

Matêwre Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwỳnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwỳr wrỳk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahiti mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

*Apraãw kanrêhã hkra nê htàmnhwỳjê nhĩxi
Rukre 3.23-38*

¹ Amnepêm Jejus Kris kormã pika hwỳr wrỳk kêt ri hkukamã higêtjê nhĩxi na jajaja.

Wỳj ri higêtjê hõ nhĩxi na pre kêp Tawi.

Nê Tawi xwỳj ri higêt nhĩxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

Nê Jako hkra na pre kêp Juta mẽ htõjaja.

³ Nê Juta hkra na pre wa kêp Pere nê Jera.

Nê Pere mẽ Jera wa katorxà na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxà na pre kêp Raap.

Ně Poas kra na pre kêp Opex.

Ně Opex katorxà na pre kêp Rutre.

Ně Opex kra na pre kêp Jese.

⁶ Ně Jese hkra na pre kêp Pahihti Tawija.

Ně Tawi hkra na pre kêp Sarumãw.

Sarumãw katorxàja Uristi hprõ na pre. Tã
nhũm pre Uristi ty nhũm Tawija hãmri
mýrpê Uristi hprõ ho hprõ ně kamã hkra.

Nhũm wa hkraja kêp Sarumãw.

⁷ Ně Sarumãw kra na pre kêp Ropã.

Ně Ropã hkra na pre kêp Apiasti.

Ně Apiasti kra na pre kêp Asti.

⁸ Ně Asti hkra na pre kêp Josapa.

Ně Josapa hkra na pre kêp Jorã.

Ně Jorã hkra na pre kêp Ojis.

⁹ Ně Ojis kra na pre kêp Jotã.

Ně Jotã hkra na pre kêp Akaj.

Ně Akaj kra na pre kêp Ejekis.

¹⁰ Ně Ejekis kra na pre kêp Manase.

Ně Manase hkra na pre kêp Amõ.

Ně Amõ hkra na pre kêp Josis.

¹¹⁻¹² Ně Josis kra na pre kêp Jekonĩs mẽ htõjaja.

Kormã mẽ htĩr ri na pre Papirõn nhõ
xwýnhjaja kot mẽ hkurê kaxàr kaxyw mẽ
hwýr hprõt ně mẽ unê. Ijaew piitã unênh
pa ně ma akupým mẽ õ pyka hwýr mẽ ho
hapêx nhũm mẽ hpãnhã Papirõn kamã pa
ho pa. Jakamã nhũm Josis mẽ hkra Jekonĩs
mě htõjaja mẽ hipêêxà pyrà ně Papirõn
kamã pa ho pa.

Ně Jekonĩs kra na pre kêp Saraxi.

Ně Saraxi hkra na pre kêp Joropape.

13 Nê Joropape hkra na pre kêp Apiux.

Nê Apiux kra na pre kêp Eriakĩ.

Nê Eriakĩ hkra na pre kêp Ajo.

14 Nê Ajo hkra na pre kêp Satok.

Nê Satok kra na pre kêp Akĩ.

Nê Akĩ hkra na pre kêp Eriux.

15 Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

16 Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jejus.

Mê kot kãm: “Tĩrtũm kot mẽ pakaxyw ãm xwỳnh” anhỹr xwỳnhnta na pre.

17 Nhũm Apraãw kanrêhã axte axpẽn kanrêhã mẽ àptàr nywjaja Tawija wỳr kêp 14. Nê Tawi nhĩrõ pê Papirõn hwỳr mẽ hapêx kêt ri axpẽn kanrêhã mẽ àptàr nywjaja mããnẽn kêp 14. Nê ra Papirõn kamã mẽ pa nhĩrõ pê axpẽn kanrêhã Jejus pê Tĩrtũm kot mẽ pakaxyw ãm xwỳnhnta wỳr mããnẽn kêp 14. ã na pre Jejus Kris xwỳj ri higêjtê nhĩxi anẽ.

Jejus Kris kator

Rukre 1.26-38, 2.1-7

18 Tã ã mẽ hixi jarênh kot anhỹr kanrêhã na pre ã Jejus Kris kator anẽ. Nhũm pre kormã Jujeja Marir o hprõ kaxyw. Nom kormã ho hprõ hkêt ri nhũm htujarô. Kormã hkukrit tã nhũm Tĩrtũm Karõ tanhmã ho nhũm htujarô.

19 Hãmri nhũm Jujeja harênh ma nê tee ri hamaxpêr nê htỳx nhãm mễhõ kot kêp htu hã hkamnhĩx. Juje kot tãm amnhĩ nhĩpêx nê tãm

hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Nà pa măn ixte htüre hã. Nhãm mêhõ ra kot ã hipêx anhÿr kênã. Nà kot paj ho ixprô hkêt nê. Nom kot paj ixkwÿjê mã ã kot amnhĩ nhĩpêx anhÿr o amnhĩrĩt kêt nê. Kot paj anê nhũm mē kuma nê ho kapêr punuj nhũm amnhĩ kamã hpijaàm tÿx nê. Ja pymaj kot paj ixkatàt kôt hkaga kurê kumrêx. Nom ixkwÿjê hkàx ã hkaga. Anê.

²⁰ Nê ã hamaxpêr anhÿrja o ra gôr nê nõ. Nhũm Tĩrtũm kapêr o mē wrÿk xwÿnhjê hõ hwÿr wrÿ nê hwÿr axàn kuri xa. Hãmri nê kãm:

—Pa Juje? E ot pa awÿr tē. Kwa tee ri Marir o aprô hkukamã ajamaxpêr punuj kêt nê. Mãmri ho aprô. Mêhõ kot apê tanhmã ho hkêt. Tĩrtũm Karõ na pre ã hipêx anê. Jakamã kwa tee ri ajamaxpêr kêt nê mãmri ho aprô nê war apa.

²¹ Koja hkrare kato nê myre nê hprêk. Hãmri nê mē kot hkôt amnhĩ xunhwÿr xwÿnhjaja mē kot amnhĩ tomnuj piitã pê mē utàr pa. Jakamã koja kato ka wa hã hixi mē nhũm kêp Jejus. Anê.

Nhũm pre ã Tĩrtũm kapêr o mē wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tĩrtũm kêp mē papytâr xwÿnh” anhÿr pyrâk. Jakamã nhũm Tĩrtũm kapêr o mē wrÿk xwÿnhja Juje ôt kãm ã kãm Marir jarênh anê.

²²⁻²³ Nom kormã ã kãm kapêr anhÿr xwÿj ri na pre ra Tĩrtũm nhÿ hã kapêr xwÿnhjê hõja kukamã tanhmã harênh to nê hã kagà. Nê hã kagà ho:

E mē inhma nê inhmar tÿx nê ho apa. Koja nhÿrmã pyka já kamã mêhõ kormã hkukrit tã htu-

jarô. Nê hkra kato nê myre. Nhũm mẽ omu nê hã hixi mẽ nhũm kêp Emanuew. Anê. Ijaew kapêr kãm “Emanuew” jarênhja te kêp “Ota ra Tirtũm mẽ pahkôt pa ho pa” anhÿr jarênhja pyràk. Jakamã nhũm pre Tirtũm nhÿ hã kapêr xwÿnhja Jejus kukamã ã harênh anê nê hã kagã.

²⁴ Jakamã nhũm Tirtũm kapêr o mẽ wrÿk xwÿnhja Juje mã kapêr par mẽ nhũm hkrãkato. Hãmri nê kot kãm ujarênh xá hkôt Marir o hprô.

²⁵ Nom kormã tanhmã ho hkêr nê ri o pa rãhã nhũm hkrareja kato. Hãmri nhũm wa hã hixi mẽ nhũm kêp Jejus nê mãânên kêp Emanuew.

2

Kanhêti ho studa xwÿnhjê jarênh

¹ Nhũm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhô xwÿnhjê ho amnhÿptar o pa ri nhũm ô pika kamã kato. Hãmri nhũm Tirtũmja kaxkwa kamã Kra kator jarênh xà hã kanhêti raxta ô nhô nhũm pika hõ kamã kanhêti ho studa xwÿnhjaja omu. Kanhêtiija pumu nê hkĩnh nê axpên mã:

—Kwa ga mẽ kanhêti raxti mũj pumu. Mãn ra Ijaew nhô pahi nywta kato nhũm kanhêti mũj kêp ho amnhÿrit xà hã ajêr. Kwa pu mẽ ma hapêr o mō nê nhÿri tokyx omu nà.

Anê hãmri nê amnhÿ to pikuprõnh pa nê ma hapêr o pa. Ma myt gjêx xá hwÿr hapêr o pa hã apkati xohtô nê. Hãmri nê ra Ijaew nhô pika hwÿr pōj nê krÿ pê Jerujarê hwÿr hapêr o mō. Pahi Eroxo nhô krÿja wÿr nhũm mẽ hapêr o mō hãmri nê kamã

pôj nê mẽ hkrare nywta ã krĩ nhõ xwỳnhjê kukjêr
o mỗ

² nê mẽ kãm:

—Pa? Ot pa mẽ apê Ijaew nhõ pahi nywreta pumunh kaxyw mỗ. Ham kator xwỳnhhta. Mẽ inhõ pika kamã na pa prem kaxkwa hkrax rũm kot ho amnhĩrĩt xà hã kanhêti raxta pumu. Hãmri nê nhỹri pahi nywre pumunh nê kutã mẽ ixkõn krã ho ixtêm nê ixkrĩ nê kãm mex o mex ã harênh kaxyw nêtãnh mẽ inhõ krĩ rũm hapêr o mỗ. Kwa mẽ inhmã harê. Nhỹri na? Na pa mẽ inhmã omunh prãm tỳx kumrêx.

Anhỹr o hã mẽ hkukjêr o mỗr jakamã nhũm mẽ piitã pahi nywja jarênh ma nê axpên mã harênh o hprõt.

³ Nhũm pahi Eroxa harênh ma nê tee ri amnhĩ kukamã hamaxpêr. Pahi nyw kot mẽ ho amnhĩptàr ã hkamnhĩx nhũm já kêp omnuj tỳx nê. Nhũm krĩ nhõ xwỳnhjaja ã hamaxpêr anhỹr ã omu nê tee ri amnhĩ kukamã hamaxpêr o ra kãm ma nê.

⁴ Hãmri nhũm pahi Eroxa amnhĩ wỳr hkwỳjê hã karõ. Mẽ õ patre krãhtũmjaja nê Tĩrtũm kapêr tũm o mẽ ahkre ho mẽ pa xwỳnhjaja nhũm amnhĩ wỳr mẽ hã karõ nê Tĩrtũm kot nhỹrmã mẽ hwỳr mênh mã xwỳnhhta ã mẽ hkukjêr kaxyw. Nê mẽ kãm:

—E Tĩrtũm kot nhỹrmã mẽ pahwỳr mênh mã xwỳnhhta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhỹrmã kator kaxyw nê nhỹri koja we kato? Xà jar mẽ panhõ krĩ kamã nà? Xà nhỹri krĩ hõ kamã? Anê.

⁵ Hãmri nhũm mẽ kuma nê kãm:

—Nà mẽ panhõ pika pê Jutej kamã koja xep kato. Krĩ pê Perěj kamãã. Na pre Tĩrtũm nhỹ hã kapêr o mẽ pa xwỳnhja ra hkukamã mẽ panhĩgêjtjê mã tanhmã harênh to nê hã kagà. Nê hã kagà ho:

⁶ Pa Perěj nhõ xwỳnhjaja? E mẽ anhõ krĩ grire htã kamã koja nhỹrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptàr mex o pa. Jakamã mẽ anhõ krĩ grire htã koja Ijaew piitã axpên mã mex ã harênh o pa.

Ã na pre Tĩrtũm kot mẽ pahwỳr mênh mã xwỳnhhta kukamã mẽ kãm harê nê hã kagà anê. Anê.

⁷ Hãmri nhũm pahi Eroxo tee ri ã harênh anhỹrja ma hãmri nê amnhĩ wỳr mẽ kot hã àhkukjêr o mõi xwỳnhjê hã karõ. Nom nhỹri Ijaew kàx ã. Hãmri nhũm mẽ ma hwỳr mra nê agjê nhũm mẽ omu nê pahi nywta ã mẽ hkukja nê mẽ kãm:

—E mẽ aprĩ hã inhmã pahi kator nywta jarê. Tanhmã na pre ra mẽ ate kanhêti pumunh ã mytwrỳ kute? Xà ham na ka prem omu nà amnepê mã? E mẽ aprĩ hã tanhmã inhmã harênh to. Anê.

Hãmri nhũm mẽ ihõja kãm:

—Nà na ra hã amgrà axkrut kaxyw. Na pa prem omu hãmri nê inhnojarêr nê man ixpa hõ ixpa ry rax nê mẽ awỳr pøj. Anê.

⁸ Nhũm mẽ kuma nê mẽ kãm:

—Tỳ. Nom jar amrakati. Perěj kamã na xep kato. E mẽ mãmrĩ ma hwỳr mõi nê kamã hapêr. Hãmri nê nhỹri omu nê akupỹn ixwỳr mõi nê inhmã harê. Pa ijaxwỳja ma hwỳr mõi nê omu nê mẽ apyrà nê kãm mex o mex ã harê. Ijaxwỳja inhmã omunh prãm tỳx kumrêx. Anê.

Nom hêx rom ã ri mẽ kãm kapêr anê. Kot nhỹri harênh mar nê hã àmnênh nhũm mẽ kot hpĩr kaxyw nhũm hêx rom ã kãm omunh prãm tỳx ã amnhĩ jarênh anê.

⁹⁻¹⁰ Jakamã nhũm mẽ kuma hãmri nê kato nê ma Perêj wỳr mōr kurê kumrêx. Hãmri nê kormã mẽ õ pika kamã mẽ pa ri kanhêti ho studa xwỳnhta nhũm mẽ axte amnhĩ kukamã omu nê hkĩnh nê. Nhũm ma Perêj wỳr mẽ hkukamã mō nhũm mẽ omunh pê ma hkôt pa rãhã hwỳr pōj. Nhũm kanhêtiya pahi nywre nhōrkwỹ mỳri ajêt.

¹¹ Jakamã nhũm mẽ ma hkôt mra nê ixkreja wỳr pōj nê kapem xa. Hãmri nê mẽ kãm kapêr nê mẽ hwỳr agjê nê Jejus mẽ katorxàja wa omu. Hãmri nê Jejus kutã hkōn krã ho hkrĩ hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhỹrmã axaptàr hãmri nê apê mẽ inhō Pahi Maati. Nà ãm hãmri na pa mẽ apumu nê ixkĩnh nê. Anê.

Hãmri nê ahpỹnhã kãm hkĩnh xà gō. Kãm ôr kwỹ gō nê kãm mēhkuxwa xà hkwỹ gō nê kãm te kot ràmre kuxware pyræk pê mĩraja nhũm mẽ kãm hkwỹ gō. Mẽ hkĩnh xà hã kàxpore xohtô nhũm prem kãm òr pa.

¹² Hãmri nê ra akupỹm Jerujarê kamã pahi Erox wỳr nojarêt. Nhũm kamàt nhũm mẽ gōr nê hikwỹ hãmri nê ra amỹti. Nhũm Tĩrtũm mẽ hpimtir kãm mẽ kãm kapêr nê mẽ kãm:

—Pa? E mẽ inhma. Kêr ka mẽ akupỹm pahi Erox wỳr amrar nê kãm mẽ hkrata jarênh kêt nê. ãm kwarĩ ho kwarĩ. Nê kêr ka mẽ pry hō hã mãn ma mẽ anhō pika hwỳr akupỹm apa ho apa.

Anhÿr o mẽ kãm kapêr jakamã nhũm apkati nhũm mẽ kànhmã hkrĩ hãmri nê Tĩrtũm kot mẽ kãm hã karõ xà hkôt ma akupÿm mẽ õ pika hwÿr pa kurê kumrêx nê akupÿm pahi Erox wÿr mrar kêt nê.

*Juje mẽ hprõ wa kot Erox pymaj ma Jesus o mõi
Apokariþ 12.1-6, 12.13-18*

¹³ Tã nhũm kanhêti ho studa xwÿnhjaja ma akupÿm hapêx hãmri nhũm Tĩrtũm axte Marir mjên Juje hwÿr kapêr o mẽ wrÿk xwÿnhjê hõ mẽ. Nhũm kê axte hpimtir kãm hwÿr wrÿ nê kãm kapêr nê kãm:

—Pa Juje. E kwa kànhmã nhÿ. Na ra pahi Eroxja aprõ pê hkrata ã amÿnê. Kojã tokyx pôristi hkwyjaja mẽ anhõ krĩ hwÿr pøj nê war apê hpĩr kaxyw ri hapêr. Jakamã kwa wa tokyx akato nê ma pika pê Ejit wÿr amõi kurê kumrêx. Nê Ejit kamã apa rãhã pa nhÿrmã akupÿn amnê war amê. E kwa tokyx. Anê.

¹⁴ Hãmri nhũm kuma nê kànhmã nhÿ nê Marir mra nê war amnhĩ to akuprõ nê ra nojarêt. Hãmri nê krĩa pê Jesus o kato nê ma o mõi kurê kumrêx. Wa mõi ryy nê hãmri nê Ejit wÿr pøj nê kamã pa ho pa.

¹⁵⁻²⁰ Rôm nhũm pahi Erox tee ri amnhĩ wÿr kanhêti ho studa xwÿnhjê kamã hamak o pa nom nhũm mẽ akupÿm hwÿr mrar kêt nê. Jakamã nhũm mẽ kamã gryk nê hamaxpêr o:

—Tk. Kwa nà. Na mẽ ãm inhmã hêx nê akupÿn ixwÿr mrar nê nhÿri inhmã pahi nywta jarênh kêt nê. Nà kwãr mẽ mãmrĩ ã inhĩpêx anê. Mẽ kot ixpê ho hpimxuure kaxyw ã. Nà kot paj mẽ kêp kupĩ nhũm mẽ rĩ amnhĩ pumu. Na xep prem kanhêti

kot harênh xàja pumunh ã ra hã amgrà pyxi nê hkôt mytwrÿ kêp 6. Jakamã mãn mẽ hkrata ra hã amgrà axkrut kaxyw. Nà na pa ra ijamxpêr. Kot paj Perêj kamã mẽ hkra myjaja ra mẽ hã amgrà axkrut xwÿnhjaja nê kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pah nywta pĩ. Nà ixte hpĩr mã kênã. Koja hprêk nê ixpãnhã Ijaew o amnhĩptàr kêt nê.

Anhÿr o hamaxpêr hãmri nê amnhĩ wÿr õ pòristi hkwyjê hã karõ nê mẽ kãm mẽ hkrajê hã amÿnê nê mẽ kãm:

—E kêt ka mẽ ma Perêj wÿr mra nê kamã mẽ kêp mẽ hkra myrejaja ra mẽ hã amgrà axkrut xwÿnhjê nhĩmex pa. Nê kormã mẽ hã amgrà axkrut kêt xwÿnhjaja mãânên mẽ himex par kumrêx. Nê Perêj pu hã ri krĩ hkryre hkôt mãânên ri ajapøj nê ã mẽ himex par anê. Anê.

Hãmri nhũm mẽ kuma nê ma mẽ hwÿr mrar kurê kumrêx. Hãmri nê Perêj wÿr pøj nê mẽ kêp mẽ hkra myre piitã mẽ himex pa. Jakamã nhũm mẽ katorxà nê mẽ hipêêxàjaja tee ri mẽ hkra htyk xwÿnhjê pumu nê hkaprĩ htÿx nê mÿr rÿnh nê. Nom na pre Tirtũm nhÿ hã kapêr jarênh o mẽ pa xwÿnh finat Jeremĩstija ra amnepêm ã mẽ kot amnhĩ nhĩpêx anhÿrja kukamã mẽ panhĩgêjtê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhũm mẽ panã Rrakewja te ra kot tee ri ja hã mẽ omunh nê tanhmã amnhĩ nhĩpêx to pyræk nhũm Jeremĩstija tanhmã Ijaewjê jarênh to nê hã kagà. Nê hã kagà ho:

Amnepêm Perêj kamã na pre mẽ panã Rrakewja
hpijagri ho nørja ã ra htyk kaxyw nê tee ri

hkra kator mã xwýnhta kukamã hamaxpêr nê mÿr o nõ. Nhũm hkwyjaja tee ri akupÿm tam hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urak nê tee ri mẽ hkrare ho hamak xaj mÿr o pa. Mẽ kot mẽ kêp utar nê mẽ himex par jakamã nhũm mẽ tee ri mẽ ho hamak xaj mÿr o pa. Anẽ.

Nhũm pre finat Jeremĩsja mẽ hkukamã ã mẽ harẽ nê mẽ hã kagà anẽ. Tã ra jarãhã mẽni piitã Rrakew pyrà nê hkrajê o hamak xaj mÿr o pa.

*Wa kot akupÿm wa õ pika hwÿr Jejus o mõi
Juãw 7.41-42*

Tã nhũm mytwrÿ grêre nê hapêx nhũm pahi Eroxy ty. Jakamã nhũm kamat nhũm Jujeja gõi nê nõ. Nê kê õt kãm axte amÿti. Nhũm Tĩrtũm kapêr o mẽ wrÿk xwýnhja axte hwÿr wrÿ nê kãm:

—Pa Juje? E na ra Marir pẽ hkra pĩr mã xwýnhta ty. Jakamã kwa wa mãmrĩ ma akupÿm mõi. Ma akupÿm mẽ apẽ Ijaewjê nhõ pika hwÿr axãmnhĩx aprõ mẽ hkrata wa o mõi.

Anhÿr o kãm kapêr. Na pre ra amnepêm Tĩrtũm nhÿ hã kapêr o mẽ pa xwýnhjê hõja ja kukamã mẽ panhĩgêttjẽ mã ja jarẽ nê hã kagà. Nê hã kagà kot: “Ixpê Tĩrtũm kot paj nhÿrmã Ejit rũm ma akupÿm õ pika hwÿr ixkrata wa mẽ kumẽ.” Anhÿr o kot hkukamã harẽnh nê hã kagà.

²¹ Jakamã nhũm Tĩrtũm kapêr o mẽ wrÿk xwýnhja ã Juje mã karõ anẽ hãmri nhũm kuma nê mã akupÿm wa o mõi. Ma akupÿm mẽ õ pika hwÿr wa o mõi.

22 Tã ra akupÿm hpôx kaxyw htêp o mō. Hãmri nê pahî Erox kra Akêrawja ra hipêêxà mÿr pê kot Jutej kamã mē ho amnhĩptàr hã harēnh ma. Hãmri nê tee ri mē amnhĩ kukamã hamaxpēr nê kãm mē hwÿr wa o mōr pyma nē.

Tã nhũm kamàt nhũm Juje ra gōr nē nō nē kê axte amÿti. Nhũm kê axte Tĩrtũm kapēr o mē wrÿk xwÿnhja hwÿr wrÿ nē akupÿm ò pika hkwȳ pê Jutej wÿr mōr nē wa mē hkurê nē kãm:

—Pa Juje? E kêr ka Jutej wÿr wa mē amōr kêt nē. Pãnhã nhãm mē anhō pika hō hwÿr mãn mō nē kamã ri apa.

Anē nhũm kuma nē hpãnhã wa mē ma mē ò pika hkwȳ pê Garirej wÿr wa mē juk nē ma mō.

23 Nē kamã pōj nē krĩ pê Najare hwÿr mō nē kamã amnhĩm òrkwÿ nhĩpêx nē kamã wa mē pa ho pa. Nhũm pre ra amnepêm Tĩrtũm nhÿ hã kapēr o mē pa xwÿnhjê hōja ra ã mē kot amnhĩ nhĩpêx anhÿrja kukamã mē panhĩgêtjê mã mē harē nē hã kagà. Nē hã kagà kot:

Tĩrtũm kot mē pahwÿr mēnh mã xwÿnhhta koja kêp Najare nhō xwÿnh. Anē.

3

*Juãw Paxis kot Tĩrtũm kapēr jarēnh o pa
Makre 1.1-6; Rukre 3.1-14; Juãw 1.19-23*

¹ Nhũm pre Juãw Paxisja ã amnhĩ nhĩpêx anē. Nē pika pê Jutej kamã mē kãm Tĩrtũm kapēr jarēnh o pa. No ãm krĩm pa hkêt nē. ãm mē hpu hã krĩ pê amÿm ri kapôt ã ri mē kãm Tĩrtũm kapēr jarēnh o pa.

2-3 Tĩrtũm nhỹ hã kapêr o pa xwỳnh finat Ijais ra kot Juãw kukamã mẽ panhĩgêjtjê mã tanhmã harênh to nê hã kagà xá hkôt. Na pre hkukamã hã kagà ho:

Koja nhỹrmã mēhõ mōn pōj. Kapôt ã mōn pōj nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tĩrtũm tokyx mẽ pahwỳr mẽ panhõ Pahihtija mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mēhõ kutêp pry ho mexta pyrã nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỹr o ri apa.” Anhỹr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kôt nhũm Juãw Paxisja mōn pōj. Hãmri nê Ijais kot hkukamã harênh xà hkôt kapôt ã ri mẽ kãm ujarênh o pa nhũm mẽ kãm mar prãm xwỳnhjaja ma hwỳr mra. Nhũm mẽ kãm kapêr nê mẽ kãm:

—E koja Tĩrtũm tokyx kot mẽ pakaxyw ãm xwỳnhja o amnhĩrĩt. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhỹr o Jejus kutêp mẽ kãm kapêr o pa.

4 Juãw Paxisja hikàxpore hkêt jakamã na pre ê mex kêt nê pa. ãm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽõ mex kur kêt nê ãm krit ku nê menh ôr o ri pa.

⁵ Jakamã nhũm kapôt ã ri mẽ kãm Tĩrtũm kapêr jarênh o pa nhũm mẽ kot mar kaxyw ma hwỳr mra. Pika pê Jutej kamã ri mẽ pa xwỳnhjaja. Nê Jutej kamã krĩ pê Jerujarê nhõ xwỳnhjaja. Nê pyhti pê Jotãw mỳri mẽ pa xwỳnhjaja. Nhũm prem piitã harênh ma nê kot mar kaxyw ma hwỳr mra.

⁶ Hãmri nê kapêr ma nê Tĩrtũm noo mã mẽ kot amnhĩ tomnuj xwỳnh ã kãm amnhĩ jarê. Mẽ kot amnhĩ tomnuj kaga nê tam amnhĩ nhĩpêx o pa hprãm xàj ã kãm amnhĩ jarênh anê. Nhũm Tĩrtũm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tĩrtũm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

⁷ Tã nhũm Parijew mẽ Satusew nhõ xwỳnhjaja mããnên mẽ hkôt ma Juãw Paxis wỳr mra. Mẽ uràk nê mẽ kêp Ijaew jakamã haxwỳja Juãw Paxis kot mẽ hkrã kumrãr kaxyw ma hwỳr mra. No ãm hkwyjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. ãm amnhĩ krã hkôt hkwyjê hkôt hwỳr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhỳrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nê? Nà koja já kãm mex kêt nê. Koja ja mỳrapê nhỹrmã tanhmã mẽ atomnuj tỳx to ka mẽ tee ri umaj apimxur prãm kaprỳ.

⁸ Na htem amnhĩ tomnuj kaga nê tãm amnhĩ nhĩpêx nê tam axpên nhĩpêx. Jakamã e kwa mẽ

ã amnhĩ nhĩpêx o apa anê pa rĩ kormã mẽ akrã kumrã.

⁹ Na ka htem atỳx ri ajamaxpêr o: “Mẽ ixpê finat Apraãw kanrêhã htàmnhwỳ hkwy na pa mẽ. Jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhỳr o atỳx ri amnhĩ kukamã ajamaxpêr. Nom ja kot anhỳr kêt. Mẽ apê Apraãw kanrêhã htàmnhwỳ htã mẽ ate urak nê tãm amnhĩ nhĩpêxre hã. Kot kaj mẽ apê htàmnhwỳ htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwỳ pix pyrak.

¹⁰ Na ra Tĩrtũm mẽ ate amnhĩ tomnuj mỳrapê tanhmã mẽ ato kaxyw. Te ho mẽhõ nhõ mẽmo hpàr ô hkêt nhũm kot tee ri omunh nê krãhyr nê kuwy kamã mẽnh nê ho kaxàr par pyrak o koja mẽ anhĩpêx. Jao amnhĩ nê kuwy hwỳr mẽ arê ka mẽ kamã amnhĩ xà htỳx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwỳnhjê mã kapêr anê.

¹¹ Hãmri nê hpãnhã axte mẽ kot mar kaxyw hwỳr mẽ mrrar xwỳnhjê mã kapêr nê mẽ kãm:

—E ra mẽ ate amnhĩ tomnuj kaga xwỳnhjaja. Na pa Tĩrtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tĩrtũm kot mẽ pakaxyw ãm mã xwỳnhhta tãm mẽ pahwỳr pôj. àhpumunh tỳx o kot ijakrenh par jakamã na pa hte ãm kukwak ri ixpa nê amnhĩ tã hã ixpijaãm o ri ixpa. Koja mẽ awỳr Tĩrtũm Karõ rê nhũm mẽ akarõ mã agjê. Ka mẽ ÿ hã tam amnhĩ nhĩpêx o ri apa. Nom kormã mẽ kot tãm amnhĩ nhĩpêx

kêt xwÿnhjaja koja Tirtûm kot mẽ pahwÿr mẽnh xwÿnhja ja hã mẽ omu nẽ mẽ hipêx o te kuwy kot mẽmoj to kaxàr par pyràk o mẽ hipêx.

¹² –Na htem pur kãm harôj nhîkẽ nẽ ho grà nẽ hpãnhã kahtwÿ. Nẽ kahuk pa hãmri nẽ hkapĩ nhũm kôk apê nẽ pryhka ho htor pa. Nhũm mẽ hpãnhã hy ho pa nẽ ixkre kamã gôj kãm unhwÿ. Ja pyrà nẽ koja tokyx Tirtûmja mẽ piitã mẽ kot tanhmã amnhĩ nhîpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhĩ nhîpêx o mẽ pa xwÿnhjaja koja ma amnhĩ wÿr mẽ ho api nhũm mẽ kuri mex rãhã nẽ pa ho pa. No mẽ kot amnhĩ tomnuj rãhã ho mẽ pa xwÿnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wÿr pa nẽ kamã amnhĩ xà htÿx kamã hamak rãhã nẽ pa ho pa.

Anhÿr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

¹³ Tã nhũm Jejus pika pê Garirej rûm kato nẽ ma Juãw Paxis wÿr mõi. Juãw kot pyhti pê Jotãw kamã hkrã kumrãr kaxyw ma hwÿr mõi. Hãmri nẽ omu nẽ kãm:

–Pa. E ot pa awÿr amnhĩ to tẽ. Ate mẽ kuxwar ixkrã kumrãr kaxyw. Anẽ.

¹⁴ Hãmri nhũm tee ri kuma nẽ kãm:

–Kwa nà. Aa ate amnhĩ tomnure hã kot pa kêt ri akrã kumrã. Nà ka kot kaj ixkrã kumrã. Anẽ.

¹⁵ Hãmri nhũm kãm:

–Kwa nà. Mãmri ixkrã kumrã Juãw Paxis. Tirtûm kãm ja prãm kênã kot ka kêt ri axtem nẽ ixkaga. Kot puj mẽ Tirtûm kãm hprãm xà hkôt tanhmã amnhĩ nhîpêx to ho ri papa. Anẽ.

Hãmri nhũm kuma nẽ kãm:
—Tôe. Nà kot paj akrã kumrã. Anẽ.

¹⁶ Hãmri nẽ pyhti hwÿr o wrÿ nẽ kamã hkrã kumrã. Hãmri nẽ wa akupÿm api nẽ gô mÿ ri ãm rãhã nhũm kaxkwa axkjê. Hãmri nhũm kurũm Tĩrtũm Karõja Jejus wÿr te tuuti pyrã nẽ ahpar mã hwÿr wrÿk o tẽ nẽ ĩkre hã xa. Nhũm Jejus arĩ amnhĩ wÿr wrÿk o htẽm kãm omunh o xa.

¹⁷ Hãmri nhũm Tĩrtũm kaxkwa rũm kãm kapêr nẽ kãm:

Pa? E apê ixkra mex na ka. ãm hãmri na ka hte ixkanrêhã ã amnhĩ nhĩpêx mex anẽ. Inhmã ajapê kamã na ka ri apa ho apa. Anẽ.

4

*Satanasti tee kot amnhĩ tã Jejus kamã hamak
Makre 1.12-13; Rukre 4.1-13; mããnẽn Eprêw
2.18, 4.15*

¹ Tã nhũm Jejus Tĩrtũm Karõ nhÿ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa.

² Ri pa hã apkati xohtô nẽ. Ra hã arĩgro pê 40. Nẽ kormã apkur kêt jakamã ra kãm prãm tÿx kumrêx nẽ ri pa.

³ Hãmri nhũm Satanastija nhÿhÿnh hwÿr tẽ nẽ hêx rom kãm kapêr nẽ kãm:

—Pa. E kwa mãn ka ra amã prãm tÿx nẽ nà? Nom xep apê Tĩrtũm Kra jakamã apê mẽmoj hihtÿx kêt. Tĩrtũm pyrã nẽ axàhpumunh o axàhpumunh kênã. Jakamã kwa kên nhĩkwÿ mÿj mã anẽ kê amã pãwti hã amnhĩ jahkre ka aku nẽ tokyx ho amnhĩ xihtÿx. E kwa tokyx kãm akapêr. Anẽ.

⁴ Hãmri nhũm kuma nẽ kãm:

—Tk. Nà kot paj amar xà hkôt ã ri amnhĩ nhĩpêx anhÿr kêt nê. Koja Tĩrtũm kãm inhmã mẽmoj nhõr prãm nê inhmã mẽmoj gõ pa rĩ kormã kukrê. Kapêr ã kagà htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãânên Tĩrtũm kapêr ma nê hkôt amnhĩ nhĩpêx nê htĩr nê pa. Anê.

—Ã kapêr ã kagà kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwÿr o mō. Nê Tĩrtũm mã amnhĩ jarênh xà hã ixkre hprêk nhĩmōk wÿr ho api nê kÿxpê hatur xà hã ãm nhũm xa. Hãmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

⁶ —E apê Tĩrtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêêxàja apumunh mex nê ka tanhmã amnhĩ to hkêt nê. Kapêr ã kagà htũm kot harênh kot:

Tĩrtũm koja kapêr o wrÿk xwÿnh kwÿjê mã ajarê ka ajarĩ nê ahpar mã tẽ nhũm mẽ kÿx pê amÿ nhũm mẽmoj akà hyr kêt nê. Anê.

—Ã kapêr ã kagà htũm kot ajarênh anhÿr jakamã e tokyx ajarĩ. Anê.

⁷ Hãmri nhũm Jejus kuma nê kãm:

—Tk kot paj ri ate inhmã karō xàja kôt ã amnhĩ nhĩpêx anhÿr kêt nê. Koja Tĩrtũm tãm inhmã ijarĩ hã karō pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tĩrtũm kapêr ã kagà htũm kot ja jarênh kot:

Kêr ka mẽ amnhĩ krã hkôt amnhĩ tâ ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê. Anê.

—Ă kot ja nê kapêr kot anhÿr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tĩrtũm tãm kot inhmã ã ixte amnhĩ nhĩpêx anhÿr ã karõre hã. Anê.

⁸ Hãmri nhũm Satanasti tee ri kuma nê hpãnhã ma nhÿri kên prêêti hwÿr o tẽ nê himõk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhũm kãm ahkre ho xa. Kàxpore nê mẽmoj mex piitã nhũm kãm ahkre nhũm Jêjus piitã omunh o xa.

⁹ Hãmri nhũm kê Satanasti axte kãm:

—E mãn ka kam ri mẽmoj mex mũj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mẽmoj piitã ho anhõ nê ho amnhĩptàr o apa. Jakamã e kwa tokyx. Anê.

¹⁰ Hãmri nhũm kuma nê axte kãm kapêr nê kãm:

—Tk kwa ma nhÿhÿm tẽ Satanasti. Kot paj ri amã amex o amex ã ajarênh kêt kumrêx. Tĩrtũm kapêr ã kagà htũm kot ja nê kapêr kãm hihtÿx kênã. Kápêr kot:

Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhĩpêx anhÿr o ri apa.

—Anhÿr o kot hã karõ jakamã kot paj amã amex o amex ã ajarênh kêt kumrêx. Anê.

¹¹ Hãmri nhũm tee ri amnhĩ tâ kuma hãmri nê ma tẽ. Tee ri kãm kapêr kaprÿja ã amnhĩ pumu hãmri nê hkaga nê ma tẽ. Hãmri nhũm Tĩrtũm kapêr o mẽ

wryk xwÿnhjaja Jejus wÿr wry ñe tanhmã ho mex to ñe kãm õ nhũm kukrẽ ñe akupÿm hihtÿx.

*Jejus kot Garirej kamã kapêr o pa
Makre 1.14-15; Rukre 4.14-15*

¹² Tã nhũm Juãw Paxisja mẽmoj tã pahi Erox mã akir nhũm amnhĩ tã kuma ñe gryk xaj haxà nhũm hkrĩ ho hkrĩ. Hãmri nhũm Jejusja harênh ma ñe ma akupÿm Garirej kamã krĩ pê Najare hwÿr ma akupÿm tẽ.

¹³ Hãmri ñe ra pøj nom kamã ri pa hkêt ñe. Nẽ hpãnhã kurũm kato ñe ma krĩ pê Kapanaũ hwÿr tẽ. Gõ rax pê Garirej mÿri na pre. Pika hkwÿ pê Jepurõ mẽ Natari wa mẽ kamã na pre nhũm Jejus ma hwÿr tẽ. Hãmri ñe kamã pa.

¹⁴ Nhũm ra amnepêm Tirtũm nhÿ hã kapêr jarênh o mẽ pa xwÿnh finat Ijaisja Jejus kukamã ra mẽ panhĩgêjtjê mã ã kot amnhĩ nhĩpêx anhÿr ã harẽ ñe hã kagà. Jejus kot ã mẽ hwÿr mõi anhÿrja kukamã nhũm pre harẽ ñe hã kagà.

¹⁵ Pika hkwÿ kamã mẽ pa xwÿnhjaja nhũm pre mẽ hkukamã mẽ harênh mex ñe. Nẽ pika pê Garirej kamã mẽ pa xwÿnhjaja nhũm pre mãänẽn mẽ hkukamã mẽ harẽ. Nẽ pyhti pê Jotãw mẽ gõ xujanãr wa hkaêx kãm pika piitã kamã mẽ pa xwÿnhjaja. Nẽ krĩ pê Garirej kamã mẽ kêp Ijaew kêt xwÿnhjaja nhũm pre mãänẽn mẽ harẽ. ã na pre finat Ijaisja mẽ hkukamã Tirtũm nhÿ hã mẽ piitã mẽ harẽ ñe hã kagà anẽ. Jejus kot ma mẽ hwÿr mõi rja kukamã nhũm ra hprĩ hã harẽ ñe hã kagà. Nẽ hã kagàja o:

¹⁶ E. Kot paj mẽ amã mẽmoj mex jarẽ ka mẽ inhma.
Mẽ ate Tirtũm pumunh kêt jakamã te mẽ ate

kamàt kô kamã ri apa pyræk. Tã koja Tĩrtũm mẽ amã amnhĩ to amnhĩrĩt ka mẽ hpãnhã te mẽ ate hirã kamã ri apa pyræk o amnhĩ nhĩpêx nê ra hkôt amnhĩ xunhwỳ.

Anhỹr o mẽ hkukamã mẽ harê nê hã kagà.

¹⁷ Tã nhũm ra kot hkukamã mẽ kãm ujarênh xà hkôt nhũm Jejusja mẽ hwỳr mỗ nê mẽ kãm Tĩrtũm kapêr jarênh o ri mẽ hkôt pa. Nê mẽ kãm tanhmã amnhĩ jarênh to ho pa. Nom kormã hprĩ hã mẽ kãm amnhĩ jarênh kêt nê. Te ho nhãm mễhỗ jarênh pyræk o mẽ kãm amnhĩ jarê nê mẽ kãm:

—E na ra Tĩrtũmja kot mẽ akaxyw ãm xwỳnhta mẽ nhũm mẽ awỳr wrỳ. Jakamã kwa mẽ tokyx tee ri ate amnhĩ tomnuj ã amnhĩ pumu nê ã ate amnhĩ nhĩpêx anhỹr kaga nê hpãnhã Tĩrtũm kôt mãn amnhĩ nhĩpêx o ri apa.

Anhỹr o mẽ kãm kapêr o pa pê mẽ ahkre ho ri mẽ hkôt pa.

*Jejus kot amnhĩ wỳr tep pynênh xwỳnhjê hwỳr
Makre 1.16-20; Rukre 5.1-11*

¹⁸ Tã nhũm Jejus ma gô rax pê Garirej mỳ ri pa nê gôx kãm ja wa omu. Simãw Pêtre mẽ htỗ Andreja nhũm wa gôx kãm kryhti rênh o wa xa. Hãmri nhũm Jejus wa hwỳr tễ nê wa omu nê amnhĩ kôt wa kuwỳ nê wa kãm:

¹⁹ —Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mễ kot war amar nê ra ixkôt amnhĩ xunhwỳr kaxyw. Anê.

²⁰ Hãmri nhũm wa kuma nê kryhti re nê wa ma hkôt htêm kurê kumrêx.

21 Hāmri nhũm mẽ ma nhãm axte mō nẽ ra jajê hwỳr kato. Jepetew mẽ hkra Xiakre mẽ Juãwja nhũm wa mẽ hwỳr kato. Nhũm mẽ õ pàr kãm kryhti ho mex o wa mẽ nhỹ. Hāmri nhũm mẽ hwỳr mra nhũm Jejus amnhĩ kôt ja wa kuwỳ nẽ wa kãm:

—Pa Xiakre mẽ Juãw. E wa ma ixkôt mãn wa apa. Anẽ.

22 Hāmri nhũm wa kuma nẽ hipêêxà mã amnhĩ jarẽ nẽ ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

23 Tã nhũm Jejus Garirej kamã Ijaew mã Tĩrtũm kapêr jarênh o pa. Na pre hte Tĩrtũm kapêr o mẽ ahkre xà hã ixkre hwỳr agjê nẽ kamã mẽ kãm Tĩrtũm kapêr jarênh o hkrĩ nẽ mẽ kãm:

—E mẽ tee ri ate amnhĩ tomnuj ã amnhĩ pumu nẽ hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anẽ nhũm ja hã mẽ apumu nẽ mẽ ato hkra kurê kumrêx. Anẽ.

Hāmri nẽ akupỹm mẽ kãm mẽ à xwỳnhjê ho mex. Ahpỹnhã tanhmã mẽ à kute xwỳnhjaja nhũm akupỹm mẽ ho mex o pa.

24 Jakamã nhũm mẽ piitã pikaja kamã ri axpẽn mã harênh o hprõt. Nẽ pika pê Sir kôt mãânẽn ma ri axpẽn mã harênh o hprõt. Nhũm mẽ piitã harênh ma nẽ ma hwỳr mẽ à xwỳnhjê ho mra. Ahpỹnhã ri tanhmã mẽ à kute xwỳnhjaja. Mẽ à htỳx xwỳnhjaja. Nẽ mẽ ĩ kamã mẽ htyk xwỳnhjaja. Nẽ mẽ hkrã pipãnh xwỳnhjaja. Nẽ mẽkarõmnuti kot Satanasti nhỹ hã tanhmã ri mẽ ho xwỳnhjaja. Nhũm prem mẽ hamỳ nẽ ma Jejus wỳr mẽ o mra nhũm mẽ omu nẽ akupỹm mẽ ho mex pa.

²⁵ Jakamã nhũm mẽ ohtô nẽ ma hkôt pa. Krĩ pê Garirej rũm nẽ Tekap rũm nẽ Jerujarẽ rũm nẽ pika pê Jutej rũm. Nẽ pyhti pê Jotãw nhĩkjê rũm mẽ pa xwýnhjaja. Nhũm mẽ ã ohtô nẽ ma Jejus kôt omunh o pa anẽ.

5

Jejus kot tanhmã mẽ ahkre hto

Rukre 6.20-23

¹ Nhũm Jejus amnhĩ kôt ri mẽ kot omunh o mẽ pa xwýnhjê pumu hãmri nẽ mẽ ahkre kaxyw ma tẽ nẽ hixêt ã api nẽ himõk ã nhỹ. Hãmri nhũm mẽ ma hkôt mra nẽ pu hã hkrĩ pa.

² Hãmri nhũm mẽ ahkre nẽ mẽ kãm:

³ E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ wa inhmã ajamaxpêr to nẽ ajamaxpêr o: “Koja Tĩrtũm inhĩhkô hã pa hkêt pa ixtýx ri tanhmã amnhĩ tomnuj to ho ri ixpa rãhã ho ri ixpa.” Anhỹr o ajamaxpêr. Hãmri nhũm Tĩrtũm ã ajamaxpêr anhỹr ã apumu nhũm ja kãm mex nẽ. Hãmri nhũm apê hkra hã ato mex nẽ atãnopxar o akôt pa ho pa ka ajamakêtkati nẽ axãmnhĩx akĩnh nẽ ri apa.

⁴ Nẽ kot ka mẽ atõ tanhmã amnhĩ tomnuj to. Hãmri nẽ tee ri ja hã amnhĩ pumu nẽ apijaàm nẽ akaprĩ nẽ. Nẽ akaprĩ xàj amýr o nhỹ. Amýr rax nẽ. Hãmri nhũm Tĩrtũm ja hã apumu nhũm ja kãm mex nẽ. Jakamã nhũm anê akaprĩ hta nẽ ato mex nẽ ka ajamakêtkati nẽ axãmnhĩx akĩnh nẽ ri apa.

⁵ Nẽ kot ka mẽ atõ agryk tokyx anhỹr kêt nẽ. Nẽ kritpêm amnhĩ tã amã mẽ hkaprĩ ho ri apa.

Hāmri nhūm Tīrtūm ja hā apumu nhūm ja kām mex nē. Hāmri nhūm ato mex nē ka ajamakêtkati nē axàmnhīx akīnh nē ri apa.

⁶ Nē kot ka mē atō amā Tīrtūm kām hprām xà hkôt amnhī nhīpêx o ri apa hprām nē. Nhūm amnhī tā apumu nhūm ja kām mex nē. Hāmri nhūm ato mex nē tanhmā akrā hto ka hkôt pix mā amnhī nhīpêx o ri apa. Jao ajamakêtkati nē axàmnhīx akīnh nē ri apa.

⁷ Nē mē kamā mē axukaprī ho ri apa xwýnhjaja na hte Tīrtūm ja hā mē apumu nhūm ja kām mex nē. Jakamā na hte mē hā mē apyrà nē mē akamā ukaprī ho pa. Jao mē ato mex nē ka mē ajamakêtkati nē axàmnhīx akīnh nē ri apa.

⁸ Nē kot ka mē atō ã ajamaxpēr anē nē ajamaxpēr o: “Nà kot paj ãm Tīrtūm kapēr kôt pix mā ri amnhī nhīpêx o ri ixpa. ãm ja pix na inhmā hprām.” Anhýr o ajamaxpēr. Hāmri nhūm Tīrtūm amnhī tā mē apumu nē mē ato mex nē. Ka mē ajamakêtkati nē axàmnhīx akīnh nē ri apa. Nē nhýrmā Tīrtūm wýr api nē kuri amex rāhā apa ho apa.

⁹ Nē kot ka mē atō mēhō wa kot axpēn kutā amnhī xām xwýnhhta axpēn tā wa omu nē wa kot tanhmā axpēn nhīpêx tota nē tanhmā wa kām akapēr to nē akupým tām wa ãm. Hāmri nhūm Tīrtūm ja hā apumu nhūm ja kām mex nē. Nē apē hkra hā ajarē ka ajamakêtkati nē axàmnhīx akīnh nē ri apa.

¹⁰ Nē koja mēhō mē ate Tīrtūm kapēr mar xà hkôt amnhī nhīpêx o apa hā mē apumu nē hā tanhmā mē anhīpêx kati hto. Tā nom koja

Tirtûm arî mẽ ato mex nê. Mẽ apê hkra jakamã mẽ kot tanhmã mẽ anhîpêx hto htã ka mẽ ajamakêtkati nê axàmnhîx akînh nê ri apa.

11-12 —Kwâr mẽ mãmri ixtã mẽ ato kapêr rý mẽ ato hêx rý tanhmã ri mẽ atomnuj to. Kwâr mẽ mãmri ã mẽ anhîpêx anê. Nom kêr ka mẽ arî amnhî kaxyw inhmã ajamexpêr tÿx rãhã pê ajamakêtkati nê axàmnhîx akînh nê ri apa. Kwâr mẽ mãmri ixtã ã mẽ anhîpêx anê nê mẽ amex kêt ã mẽ ajarê. Amnepêm na prem ã Tirtûm nhÿ hã kapêr jarênh xwÿnhjê nhîpêx anê. Jakamã koja mẽ urak nê ã mẽ anhîpêx anê. Hãmri nhÿm Tirtûm ja hã mẽ apumu nê amnhîm mẽ amex ã mẽ ajarê. Hãmri nê nhÿrmã kaxkwa kamã wa inhõ krî kamã mẽ ato mex nê. Jakamã kêr ka mẽ ã amnhî kukamã ajamexpêr anhÿr pê mãmri akînh nê ajamakêtkati nê axàmnhîx ri apa. Kwâr mẽ mãmri ã wa ixtã mẽ anhîpêx anê. Anê.

*Jejus krajaja te kot kaxwa mẽ kanê hpôk wa urak
Makre 9.49-50; Rukre 13.34-35*

13 Nhÿm Jejus arî mẽ kãm kapêr nê mẽ kãm:

—Nê mẽ ate ixkôt amnhî xunhwÿr xwÿnhjaja te mẽ ate kaxwa pyrak. Kaxwaja mẽ apkur xà ho ành mã mex. No koja mêmhõ tèn kamã pika hkwy mẽ nê ho ahkà. Hãmri tanhmã kot wem ho nê akupÿm ho mex? Nà koja akupÿm mex kêt nê. Âm mẽ kot hkapîr pix kaxyw koja mex. Ja pyrã nê kot ka mẽ atõ ate inhmã tanhmã amnhî nhîpêx to ho apa hã amnhî jarênh tã gaa nê rî amã ixkôt amnhî nhîpêx prãm kêt nê. Hãmri nê ra te apê kaxwa mẽ

pika pihkàrta pyràk. Kwa mẽ ixujarēnh ma mẽ kām ajamxpēr tỳx rāhã ho ri apa.

14-16 —Nē te mẽ ate kanê hpôk pyràk. Nē te mẽ ate hixêt prêk nhĩmôk ã krĩ xãm pyràk. Koja krĩja hixêt prêêti nhĩmôk ã xa nhũm mẽ piitã omu. Nē kanêja. Xà na htem kanê hpôk mẽ poti ho hpro? Nà na htem hpôk mẽ kỳx pê mẽmoj nhĩmôk ã unhwỳ nhũm mẽ piitã mẽ kām hirã nhũm mẽ hirã kamã mẽmoj pumunh mex mẽ. Ja pyrã mẽ kot kaj mẽ tãm amnhĩ nhĩpêx o ri apa nhũm mẽ piitã ja hã mẽ apumunh kôt ra kaxkwa kamã Tĩrtũm mex ã harēnh o pa. Anē.

*Jejus kot tanhmã Mojes kapēr jarēnh to
Rukre 16.16-17*

17 Nhũm Jejus arĩ mẽ kām kapēr mẽ mẽ kām:

—Nē amnepēm Mojes kot Tĩrtũm nhỹ hã Ijaewjê mã tanhmã mẽ kot amnhĩ nhĩpêx to hã mẽ kām karôja. Nē amnepēm Tĩrtũm nhỹ hã kapēr jarēnh o mẽ pa xwỳnhjê kapērja. Ixte mẽ kapēr o ijapêx kaxyw na pa pre mẽ awỳr ixwrỳk kêt mẽ. Jakamã kwa mẽ ri ã axpên mã ijarēnh anhỹr kêt mẽ. Kêt ixprĩ hã ixte mẽ amã mẽ kapēr jarēnh nhũm mẽ ate mar mex kaxyw na pa pre kaxkwa rũm mẽ awỳr wrỳ.

18 —Tĩrtũm kapēr ã kagà htũm kot mẽmoj jarēnhja. Koja ujarēnh xà hkôt mẽmoj tanhmã amnhĩ to hpar mẽ nhũm rĩ kormã kaxkwa mẽ pika wa hapêx pa nhũm kapēr ã kagàja mãânēn hapêx. Nom nhũm Tĩrtũm kapēr koja mẽmojja pyrã mẽ aa hapêx kêt mẽ. Koja rāhã ho rāhã mẽ aa ihkjê ho tanhmã mẽnh to hkêt mẽ. ãm hãmri na pa ã mẽ amã harēnh anē.

19 —Ně kot ka mẽ atõ Tĩrtũm kapẽr o pixire nẽ hirõp xa. Hãmri nẽ ra amnhĩ pyrà nẽ anhĩõ mã ja hã amỹnẽ. Apyrà nẽ kot hirõp ãm kaxyw ka kãm hã amỹnẽ. Kot kaj ã amnhĩ nhĩpêx anẽ hãmri nẽ apê Tĩrtũm kra hkêt ã amnhĩ to amnhĩrĩt. Nom kot ka kêt mẽ tãm amnhĩ nhĩpêx o ri apa. Nẽ amnhĩ pyrà nẽ tãm mẽ kot amnhĩ nhĩpêx kaxyw mẽ kãm akapẽr o ri apa hãmri nhũm Tĩrtũm ja hã apumu nẽ ato hkra nẽ ato mex nẽ.

20 —No Parijew nhõ xwýnhjaja nẽ Tĩrtũm kapẽr tũm o mẽ ahkre ho mẽ pa xwýnhjaja. Mẽ kot Tĩrtũm kapẽr kõt amnhĩ nhĩpêx mex ã amnhĩ jarẽnh tã no ãm hkõt ã amnhĩ nhĩpêx anhỹr kêt nẽ. Jakamã kot kaj mẽ hkõt amnhĩ nhĩpêx o ri apa hãmri nẽ mẽ uràk nẽ nhỹrmã Tĩrtũm mẽ wa inhõ krĩ kamã apa hkêt nẽ. Anẽ.

Mẽ gryk o mẽ pa xwýnhjê jarẽnh

Rukre 12.58-59; mãânẽn Rõmãn 12.19; Epes 4.26; Wam Ximotre 2.8; Xiakre 1.19-20

21 Nhũm Jejus arĩ mẽ kãm kapẽr nẽ mẽ kãm:

—Nẽ amnepẽm na prem mẽ panhĩgêjtê mã Tĩrtũm kapẽr kwý jarẽnh o pa nẽ mẽ kãm:

Kêr ka mẽ axpẽn par kêt nẽ. Kot kaj mẽ mẽhõx pĩ nhũm mẽ ja mýrapê atomnuj nẽ. Nẽ ma mẽ anhõ pahihti hwýr ato tẽ nhũm mýrapê tanhmã ato rý hkõt apĩ. Anẽ.

Ãm hãmri na prem mẽ kãm ja jarẽ.

22 Tã kot paj ixprĩ hã mẽ amã tanhmã harẽnh to ka mẽ inhma. Kot kaj mẽ mẽmoj tã anhĩõ kamã agryk. Hãmri nhũm Tĩrtũm tee ri ja hã apumu nhũm ja kãm mex kêt nẽ. Jakamã koja mẽ anhõ pahihti tanhmã ja hã mẽ ato japêr hã koja ja mex nẽ. Rý

kot kaj mẽ tanhmã mēhõ japry hto. Ho hagrô ry ho rop. Mýrapê kop apu akwý kot apynênh nê anhõ pahihti hwýr ato htēm nê ãhkram ajaxàr ronhýx ja inhmã mex nê. Ry kot kaj mẽ tanhmã anhĩõ mã akapêr punuj to nê kãm: “Tk. Ate ho warêhti hã. Te apê hagrô pyràk kênã.” Anhýr o kãm akapêr. Tã kop apu Tirtũm ra ã akapêr anhýrja mýrapê mẽ kot amnhĩ xà htýx kamã hamak tũm xàta wýr amēnh ronhýx ja inhmã mex nê. Ja pumaj kwa kër ka mẽ ã axpēn mã akapêr anhýr kêt nê. Kêt mẽ axpēn mã tãm akapêr pix o ri axpēn kôt apa.

23 —Nê kër ka mẽ tanhmã ate anhĩõ nhĩpêx hto kamã Tirtũm mã mex o mex ã harēnh kêt nê. Kër ka mẽ kãm amnhĩ jarēnh o akri hãmri nê ra mēhõ kot mēmoj tã akamã gryk xwýnh mã ajamaxpêr japêr.

24 Hãmri nê akato nê ma hwýr atēm kurê kumrêx nê wa tãm axpēn mã akapêr nê tãm akupým axpēn xãm. Hãmri nê rĩ kormã ma akupým tē nê Tirtũm mã amnhĩ jarēnh jatur xàm amē nê kãm mex o mex ã harē. Kër ka mẽ ã amnhĩ nhĩpêx anhýr o ri apa.

25-26 —Na htem tanhmã axpēn nhĩpêx to hãmri nê kot tanhmã war axpēn to xwýnhjê hõja ma õ pahi hwýr tē nê kãm tanhmã kot ho xwýnhhta jarēnh kaxyw nojarêt. Hãmri nhũm ra kamã gryk xwýnhhta kot pahi mã harēnh kaxyw nojarêt ã harēnh ma nê tee ri amnhĩ kukamã hamaxpêr nê ma hwýr tē nê wa akupým tãm axpēn xãm. Na htem ã amnhĩ nhĩpêx anê. Pahi kot wa harēnh mar nê tanhmã axpēn tã wa ho pymaj na htem ã amnhĩ nhĩpêx anê nê tokyx tãm akupým axpēn xunhwý. No koja mẽ anhýr kêt nhũm pahija wa harēnh ma nê wa kot tanhmã axpēn to xwýnhhta õ jaxà nhũm tee ri kãm kator prãm. Hãmri nê tanhmã amnhĩ to

nê ra amnhî pãnhã kãm amnhîrer pa nhũm pahih-tija rĩ kormã pôristi mã anê nhũm kãm ure nhũm kato. Ja pyrã nê kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhî tomnuj kaga nê hkôt amnhî nhĩpêx rãhã ho ri apa. Anê.

Tanhmã mẽ pahte mẽ pahprôjê nhĩpêx to

Matêwre 19.3-9; Makre 9.43-47, 10.2-9; mããnên Rukre 16.18

²⁷ Nhũm Jejus arĩ mẽ kãm kapêr nê mẽ kãm:

—Nê na pre finat Mojesja mẽ panhĩgêjtjê mã Tĩrtũm kapêr tũm kwý jarê nê mẽ kãm: “Kêr ka mẽ amnhî prô pix tãnopxar o ri apa. No mẽ kuhpa hã nhãm mēhõ ho amnhĩkati ho ri apa hkêt nê.” Anê. ãm hãmri na pre mẽ kãm ja hã karõ.

²⁸ Tã kot paj ixprĩ hã mẽ amã tanhmã harēnh to ka mẽ inhma. Kot kaj mẽ nhãm mēhõ pumu nê amã ho amnhĩkati hprãm mã ajamxpêr. Jao te ra ate ho amnhĩkati pyrãk o amnhî nhĩpêx. Kormã ate ho amnhĩkati hkêt tã ra hkukamã ajamxpêr jakamã te ra ate ho amnhĩkati pyrãk o amnhî nhĩpêx.

²⁹ ã mẽ hamxpêr punuj anhỹr xwýnhjaja koja mẽ nhỹrmã ma mẽ kot amnhî xà htýx kamã hamak tũm xãta wýr ma mra nê kamã pa rãhã ho pa. Jakamã kêr ka mẽ nhãm mēhõ pumu nê amã hkĩnh japêr hãmri nê te ate ano kaxàr nê mēnh nê axte ate omunh kêt pyrãk o amnhî nhĩpêx. Jao hkàx ã rĩt nê ma nhỹhým atēm kurê kumrêx.

³⁰ —Nê kot kaj mẽ anhĩhkra ho tanhmã amnhî tomnuj to kaxyw. Hãmri nê tee ri ja hã amnhî pumu nê te ate amnhî nhĩhkra krãhyr nê mēnh pyrãk o amnhî nhĩpêx nê tanhmã amnhî tomnuj to

hkêt nê. Mě ĭhkra ho mẽ kot tanhmã amnhĩ tomnuj to ho mẽ pa xwỳnhjaja koja mẽ nhỹrmã ma mẽ kot amnhĩ xà htỳx kamã hamak tũm xàta wỳr ma mra nê kamã pa rãhã ho pa. Anê.

Mě pahte axpẽn kaga hkêt

³¹ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêjtjê mã Tĩrtũm kapêr tũm kwỳ jarê nê mẽ kãm: “Kot kaj mẽ atõ aprõ kaga kaxyw hãmri nê ate hkaga hã amnhĩ jarênh ã kaga nhĩpêx nê kãm agõ nê rĩ kormã hkaga.” Anê. ãm hãmri na pre ã mẽ kãm Tĩrtũm kapêr tũm jarênh anê.

³² Tã kot paj ixprĩ hã mẽ amã tanhmã harênh to ka mẽ inhma. Kêr ka mẽ atỳx ri amã hprãm xà hkôt aprõ kaga hkêt nê. Nom koja aprõ akuhpa hã nhãm mẽhõ ho amnhĩkati ka harênh ma hãmri nê amã ja hã hkaga hprãm nê mãmri kam nê hkaga. Ja tanhmã kute hkêt. Nom koja ã amnhĩ nhĩpêx anhỹr kêt tã ka amnhĩ krã hkôt hkaga. Hãmri nhũm mẽhõ apãnhã ho hprõ nê o pa. Hãmri nê ra kot apê aprõ ho amnhĩkati ho pa pyræk o hipêx. Nê nija haxwỳja. Te arĩ kêp aprõ htã akuhpa hã nhãm myja o amnhĩkati o pa pyræk o amnhĩ nhĩpêx. Anê.

Tãm mẽ pakapêr ã Jejus kot mẽ pamã karõ

Xiakre 5.12

³³ Nhũm Jejus arĩ mẽ kãm kapêr nê mẽ kãm:

—Nê na pre finat Mojes mẽ panhĩgêjtjê mã Tĩrtũm kapêr tũm jarênh o: “Kêr ka mẽ Tĩrtũm mã mẽmoj to anhỹr ã amnhĩ jarê hãmri nê amnhĩ jarênh xà hkôt kãm tanhmã amnhĩ nhĩpêx to. Nom kêr ka mẽ atỳx ri kãm tanhmã amnhĩ jarênh to ho amnhĩ to axêx kêt nê. ãm

akatàt kôt mẽ ate amnhĩ jarēnh to xà hkôt kãm tanhmã mẽmoj to.” Anē. Ām hāmri na pre mẽ kãm ja jarē.

³⁴ Tã kot paj ixprĩ hã mẽ amã tanhmã harēnh to ka mẽ inhma. Kêr ka mēhõ mã tanhmã amnhĩ jarēnh to. Tĩrtũm mã pix mã amnhĩ jarēnh kêt nhãm mēhõ mã mãânēn tanhmã amnhĩ jarēnh to. Nē akatàt kôt kãm amnhĩ jarē. Na ka htem mẽ kot mẽ axêx kêt kôt mẽ apumunh kaxyw mẽmoj nhĩxi jarēnh kôt amnhĩ jarē. Nom kêr ka mẽ axte ã mẽmo nhĩxi hã amnhĩ jarēnh anhỹr kêt nē. Mẽmoj tã amnhĩ jarē nē akatàt kôt amnhĩ jarēnh kuré kumrêx. No mẽ kot axêx kêt kôt apumunh kaxyw mẽmoj nhĩxi hkôt amnhĩ jarēnh kêt nē. Tanhmãn kaxkwa nhĩxi jarēnh kôt mẽmoj tã amnhĩ jarēnh kêt nē. Kaxkwa kêp Tĩrtũm krĩ xà maati kēnã kot ka kêt mẽ axtem nē atỳx ri amnhĩ kaxyw hixi jarē.

³⁵ Rỳ mẽ kot axêx kêt kôt apumunh kaxyw pika nhĩxi jarēnh kêt nē. Pika kêp Tĩrtũm par xãm xà kēnã kot ka kêt mẽ atỳx ri amnhĩ kaxyw tanhmã hixi jarēnh to. Nē krĩ pê Jerujarēja mãânēn kêr ka mẽ ri amnhĩ kaxyw tanhmã hixi jarēnh to hkêt nē. Koja nhỹrmã Tĩrtũm mẽ awỳr Jerujarē hwỳr ixpê pahi maati hã inhmẽ pa kamã mẽ ato amnhĩptàr o ixkrĩ. Jakamã kêr ka mẽ ri atỳx amnhĩ kaxyw tanhmã hixi jarēnh to ho ri apa hkêt nē.

³⁶ –Nē kêr ka mẽ kot axêx kêt kôt apumunh kaxyw mẽ ri tanhmã amnhĩ krã hkĩ jarēnh to hkêt nē. Kot kaj mẽ anē nē ãm tanhmã hã harēnh to kaprỳ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ hõ anhỹr kêt nē. Jakamã mẽ ri atỳx tanhmã harēnh to hkêt nē.

Nē mẽ atỳx ri mẽmo nhĩxi jarēnh kôt mẽmoj tã

amnhĩ jarēnh o apa hkêt nē.

³⁷ ãm akatàt kôt tãm amnhĩ jarēnh kurê kumrēx. Jao mẽ kãm: “Tỳ. Nà kot paj ho anē.” Anhỹr o mẽmoj tanhmã ho. Rỳ mẽ kãm: “Nà kot paj ho anhỹr kêt nē.” Anhỹr o mẽmoj tanhmã ho hkêt nē. ãm akatàt kôt tanhmã mẽmoj tã amnhĩ jarēnh to xà hkôt ho anhỹr kurê kumrēx. Mẽ kot Satanasti hkôt amnhĩ nhĩpêx o mẽ pa xwýnh pixjaja na htem hêx rom mẽmoj nhĩxi jarēnh kôt tanhmã amnhĩ jarēnh to ho pa. Anē.

Mẽ pahte tanhmã axpēn nhĩpêx to hã Jejus kot mẽ pamã karõ

Rukre 6.27-30, 23.34; mããnēn Atre 7.60; Rõmãn 12.14

³⁸ Nhũm Jejusja arĩ mẽ kãm kapēr nē mẽ kãm:

—Na prem amnepēm mẽ panhĩgêjtê mã Tirtũm kapēr tũm jarēnh o: “Koja mēhõ apê ano katõk nē hkapa hã koja mẽ anhõ pahija atã mã ho anē nē kêp no kapa. Rỳ koja mēhõ apê axwa hõ hkwỹr hã koja atã mã ho anē nē atã kêp wa hõ hkwỹr.” Anhỹr o mẽ kãm hã karõ. ãm hãmri na prem ã ja jarēnh anē.

³⁹ Tã kot paj ixprĩ hã mẽ amã tanhmã ja jarēnh to ka mẽ inhma. Koja mēhõ tanhmã mẽ anhĩpêx to ka mẽ ãm amnhĩ tã omu nē tanhmã amnhĩ tã ho hkêt nē. Koja anhĩnep akura ka ãm omu nē tanhmã amnhĩ tã ho hkêt nē. Te ate kãm ihkjê hpēr nhũm kot ihkjê kamã hkuranh pyræk o amnhĩ nhĩpêx nhũm ja amã mex nē. No amnhĩ tã tanhmã ho hkêt nē.

⁴⁰ —Nē koja mēhõ anhĩnõhkà hã awỳ nhũm mẽ anhõ pahija amã anē ka mãmrĩ kãm agõ nē tanhmã hã kãm nē hkêt nē. Te ate hkôt kry pē kãm

anhĩnôhkà hpakà ry jagiênh xwỳnhta nhõr pyràk o amnhĩ nhĩpêx. Nom kêr ka mẽ kamã agryk kamã kãm õr kêt nê.

⁴¹ —Nê koja mêhõ ate kãm jênh tur nê hkôt ho amõr ryy kaxyw amã kapêr ka mãmri kãm ho anê. Nê kot amã nhỹri hã karõ xàja wỳr o pøj nom kamã kãm õr kêt nê. Kãm ho hakrenh ryy nê ri kormã akupỹm kãm agõ.

⁴² —Nê koja mêhõ õ mẽmoj kêt nê awỳr tẽ nê mẽmoj tã awỳ ka mãmri kãm agõ. Rỳ nhũm awỳr tẽ nê apê mẽmoj to ãpresta kaxyw ka mãmri kãm ho ãpresta. Kêr ka mẽ ã axpên nhĩpêx anhỹr o ri apa. Anê.

*Mẽ pamã axpên kĩnh ã Jesus kot mẽ pamã karõ
Rukre 6.32-36; mããnhẽn Rõmãn 12.14*

⁴³ Nhũm Jesus arĩ mẽ kãm kapêr nê mẽ kãm:

—Nê na prem amnhĩ krã hkôt axtem nê tanhmã mẽ panhĩgêjtê mã mẽmoj jarênh to nê mẽ kãm: “Kêr ka mẽ amã mẽ akràmnhwỳjê pix kĩnh nê tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmri mẽ kamã axàhkurê ho ri apa.” Anhỹr o mẽ kãm karõ.

⁴⁴ Nom pa kot paj mẽ amã Tirtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêt nê. ãm tanhmã mẽ ho mex to pix hkukamã mãn ajamaxpêr. Nê mẽ ho Tirtũm wỳr pix kukamã mãn ajamaxpêr.

⁴⁵ Na hte ã kaxkwa kamã Mẽpahpãm Tirtũmja amnhĩ nhĩpêx anhỹr o pa. Mẽ kot amnhĩ tomnuj xwỳnhjaja nê mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpên pyràk. Jao hamẽ wa hwỳr na rẽ nê hamẽ wa hwỳr myyti

rê nhũm hamě wa kãm hirã ho pa. Jakamã kêr ka mě urak ně mě piitã tãm mě hipêx o axpěn pyrãk. Mě kot amnhĩ tomnuj xwýnhjê mě mě kot amnhĩ to mex xwýnhjê mě ho apimràatã mě ho mex o axpěn pyrãk.

⁴⁶ —Ně xat kaj mě amã mě piitã mě ho mex prãm kêr ně ãm mě kot mě ato mex xwýnh pixjaja ka mě amã mě ho mex prãm nhũm Tirtũm ja hã mě apumu nhũm ja kãm mex ně nà? Nã koja kãm mex kêr ně. Koja mēhõ ato mex kêr tã kêr ka ãm amnhĩ rom ho mex ně. Nhũm Tirtũm ja hã apumu ně amnhĩm amex ã ajarě. Mě kot amnhĩ tomnuj xwýnhjaja na htem ãm mě kot mě ho mex xwýnh pixjaja nhũm mě amnhĩ xwar mě ho mex. No tãm mě kot amnhĩ nhĩpêx xwýnhjaja na htem mě piitã mě ho mex o axpěn pyrãk. Mě kot tãm amnhĩ nhĩpêx xwýnhjaja ně mě kot amnhĩ tomnuj xwýnhjaja nhũm mě ho hpimràatã mě ho mex o axpěn pyrãk.

⁴⁷ —Ně na hte mě hkwyjaja ãm amnhĩ kwýjê pix mã kapěr mex o pa. Nom mě piitã tãm mě hipêx kêr ně. Nom kêr ka mě ã amnhĩ nhĩpêx anhÿr kêr ně. Kêr ka mě kurom mě piitã tãm mě hipêx o axpěn pyrãk. Mě akwýjê mě mě akwý hkêr xwýnhjaja ka mě hipêx o axpěn pyrãk. Ně tãm mě kãm akapěr o axpěn pyrãk.

⁴⁸ Kaxkwa kamã Měpahpãm Tirtũm pyrã ně mě kot amnhĩ tomnuj xwýnhjê mě mě kot amnhĩ to mex xwýnhjaja mě ho apimràatã mě ho mex o axpěn pyrãk. Na hte ã Tirtũmja mě panhĩpêx aně. Aně.

6

Mê pahte mê kêp amrakati xwÿnhjê ho mex rãhã hã mê pamã karõ

¹⁻² Nhũm Jejus arĩ mê kãm kapër nê mê kãm:

—Nê na htem mê piitã hkwÿjê noo mã tanhmã mê kêp amrakati xwÿnhjê ho mex to. Nom kãm mê hkaprĩ kamã tanhmã mê ho mex to hkêt nê. ãm hkwÿjaja kot ja hã mê omunh nê mê mex ã mê harênh pix kaxyw na htem krĩ hkôt ri mê kêp amrakati xwÿnh piitã mê ho mex o pa. Nê mê pikuprõnh xà hã ixkre kamã kuhê nê tanhmã mê ho mex to. Mê hkwÿjaja kot ja hã mê omunh nê amnhĩm mê mex ã mê ho jarkrar kaxyw. Jakamã koja nhÿrmã Tĩrtũmja axte ja hã mê kãm mêmoj mex nhõr kêt nê. Ra jar mê hkwÿjaja kot ja hã mê omunh nê amnhĩm mê mex ã mê harênh kênã. Jakamã kwa kêr ka mê ho mê urak kêt nê. Nê tanhmã mēhõ ho mex to kaxyw nê akwÿjê no kuhpa hã mê hkàx ã tanhmã mê ho mex to. No kot kaj mê noo mã tanhmã mê ho mex to. Mê kot hã apumunh nê ato jarkrar kaxyw tanhmã mê ho mex to nhũm kaxkwa kamã Mēpahpãmja ja hã apumu nê mê hã tanhmã ato mex to hkêt nê. Koja ãm hã apumu.

³—Ja pymaj kêr ka mê mê kêp amrakati xwÿnhjê mã mêmoj nhõr kaxyw hãmri nê mê piitã mê no hkàx ã tanhmã mê ho mex to. Hãmri nê nhãm ri ja hã mê kãm amnhĩ to jarkrar kêt nê. Aprõ mã rÿ akrajê mã rÿ akràmnhwÿ mã hã amnhĩ jarênh kêt nê.

⁴ Kot kaj mê no hkàx ã tanhmã ho mex to no nhũm Tĩrtũm tapxipix apumunh o nhÿ. Hãmri nê ja hã ato mex rax nê ka amex nê apa. Anê.

Tanhmã mẽ pahte Tĩrtũm mã amnhĩ jarẽnh to hã mẽ pamã karõ

Rukre 11.1-13, 18.9-14

⁵ Nhũm Jejus arĩ mẽ kãm kapêr nẽ mẽ kãm:

—Nẽ mãănẽn ja. Na htem hakwa pix o amnhĩ mex ã amnhĩ jarẽnh xwỳnhjaja Tĩrtũm mã amnhĩ jarẽnh kaxyw nẽ mẽ kot Tĩrtũm kapêr o mẽ ahkre xà hã ixkreja wỳr agjê. Nẽ mẽ piitã mẽ noo mã kãm tanhmã amnhĩ jarẽnh to. Rỳ gạp kuhê nẽ mẽ piitã mẽ noo mã kãm amnhĩ jarẽ. Tã mẽmo kaxyw na htem mẽ noo mã Tĩrtũm mã amnhĩ jarẽ? Nà ãm mẽ kot ja hã mẽ omunh nẽ mẽ mex ã mẽ ho jarkrar pix kaxyw. Nẽ mẽ harẽnh o: “E mũjti pumu. Na hte apkati mẽ ã Tĩrtũm mã amnhĩ jarẽnh anê. Kot amnhĩ to mex xwỳnh mãn.” Anhỹr ã harẽnh kaxyw. Tã ra mẽ piitã mẽ kot ja hã omunh nẽ amnhĩm mex ã ho jarkrar jakamã koja Tĩrtũm axte ja hã tanhmã ho mex to hkêt nẽ. Ra pika ja kamã mẽ kot mẽ omunh nẽ mẽ mex ã mẽ harẽnh kênã.

⁶ No mẽ kajaja. Kêr ka mẽ uràk nẽ ã amnhĩ nhĩpêx anhỹr kêt nẽ. ãm Tĩrtũm mã amnhĩ jarẽnh kaxyw nẽ akwỳjê no hkàx ã hitom wỳr agjê nẽ hitom kãm ahte kãm amnhĩ jarẽ. Hãmri nhũm Tĩrtũm tapxipix ja hã mẽ apumu. Mẽ amã amnhĩ to amnhĩrĩt kêt tã mẽ apumu. Hãmri nẽ mẽ ato mex nẽ.

⁷ —Nẽ mẽ kêp Tĩrtũm kra hkêt xwỳnhjaja na htem sãnti mã amnhĩ jarẽnh kaxyw nẽ xatã kãm amnhĩ jarẽ. Nẽ xatã kàx pêê kãm amnhĩ jarẽ. Nẽ hamaxpêr o: “Kot paj xatã sãnti mã amnhĩ jarẽ nhũm inhmar japêr.” Anhỹr o hamaxpêr jakamã

xatã kãm amnhĩ jarẽ. No ãm htỳx ã hamaxpěr anhỹr kaprỳ.

⁸ Jakamã kwa kêr ka mẽ ho mẽ uràk kêt nẽ. Tĩrtũm ra kot mẽ ate mẽmoj tã hwỳr xàta ra ja kukamã kot omunh mex kênã kot ka kêt mẽ xatã hã hwỳr o akuhê.

⁹ –Nẽ kêr ka mẽ kãm amnhĩ jarẽnh kaxyw nẽ amnhĩ krã hkôt tanhmã kãm amnhĩ jarẽnh to rỳ kãm amnhĩ jarẽnh o:

Pa Měinhĩpêêxà maati pê kaxkwa kamã ri apa xwỳnh? Amex o amex Tĩrtũm.

¹⁰ Apê mẽ ijamār mex xwỳnh maati na ka.

Na hte kaxkwa kamã mẽ kot ri amã tanhmã amnhĩ nhĩpêx to ho mẽ pa xwỳnhjaja akôt pix mã amnhĩ nhĩpêx o ri pa. Tã ijaxwỳja inhmã mẽ uràk nẽ akôt pix mã amnhĩ nhĩpêx o ri ixpa hprãm.

¹¹ Nẽ kwa jarãhã mẽ inhmã mẽmoj gõ pa mẽ akukwak ri ho apku.

¹² Na pa hte tõiã amnhĩ tomnuj nẽ Tĩrtũm. Nom mẽ kot tanhmã ixtomnuj to xwỳnhjaja na pa hte ãm mẽ omu nẽ amnhĩ tã tanhmã mẽ ho hkêt nẽ. Nẽ ja ho ijamakêtkati nẽ axte kãm ijamaxpěr kêt nẽ. ã ixte amnhĩ nhĩpêx anhỹr jakamã kwa ja hã ixpumu nẽ ixpyrà nẽ ixte tanhmã amnhĩ tomnuj to hã ixpumu nẽ hã tanhmã ixto hkêt nẽ. ãm ho ajamakêtkati kurê kumrêx nẽ axte kãm ajamaxpěr kêt nẽ.

¹³ Nẽ kot paj nhỹrmã tanhmã amnhĩ tomnuj to kaxyw ka ja hã ixpumu nẽ ixte ã amnhĩ nhĩpêx anhỹrja nê ixto htỳx nẽ pa tanhmã

amnhĩ tomnuj to hkêt nê. ãm mẽmoj punuj pê ixpytâr rãhã ho apa Tĩrtũm. Tã ãm ja pix na hapêx. Anê.

—E kêr ka mẽ ã Tĩrtũm mã amnhĩ jarênh anê. Anê.

¹⁴ —Nê koja mẽhõ tanhmã anhĩpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Mẽpahpãm maatija ja hã apumu nê apyrà nê tanhmã ate amnhĩ tomnuj to ho hamakêtkati nê axte kãm hamaxpêr kêt nê.

¹⁵ Nom kot kaj mẽ ã amnhĩ nhĩpêx anhỹr kêt nê. Nê tanhmã mẽ kot mẽ atota ã anohtỳx rãhã ho apa hãmri nhũm Mẽpahpãm maatija mẽ apyrà nê mẽ ate tanhmã amnhĩ tomnuj to ho hamakêtkati hkêt nê. ãm hã nohtỳx rãhã ho pa ho pa. Anê.

Tanhmã mẽ pahte Tĩrtũm mã mex o mex ã harênh to

Rukre 18.11-12

¹⁶ Nhũm Jejus arĩ mẽ kãm kapêr nê mẽ kãm:

—Nê mẽ kot amnhĩ to jarkrar xwỳnhjaja na htem Tĩrtũm mã amnhĩ jarênh kaxyw hãmri nê tõiã ho apkur kêt rãhã kãm amnhĩ jarênh jakamã hkuk kaprĩ nê hkwỳjê hkôt pa. Tã mo kaxyw na htem ã mẽ noo mã amnhĩ nhĩpêx anê? ãm mẽ apkur kêt rãhã Tĩrtũm mã amnhĩ jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tĩrtũm nhỹrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ uràk kêt nê.

¹⁷ Kêr ka mẽ tõiã Tĩrtũm mã amnhĩ jarênh ryy kaxyw axàpkur kaga hãmri nê amnhĩ krã kahõ nê

amnhĩ jaxwÿr mux nê akuk kĩnh nê ri akwÿjê hkôt apa.

¹⁸ Hãmri nê nhÿri mẽ hkàx ã ahte kãm amnhĩ jarẽ nê kãm mex o mex ã harẽ. Kot kaj mẽ ã mẽ hkàx ã amnhĩ nhĩpêx anê nhũm mẽ akwÿjaja mẽ axàpkur kaga hã mẽ apumunh kêt nê. Nhũm Tĩrtũm pix ja hã mẽ apumu. Hãmri nê nhÿrmã ja hã mẽ atõ mex nê. Anẽ.

Kaxkwa kamã mẽmoj mex

Rukre 12.33-34; mãânẽn Sikũn Ximotre 4.8; Wam Pêtre 1.4; Eprêw 10.34

¹⁹ Nhũm Jejus arĩ mẽ kãm kapêr nê mẽ kãm:

—Nê mãânẽn ja. Kêr ka mẽ jar pika ja kamã akukrêx rũnh o apa hkêt nê. Kêt jar mẽ hikukrêx koja kritpêm mex kêt nê. Kot kaj mẽ ho akuprõ nhũm amnhõre apê homnu rÿ paratre apê homnu. Nê kàx o mẽ akukrêx nhũm haxwÿja apê omnu rÿ nhũm mẽhõ apê hkwy ho ahkĩ.

²⁰ Jakamã kêr ka mẽ akukrêx rũnh o apa hkêt nê. Kaxkwa kamã Tĩrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhÿrmã kaxkwa kamã akukrêx mex prãm xàj tãm mẽ piitã tãm mẽ hipêx nê mẽ ho mex o ri apa. Nê mẽ kamã axukapri nê. Nê Tĩrtũm kôt ri amnhĩ nhĩpêx mex nê. Hãmri nhũm ã mẽ ate amnhĩ nhĩpêx anhÿr ã mẽ apumu nê mẽ akutêp mẽ amã mẽmoj mex kwÿ jaxwÿ. Kaxkwa kamã mo amnhõre nê mo paratre? Nê kamã mo mẽ ahkĩnh xwÿnh? ãm kamã amrakati kumrêx.

²¹ Kot kaj mẽ jar akukrêx rũnh hãmri nê ãm tanhmã apê homnu hto pix kukamã ajamaxpêr.

Nom kot kaj mẽ apê Tĩrtũm kra hã kaxkwa kamã akukrêx mã ajamxpêr rãhã ho ra akĩnh nê ri apa.

²² —Nê kot kaj mẽ ixkapêr ma nê ixkôt amnhĩ nhĩpêx hãmri nê tãm amnhĩ nhĩpêx. Nê tãm axpên hipêx. Jao te hirã kamã arĩt mex pyrãk o amnhĩ nhĩpêx.

²³ No koja mẽhõ ixkapêr ma nê ãm kuma nê ixkwým ri amnhĩ nhĩpêx o pa. Hãmri nê te kamãt kô kamã mẽhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nê kãm ajamxpêr tỳx rãhã ho ri apa.

²⁴ —Nê kot kaj apyxi nê anhõ patrãw hamêxkrut hãmri nê arĩgro pyxi hã hamê wa kãm axapênh o amỹkry hkêt nê. Kot kaj anê nê hõ gryk ã ihõ kaga. Ja pyrã nê kot kaj mẽ jar akàxpore nê akukrêx pix mã ajamxpêr nê amã hapê ho akwỳjê pê ho anhõxỳ ho ri apa. Nê gryk ã Tĩrtũm kãm hprãm xà hkôt tanhmã ho mẽ ho mex to hkêt nê. Jakamã kwa kêr ka mẽ Tĩrtũm pix mã mãn ajamxpêr rãhã nê. Jao akàxpore nê akukrêx pix kukamã ajamxpêr o ri apa hkêt nê. Anê.

Mẽ pahte tee ri amnhĩ kukamã pajamxpêr kêt ã mẽ pamã karõ

Rukre 12.22-31; mããnên Piripos 4.6; Wam Pêtre 5.7

²⁵ Nhũm Jejus arĩ mẽ kãm kapêr nê mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamxpêr kêt nê. Tanhmãn axàpkur xà rỳ axê ka mẽ tee ri hkukamã ajamxpêr kêt nê. Mẽmoj piitã hkukamã tee ri ajamxpêr o ri apa hkêt nê. Tĩrtũmja àhpumunh tỳx o àhpumunh tỳx

xwÿnh na. Na pre àhpumunh tÿx o mẽ anhĩpêx ka mẽ kukwak ri atĩr nẽ apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tÿx kênã. Kêp mẽ anhĩpêx xwÿnh jakamã mãânẽn kêp mẽ amã mẽ anhõ xwÿnh. Nẽ kêp mẽ amã mẽ axê nhõr xwÿnh.

26 —Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nẽ ri pa hkêt nẽ. Mẽ anhĩpêêxà maati tãm na hte kãm õ ho pa. Tã kãm mẽ ajapê htÿx o kot kuwênhre jakrenh jakamã koja uràk nẽ mẽ amã mẽ anhõ rãhã ho pa.

27 —Nẽ xà kot kaj mẽ kritpêm atĩr prãm xàj ja pix kukamã ajamaxpêr rãhã nẽ ra ajamaxpêr kôt kritpêm atĩr nẽ apa? Nà kot kaj mẽ anhÿr kêt nẽ.

28 —Mãn ka htem akunĩ kamã pixôrà pumu. Na hte tee ri tanhmã kute hkukamã hamaxpêr o ra hkaprĩ nẽ harir kêt nẽ.

29 Tã nom muxre nẽ harir ka mẽ omu. Te ho amnepêm pahihtĩ Sarumãw xê mex pyràk nom mex o hakre.

30 Pixôràreja koja mẽmo arĩgro hã htĩr nẽ mux nẽ harir tã mẽmo arĩgro hã ra grà pa nẽ hapêx. Kêp pixôrà pix nẽ hapêx tokyx anhÿr tã nhũm Tĩrtũm ho mex nẽ nhũm mux nẽ harir. No mẽ kajaja na hte mẽ ato mex o pixôrà ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o ri akaprĩ nẽ apa? Kot kaj mẽ ã ajamaxpêr anhÿr jao kormã amnhĩ kaxyw Tĩrtũm mã ajamaxpêr tÿx kêt nẽ.

31 —Kwa mẽ tee ri axàpkur xà hkukamã ajamaxpêr o ri akaprĩ hkêt nẽ. Nẽ tee ri amnhĩ

kukamã tanhmã ajamexpër to ho ri akaprĩ hkêt nê.

³² Mẽ kot Tĩrtũm kôt amnhĩ xunhwỳr kêt xwỳnhjaja na htem ã ri hamaxpër anhỳr o pa. Tã nom kêr ka mẽ ho mẽ uràk kêt nê. Tĩrtũm ra kot mẽ panhõ mẽmoj kêt kôt mẽ pahpumunh mex kênã.

³³ Jakamã kêr ka mẽ hkôt ri tanhmã amnhĩ nhĩpêx to rãhã ho ri apa. Nê amã ja pix tânopxar prãm. Hãmri nhũm Tĩrtũm amnhĩ tã mẽ apumu nê apkati mẽ mẽ amã mẽmoj nhõr o pa.

³⁴ —Jakamã kwa kêr ka mẽ tee ri amnhĩ kukamã ajamaxpër o akaprĩ nê apa hkêt nê. Tĩrtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpër kêt nê. Kê apkati mãn. ãm jarãhã pix mã mãn mẽ ate tanhmã amnhĩ nhĩpêx tota kukamã ajamaxpër. Tĩrtũm kot mẽ pahpumunh mex o pa rãhã kênã. Anê.

7

Mẽ pahte axpên to pakapër punuj kêt ã kot mẽ pamã karõ

Rukre 6.37-38, 6.41-42; mããnên Rõmãn 2.1-3; Wam Korĩt 4.5; Xiakre 4.11-12

¹ Nhũm Jejus arĩ mẽ kãm kapër nê mẽ kãm:

—Nê kêr ka mẽ atỳx ri amnhĩ krã hkôt tanhmã akwỳjê hõ kot amnhĩ tomnuj to hã harênh kêt nê. Kot kaj mẽ ã harênh anê nhũm Tĩrtũm ja hã mẽ apumu nê mẽ kajaja ã mẽ ajarênh anê.

² Na hte tanhmã mẽ pahte axpên nhĩpêx to hã mẽ pahpumunh kôt tanhmã mẽ panhĩpêx to.

3-5 Jakamã kwa kêr ka mẽ mēhõ kot tanhmã amnhĩ tomnuj to hã omu hãmri nē hã kãm kapēr tokyx anhỹr kêt nē. Akumrēx ate tanhmã amnhĩ tomnuj to hã amnhĩ pumu nē hkaga hãmri nē rĩ kormã ate mẽmoj tâ omunh xwýnhhta wỳr tē nē hã tanhmã kãm akapēr to. Kêr ka mẽ ã amnhĩ nhĩpêx anhỹr o ri apa.

—Nē xà koja mẽ akwỳjê hõ tanhmã amnhĩ tomnuj to grire. Ka ate amnhĩ tomnuj tỳx o hakrenh tâ ã kot amnhĩ nhĩpêx anhỹr ã omu nē hã kãm akir nhũm amã ja mex nē nà? Nà koja amã ja mex kêt nē. Kot ka akumrēx ate tanhmã amnhĩ tomnuj tota kaga hãmri nē rĩ kormã anhĩõ tanhmã kot amnhĩ tomnuj to grireta nē kãm akapēr nhũm ja amã mex nē.

6 —Nē xà na htem mẽ apkur xà mex jamỳ nē rop mã kurē? Nà na htem anhỹr kêt nē. Ja pyrà nē kêr ka mẽ kot Tĩrtũm kaga xwýnhjê mã kapēr jarēnh o ri apa hkêt nē. Anē.

Mẽ pahte mẽmoj to presija hã amnhĩ to Tĩrtũm wỳr

Makre 11.24; Rukre 11.5-13; Juãw 14.13-14; mããnēn Wam Tesarõn 5.17; Xiakre 1.5-8, 4.1-3

7-11 Nhũm Jejus arĩ mẽ kãm kapēr nē mẽ kãm:

—Nē xà kot we akraja kãm prãm nē tep ã awỳ ka axtem nē kagã hõ py nē kãm agõ? Rỳ nhũm krãhyre gre hã awỳ ka axtem nē makre hõ py nē kãm agõ? Nà na ka htem ã mẽ hipêx anhỹr kêt. Na ka htem kot mẽmoj tâ mẽ awỳr xà hkõt kãm mẽmoj gõ. Mẽ ate amnhĩ tomnuj tâ na ka htem akrajê ho mex o ri apa. Tã kaxkwa kamã Tĩrtũmja na hte mẽ ato mex o mẽ ate mẽ akrajê ho mex jakrenh. Kãm

mê ajapê htỳx kôt na hte mẽ amã mẽmoj mex nhõr o pa. Jakamã kot ka mẽ mẽmoj tã awỳ nhũm mẽ ama nê mẽ ate mẽmoj tã hwỳr xàta kôt amã kugõ. ãm xatã mẽ ate hã axàhwỳr o ri apaja nhũm mẽ amã hprãm xwỳnhta gõ. ãm mẽmoj tã hwỳr rãhã ho ri apa nhũm mẽ ama nê mẽ amã mẽmoj tanhmã hipêx to. Te ho mēhõ kãm tep xành nê teprēnhxà hpyr nê xatã gôx kãm rēnh o ãm pyrà nê xatã mẽmoj tã awỳ. Hãmri nhũm mẽ ama nê mẽ amã hprãm xwỳnhta gõ. Te tep kanhêr xwỳnhta jatã kot tep kanhêr pyràk. Jao mẽ amã mẽmoj prãm xwỳnhta gõ.

¹² —Nê mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrà nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axàmnhĩx mẽ kêp anhõxỳ hkêt nê tãm mẽ hipêx. Kot kaj mẽ ã axpēn nhĩpêx anê nê finat Mojes mẽ Tĩrtũm nhỹ hã mẽ kapēr o mẽ pa xwỳnhjê xujarēnh xà hkôt axpēn nhĩpêx mex o ri apa. Anê.

Pry pijakrut jarēnh

Rukre 13.24; mããnēn Piripos 3.19-21

¹³⁻¹⁴ Nhũm Jejus arĩ mẽ kãm kapēr nê mẽ kãm:

—Tĩrtũm kapērja mẽ kêp hihtỳx jakamã na htem ohtô nê hkôt amnhĩ xunhwỳr kêt nê. Na htem ãm hpỹnhre nê hkôt amnhĩ xunhwỳ nê hkôt amnhĩ nhĩpêx. Jakamã te Tĩrtũm nhõ krĩ hwỳr pry grireta ã hpỹnhre nê pa pyràk. No nhũm Satanasti hkôt mẽ kot amnhĩ xunhwỳr xwỳnhjaja na htem Satanasti kôt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te pry krepak rax ã axpēn kôt mẽ ohtô nê pa pyràk o amnhĩ nhĩpêx. Axtem kuwy hwỳr pry krepakja

nõr tã nhũm mẽ htỳx kuwyja wỳr amnhĩ to pa. Jakamã Tĩrtũm kapễrja mẽ apê hihtỳx tã kêr ka mẽ mãmri hkhôt amnhĩ xunhwỳ. Jao Tĩrtũm nhõ krĩ hwỳr pry gireta ã mãn apa. Anẽ.

Mẽ kot amnhĩ to hêx xwỳnhjê jarẽnh

Rukre 6.43-44; mããnẽn Xiakre 3.9-12; Wam Juãw 3.10, 4.4-6

¹⁵ Nhũm Jejus arĩ mẽ kãm kapễr nẽ mẽ kãm:

—E kwa mẽ o kora. Mẽ akwỳjaja kot kêp Tĩrtũm nhỹ hã kapễr jarẽnh xwỳnh ã amnhĩ jarẽnh tã na htem ja hã amnhĩ to hêx. Nhũm htem kãm mẽ kapễr mar prãm nẽ. Te mẽ kapễr mex pyrak tã no nhũm htem ãm mẽ kãm amnhĩ to hêx pix o ri mẽ hkhôt pa. Mẽ kot mar nẽ axtem nẽ Tĩrtũm kapễr kwỳm tanhmã amnhĩ nhĩpêx to kaxyw nhũm htem hêx rom tanhmã mẽ kãm kapễr to. Jakamã kwa mẽ o kora. Mẽ axkãm ajamak rom nẽ amnhĩ nê mẽ omunh mex nẽ.

¹⁶ Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nẽ rĩ kormã tanhmã mẽ harẽnh to. Mẽ hamaxpễr punuj xwỳnhjaja kêp Tĩrtũm nhỹ hã kapễr jarẽnh xwỳnh kêt. No koja mẽ tãm hamaxpễr nẽ tãm amnhĩ nhĩpêx ka ja hã mẽ omu nẽ mẽ kêp Tĩrtũm nhỹ hã kapễr jarẽnh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nẽ rĩ kormã tanhmã mẽ harẽnh to.

¹⁷ Na htem hamaxpễr punuj hãmri nẽ hkhôt tanhmã amnhĩ tomnuj to. Nom koja mẽhõ hamaxpễr mex nẽ hãmri nẽ hkhôt tãm amnhĩ nhĩpêx mex o pa.

¹⁸ Na htem tanhmã hamaxpễr to xà hkhôt tanhmã amnhĩ nhĩpêx to ho pa.

19 —Nê koja mēhō ò pī hpàr ô hkêt japêr nhũm tee ri omu hāmri nê krāhta nê kuwym kumê. Ja pyrà nê koja mēhō tanhmã amnhĩ tomnuj to ho pa nhũm Tĩrtũm tee ri ja hã omu hāmri nê ã kot amnhĩ nhĩpêx anhỹr o paja mỹrapê kuwy hwỳr kumê.

20 Jakamã kot kaj mē tanhmã mē kot amnhĩ nhĩpêx to ho pa hã akwỳjê pumu nê ra aprĩ hã tanhmã mē kute hã mē omunh kurê kumrêx. Mē kêp Tĩrtũm nhỹ hã kapêr xwỳnh ã mē omu rý mē kêp hkwỳm ri kapêr xwỳnh ã mē omu. Anê.

Mê kot Tĩrtũm nhō krĩ hwỳr gjêx mã xwỳnhjê jarênh

Rukre 13.25-27; mããnên Sikũn Korĩt 13.5; Wam Juãw 2.3-6

21-23 Nhũm Jejus arĩ mē kãm kapêr nê mē kãm:

—Nê Inhipeêxà Tĩrtũm mē wa inhō krĩa wỳr koja mē piitã gjêx kêt nê. ãm mē kot kapêr kôt amnhĩ nhĩpêx o mē pa xwỳnh pixjaja koja mē nhỹrmã ma hwỳr agjê. Na hte mē hkwỳjaja ixto “Pahihti” anhỹr ã ijarênh tã no ãm ixkôt ri amnhĩ nhĩpêx kêt nê. Jakamã koja mē nhỹrmã wa inhō krĩ hwỳr àpir kêt nê. Kot paj nhỹrmã mē piitã mē htĩr ri tanhmã mē kot amnhĩ nhĩpêx to ho pa hã mē omunh xà hkôt tanhmã mē harênh to. Mē mex ã mē hkwỳjê jarê nê mē kot amnhĩ tomnuj ã mē hkwỳjê jarê. Hāmri nhũm mē hkwỳ kot ixkôt amnhĩ nhĩpêx o pa hkêt xwỳnhjaja kuwyta wỳr ma pa pymaj tee ri amnhĩ kukamã hamaxpêr hāmri nê tanhmã inhmã amnhĩ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtĩr ri pikap ixpare ri anhỹ hã aa mē kot mēmoj pumunh kêt kwỳ ho anhỹr rax nê. Nê ixkwỳjê nê

mêkarômnuti jano nê mê kãm akapêr jarênh o ri ixpa. Kwa xà ate ja hã ixpumunh kêt?” Anhÿr o inhmã amnhĩ jarê.

—Nom mê htĩr ri ã mê kot amnhĩ nhĩpêx anhÿr o pa htã ixkapêr kôt amnhĩ nhĩpêx kêt jakamã kot paj mê kuma nê ãm mê kuma nê amnhĩ nê mê hano nê mê kãm: “Tk kwa mê ma mra. Mê apê ixkwÿ hkêt. Mê ate ixkôt amnhĩ nhĩpêx o apare hã. ãm mê ate amnhĩ tomnuj xwÿnh na ka mê. E mê ma kuwy hwÿr amrar kurê kumrêx.” Anhÿr o kot paj amnhĩ nê mê hano. Hãmri nhũm mê kot ixkôt amnhĩ nhĩpêx o mê pa xwÿnh pixjaja ma Tĩrtũm mê wa inhõ krĩ hwÿr gjêx pa. Anê.

Ixkre pijakrut jarênh

Rukre 6.46-49; mãânên Xiakre 1.22-25; Wam Juãw 2.3-6

²⁴ Nhũm Jejus arĩ mê kãm kapêr nê mê kãm:

—E kot paj mê amã awjarê ka mê ixujarênh ma. Nã mê kot ixkapêr mar nê hkôt amnhĩ nhĩpêx o mê pa xwÿnhjaja te mê kot ixujarênh ja pyrãk. Mê kot amnhĩ nhĩpêx o te mêhõ kot amnhĩ kukamã hamaxpêr mex nê aptÿx kãm amnhĩm ôrkwÿ nhĩpêxja pyrãk.

²⁵ Koja mêhõ aptÿx kãm amnhĩm hipêx nhũm mêmemo arĩgro hã na wrÿk rax nê gô htãm rax nê hanhi no nhũm arĩ ãm tÿx nê xa. Tã kot kaj mê ixkôt amnhĩ nhĩpêx o ri apa hã kot kaj mê te ixkre ja pyrãk. Jao amex nê ajamakêtkati nê ri apa. Te ho gô htãm kot ixkre janhir nhũm arĩ ãm tÿxta pyrãk.

²⁶⁻²⁷ —No mê kot ixkapêr mar nê ãm mar xwÿnhjaja. Te mê kot mêhõ kot amnhĩ kukamã hamaxpêr mex kêt nê htÿx mõi nê gô mÿri gyw

rerek kãm amnhĩm òrkwỹ nhĩpêx pyræk. Koja mẽmo arĩgro hã òrkwỹ hã kòk xàpêr tỳx nẽ na wrỳk rax nẽ. Nẽ gò htàm nẽ hanhi nẽ kêp grành pa. Jakamã koja mẽhõ ixkòt amnhĩ nhĩpêx kêt nẽ te kot ã kot amnhĩ nhĩpêx anhỹr xwỳnhta pyræk. Jakamã kwa mẽ ixkapêr mar tỳx nẽ hkòt amnhĩ nhĩpêx rãhã ho ri apa. Te mẽhõ aptỳx kãm òrkwỹ xãm xwỳnhta pyræk. Anẽ.

²⁸ Nhũm pre Jejusja ã mẽ kãm ujarênh ry anẽ nhũm mẽ amnhĩ jaêr pê kot tanhmã mẽ ahkre htoja mar o hkrĩ.

²⁹ Hãmri nẽ axpẽn mã harênh o:

—Hêxta waa nẽ. ãm hãmri na ã mẽ pamã kapêr anẽ. àhpumunh tỳx kòt na hte ãm hãmri tanhmã mẽ pamã ujarênh to. Pêr ãm Tĩrtũm kapêr tũm o mẽ ahkre xwỳnhjê kurom àhpumunh tỳx kumrêx. Anẽ.

8

Kà nhy hkro xàpêr o pa xwỳnh jarênh

Makre 1.40-45; Rukre 5.12-16

¹ Tã nhũm Jejus mẽ kãm kapêr pa hãmri nẽ hixêh prêeta rũm akupỹn wrỳ nẽ ma tẽ nhũm mẽ ohtô nẽ ma hkòt mra.

² Hãmri nhũm mẽhõ my hkà nhy hkro xàpêr o pa xwỳnhja omu nẽ hwỳr tẽ. Hãmri nẽ kutã hkõnkrã ho tẽm nẽ hipô nẽ nhỹ nẽ amnhĩ to kuwỳ nẽ kãm:

—Pa Pahihti. E ot pa awỳr amnhĩ to tẽ. Akupỹm ate mẽ ixto mex kaxyw axàhpumunh tỳx jakamã kot ka amã akupỹm ixto mex prãm nẽ mãmrĩ ixto mex. Anẽ.

³ Hãmri nhũm Jejus kuma nẽ hkà punuti hã ìhkra xi. Amnhĩ kamã kahak kêt nẽ hã ìhkra xi nẽ kãm:

—Nà kot paj ato mex. E akupỹm akà mex. Anẽ.

Hãmri nhũm hkà akupỹm mex kurê kumrêx.

⁴ Hãmri nhũm Jejus kãm:

—E kêr ka amnhĩ tâ mẽ kãm tanhmã ijarênh to hkêt rãhã ma patre hwÿr tẽ kê akupỹm akà mex ã apumu. Hãmri ka hpãnhã amnepê m finat Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ piitã akupỹm akà mex ã apumu. Anê.

Pôristi krãhtũm mã àpênh xwÿnh jarênh

Rukre 7.1-10

⁵ Tã nhũm Jejus ma krĩ pê Kapanaũ hwÿr mõ. Hãmri nê hwÿr pøj nhũm Rõm nhõ xwÿnh pê pôristi krãhtũmja omu nê hwÿr tẽ. Kêp Ijaew kêt tâ hwÿr tẽ. Na pre kãm àpênh xwÿnh kêp à htÿx nê nõ nhũm omu nê tee ri hkukamã hamaxpêr. Hãmri nê Jejus ra õ krĩ hwÿr hpôx ã omu nê hwÿr tẽ nê kãm harê nê kãm:

⁶ —Pa Jejus? E ot pa awÿr tẽ. Inhmã àpênh xwÿnhja na ixpê à htÿx nê. Ra ã kamã htyk pa nê nõ. O mũj inhõrkwỹ kamã nõ. Anê.

⁷ Nhũm Jejus kuma nê kãm:

—Tÿ? Tôe. Nà pa ma akõt tẽ nê akupỹm amã ho mex. Anê.

⁸⁻⁹ Hãmri nhũm tee ri kuma nê kãm:

—Kwa akĩnhã ixpê Ijaew kêt jakamã ixte amnhĩ kuk ã ixpijaàm. ãm ja rũm mãn akapêr pix o akupỹm inhmã ho mex nà? Ixpê mẽ hkrãhtũm na pa hte inhõ pôristi mã mẽmoj tâ karõ nhũm mẽ inhmar xà hkõt inhmã mẽmoj tanhmã ho. Na pa hte mẽ kãm: “E mẽ ma mra nê ã amnhĩ nhĩpêx anê.” Anê nhũm htem inhma nê ma mrrar kurê kumrêx. Rÿ pa mẽ kãm: “E mẽ amnê ixwÿr mra nê ã amnhĩ nhĩpêx anê.” Anê nhũm mẽ inhma nê ixwÿr mra.

No kêt ixrom axàhpumunh tỳx kôt na ka hte mẽ àja mã akapêr nhũm ama nẽ mẽ kêp hapôx nẽ ma mrar kurê kumrêx. Jakamã kwa ãm ja rũm akapêr pix o akupỹm inhmã ho mex nà? Anẽ.

¹⁰ Hãmri nhũm Jejus amnhĩ jaêr pê kot kãm ã kapêr anhỹrta ma nẽ hkĩnh nẽ. Hãmri nẽ hã hkôt ri mẽ mõi xwỳnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tã mẽ arom amnhĩ kaxyw inhmã hamaxpêr tỳx nẽ. Aa mẽ atõ uràk nẽ ã amnhĩ kaxyw inhmã ajamaxpêr tỳx anhỹr kêt tã nhũm mẽ arom kãm àpênh xwỳnh kaxyw ã inhmã hamaxpêr tỳx anẽ.

¹¹ Nà koja nhỹrmã mẽ hkwỳjaja kêp Ijaew kêt tã ohtô nẽ pika piitã kurũm ma Tĩrtũm mẽ wa inhõ krĩ hwỳr api nẽ hwỳr agjê. Nẽ wa ixkuri wa inhõ krĩ kamã Ijaew pàr krax pê Apraãw nẽ Ijak nẽ Jako mẽ pimràatã pa ho pa. Mẽ kêp Ijaew kêt tã mẽ ìhkô hã apkur mex o hkrĩ nhũm Tĩrtũm mẽ ho mex rax o pa.

¹² No pêr mẽ apê Ijaew kwỳjaja kot kaj mẽ hkôt hwỳr agjêx kêt nẽ. Tĩrtũm kãm hwỳr mẽ agjêx prãm tã ka mẽ axtem nẽ hkaga. Jakamã kot kaj mẽ ma kamàt kô xihtỳx rax wỳr ajapêx nẽ mẽ kêp awry rax nẽ mẽ kot amnhĩ xà htỳx kamã hamak tũm xàta kamã apa ho apa. Hãmri nẽ tee ri mẽ ixwỳr agjêx prãm kaprỳ nẽ akaprĩ xàj mur nẽ amnhĩ kamã agryk tỳx nẽ. No ãm tee ri amnhĩ kamã agryk kaprỳ. Mẽ ate Tĩrtũm kapêr kaga nẽ hkôt amnhĩ xunhwỳr kêt jakamã kot kaj mẽ nhỹrmã ã amnhĩ nhĩpêx anẽ. Anẽ.

¹³ Nhũm pre ã Jejusja mẽ kãm kapêr anẽ. Hãmri nẽ pôristi krãhtũmta mã kãm:

—E māmri ma akupÿm tē nē amã àpênh xwÿnhhta pumu. Ra ate kaxyw inhmã ajamaxpêr tÿx jakamã na pa ra akupÿm amã ho mex. E akupÿm tē nē omu.

Anhÿr o kãm kapêr rôm nhÿm ra akupÿm kãm mex kurê kumrêx.

*Jejus kot ahpÿnhã mē à xwÿnhjê ho mex
Makre 1.29-31; Rukre 4.38-41*

¹⁴ Tã nhÿm Jejus ma Simãw Pêtre nhôrkwÿ hwÿr tē nē hwÿr axà. Nhÿm Simãw Pêtre xupãnhgêx ra à nē hkà kagro htÿx nē nõ.

¹⁵ Hãmri nhÿm Jejus hwÿr axà nē omu nē ìhkra hã kupy nhÿm hkà hakry nē akupÿm hihtÿx kurê kumrêx. Jakamã kãnhmã nhÿ nē mē kãm mēõ hã àpênh o ri mra.

¹⁶ Tã nhÿm ra awjakry. Ra kamàtre ho mō nhÿm mē piitã Jejus wÿr mē à xwÿnhjê ho mra. Nē mēkarōmnuti kot mē hwÿr gjêx xwÿnhjaja nhÿm mē hwÿr mē o mra. Hãmri nhÿm mē omu nē akupÿm mē piitã mē ho mex. Mē à xwÿnhjê ho mex nē mē hkwyjê nē mēkarōmnuti jano. Æm kapêr pix o mē nē mē hano nhÿm mē kêp hapôj nē ma hapêx.

¹⁷ Na pre ra Tirtÿm nhÿ hã kapêr xwÿnh finat Ijaisja ã amnhÿ nhÿpêx anhÿrja kukamã amnepê mē kãm harênh o:

Tirtÿm kot mē pahwÿr mēnh mã xwÿnhja koja nhÿrmã wrÿ nē mē panê mē paxà piitã rênh pa nē akupÿm mē pahto mex pa. Anê.

Na pre ã finat Ijaisja Jejus kukamã harênh anê. Tã nhÿm wrÿ nē kot harênh xà hkôt ã amnhÿ nhÿpêx anhÿr o pa.

Wa kãm Jejus kôt amnhĩ xãm prãm xwýnh wa harẽnh

Rukre 9.57-62

¹⁸ Tã nhũm Jejus amnhĩ pu hã rĩt nẽ tee ri hwýr mẽ mrar xwýnhjê pumu hãmri nẽ hkôt mẽ pa ho mẽ pa xwýnhjê mã kãm:

—E ma pu mẽ pàr mã agjê nẽ ma xarmã mỗ. Anẽ.

¹⁹ Hãmri nhũm mẽ nojarêr rôm nhũm Tĩrtũm kapêr tũm o mẽ ahkre xwýnhjê hõ Jejus wýr tẽ nẽ kãm:

—Pa mẽ ijahkre xwýnh? E pa ma akôt ri ixpa ho ixpa nà. Anẽ.

²⁰ Hãmri nhũm kuma nẽ kãm:

—Ko ka mã. Kam nẽ rĩ ma ixkôt ri apa. Nom kêr ka inhmar kumrêx. Xore na hte pika hkre kamã hikwỹ. Nẽ kuwênhre pĩ nhĩmõk ã hikwỹ. No pa ixpê Tĩrtũm kot mẽ awýr inhmênh xwýnh tã mry hkĩnhã inhõrkwỹ hkêt. Na pa hte amarĩ nhãm krĩ hwýr ixpa nẽ nhãm hõ hwýr ixpa. Tã xà kot ka ixpyrà nẽ ã amnhĩ nhĩpêx anhỹr o ri apa nà? Anẽ.

²¹ Hãmri nhũm pãnhã hõja hwýr tẽ. Ra mẽ kot hkôt amnhĩ xunhwýr xwýnhjê hõja hwýr tẽ nẽ kãm:

—Pa Pahihti. E pa amã amnhĩ jarẽ ka inhma. Kot paj ma akôt ixpa ho ixpa no ãm kormã. Koja nhỹrmã inhĩpêêxà tanhmã amnhĩ to nẽ ty mãn. Pa haxà hãmri nẽ rĩ kormã ma akôt ixpa ho ixpa. Anẽ.

²² Hãmri nhũm kuma nẽ kãm:

—Kwa nà ri ã ajamaxpêr anhỹr kêt nẽ. Ma ixkôt apa ho apa kurê kumrêx. Kê mẽmoj inhnê ano kupyrr y àpê àmnàr kêt nẽ. Kwãr mẽ htĩr tũm nẽ mẽ pa hkêt mã xwýnhjaja mãn axwakre kamã amã anhĩpêêxà jamãr o pa nẽ haxà. Anẽ.

*Jejus kot kôk o pinhkrênh jarênh
Makre 4.35-41; Rukre 8.22-25*

²³ Tã nhũm mẽ ra xarmã nojarêt nhũm Jejus mẽ hkôt mẽ pa ho mẽ pa xwýnhjaja pàr wýr agjê hãmri nê himô raxja ã ma xarmã mỗ.

²⁴ Hãmri nhũm Jejus ra ôt xwa nê ra gõr nê nỏ. Puh nhũm naja hkoko ho mỗ nê kôk xàpêr tỳx kumrêx. Nhũm gô kànhmã harĩ nê axpên tak tỳx nê. Xatã axpên tak nê pàr kre kamã axkapĩ nhũm ra àr o mỗ. Hãmri nhũm mẽ tee ri omu nê kãm ma htỳx kumrêx. Nê tee ri amnhĩ nhĩpêx. No nhũm Jejusja htỳx gõr nê nỏ.

²⁵ Hãmri nhũm mẽ hwýr hprôt nê kumra nê kãm:

—Kwa Pahihti. Kot puj mẽ jarãhã pahtyk pa. Kwa tokyx kànhmã nhỹ nê ri tanhmã amnhĩ nhĩpêx to wehe. Anê.

²⁶ Hãmri nhũm hkrākato nê kànhmã nhỹ nê kôk mã kapêr nê kãm:

—E kwa hãmri anhĩkrê. Anê.

Puh nhũm hpinhkrênh pa nhũm gôja tãm nỏr kurê kumrêx. Hãmri nhũm Jejusja hkôt mẽ pa ho mẽ pa xwýnhjê hwýr apkjê nê mẽ kãm:

—Hêxta waa nê. Kwa pêr ãm kormã te mẽ ate amnhĩ kaxyw Tĩrtũm mẽ wa inhmã ajamxpêr tỳx kêt pyrāk. Hã na ka mẽ amã ma xàj tee ri amnhĩ kukamã ajamxpêr. Anê.

²⁷ Hãmri nhũm mẽ amnhĩ jaêr pê ã kot amnhĩ nhĩpêx anhỹrja ã omu nê tee ri hamaxpêr nê axpên pumunh pê omunh o kuhê. Hãmri nê axpên mã:

—Kokỹỹ. Pêr Jejus kêp mẽ panhĩo hkêt. Mẽ pahtõ kot pu we te kot amnhĩ nhĩpêx pyrã nê kôk mã pakapêr nhũm hpinhkrênh kurê kumrêx? Nà

Jejusja mẽ pakurom àhpumunh tỳx o àhpumunh tỳx.
Anẽ.

Jejus kot wa nê mẽkarõmnuti janor

Makre 5.1-20; Rukre 8.26-39

²⁸ Tã nhũm mẽ ra himô rax pê Garirejja ã rê nẽ pika pê Geras wỳr pôj nẽ kamã mỗ. Hãmri nhũm ra mẽhỗ myja wa hamẽxkrut nẽ mẽ kutã tẽ. Ra mẽkarõmnuti kot hamẽ wa hwỳr gjêx xwỳnhja wa. Mẽkarõmnuti xohtô kot tanhmã wa ho jakamã nhũm wa oprê htỳx nẽ hihtỳx rax nẽ wa pa. Jakamã nhũm mẽ piitã kãm wa uma nẽ amnhĩ nẽ mẽ htykjê jagjênh xà hã kên kre kaêx kãm wa kumẽ nhũm wa kamã pa ho pa. Jakamã nhũm wa Jejus kutã tẽ nẽ amnhĩ wỳr omu hãmri nẽ amnhĩ nẽ tanhmã kãm kapêr to. Nom mẽkarõmnuti nhỹ hã àmra kamã kãm kapêr nẽ kãm:

²⁹ —Pa Tĩrtũm Kra Jejus? Mo kaxyw na ka mẽ ixwỳr tẽ? Kwa tanhmã mẽ ixto hkêt nẽ. Ate tanhmã mẽ ixtomnu hto hã arĩgrota kormã ka-toore hã. Anẽ.

³⁰ Nhũm ra krĩ nhỗ xwỳnhjê hkrit hagrô ohtô nẽ ri mẽ hpum pa.

³¹ Nhũm mẽkarõmnuti mẽ omu hãmri nẽ amnhĩ to Jejus wỳ nẽ kãm:

—Kwa kot ka jahti wa nê mẽ ijapôx japêr nẽ mẽ kot amnhĩ xà htỳx kamã hamak tũm xàta wỳr mẽ ixrênh kêt nẽ. Hagrô hkwy mũj wỳr mãn mẽ ixrê pa mẽ hpãnhã hwỳr mãn hagiê nà? Anẽ.

³² Hãmri nhũm mẽ kuma nẽ mẽ kãm:

—Tõe mẽ tãm mẽ hwỳr mãn mra. Anẽ.

Hãmri nhũm mẽ kuma nẽ myta wa kêp hapôj nẽ hagrô hwỳr mrrar kurê kumrêx nẽ hpãnhã kãm gjêx pa. Hãmri nhũm hagrôta mẽkarõmnuti pymaj

amÿra nê ma hprôt nê himô hã hixêt prêk ã axpum rôrôk nê gôx kãm mrô nê pikaprâr pa.

³³ Hãmri nhũm hagrô jamâr o ri mē pa xwÿnhjaja tee ri omu hãmri nê ma akupÿm krīm hprôt nê mē kãm awjarē. Nê myta wa akupÿm tãm hkrã hã harēnh o hprôt.

³⁴ Hãmri nhũm krī nhõ xwÿnhjaja tee ri mē hkrit jarēnh ma nê ma piitã Jejus wÿr mra nê hkaxpa. Hãmri nê amnhĩ nê kãm:

—E kwa mē ma amrar kurê kumrêx. Anē.

Hãmri nhũm mē kuma nê awjanã nê ma akupÿm pan rê.

9

ĩ kamã htyk xwÿnh jarēnh

Makre 2.1-12; Rukre 5.17-26; Juãw 10.37-38

¹ Nhũm Jejus mē hkôt mē pa ho mē pa xwÿnhjaja awjanã nê ma akupÿm pâr wÿr mra nê gjêx pa nê akupÿm xarmã rê nê akupÿm Jejus nhõ krī hwÿr mō.

² Hãmri nê hwÿr pôj nhũm krī nhõ xwÿnh kwÿjaja mē omu nê ĩ kamã htyk xwÿnhja mÿ nê Jejus wÿr o tē. Nôr xã kamã nôr rãhã nhũm mē hã hije nê kumÿ nê hwÿr o tē. Hãmri nhũm amnhĩ tã mē omu. Ra mē kot hkràmnhwÿta kaxyw kãm hamaxpēr tÿx ã mē omu nê ĩ kamã htyk xwÿnhhta mã kapēr nê kãm:

—Pa? Kwa tee ri amnhĩ kukamã ajamaxpēr kêt nê. Na pa ra apê tanhmã ate amnhĩ tomnuj to ho ijapêx pa. Kot paj axte kãm ijamaxpēr kêt nê. Anē.

³ Hãmri nhũm Tirtũm kapēr tũm o mē ahkre xwÿnhjaja tee ri ã kot kãm kapēr anhÿrja ã kuma nê axpēn mã:

—Tk. Kwa mēhō myti mŭj kēp Tīrtŭm kēt tā te ri kot amnhĩ nhĩpêx pyrāk ã amnhĩ nhĩpêx. Tīrtŭm pix na kot mē nē mē kot amnhĩ tomnuj o hapêx xwŷnh. Anē.

⁴ Hāmri nhŭm Jejus amnhĩ tā mē kuma nē mē kām:

—Kwa mē ã ajamaxpēr anhŷr kēt nē.

⁵ Ixte mē nē mē kot amnhĩ tomnuj o ijapêx par ã amnhĩ jarēnh tā mē ate ja kôt ixpumunh kēt jakamā na ka mē ja kaxyw ixkôt ajamaxpēr kēt nē. Nom kot paj mē anoo mā akupŷm ĩ kamā htyk xwŷnhta o mex ka mē apiitā hā ixpumu hāmri nē ixkôt ajamaxpēr kurê kumrêx. Ixpê Tīrtŭm kot mē awŷr inhmēnh xwŷnhta na pa. Ixte mē anē mē ate amnhĩ tomnuj rēnh kaxyw na pre mē awŷr inhmē pa mē awŷr wrŷ.

⁶ Tā mē ate ja hā ixpumunh kaxyw kot paj mē anoo mā ja ho mex.

Anhŷr o mē kām amnhĩ jarē hāmri nē ĩ kamā htyk xwŷnhta mā kām:

—E kànhmā xa nē anōr xàta py nē ma akupŷm anhōrkwŷ hwŷr tē. Anē.

⁷ Puh nhŭm kànhmā ãm kurê kumrêx nē nōr xà py nē mē noo mā kato nē ma akupŷm ōrkwŷ hwŷr tē.

⁸ Hāmri nhŭm mē piitā no hapôx rŭnh nē omunh o kuhē nē kamā no pyma htŷx nē. Nē tee ri omu nē axpēn mā:

—Kokŷŷ. Kwa aa mē pahte ã mēhō kot amnhĩ nhĩpêx anhŷr ã omunh kēt tā jarāhā ja pumu.

Anhŷr o Jejus jarē hāmri nē ŷ hā Tīrtŭm mā mex o mex ã harē.

*Jejus kot amnhĩ kôt Matêwre hwÿr
Makre 2.13-17; Rukre 5.27-32*

⁹ Tã nhũm Jejus mẽ kêp kato nê hkôt mẽ pa xwÿnhjê mẽ nhũm mẽ ma mō. Hãmri nê pa ixpê Matêwre ixpumu. Ixte Rôm kãm mẽ ho amnhĩptâr xwÿnh mã krĩ nhõ xwÿnhjê pê kàxpore hkwy jamÿnh xwÿnh na pa pre. Nom mẽ kot ho tewên kryre htã ixte amnhĩm hkwy ho ixârĩk prãm xaj na pa pre hte mẽ kãm ho rũnh nê harê. Jakamã nhũm mẽ piitã kãm ixkĩnh kêt nê. Tã pa pre mẽ kêp kàxpore jamÿnh xà hã ixkre kamã mẽ kêp hamÿnh o nhỹ nhũm Jejus mẽ hkwyjaja ijãnh mra nê ixpumu nê amnhĩ kôt ixwÿ nê inhmã:

—Pa? E axàpênhta kaga nê hpãnhã amnê mẽ ixkôt mãn tẽ nê ixkôt mãn ri apa ho apa. Anê.

Hãmri pa kuma nê ixàpênh kaga nê ma hkôt tẽ. Nê hpãnhã hkôt ixpa ho ixpa.

¹⁰ Hãmri nê mẽmo arĩgro hã amnhĩ nhõrkwy hwÿr Jejus nê hkôt mẽ pa ho pa xwÿnhjaja mẽ ixkràmnhwÿ hkwyjê hwÿ. Nhũm mẽ piitã mra nê inhõrkwy hwÿr agjê nê ixkutã apkur o hkrĩ. Nê ixpyrà nê Rôm nhõ pahi mã mẽ kêp kàxpore hkwy jamÿnh xwÿnh kwÿ haxwÿja ixwÿr mra nê mẽ ixkutã apkur o hkrĩ.

¹¹ Hãmri nhũm Parijew nhõ xwÿnhjaja mra nê inhõrkwy kapem mẽ ixàpkur ã mẽ ixpumu. Nê tee ri mẽ ixkaêx ã Jejus pumu hãmri nê hkôt mẽ pa ho mẽ pa xwÿnhjê hwÿr agjê nê mẽ ixtã mẽ kãm akir nê mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nê mẽ kutã apkur o nhỹ. Kwa nã mẽ kot amnhĩ tomnuj xwÿnh kênã. Jejus kot amnhĩ to mex ronhỹx mẽ kutã apkur kêt nê. Anê.

¹² Hâmri nhũm Jejus amnhĩ tã ã mẽ kapêr anhỹrja ma nẽ mẽ kãm:

—Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tôtôja mẽ mex xwỳnhjê hwỳr mra nẽ mẽ hkane? Nà ãm mẽ à xwỳnhjê pix wỳr na hte mra nẽ tanhmã mẽ hkane hto. Ra mẽ ate ja pumunh mex. Tã ja pyrã nẽ na pa pre mẽ kot amnhĩ to mex xwỳnhjê hwỳr ixwryk kêt nẽ. Mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nẽ ã jajê kutã ixàpkur o inhỹr anẽ.

¹³ Ga mẽ ma mra nẽ Tĩrtũm kapêr ã kagà htũm kot ja jarẽnhja kamã harẽ nẽ ama. Harẽnh kot:

Na ka htem inhmã tanhmã amnhĩ jarẽnh to kaxyw hãmri nẽ inhmã mẽmoj gõ nẽ tanhmã ixto mex to. Nom kêr ka mẽ ãm ja pix ho anhỹr kêt nẽ. Mẽ mããnẽn mẽ piitã tanhmã mẽ ho mex to ho ri apa. Anẽ.

—Ã Tĩrtũm kapêr ã kagà htũm kot ja jarẽnh kot anhỹr. Tã ja pyrã nẽ na pa pre mẽ kot amnhĩ tomnuj xwỳnhjê hwỳr wrỳ nẽ mẽ kamã ixukapřĩ ho ixpa. Mẽ kot amnhĩ tomnuj kaga nẽ hpãnhã tãm amnhĩ nhĩpêx kaxyw na pa pre ã mẽ hwỳr ixwryk anẽ. Tã ka mẽ ri atỳx amnhĩ krã hkôt ã ixto akapêr anẽ. Anẽ.

*Mẽ kot mẽmoj tã Jejus kukjêr
Makre 2.18-20; Rukre 5.33-35*

¹⁴ Tã nhũm Juãw Paxis kôt mẽ pa xwỳnhjaja Jejus wỳr mra nẽ mẽmoj tã hkukja nẽ kãm:

—Pa? E ot pa mẽ awỳr mra. Kwa mẽ inhmã mẽmoj jarẽ. Na pa htem tũhã Parijew nhõ xwỳnhjê pyrã nẽ ixàpkur kêt kãm Tĩrtũm mã amnhĩ jarẽ.

Tã nom akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarēnh o pa. Kwa mo na htem mẽ ixpyrà nē tōhã apkur kêt kamã kãm amnhĩ jarēnh kêt nē? Anē.

¹⁵ Hãmri nhũm mẽ kuma nē mẽ kãm:

—Nà mo kaxyw kot kêt mẽ apkur kêt rãhã kãm amnhĩ jarē? Mẽ hkaprĩre hã. Mẽ kot ixkôt pa ho pa hã amnhĩ pumunh jakamã na htem hkĩnh nē ixkôt pa. Kormã ixte mẽ kamã ixpa kênã kot kêt mẽ apkur kêt rãhã Tĩrtũm mã tanhmã amnhĩ jarēnh to. Xà na htem hkràmnhwỳ hã hkĩnh kaxyw hã akuprõ nē hkaprĩ nē apkur kêt o kamàt nē mỳr o hkrĩ? Nà na htem anhỳr kêt nē. Na htem hã akuprõ nē hkĩnh nē hã apkur rũnh nē. Ja pyrà nē na hte ixkôt mẽ pa ho mẽ pa xwỳnhjaja ixkôt kormã àmnhĩx hkĩnh nē apkati mẽ apkur o pa. Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ hkaprĩ htyx nē rĩ kormã tōhã apkur kêt rãhã Tĩrtũm mã amnhĩ jarē. Anē.

*Mẽ pahte Jejus kôt amnhĩ nhĩpêx
Makre 2.21-22; Rukre 5.36-39*

¹⁶ Nhũm Jejus mẽ piitã mẽ kãm kapēr nē mẽ kãm:

—Mẽ kot amnhĩ tomnuj xwỳnhjaja ra mẽ kot amnhĩ nhĩpêx tũm o amnhĩ pyràk jakamã na htem tanhmã mẽ kot amnhĩ nhĩpêx nyw tota kaga.

¹⁷ Tã ixte amnhĩ nhĩpêx nywja te kot mẽ ate amnhĩ nhĩpêx tũm pyràk kêt jakamã na ka htem ixkapēr ma nē ãm ama. Kwa mẽ inhma nē mẽ ate amnhĩ nhĩpêx tũmja gryk ã ixkaga hkêt nē. Anē.

*Mẽ hkra htyk nē mēhõ ni kamrô wa harēnh
Makre 5.21-43; Rukre 8.40-56*

18 Nhũm pre ã Jejus mẽ kãm kapêr anhỹr o xa. Rôm nhũm mẽõ pahihtija tẽ nẽ mar o xa. Hãmri nẽ hamaxpêr o:

—Kokỹỹ. Jejusja ãm hãmri kêp pahi maati kumrêx. Hã na ri ã kapêr mex anẽ. E pa hwỳr tẽ nẽ ixkrare ho kuwỳ. Anẽ.

Hãmri nẽ hwỳr tẽ nẽ kutã hkõnkrã ho nhỹ nẽ kãm:

—Pa akupỹm mẽ ixto mex xwỳnh? E ot pa awỳr tẽ. Kwa ma ixkõt tẽ nẽ inhmã ixkra nire pumu nẽ tanhmã inhmã ho kê akupỹm inhmã htĩr. Na ham ixpê ty pa kaxyw amã ijamaxpêr nẽ man awỳr tẽ. Anẽ.

19 Hãmri nhũm kuma nẽ kãm:

—Tõe. Nà kot paj ma akõt tẽ. Anẽ.

Hãmri nẽ ma hkõt tẽ. Mẽ ixpê hkõt ixpa ho ixpa xwỳnhjê mẽ pa mẽ ma hkõt mỗ.

20-21 Nhũm mẽhõ ni kamrô rãhã ho pa xwỳnhja ma mẽ ixkõt tẽ. Na pre hte hkamrô hkryre rãhã ho pa hã amgrà pê 12 nẽ tee ri kãm amnhĩ mex prãm o pa. Jakamã Jejus jarênh ma nẽ amnhĩ kaxyw kãm hamaxpêr kurê kumrêx nẽ hamaxpêr o:

—Ma pa kop ma hwỳr tẽ nẽ kêp ê nhĩrê pix kupênh tã akupỹm inhmex japêr. Anẽ.

Hãmri nẽ ma mẽ ohtôjê kaêx kõt hwỳr tẽ. Nẽ katut kõt tẽ nẽ kêp ê nhĩrê kupê.

22 Hãmri nhũm Jejus ho hakêx nẽ amnhĩ tã omu nẽ kãm:

—Pa? Kwa tee ri amnhĩ kukamã ajamaxpêr kêt nẽ. Ate amnhĩ kaxyw inhmã ajamaxpêr tỳx jakamã na ka ra akupỹm amex. E mãmri aja-makêtkati nẽ ri apa. Anẽ.

Hāmri nhũm akupỹm mex nẽ hkĩnh tỳx nẽ ma akupỹm tẽ.

²³ Hāmri pa mẽ ma htyk xwỳnh nhĩpêêxà hkôt mra nẽ òrkwỹ hwỳr agjê nẽ mẽ pikuprõnh xwỳnhjê pumu. Nhũm mẽ ra mẽ hã htu rax nẽ. Nẽ omũj ri kaprĩ xàj pifti kakôr o hkrĩ nẽ omũj ri mur. Kàx pẽ mur nẽ amnhĩ tak o hkrĩ.

²⁴ Hāmri nhũm Jesus mẽ hwỳr axà nẽ mẽ omu. Nẽ ra kot my hkrata htyk ã omunh tã kuri mẽ mỳr o mẽ hkrĩ xwỳnhjê mã kapẽr nẽ mẽ kãm ãm òt nẽ nòr ã harẽ nẽ mẽ kãm:

—Pa? Kwa mon ka mẽ ri akaprĩ nẽ amỳr o akrĩ? E mẽ ma mra. Na wa hkrata wa kẽp htyk kêt nẽ. Na ãm gòr nẽ nò. Anẽ.

Hāmri nhũm mẽ kot ra htyk ã omunh mex jakamã kuma nẽ ãm kuma. Nhũm mẽ hkwyja axtem nẽ ri axpẽn mã hã hpẽr o pikẽnh o hkrĩ.

²⁵ Hāmri nhũm kapôt mã mẽ hano nhũm mẽ hapôj nẽ kapôt ã kuhê. Hāmri nhũm Jesusja htyk xwỳnhhta wỳr axà nẽ hpa hã kupy nẽ kànhmã ãm nhũm akupỹm htĩr nẽ kànhmã ãm kurê kumrẽx.

²⁶ Hāmri nhũm mẽ piitã akupỹm htĩr kãm omu nẽ ma ri krĩ piitã hkôt ri mẽ kãm harẽnh o hprôt.

Wa nohkre xwỳnh wa harẽnh

Matêwre 20.29-34

²⁷ Tã nhũm Jesus kato nẽ ma tẽ. Pa mẽ hkôt ixpa ho ixpa xwỳnhjaja ma hkôt mỗ. Hāmri nhũm wa myja wa hamẽxkrut. Hamẽ wa nohkre xwỳnh wa Jesus jarẽnh ma nẽ hã ajêt nẽ hkôt rôrôk o mỗ. Nẽ xatã amnhĩ to hwỳr o hkôt rôrôk o mỗ nẽ kãm:

—Pa Jesus? E Tĩrtũm kot mẽ ixkaxyw axãm jakamã kwa wa ixpumu nẽ wa ixkamã axukaprĩ kêt wehe. Anẽ.

28 Hãmri nhũm wa kuma nẽ wa hkukamã nhỹri ixkrem axà nhũm wa hkôt axà nẽ xa nhũm wa omu nẽ wa kãm:

—Pa? E xàn ka wa ra amnhĩ kaxyw inhmã ajamaxpěr tỳx nẽ nà? Anẽ.

Hãmri nhũm wa kãm:

—Tỳ. Wa ixte amnhĩ kaxyw amã ijamaxpěr tỳx kênã. Anẽ.

29 Hãmri nhũm wa kuma nẽ hamẽ wa no hã ìhkra xi nẽ wa kãm:

—Tôe. Nà war ate tanhmã amnhĩ kaxyw inhmã ajamaxpěr to xà hkôt kot paj war anhĩpêx. Anẽ.

30 Hãmri nhũm wa akupỹm rĩt mex kurê kumrêx. Hãmri nẽ akupỹm kato nẽ ma htẽm kaxyw nhũm wa kãm:

—E kêr ka wa nhãm mẽ kãm ixte war ato mex ã ijarênh kêt nẽ. Âm kwarĩ ho kwarĩ.

31 Anhỹr tã no nhũm wa kuma nẽ ãm kuma nẽ wa ma tẽ nẽ krĩ pu hã mẽ piitã mẽ kãm ri war amnhĩ tã harênh o mra.

Kapěr kêt xwỳnh jarênh

32 Tã nhũm Jesus ma axte nhỹhỹm mẽ ixto mỗ. Hãmri nhũm mẽhõ my mẽkarõmnuti kot hwỳr àr nẽ tanhmã ho nhũm kapěr kêt nẽ pa xwỳnhja nhũm mẽ Jesus wỳr o tẽ.

33 Hãmri nhũm omu nẽ nê mẽkarõmnuti jano nẽ kãm:

—E kêp akato nẽ ma tẽ. Anẽ.

Hãmri nhũm kuma nẽ kurũm kato nhũm akupỹm kapěr mex kurê kumrêx. Hãmri nhũm mẽ kot hã omunh xwỳnhjaja tee ri kot mẽkarõmnuti janor ã omu nẽ kamã no pyma nẽ. Nẽ axpẽn mã:

—Kokÿÿ. Aa mẽ pahte ã mẽhõ kot anhÿr pumunh kêt kumrẽx tâ na pu mẽ jarãhã ja pumu. Anẽ.

³⁴ Nom nhũm mẽ hkwÿ pê Parijew nhõ xwÿnhjaja axtem nẽ hã mẽ kãm kapër o:

—Tk. Kot amnhĩ krã hkõt mẽ hanor kêt kênã. Mẽkarõmnuti nhõ pahi nhÿ hã kot mẽ nẽ mẽ hanor kênã. Anẽ.

*Jejus kêp mẽ pakamã ukapřĩ xwÿnh
Makre 6.34; Rukre 10.2-3; Juãw 4.35*

³⁵ Tã nhũm Jesusja krĩ ho ohtõ nẽ hkõt ri mẽ kãm Tĩrtũm kapër jarẽnh o pa. Pa mẽ hkõt ixpa. Na prehte nhÿri krĩ hwÿr pøj nẽ mẽ kot Tĩrtũm kapër o mẽ ahkre xà hã ixkre hwÿr mra nẽ hwÿr agjê nẽ mẽ pikuprõnh xwÿnhjê jahkre. Nẽ mẽ kãm:

—E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xaj hkõt amnhĩ xunhwÿ nẽ kapër kõt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa.

Anhÿr o mẽ kãm kapër. Hãmri nẽ ahpÿnhã ri tanhmã mẽ à kute xwÿnhjê ho mex. Nhũm mẽ ohtõ nẽ hkõt mar o pa.

³⁶ Hãmri nhũm mẽ omu nẽ kãm mẽ hkapřĩ nẽ. Na prem tee ri amnhĩ kukamã hamaxpër o pa jao ra hkapřĩ nẽ. Nhũm Jesus ja hã mẽ omu nẽ hamaxpër o:

—Hêxta waa nẽ. Na mẽ mex kêt nẽ pa. Te mẽ kêp ôwêhti jamãr xwÿnh kêt kot amnhĩ nhĩpêx pyrãk o htÿx ri pa. Mẽhõ koja kãm mẽ hkapřĩ nẽ tanhmã mẽ ho mex to ho pa? Anẽ.

Hãmri nẽ mẽ kamã ukapřĩ nẽ.

37 Hãmri nê mẽ hã mẽ ixpê hkôt ixpa ho ixpa xwỳnhjê mã kapêr nê mẽ inhmã:

—Nà na mẽ kormã ohtô rax nê Tĩrtũm kapêr mar kêt nê. No ãm kormã mẽ ate mẽ kãm kapêr jarênh o apa kaxyw mẽ agrêre. Te pur rax kãm ra harôj kamrêk par nê ãm tã no ãm kaxyw hikênh xwỳnhjaja grêre pyràk.

38 Jakamã kwa mẽ ho Tĩrtũm wỳ kê axte mẽ kaxyw mẽ akwỳjê rê kê mẽ apyrà nê ma mẽ hkôt ri mẽ kãm kapêr jarênh o pa. Anê.

10

*Jejus kot mẽ ho 12 nê mẽ rênh
Makre 3.13-19; Rukre 6.12-16*

1-4 Tã nhũm Jejusja hkôt mẽ ixpa ho mẽ ixpa xwỳnhjê ho 12 nê mẽ ixrê. Mẽ ixte ma krĩ piitã hwỳr inhmrar nê ÿ hã mẽ ahkre nê tanhmã mẽ à kute xwỳnhjê ho mex o ixpa kaxyw. Nê ÿ hã mẽ nê mẽkarõmnuti janor o ixpa kaxyw nhũm mẽ ixrê. Na pre mẽ ixto 12 nê mẽ ixrê. ã mẽ inhĩxi kot anhỹr.

Pêtre kumrêx na pre kuta. Hixi hõ pê Simãw.

Nê hkôt htõ Andreja ta.

Nê hkôt Jepetew kra Xiakreja ta.

Nê hkôt Xiakre htõ Juãwja ta.

Nê hkôt Firiptija ta.

Nê hkôt Patoromewja ta.

Nê hkôt Tomasja ta.

Nê hkôt pa ixpê Matêwre nhũm pre mẽ hkôt ixta.

Ixpê pahĩ nhỹ hã kãm mẽ kêp ixujamỳnh xwỳnh tã nhũm pre jajê hkôt ixta.

Nê ixkôt Apew kra Xiakre hõja ta.

Nê hkôt Tatewja ta.

Ně hkôt Simãw Jeroxja ta.

Ně hkôt Jut Kariotja ta.

Kormã kot mẽ kãm Jejus kurê xwýnhjê
nhĩhkram òr mã nhũm Jejus kot amnhĩ
kukamã omunh mex tã mẽ hkôt amnhĩ
kaxyw kuta.

Ã mẽ ixte ỹ hã mẽ ahkre o ixpa kaxyw mẽ ixrênh
xwýnhjê nhĩxi kot anhỹr.

Jejus kot mẽ kêp 12jê mã mẽ àpênh ã karõ

*Makre 6.7-13; Rukre 9.1-6, 10.1-12, 10.14;
mããnên Atre 13.50-51, 18.6*

⁵ Hãmri nhũm Jejus mẽ ixrênh pa mẽ ma mẽ hwýr
mẽ ixrênh kaxyw tanhmã mẽ inhmã kapêr to mẽ
mẽ inhmã:

—E. Kêr ka mẽ ma mẽ piitã mẽ kãm ri ijarênh o
apa. No ãm kormã mẽ kêp Ijaew kêt xwýnhjê nhõ
pika hwýr apa hkêt mẽ. Rý mẽ kêp Samar nhõ krĩ
hwýr ka mẽ apa hkêt mẽ.

⁶ ãm mẽ pahpê Ijaew nhõ krĩ kôt pix mã mãn ri
apa. Mẽ kot tee ri amnhĩ kukamã hamaxpêr o pa
jakamã te mẽ kêp ôwêhti pikunor mẽ htýx ri mex
kêt mẽ pa pyræk.

⁷ Jakamã kêt ka mẽ ma mẽ hwýr apa mẽ ã mẽ
hkôt ri mẽ kãm akapêr o apa anê mẽ mẽ kãm: “E
kot kaj mẽ ate amnhĩ tomnuj kaga mẽ Tĩrtũm kôt
amnhĩ xunhwý hãmri nhũm amnhĩ tã mẽ apumu
mẽ mẽ ato hkra. Jakamã e kwa mẽ tokyx hkôt
amnhĩ xunhwý.” Anê. Kêr ka mẽ ã mẽ kãm akapêr
anhỹr o ri mẽ hkôt apa.

⁸ Hãmri mẽ akupỹm mẽ à xwýnhjê ho mex o ri
apa. Nẽ mẽ htyk xwýnhjaja ka mẽ akupỹm mẽ ho
htĩr o ri apa. Nẽ mẽ hkànhy rũnh xwýnhjaja ka

mê akupÿm mê ho mex o ri apa. Nê mê kamã mēkarōmnuti xwÿnhjaja ka mê nê mê hano. E kêr ka mê ã inhÿ hã mê ho mex o ri apa anê. Na pa amarĩ tanhmã mê ato ka mê inhmã amnhĩrer kêt tâ ra mê ate tanhmã mê ho mex to mã tãm. Tã kêr ka mê amnhĩ xwar amarĩ ri mê ho mex o ri mê hkôt apa. No ri mê ho mex pãnhã kàxpore hã axàhwÿr kêt nê.

9-10 —Nê kêr ka mê ma mê hwÿr apa kaxyw anojarêt hãmri nê amnhĩ kôt akukrêx rÿnh o apa hkêt nê. ãm anhÿ kamã mê hwÿr apa. Nê akàxpore ho rax nê ho apa hkêt nê. Rÿ akawà kamã axê hkwy rÿ aparkà hõ xàr nê ho amõr kêt nê. Rÿ kô hõ py nê ri ho apa hkêt nê. ãm anhõ mrykà pix jamÿ nê ma ho apa. Kêr kê mê ate Tĩrtũm kapêr o mê ahkre nê mê ho mex xwÿnhjaja mãn amnhĩ pãnhã mê amã mê axàpkur xà gõ ka mê kutã axàpkur o ri mê hkôt apa.

11 —Nê kêr ka mê nhÿri krĩ hwÿr ajapôj nê kamã mēhõ kot amnhĩ to mex xwÿnh japêr. Nê ra omu hãmri nê kuri mãn pôj nê hkôt apikamēnh tãmtã kurũm akupÿm ajapôj nê ma nhãm krĩ hõ hwÿr mra.

12 —Nê kêr ka mê mēhõ nhõrkwy hwÿr pôj nê mê kãm: “E ot pa mê awÿr mō. Nà koja Tĩrtũmja mê ato mex nê.” Anhÿr o mê kãm akapêr.

13 Koja mê ama nê amnhĩ wÿr awÿ ka mê amnhĩ tã mê omu nê mê kãm: “E koja Tĩrtũm mê ato mex nê ka mê ajamakêtkati nê ri axãmnhĩx apa.” Anhÿr o mê kãm akapêr. No koja mê amnhĩ nhõrkwy nê mê akurê nhũm Tĩrtũm ja hã mê omu nê mê ho mex kêt nê.

14 —Nê koja nhÿri krĩ hõ kamã mê akaga nê akapêr mar kêt japêr. Ka mê tee ri amnhĩ tã mê

kamã ama hãmri nê tokyx mẽ kurũm ajapôj nê ma akupỹm apa. Nê akupỹm anojarêť nê mẽ noo mã akuhê nê amnhĩ par ã awjagrô kapĩ nê ma apa. Mẽ kot Tĩrtũm kaga hã amnhĩ pumunh kaxyw ka mẽ ã mẽ noo mã amnhĩ nhĩpêx anê. Hãmri nê ma nhỹhỹm hpãnhã apa.

¹⁵ Kojã nhỹrmã Tĩrtũm mẽ kot amnhĩ tomnuj mýrapê tanhmã mẽ ho. Na pre ã Sotô mẽ Komo nhõ xwýnhjê nhĩpêx anê. Na prem amnhĩ tomnuj tỳx nê nhũm Tĩrtũm tee ri ja hã mẽ omu nê tanhmã hã mẽ homnuj tỳx to. Tã jar mẽ kãm ixkapêr mar prãm kêt nê mẽ kot ixkaga xwýnhjaja kojã ja hã mẽ omu nê kot Sotô mẽ Komo nhõ xwýnhjê nhĩpêx o mẽ hipêx. No ãm tanhmã mẽ ho htỳx o mẽ hakre. Anê.

Nhũm pre Jejus ã mẽ inhmã mẽ ixapênh ã karõ anê.

Jejus kot mẽ kêp 12jê hkukamã mẽ harênh

Makre 13.9-13; Rukre 12.11-12, mãñnênh Rukre 21.12-17; Wam Pêtre 3.13-17, 4.12-19; Rukre 6.40; Juãw 15.20; Rukre 12.2-9

¹⁶ Nhũm Jejus arĩ kot mẽ ixrênh xwýnhjê mã kapêr nê mẽ inhmã:

—E kot paj ma mẽ hwýr mẽ arê. Ma mẽ ate Tĩrtũm kapêr o mẽ ahkre ho ri mẽ hkôt apa kaxyw. Jakamã kot kaj mẽ te ôwêhti kot mry xoprê hwýr amnhĩ to mrrar nhũm kot hkwy hpar pyrak o amnhĩ nhĩpêx. Kojã mẽ hkwyjaja mẽ ate mẽ ahkre ma nhũm ja mẽ kêp omnuj nê nhũm mẽ hã tanhmã mẽ anhĩpêx to. Tã nom kêr ka mẽ tee ri amnhĩ kukamã ajamaxpêr nê amã mẽ uma hkêt nê.

¹⁷ —E kwa mẽ o kora. Kêr ka mẽ ma mẽ hwýr mra nê amnhĩ nê mẽ htãnopxar o ri apa. Kojã mẽ

hkwỳjaja mẽ akapêr ma nê kêp mẽ aprãm nõkati. Nê mẽ apynê nê ma mẽ utàr xwỳnhjê hwỳr mẽ ato mra nê mẽ kãm tanhmã mẽ ato hêx to. Hãmri nhũm mẽ mar xà hkôt mẽ atak. Tĩrtũm kapêr o mẽ ahkre xà hã ixkre kamã koja mẽ ã mẽ anhĩpêx anê.

18 —Nê koja mẽ ixtã tanhmã mẽ ato kaxyw mẽ apynê nê ma mẽ õ pahi hwỳr mẽ ato mra nê tanhmã kãm mẽ ato hêx to. Nom kwãr mẽ mamrĩ ã mẽ anhĩpêx anê. Koja mẽ ato anê ka mẽ kutã akrĩ nê mẽ kãm Tĩrtũm kapêr jarê. Ijaewjê mã nê mẽ kêp Ijaew kêt xwỳnhjê mã.

19 —Nê koja mẽ ma mẽ õ pahi hwỳr mẽ ato mra nê ã mẽ anhĩpêx anê nom kêr ka mẽ tee ri tanhmã mẽ kãm amnhĩ jarênh to hkukamã ajamaxpêr kêt nê. Koja Tĩrtũm Karõ tãm tanhmã mẽ akrã hto ka mẽ ô ri mẽ kãm akapêr mex nê.

20 Nê kot kaj mẽ amnhĩ krã hkôt ri mẽ kãm akapêr kêt nê. Tĩrtũm Karõ nhỹ hã kot kaj mẽ ô ri mẽ kãm tanhmã axujarênh to.

21-22 —Nê koja mẽ hkwỳjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwỳjê hã amỹnê. Koja mẽ anhĩpêxà hkwỳjaja mẽ apê mẽ hkra hã amỹnê. Nhũm mẽ akra hkwỳjaja mẽ apê mẽ hipêxà hã amỹnê. Nhũm mẽ atõ hkwỳjaja mẽ apê mẽ htõ hã amỹnê. Nhũm mẽ akatorxajaja mẽ atã amỹnê. Hãmri nhũm mẽ apa. No ãm kwãr mẽ mãmri ã mẽ anhĩpêx anê. ã mẽ kot mẽ anhĩpêx anhỹr tã kêr ka mẽ tee ri amnhĩ kukamã ajamaxpêr pê ixkaga hkêt nê. Mẽ ãm amnhĩ to htýx rãhã ty. Hãmri nê akaxwỳnhja ma Tĩrtũm mẽ wa inhõ krĩ hwỳr axàpir kurê kumrêx nê wa ixkuri akupỹm amex nê atĩr tũm nê apa ho apa.

23 —Ně koja mẽ nhỹri krĩ hkwȳ kamã ixtã tanhmã mẽ anhĩpêx hto ka mẽ mãmri mẽ kurũm ajapôj mẽ ma nhỹhỹm krĩ hõ hwỳr apa. Ně hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krĩ piitã hwỳr apa hkêt ri pa akupỹn mẽ awỳr wrỳ. Kwa kêr ka mẽ ixkapêr mã ajamaxpêr tỳx rãhã ri apa.

24-25 —Mẽ ate ixkôt apa ho apa xwỳnh na ka mẽ. No pa na ixpê mẽ ajahkre xwỳnh. Jakamã koja mẽ kot tanhmã inhĩpêx to ho mããnẽn mẽ anhĩpêx. Koja mẽ nhỹrmã tanhmã inhĩpêx to mẽ mã ixkôt mẽ ato anẽ mẽ. Mẽ pahte amnhĩ nhĩpêxja kot axpẽn pyræk. Jakamã koja mẽ ixpê Satanasti hã ijarê mẽ mããnẽn tanhmã mẽ ajarênh punuj to ho pa. Mẽ pahte amnhĩ nhĩpêxja kot axpẽn pyræk jakamã koja mẽ panhĩpêx o axpẽn pyræk.

26 —Tã nom kêr ka mẽ tee ri amnhĩ kukamã ajamaxpêr pê amã mẽ uma ho apa hkêt mẽ. Na htem piitã axpẽn pê tanhmã hamaxpêr punuj to ho hpimxur o pa nom tee ri ho pimxur prãm kaprỳ. Koja nhỹrmã mẽ hamaxpêr piitã amnhĩrit pa. Nẽ mẽmoj piitã ra hpimxur mex tã koja nhỹrmã amnhĩrit par kumrêx.

27 —Ně koja nhỹrmã mẽ piitã ixte amnhĩ nhĩpêx kôt ixpumu. Na pa ra mẽ hkàx ã mẽ amã ixujarênh rax mẽ. Tã kêr ka mẽ ma mẽ piitã mẽ kãm harênh o ri apa. Nẽ ra ixte mẽ hkàx ã ahte ixte mẽ amã mẽmoj jarênhhta ka mẽ hpãnhã ma mẽ kãm harênh o ri apa kê mẽ apyrà mẽ harênh ma.

28 —E kêr ka mẽ amã mẽ kot tanhmã mẽ ato mã xwỳnhjê puma ho apa hkêt mẽ. Mẽ kot mẽ apar mã tã koja mẽ ãm mẽ akrãhkà pix pa nom tanhmã mẽ akaxwỳnh to hkêt mẽ. Tĩrtũmja tapxipix na hte

mê hkrâhkà nê mê hkaxwÿnh mê ho pimràatã kot amnhĩ xà htÿx kamã hamak tÿm xàta wÿr mê rēnh pumunh. Tã kot hwÿr mê arēnh pymaj kêr ka mê amã kapēr kwÿm ri tanhmã amnhĩ nhĩpêx to puma ho ri apa.

²⁹⁻³¹ —Nê Tirtÿm kot mê pahto hapêx par pumunh tã mãänēn kot mê pajamār mex. Mãn ka htem kuwēnhre pumu. Na hte Tirtÿm kuwēnhre jamār mex o pa. Mē piitã mê kot ãm omunh tã nom nhÿm Tirtÿm mê kurom hamār mex pê mê htānopxar rāhã ho pa. Tã kãm mê pajapê htÿx o kot kuwēnhre jakrenh jakamã kwa mê tee ri amnhĩ kukamã ajamaxpēr o ri akaprĩ nê apa hkêt nê. Koja Tirtÿm mê pahtānopxar rāhã ho pa. Kot mê panhĩ piitã omunh par. Nê ahpÿnhã tanhmã mê pahkrã hkĩ kute hkôt mê pahpumunh par. Tã kot mê pahtānopxar rāhã jakamã mo kaxyw kot kaj kêt mê ri amã mê uma ho apa? Anê.

Mê pahte Jejus kôt amnhĩ xunhwÿr rÿ mê pahte hkaga jarēnh

³² Nhÿm Jejus arĩ kot mê hwÿr mê ixrēnh xwÿnhjê mã kapēr nê mê inhmã:

—E kwa mê mãmrĩ akwÿjê mã mê apê ixkwÿ hã amnhĩ jarēnh o ri apa nê amã mê uma xāj tee ri amnhĩ nhĩpêx kêt nê. Kot kaj mê kãm ra ate ixkôt amnhĩ xunhwÿr ã amnhĩ jarē. Pa ja hã mê apumu hãmri nê mê apyrà nê kaxkwa kamã Inhĩpêxà mã ra ate ixkôt amnhĩ xunhwÿr ã mê ajarē.

³³ Nom kot kaj mê kot ixtã tanhmã mê ato pymaj apê ixkwÿ hã amnhĩ jarēnh kêt nê. Pa ja hã mê apumu hãmri nê nhÿrmã amnhĩ xwar Inhĩpêxà mã mê apê ixkwÿ hkêt ã mê ajarē. Jakamã kwa

mê mãmri mẽ kãm apê ixkwỳ hã amnhĩ jarênh o ri mẽ hkôt apa kê mẽ ama nê amnhĩ kaxyw inhmã hamaxpêr japêr. Anê.

Mê kãm Jejus ã hkwỳjê kurê xwỳnhjaja

Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

³⁴ Nhũm Jejus arĩ kot mẽ hwỳr mẽ ixrênh xwỳnhjê mã kapêr nê mẽ inhmã:

—Ra mẽ awỳr ixwrỳk tã koja mẽ piitã ixkukwak ri hamakêtkati nê àmnhĩx ri pa hkêt nê. Kormã. Koja mẽ akwỳjaja ixkapêr ma nê mẽ apyrà nê amnhĩ kaxyw ixkôt hamaxpêr. Nhũm mẽ akwỳjaja axtem nê kuma nê ãm kuma. Hãmri nê ixtã tanhmã mẽ atomnuj to ho pa ka mẽ amnhĩ xà htỳx kamã ajamak o ri apa.

³⁵ —Koja mẽ akrajaja ixtã mẽ apê mẽ hipêêxà nê mẽ katorxà kutã amnhĩ xunhwỳ. Nhũm mẽ wỳjjaja ixtã mẽ umregêxjê kutã amnhĩ xunhwỳ.

³⁶ —Koja mẽ ã mẽ akwỳjaja ixtã mẽ akutã amnhĩ xunhwỳr anê. Mẽ anhõrkwỹ kamã mẽ akukwak ri pa htã ixtã mẽ akutã amnhĩ xunhwỳ.

³⁷ —Nê mẽ amã mẽ anhĩpêêxà nê mẽ akatorxà japêê. Nê mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa hkêt hãmri nê apê ixkwỳ mã tãm kêt.

³⁸ Rỳ nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamaxpêr nê mẽ kot mẽ apar pymaj ixkaga hã kot kaj apê ixkwỳ mã tãm kêt nê.

³⁹ Koja mẽ nhỹrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixpyrà nê ixtã mẽ apar mã tã kwa kêr ka mẽ

amã atyk pymaj ixkaga hkêt nê. Kwãr mẽ mãmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xaj ixkaga hãmri nê nhỹrmã wa ixri atĩr tũm nê apa ho apa hkêt nê. Anê.

*Mẽ kot Jejus krajê ho mex xwỳnhjê jarênh
Matêwre 25.34-40; Makre 9.41; Juãw 13.20*

⁴⁰ Nhũm Jejus arĩ kot mẽ hwỳr mẽ ixrênh xwỳnhjê mã kapêr nê mẽ inhmã:

—E koja mẽhõ nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyræk. Nê kot kaj mẽ tanhmã pa ixto mex to nê te Tĩrtũm o mex pyræk.

⁴¹ —Nê kot ka mẽ nhỹri Tĩrtũm nhỹ hã mẽ kãm kapêr jarênh xwỳnhjê hõ tanhmã ho mex to nhũm Tĩrtũm hã apumu nê nhỹrmã hã ato mex nê. Rỳ ka mẽ mẽhõ kot Tĩrtũm kôt amnhĩ nhĩpêx xwỳnhjê hõ pumu nê tanhmã ho mex to. Nhũm Tĩrtũm hã apumu nê mãănênh hã ato mex nê. Te ate mẽhõ ho mexta pyrà nê mãănênh ato mex nê.

⁴² Nhũm mẽhõ nhỹri mẽ kot ixkôt kormã amnhĩ xãm nyw nê kormã àhpumunh tohtuj anhyr xwỳnhjê hõ pumu. Nê kãm kôr ã omu nê hamaxpêr o: “Kwa Jejus kôt ri pa xwỳnh mũj kãm kôr. Kormã kot Jejus kôt amnhĩ xãm tỳx kêt tã kêp hkwỳy. E kot paj kãm gô hkwỳ kê ho ixkô.” Anê hãmri nê kãm hkwỳ nhũm ho ixkô. Hãmri nhũm Tĩrtũm hã omu nhũm kot kãm gô pix nhõr nhũm kot ho hkôm tã nhũm ja hã ho mex rax nê. Anê.

Nhũm pre ã Jejus kot mẽ hwỳr mẽ ixrēnh xwỳnhjê mã kapēr ry rax anē. Mẽ ixpê 12jê mã ã kapēr anē.

11

Juãw Paxis kot Jejus jarēnh mar

Rukre 7.18-23, 7.5, mããnēn Rukre 4.16-21

¹ Tã nhũm Jejus ra kot mẽ hwỳr mẽ ixrēnh xwỳnhjê mã kapēr pa hãmri nē kato nē ma krī pu hã krī hkwỳjê hkôt ri pa. Nē mẽ kãm Tĩrtũm kapēr jarēnh o ri mẽ hkôt pa.

² Nhũm Juãw Paxisja arĩ kệp prēs nē mẽ hagjēnh xà kamã hkrĩ. Nhũm pre hte hkôt mẽ pa ho mẽ pa xwỳnhjaja hwỳr mra nē kãm Jejus kot tanhmã amnhĩ nhĩpêx to ho pa hã harē. Hãmri nhũm harēnh ma nē tee ri hkukamã hamaxpēr. Hãmri nē hkôt mẽ pa xwỳnh wa ho axkrut nē wa kuta

³ nē hwỳr wa kumē nē wa kãm:

—Kwa wa ma Jejus wỳr tē nē hkukja nē kãm: “Xà ka na pre Tĩrtũm mẽ ixwỳr amē nà? Xà kormã axtem mẽhõ na pa mẽ ri hamãr o ri ixpa?” Anhỳr o hkukja hãmri nē tanhmã kot amnhĩ jarēnh to hã ama nē man akupỹn ixwỳr tē nē inhmã harē. Anē.

⁴ Hãmri nhũm wa kuma nē ma hwỳr tē. Nhũm Jejus kormã tanhmã mẽ à kute xwỳnhjê ho mex o xa. Mẽ nohkre xwỳnhjaja nhũm akupỹm mẽ ho mex. Nē mẽkarõmnuti kot mẽ hwỳr gjêx xwỳnhjaja nhũm mẽ nē mẽ hanor o ãm rãhã nhũm Juãw kôt wa pa xwỳnhhta wa hwỳr tēn pøj. Nē kormã mẽ hã omunh o wa xa. Hãmri nē kãm Juãw Paxis kapēr jarē nhũm wa kuma nē wa kãm:

—Tỳ. Nà ãm hãmri na ja hã ijarẽ. Ixpê mẽ ate ixkamã ajamak o apa xwỳnhta na pa. Na ka wa kam ã ixte amnhĩ nhĩpêx anhỹr ã ixpumu. Jakamã wa ma akupỹm tẽ nẽ aprĩ hã kãm ijarẽ.

⁵ Na pa hte akupỹm mẽ nohkre xwỳnhjê ho mex. Nẽ mẽ hkànhy xwỳnhjaja pa akupỹm mẽ hkà ho mex. Nẽ mẽ hyk o mẽ pa xwỳnhjaja pa akupỹm mẽ hte ho mex. Nẽ mẽ htyk xwỳnhjaja pa akupỹm mẽ ho mẽ htĩr. Nẽ mẽ kêp amrakati nẽ ri mẽ pa xwỳnhjaja pa mẽ kãm mẽmoj mex jarẽnh o ri mẽ hkôt ixpa. ã na pa hte mẽ hipêx anhỹr o ri ixpa. Jakamã e wa ma akupỹm Juãw wỳr tẽ nẽ ã kãm ijarẽnh anẽ.

⁶ Kê ijarẽnh ma nẽ ixkôt hamaxpêr tỳx nẽ tee ri ixkukamã hamaxpêr kêt nẽ. Koja ã amnhĩ nhĩpêx anẽ nẽ hamakêtkati nẽ ri pa. E wa tokyx ma akupỹm tẽ nẽ kãm ã ijarẽnh anẽ. Anẽ.

*Jejus kot tanhmã Juãw Paxis jarẽnh to
Rukre 7.24-35*

⁷⁻⁹ Nhũm pre ã Jejus Juãw Paxis kôt wa pa ho wa pa xwỳnhja wa kãm amnhĩ jarẽnh anẽ nẽ akupỹm hwỳr wa kumẽ nhũm wa ma akupỹm hwỳr tẽ. Hãmri nhũm Jejus mẽ kot mar o kuhê xwỳnhjê mã tanhmã Juãw Paxisja jarẽnh to nẽ mẽ kãm:

—Na ka pre htem kapôt ã Juãw Paxis mar kaxyw ma hwỳr mra. Nom ê mex ã omunh kaxyw rỳ hpijaàm kãm tanhmã kapêr to hã mar kaxyw na ka prem hwỳr amrar kêt nẽ. Tĩrtũm nhỹ hã kapêr o pa jakamã na ka prem ate mar kaxyw ma hwỳr mra. Tĩrtũm nhỹ hã ixkukamã ijarẽnh o pa xwỳnh na. Ixpê Tĩrtũm kot mẽ akaxyw ixãm xwỳnh ã na hte ijarẽnh o pa. Nẽ hprĩ hã tanhmã mẽ amã ijarẽnh

to. Jakamã kapêrja mex o kot wam Tirtûm nhỹ hã kapêr jarênh xwýnhjê kapêr piitã hakrenh par.

¹⁰ Tirtûm kapêr ã kagà htûm kot Juãw kukamã tanhmã harênh to nê harênh kot:

Kot paj Ixkra hkukamã ma mẽ hwýr harênh xwýnhja mẽ nhûm ma ri kutêp mẽ kãm harênh o pa. Mẽ kot mar nê kutêp tãm amnhĩ nhĩpêx o pa kaxyw.

—Anhỹr o Tirtûm Juãw Paxis kukamã harê nhûm prem hã kagà. Tã nhûm ixkukamã mẽ awýr kumê.

¹¹ Juãw Paxisja na mex kumrêx. Na pre hprĩ hã ixkukamã tanhmã ijarênh to ho pa. Tã nom ixkôt mẽ pa ho mẽ pa xwýnhjê hkĩnhã na pre ixkôt pa ho pa hkêt nê. Jakamã ixkôt mẽ pa ho mẽ pa xwýnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anê.

¹²⁻¹³ —Na pre finat Mojes kumrêx mẽ kãm Tirtûm kapêr kwý hã kagà. Tã nhûm hpãnhã Tirtûm nhỹ hã kapêr jarênh xwýnhjaja Mojes mýr pê hkwý hã kagà. Nhûm prem kamã harê nê kuma nê hkôt amnhĩ nhĩpêx o pa. Hãmri nhûm Juãw Paxisja mẽ mýrpê kato nê tãm Tirtûm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhûm mẽ ohtô nê inhma nê ixkôt amnhĩ xunhwý nê kãm ixkapêr kôt pix mã amnhĩ nhĩpêx o ri pa hprãm nê.

¹⁴ —Amnepêm na pre Tirtûm nhỹ hã kapêr jarênh xwýnhjaja mẽhõja kukamã tanhmã harênh to ho pa. Nê mẽ kãm harênh o: “Koja nhỹrmã mẽhõ te Êris kot amnhĩ nhĩpêx pyrãk o amnhĩ nhĩpêx nê mẽ awýr mō. Nê mẽ amã Tirtûm kot mẽ awýr mẽnh mã xwýnhja jarênh o pa ka mẽ ama.” Anhỹr o mẽ kãm

mêhõ jarẽ. Tã kot paj mẽ amã kot hkukamã harẽnh xwỳnh ta nhĩxi jarẽ ka mẽ inhma. Nà Juãw Paxisja kukamã na prem ã harẽnh anhỹr o pa.

¹⁵ —E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harẽ ka mẽ harẽnh ma.

¹⁶ Te mẽhprĩre kot amnhĩ nhĩpêx pyràk o na htem amnhĩ nhĩpêx. Mẽhprĩrejaja na htem mẽ òrkwỳ kapem mẽmoj to amnhĩkati nẽ tee ri hkwỳjê kot amnhĩ nhĩpêx pumu nẽ mẽ kãm:

¹⁷ Kwa na pa mẽ amã gre htã ka mẽ ixkutã anhõkrepôx kêt nẽ. Pa mẽ ja hã mẽ apumu nẽ hpãnhã mẽ amã mẽ htyk jarẽ htã ka mẽ akaprĩ nẽ amỳr kêt nẽ. Kwa mẽ ri ã amnhĩ nhĩpêx anhỹr kêt nẽ. Anẽ.

—Mẽhprĩjaja na htem ã axpên mã kapêr anẽ. Tã te mẽ ate mẽ uràk. Tĩrtũm kot mẽ awỳr y hã kapêr jarẽnh xwỳnhjê rẽnh tã ka mẽ te mẽhprĩre kot amnhĩ nhĩpêx pyrà nẽ mẽ ama nẽ ãm mẽ ama nẽ mẽ hkôt amnhĩ nhĩpêx kêt nẽ.

¹⁸ —Juãw Paxis na pre mẽ awỳr mỗ nẽ ixkĩnhã apkur mex o ri pa hkêt nẽ. Nẽ ixkĩnh ã wĩhti ho hkõm kêt nẽ. Ka mẽ ja hã omu nẽ hkaga nẽ atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nẽ mẽhprĩre kot amnhĩ nhĩpêxta pyrà nẽ hkôt amnhĩ nhĩpêx kêt nẽ.

¹⁹ Tã hãmri pa hpãnhã mẽ awỳr mỗ nẽ Juãw Paxis rom apkati mẽ ixàpkur mex o ri mẽ akôt ixpa. Nẽ kurom mẽ akutã wĩhti hkwỳ ho ixkõm o ri ixpa. Tã ka mẽ ja hã ixpumu nẽ atỳx ri ixàpkur rũnh nẽ ixpipãnh o ri ixpa hã ixkamnhĩx nẽ ã axpên mã ixto akapêr anẽ. Nẽ mẽ kot amnhĩ tomnuj xwỳnhjê hkôt ri ixpa xwỳnh ã axpên mã ijarẽ. ã na ka

htem axpẽn mã ijarẽnh anẽ. Jao te mẽ ate Juãw Paxis nhĩpêx pyrà nẽ ixkaga nẽ ixkôt amnhĩ nhĩpêx kêt nẽ. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anẽ. No tãm ri mẽ hamaxpêr xwỳnhjaja na htem ahpỳnhã wa ixte amnhĩ nhĩpêx ã wa ixpumu nẽ axpẽn mã wa ijarẽnh o: “Nà ahpỳnhã wa kot amnhĩ nhĩpêx tã no ãm hamẽ Tĩrtũm nhỹ hã kapêr mex o pa. E pu mẽ wa uràk nẽ Tĩrtũm kôt amnhĩ xunhwỳ.” Anhỹr o axpẽn mã wa ijarẽ. Anẽ.

Mẽ kot Tĩrtũm kôt mẽ hamaxpêr kêt xwỳnhjê jarẽnh

Rukre 10.13-15

²⁰ Na pre hte Jejus krĩ piitã hkôt pa nẽ krĩ nhõ xwỳnhjê mã kapêr nẽ mẽ kot amnhĩ tomnuj ã mẽ kãm kapêr. Korajĩ mẽ Pese nhõ xwỳnhjê kumrêx mã kapêr nẽ mẽ kãm:

²¹⁻²² —E mẽ inhma. Amnepêm krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nẽ mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỹr rax tã ka mẽ omu nẽ ãm omu nẽ amnhĩ tomnuj kaga hkêt nẽ. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nẽ. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nẽ mẽ arom amnhĩ kaxyw ixkôt hamaxpêr tỳx kurê kumrêx. Nẽ tee ri kot tanhmã kot amnhĩ tomnuj to hã amnhĩ pumu nẽ hkaprĩ nẽ hkaga hpa. No mẽ kajaja na pa hte tee ri mẽ

amã aa mẽ ate mẽmoj punuj kêt kwỳ ho anhỹr o ixpa kaprỳ. Ka mẽ ja hã ixpumu nẽ ãm ixpumu nẽ amnhĩ tomnuj kaga hkêt nẽ. Jakamã koja nhỹrmã Tĩrtũm tanhmã mẽ atomnuj tỳx to. Nẽ tanhmã Sitõ mẽ Xir wa kamã mẽ pa xwỳnhjê jarẽnh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrẽx. Ka mẽ amnhĩ xà htỳx kamã ajamak rãhã ho ri apa kãm ga. Anẽ.

²³⁻²⁴ Nhũm pre ã Jejus mẽ kãm kapêr anẽ. Nẽ hpãnhã Kapanaũ nhõ xwỳnhjê mã kapêr nẽ mẽ kãm:

—No mẽ apê Kapanaũ nhõ xwỳnhjaja. Kot kaj mẽ ajaxwỳja mẽ urak nẽ amex kêt nẽ. Ra ixte mẽ amã aa mẽ ate mẽmoj pumunh kêt kwỳ ho anhỹr rax nhũm mẽ ate hã ixpumunh tã amnhĩ tomnuj kaga hkêt tã Tĩrtũm mẽ wa inhõ krĩ hwỳr akrà. No ãm hwỳr akrà kaprỳ. Kot kaj mẽ atõ hwỳr axàpir kêt nẽ. Kop apu Sotõ nhõ xwỳnhjaja mãn kot ã ixte amnhĩ nhĩpêx anhỹr ã ixpumunh ronhỹx mẽ ra kot amnhĩ tomnuj kaga nẽ ixkõt amnhĩ xunhwỳr kurê kumrẽx. No mẽ kajaja na ka mẽ ã amnhĩ nhĩpêx anhỹr kêt nẽ. Jakamã kot kaj mẽ nhỹrmã ma kuwy maatita wỳr ajapêx pa kãm ga. Anẽ.

Jejus kot õ Papaj mã amnhĩ jarẽnh

Rukre 10.21-22

²⁵⁻²⁶ Tã nhũm Jejus Tĩrtũm mã amnhĩ jarẽ nẽ kãm:

—Pa Papaj? Nà apê mẽ inhõ Pahi Maati na ka. Pikap ri mẽ pa xwỳnhjaja nẽ kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri

apa. Na ka hte mẽ àhpumunh tỳx ã mẽ kot amnhĩ to jarkrar xwỳnhjê mã axàhpumunh tỳx o amnhĩrĩt kêt nê. ãm mẽ àhpumunh kêt ã mẽ kot amnhĩ jarênh xwỳnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkôt ã mẽ piitã mẽ hipêx anhỳr o ri apa Papaj. Jakamã mẽ kot amnhĩ to hkryre xwỳnh pixjaja na htem hprĩ hã ate amnhĩ nhĩpêx kôt apumunh o pa. Anê.

Nhũm pre ã Jejus Tĩrtũm mã amnhĩ jarênh anê.

²⁷ Hãmri nê hpãnhã mẽ kot mar o kuhê xwỳnhjê mã kapêr nê mẽ kãm:

—Nà na pre ra Inhĩpêêxàja inhĩhkra kamã mẽmoj piitã hagjênh pa. Ixte kãm ho amnhĩptar o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nê papxipix na ixte Inhĩpêêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhmã hprãm xà hkôt mẽ hkwỳjê mã ho amnhĩrĩt o ri ixpa. Jakamã nhũm mẽ ixpyrà nê Inhĩpêêxà kot tanhmã amnhĩ nhĩpêx to ho pa hkôt omu.

²⁸⁻³⁰ —Nê tee ri amnhĩ kukamã mẽ ajamxpêr o ri apa xwỳnhjaja te mẽ ate mẽmoj pytĩ rax tur nê ahte ho apa pyræk. Kwa mẽ ixkôt amnhĩ xunhwỳ nê ixte amnhĩ nhĩpêx ã ixpumu. Ixte mẽ akamã ixukaprĩ xwỳnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkôt amnhĩ xunhwỳ pa te ixte mẽ anê mẽmoj pytĩ ho ixwrỳk pyræk o mẽ anhĩpêx nê tãm mẽ axunhwỳ ka mẽ tãm ajamxpêr nê tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o

pa xwÿnhjaja tee ri amnhĩ kukamã hamaxpêr o pa?
Nà na htem ixkamnàr rom hamakêtkati nê àmnhĩx
ri pa ho pa. Anê.

12

Jejus kêp arĩgromnu hpãm

Makre 2.23-28; Rukre 6.1-5

¹ Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwÿnhjê mẽ pa mẽ ma mẽ hpur kôt ri nhÿhÿm ri ixpa. Hãmri nê ra mẽ inhmã prãm nê mẽmo hy te kot harôj pyràk xwÿnhja kwÿ rê nê kugrà nê ma Jejus kôt hkanhar o mõi. Mẽ ixpê Ijaew na pa htem axpên pur kãm ã amnhĩ nhĩpêx anhÿr o ixpa.

² Hãmri nhũm mẽ ixkwÿ pê Parijew nhõ xwÿnhjaja kãm mẽmoj tã Jejus o kapêr prãm jakamã ã mẽ ixte amnhĩ nhĩpêx anhÿr ã mẽ ixpumu nê mẽ ixtã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwÿnhjaja axtem nê ã amnhĩ nhĩpêx anhÿr o ri akôt pa. Mẽmo hyta rê nê akôt hkanhar o pa. Kwa mẽ kãm anê kê mẽ ã amnhĩ nhĩpêx anhÿr kêt nê. Na htem arĩgromnu hã mẽmoj tã àpênh kêt kênã. Anê.

³⁻⁴ Hãmri nhũm mẽ kuma nê hprĩ hã mẽ kãm Tĩrtũm kapêr jarê nê mẽ kãm:

—Tk. Xàn ka htem Tĩrtũm kapêr ã kagã htũm kot pahi Tawi kot tanhmã amnhĩ nhĩpêx tota kamã harênh nê mar kêt nê? Na pre hkôt ri mẽ pa xwÿnhjê mẽ nhũm mẽ prãm xaj Tĩrtũm mã amnhĩ jarênh xà hã ixkre hwÿr agjê. Hãmri nhũm mẽ õ patre maatija mẽ kãm prãm tÿx ã mẽ omu nê kãm

mê hkaprî nê mê kãm mêmôj gô. Mê kot Tîrtûm noo mã pãwti jaxwÿr xwÿnhhta gô nhûm mê kuku. Tîrtûm kapêr ã kagà htûm kot ja nê mê hkurê htã nhûm mê kãm prãm tÿx ã mê omu nê mê kamã ukaprî xàj mê kãm kugô. Æm mê ô patre pix kot ja hkur kaxyw tã nhûm mê kãm kugô nhûm mê kuku. Tã nom nhûm Tîrtûm ja hã mê omu nhûm ja kêp omnuj kêt nê. Kot mê kamã ukaprî nê mê kãm ôr ã omu nhûm ja kãm mex nê.

⁵—Mê panhõ arîgromnu htã na hte patrejaja arî hã Tîrtûm mã amnhî jarênh xà hã ixkre kamã àpênh o pa. Tîrtûm kapêr ã kagà htûm kôt na htem arîgromnu htã nhûm mê arî hã apê nhûm Tîrtûm pê jamnuj kêt nê. Kumã mê àpênh xwÿnh kênã.

⁶ ãm hãmri na pa mê amã ja jarê. Tîrtûm mã amnhî jarênh xà hã ixkreta mex tã nom ixpê Tîrtûm Kra jakamã inhmex o ixte ixkreta jakrenh.

⁷ Tîrtûm kapêr ã kagà htûm kot ja harênh kot:
Kêr ka mê inhmã amnhî jarênh kaxyw nê ãm inhmã mêmôj nhôr pix pê inhmã amnhî jarênh kêt nê. Mê mãânên mê kamã axukaprî o ri apa pê inhmã amnhî jarê. Ja na kêt inhmã hprãm.

—Æ harênh kot anhÿr. Tã mê ate aprî hã ja mar ronhÿx ka mê ixkôt mê pa xwÿnhjê kot mêmô hy rênh nê hkanhar o môr ã mê omu nê ri tanhmã mê ho akapêr to hkêt nê. Æm mê kãm prãm ã mê omu nê mê kamã axukaprî nê.

⁸—Kêt pa na pre Tîrtûm mê akaxyw ixãm nê mê awÿr inhmê. Jakamã papxipix na pa hte arîgromnu hã tanhmã mê kot amnhî nhîpêx to hã mê kãm karô. Kwa mê jajê pumu nê mê kamã axukaprî kêt

wehe. Kwār mẽ māmri mẽmo hyta rē nē hkanhar o ixkôt mō. Anē.

ĩhkra grà xwỳnh jarēnh

Makre 3.1-6; Rukre 6.6-11

⁹ Nhũm pre ā Jejus Parijew nhõ xwỳnhjê mã kapēr anē hāmri nē Tĩrtũm kapēr o mẽ ahkre xà hã ixkre hwỳr tē nē axà.

¹⁰ Nhũm Parijew nhõ xwỳnhjaja tanhmã ho kapēr to kaxyw htãnopxar o kuhê. Jakamã nhũm ixkre kamã mēhõ my ĩhkra grà xwỳnhja mẽ pikuprõnh xwỳnhjê nhĩhkô hã nhỹ nhũm Parijew nhõ xwỳnhjaja omu nē axpẽn mã:

—Kwa pu mẽ jar pakuhê nē Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho anē nē Tĩrtũm kapēr tũm kuhpa hã amnhĩ nhĩpêx. E pu mẽ kop xa nē hã omu. Anē.

Hāmri nē hã Jejus kukja nē kãm:

—E mẽ inhmã mẽmoj jarē. Xà na htem arĩgromnu hã akupỹm mẽ ho mex nhũm Tĩrtũm kãm ja mex nē nà? Anē.

¹¹ Hāmri nhũm mẽ hamaxpēr kôt mẽ omunh mex nē mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tēm ka omu nē âm omu nē arĩgro mex jamār pē ho axàpir kêt nē? Nà kot kaj mẽ tee ri omu nē ho axàpir kurê kumrêx.

¹² Arĩgromnu hã mẽ ho mexja ja mex kẽnã. Tĩrtũm mã mẽ pahpê panhĩja na mẽ pamex o mẽ hkrit jakrenh jakamã kēr pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm.

Anhÿr o mẽ kãm kapêr.

¹³ Hãmri nê hpãnhã myta mã:

—E anhĩkra katàt. Anê.

Hãmri nhũm ìhkra katàt nê mex kurê kumrêx.

¹⁴ Hãmri nhũm Parijew nhõ xwÿnhjaja tee ri ja hã omu nê Jejus kamã gryk nê. Arĩgromnu pê sap ã kot ho mex jakamã nhũm mẽ kamã gryk tÿx nê. Hãmri nê ma mra nê hapôj nê hã axpên kukjêr o kuhê nê axpên mã:

—Kwa ã kot amnhĩ nhĩpêx anhÿrja mÿrapê tanhmã kot puj wem ho? ã kapêr anhÿrja o te mẽ papamjaja mẽ pahte hkĩnhã mẽ kamã paxukapri kêt pyrãk ã mẽ pajarê. Koja mẽ pahkwÿjaja kuma hãmri nê mẽ pahte amnhĩ nhĩpêx kaga nê amnhĩ kaxyw hkôt pix mã hamaxpêr. Kwa tanhmã kot puj wem ja nê ho?

Anhÿr o axpên kukjêr o kuhê.

Jejus kêp Tĩrtũm kot mẽ pahwÿr mênh xwÿnh ã harênh

Makre 3.7-12

¹⁵ Hãmri nhũm Jejus amnhĩ tã Parijew nhõ xwÿnhjê jamaxpêr kôt mẽ omu hãmri nê mẽ kêp kato nê hpãnhã ma nhÿhÿm krĩ hõ hwÿr ma tẽ. Nhũm mẽ ohtô nê omu nê ma hkôt mra nhũm mẽ omu nê akupÿm mẽ kãm mẽ à xwÿnh piitã ho mex.

¹⁶ Hãmri nê mẽ kãm:

—E na pa akupÿm mẽ ato mex. Nom kêr ka mẽ amnhĩ tã ixto axãmra ho ri apa hkêt nê. Ixpê Tĩrtũm Kra hã mẽ kãm ijarênh kêt nê. ãm kwarĩ kumrêx.

Anhÿr o mẽ kãm kapêr.

¹⁷ Na pre ra amnepêm Tĩrtũm nhÿ hã kapêr xwÿnh finat Ijaisja Jejus kukamã mẽ kãm tanhmã

harënh to nê hã kagà. Te Tirtũm tãm kapêr pyràk o harë nê hã kagà. Nê hã kagà ho:

18 Ota ixkôt amnhĩ nhĩpêx o pa xwýnhhta xa. Pa na pa amnhĩ kaxyw ãm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh týx nê. Kot paj hwýr amnhĩ karõ mẽ nhũm hwýr axà nhũm ma ý hã pika piitã hkôt mẽ piitã mẽ kãm ijarënh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

19 Nom koja ri amnhĩ to àmra o pa hkêt nê. Rý kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

20 ãm kapêr xukaprĩ pix o koja mẽ hirerek xwýnhjê mã kapêr o pa. Nê mẽ kot tee ri amnhĩ nhĩpêx ã amnhĩ pumunh xwýnhjê kamã ukaprĩ o pa. Nê mẽ kot htýx ri amnhĩ nhĩpêx o mẽ pa xwýnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhýr o ri mẽ hkôt pa rãhã ra akupým mẽmoj piitã tãm haxwýr pa.

21 ã kot amnhĩ nhĩpêx anhýr o pa jakamã koja pika piitã hkôt mẽ pa xwýnh kwýjaja kukwak ri amnhĩ kaxyw Tirtũm kôt hamaxpêr nê hkôt amnhĩ xunhwý. Anê.

Na pre ã finat Ijaisja Tirtũm nhý hã kormã Jejus wrýk nê kator kêt ri tanhmã kot amnhĩ nhĩpêx to ho pa hkukamã harënh nê hã kagà anê. Tã nhũm mẽ hwýr wrý nê ã mẽ hkôt amnhĩ nhĩpêx anhýr o pa.

Jejus mē mēkarōmnuti wa harēnh

Makre 3.20-30; Rukre 11.14-23, 11.31-32, 12.10

²² Tā nhūm prem Jejus wÿr mēhō myja o mō. Mēkarōmnuti kot hwÿr ār nē ho nohkre nē ho kapēr kêt xwÿnh̄ta nhūm mē hwÿr o mō. Hāmri nhūm omu nē nē mēkarōmnuti jano nē akupÿm ho mex kurê kumrēx nhūm akupÿm rīt mex nē akupÿm kapēr mex nē.

²³ Hāmri nhūm mē amnhī jaêr pē omu nē kamā no puma nē hā axpēn kukjêr o:

—Kokÿÿ. Jejus na hte ãm mē ho mex o mē ho mex o pa. Mãn kēp Tirtūm kot mē pahwÿr mēnh mā xwÿnh̄ta na nà? ã na hte ã amnhī nhīpēx anhÿr o pa. Mãn kēp pahi finat Tawi kanrēhā tāmnhwÿta na nà? Anē.

²⁴ Nom nhūm Parijew nhō xwÿnh̄jaja ã Jejus kot amnhī nhīpēx anhÿr ã omu nē kēp mēkarōmnuti hkwȳ hā hkamnhīx. Jakamā mē kot hā axpēr kukjêr ã mē kuma nē mē kām:

—Tk pēr hinhu nhīkôôti nhÿ hā na hte mē nē amnhī kwÿjê japôx o pa. Anē.

Hinhu nhīkôôti nhīxi hō pē Satanasti nhūm prem ã Satanasti nhÿ hā Jejus kot amnhī nhīpēx ã hkamnhīx anē.

²⁵ Nhūm ra mē hamaxpēr kôt mē omunh mex jakamā mē kām:

—Kwa mē inh̄ma mē ate ixpē Satanasti hkwȳ hā ixkamnhīx xwÿnh̄jaja. Koja pika nhō xwÿnh̄jaja axpēn kutā amnhī xunhwÿ nē axpu hāmri nē angrà nē ma ahpÿnhā ri pa. Hāmri nē amnhī krā hkôt ri tanhmā amnhī nhīpēx to ho pa. Jakamā nhūm mē ò pahija mē hamār kêt nē. Nē koja krī nhō xwÿnh̄jaja. Rÿ mē kot axpēn to hkwȳ xwÿnh̄jaja

mêmoj tâ axpên kãm gryk nê axpên kutã amnhĩ xunhwỳ. Hãmri nê ahpỹnhã awry hã pa nhũm mẽ õ pahija tee ri kãm mẽ hamãr prãm kaprỳ. Mo mẽ hkwỳjaja kot ri mẽ hamãr o pa? No koja pahija tãm amnhĩ nê amnhĩ kwỳjê janor kêt nê.

²⁶ Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kwỳjê janor kêt nê.

²⁷ —No mẽ akwỳjaja? Xà Satanasti nhỹ hã na htem mẽ nê mẽkarõmnuti japôx o pa? Kêp apu pa ixte ã hã mẽ nê amnhĩ kwỳjê japôx ronhỹx mẽ akwỳjaja ixpyrã nê ã hã mẽ nê amnhĩ kwỳjê japôx o pa. Nà Tĩrtũm nhỹ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhỹrja mex kêt.

²⁸ Tĩrtũm Karõ nhỹ hã ixte mẽ nê mẽ hapôx jakamã kwa mẽ ja hã ixpumu nê ixte mẽ ato amnhĩptar kaxyw Tĩrtũm kot mẽ awyr inhmênh kôt ixpumu kêt wehe. Pa na ka htem ijamãr o apa.

²⁹ —Satanastija àhpumunh tỳx jakamã na htem tee ri kêp hkôt mẽ kot amnhĩ xunhwỳr xwỳnhjê pytar kaxyw nhũm mẽ nê mẽ omunh mex nê. Tã nom ixàhpumunh tỳx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

³⁰ —Ra mẽ amã ixkapêr mar prãm tâ nom kormã ixkôt amnhĩ xunhwỳr kêt nê. Kwa wem ma amnhĩ to amõr gri nê tokyx ixkôt amnhĩ xunhwỳ kêt wehe. Kot kaj mẽ anhỹr kêt hãmri nê mẽ apê ixkutã amnhĩ xunhwỳr xwỳnh pyrãk o amnhĩ nhĩpêx.

³¹⁻³² —Nê koja mẽhõ ixkapêr ma mẽ kãm ixprãm kêt nhũm Tĩrtũm ixtã omu nom tokyx tanhmã ixtã

ho hkêt nê. Koja kormã amnhĩ tâ hamã. Karõ kot axte kãm ijarênh o amnhĩrĩt nhũm jatã kot mar nê kãm ixprãm nê ixkõt amnhĩ xãm prãm xaj nhũm kormã amnhĩ tâ hamã. Nom koja Karõ xatã mẽ kãm tanhmã ixto amnhĩrĩt to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaãm kêt o amnhĩ nhĩpêx. Mýrapê koja Tĩrtũm nhỹrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprý. Hãmri nê amnhĩ xà htýx kamã hamak o pa xata wýr ma pa nê kamã pa rãhã nê pa ho pa. Anê.

Mẽ pajamaxpêr xà hkõt tanhmã ri mẽ pakapêr to Rukre 6.43-45

³³ Nhũm Jêus arĩ Parijew nhõ xwýnhjê mã kapêr nê mẽ kãm:

—Nê kot kaj mẽ atõ anhõ mẽmo pàr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mẽmo xô hpàr pumunh kõt tanhmã kute hã harênh anê. Ja pyrã nê na htem tanhmã mẽ kot amnhĩ nhĩpêx to hã mẽ omunh kõt tanhmã mẽ harênh to. Mẽ kot amnhĩ tomnuj xwýnh ã mẽ harê rý mẽ kot amnhĩ to mex xwýnh ã mẽ harê.

³⁴⁻³⁵ —Nê koja mẽhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htýx ri tanhmã amnhĩ tomnuj to ho pa. Na htem ahpýnhã amnhĩ jamaxpêr xà hkõt tanhmã kapêr to ho pa. No mẽ kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt

nê. Na htem tanhmã hamaxpêr to xà hkôt tanhmã ri kapêr to ho pa.

³⁶⁻³⁷ Koja nhÿrmã Tirtÿm mẽ piitã tanhmã mẽ kapêr to hã mẽ mar xà hkôt tanhmã mẽ harênh to. Jakamã mẽ akapêr mex o mẽ apa xwÿnhjaja koja mẽ amex ã mẽ ajarê. Nom mẽ atÿx ri akapêr punuj o mẽ apa xwÿnhjaja koja mẽ amex kêt ã mẽ ajarê. Hãmri nê mẽ akapêr punuj o apaja mÿrapê mẽ atomnuj tÿx nê. Anê.

Jejus kot Jõhti jarênh

Makre 8.11-12; Rukre 11.29-32

³⁸ Hãmri nhÿm Tirtÿm kapêr tÿm o mẽ ahkre xwÿnh mẽ Parijew nhõ xwÿnh kwÿjaja mẽmoj tã Jejus wÿ nê kãm:

—Kwa Pahihti. Mẽ inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tirtÿm kot mẽ ixwÿr amênh ã apumunh kurê kumrêx. Jakamã e mẽ inhmã mẽmoj to anê nà. Anê.

³⁹ Hãmri nhÿm mẽ kuma nê mẽ kãm:

—Tk. Pêr ãm mẽ ajamaxpêr punuj pix o na ka htem apa. Ixpê Tirtÿm kot mẽ awÿr inhmênh xwÿnh tã mẽ ate ja hã ixpumunh kêt. Nê mẽ ate ja hã axpên mã ijarênh kêt tã ixte mẽ amã aa mẽmoj pumunh kêt õ ho anhÿr kaxyw hã ixwÿ. Nà pa mẽ amã ho anhÿr kêt nê. Kormã. ãm amnepêm Jõhti kot tanhmã amnhÿ nhÿpêx toja pix kot paj mẽ amã harê.

⁴⁰ —Tirtÿm nhÿ hã kapêr xwÿnh Jõhtija amnepêm na pre tep rax kumrêxja htÿr rãhã kukrê. Nhÿm õxàhkre kamã htÿr nê hkrÿ hã apkati axkrunêpxi hãmri nê htÿr rãhã õxàhkre rÿm kato. Tã ixpê Tirtÿm kot mẽ awÿr inhmênh xwÿnh kot paj nhÿrmã kên

kre kamã ixtyk nê inhnôr ã apkati axkrunêpxi. Jõhti hkĩnhã ixtyk kumrêx nê inhnôr ã apkati axkrunêpxi hãmri nhũm Tĩrtũm akupỹm ixto ixtĩr.

41 —Nê koja nhỹrmã Tĩrtũm akupỹm mẽ htyk nê mẽ hikwỹ xwỹnh piitã akupỹm mẽ ho htĩr hãmri nhũm mẽ piitã Inhĩpêêxà mẽ wa ixkutã hkrĩ pa wa tanhmã mẽ harênh to. Tĩrtũm mẽ wa ixkuri mẽ htĩr tũm nê mẽ pa ho mẽ pa mã xwỹnhjê hã mẽ hkwỹjê jarê nê wa ixkuri mẽ pa ho mẽ pa hkêt xwỹnhjê jarê. Mẽ piitã ã ahpỹnhã mẽ harênh anê. Amarĩ mẽ pa xwỹnhjaja nê mẽ õ pahijaja. Jakamã nhũm Nĩnĩwe nhõ xwỹnhjaja tanhmã wa inhmã mẽ ajarênh to. Jõhti kot mẽ hwỳr mõr nê mẽ kãm Tĩrtũm kapêr jarênh o pa xwỹnhjaja nhũm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krĩ hwỳr mõ nê mẽ inhmã akapêr jarênh o ri mẽ ixkõt pa. Pa prem kuma nê mẽ ixte amnhĩ tomnuj kaga nê akõt amnhĩ xunhwỳr kurê kumrêx Tĩrtũm. No or war akutã mẽ hkrĩ xwỹnh kwỳ ata mẽ na pre Akra Jejus tãm mẽ hwỳr mõ nê mẽ kãm kapêr o ri mẽ hkõt pa nhũm prem mar tã mẽ ixkĩnhã mẽ kot amnhĩ tomnuj kaga nê hkõt amnhĩ xunhwỳr kêt nê. Mẽ ixkurom mẽ kot Akra mar tã amnhĩ kaxyw kãm hamaxpêr kêt nê.” Anhỹr o koja mẽ wa inhmã mẽ ajarê ka mẽ tee ri mẽ ama nê ra mẽ amã ma nê. Nom ãm mẽ amã ma kaprỳ.

42 —Nê sur kãm mẽ õ pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhỹ hã àhpumunh tỹx ã harênh ma hãmri nê inhmã mar prãm xàj ma awry hã õ pika hwỳr mõ nê omu nê kapêr ma. Hãmri nê ma akupỹm inhõ pika hwỳr

mõ nê ixkwỳjê mã àhpumunh tỳx ã harênh o ri ixpa. Tã Akra Jejus na kot àhpumunh tỳx o pahi Sarumãw jakrenh tã or war akutã mẽ hkrĩ xwỳnh kwỳ ata mẽ. Mẽ kot kapêr mar tã ixkĩnhã kãm mar prãm kêt. Na prem kuma nê ãm kuma.” Anhỹr o koja wa inhmã mẽ ajarê. Hãmri nê ja hã mẽ amã akir ka mẽ tee ri mar o akrĩ nê amnhĩ kamã agryk o akrĩ. Nom ãm amnhĩ kamã agryk kaprỳ. Anê.

*Mêkarõmnuti kot tanhmã mēhō hto hã harênh
Rukre 11.24-26*

⁴³ Nhũm Jejus arĩ Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjê mã kapêr nê mẽ kãm:

—Te mẽ ate ixte mēhō nê mẽkarõmnuti japôx xwỳnhta pyræk. Nhũm te kêp kator nê ma htêm pyræk. Nê nhỹri amgrà kamã ri pa pyræk. Koja ja kêp omnuj nhũm tee ri kamã nhỹri hkôt xà japêr o pa. Nom tee ri hapêr o pa kaprỳ.

⁴⁴ Hãmri nê tanhmã amnhĩ kukamã hamaxpêr to nê hamaxpêr o: “E kot paj ma akupỹm mẽ kot nê ixkator xwỳnhta wỳr tẽ nê axà nê kamã mãn ri ixpa.”

⁴⁵ Anhỹr o hamaxpêr hãmri nê ma akupỹm hwỳr tẽ. Nom kormã akupỹm hwỳr àr kêt ri nhũm kamã amrakati nê ri pa. Jakamã nhũm akupỹm hwỳr axà. Nom ahte hwỳr àr kêt nê. Amnhĩ kôt hkwyjê ho 7 nê hwỳr mẽ ho gjêx pa. Mẽ kêp 7jaja nê wamta mẽ nhũm mẽ piitã hwỳr gjêx pa. No mẽ kêp 7jaja na omnuj tỳx o kot wamta jakrenh jakamã nhũm mẽ kot hwỳr gjêx xwỳnhta mẽ ý hã ra amnhĩ tomnuj tỳx nê oprê htỳx o pa. Wam pyxire kot hwỳr àrta nhỹ hã nhũm amnhĩ tomnuj o ri pa nom kawax pê oprê. Tã nhũm ra axte hwỳr mẽ ohtô

nê gjêxta nhỹ hã hãmri oprê htỳx kumrêx. Ja pyrà nê kot kaj mẽ tokyx ixkôt amnhĩ xunhwỳr kêt nê hãmri nê amnhĩ tomnuj tỳx pix o ri apa. Anê.

Jejus kot tanhmã hkwỳjê jarênh to hã harênh

⁴⁶ Nhũm Jejus arĩ mẽ ahkre ho nhỹ. Rôm nhũm katorxà nê htōjaja nhỹhỹnh hwỳr mōn pōj. Nom kormã hwỳr gjêx kêt nê. Mẽ kot hã htu rax jakamã nhũm mẽ tee ri hwỳr gjêx kaxyw kormã kapôt ã hã mẽ omunh o kuhê.

⁴⁷ Hãmri nhũm mēhōja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atōjaja awỳr mōn pōj nê tee àr kaxyw. O mũj mẽ kapôt ã kuhê. Anê.

⁴⁸⁻⁵⁰ Hãmri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêê. Nom kot kaj mẽ atō Tĩrtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtō rỳ ixkatorxà pyræk o pu mẽ axpên nhĩpêx o ri papa. Pa inhmã ixkatorxà nê ixtōjê japê pyrà nê mãănênh inhmã mẽ ajapê nê. Anê.

13

Mẽmo hy hkre xwỳnh jarênh

Matêwre 13.18-23; Makre 4.1-9; Rukre 8.4-8

¹ Hãmri nhũm Jejus mẽ kãm kapêr pa nê ixkre rũm kato nê ma himô rax wỳr tẽ nê gô mỳri mẽ kãm ujarênh kaxyw nhỹ. Pa mẽ ixpê hkôt mẽ ixpa ho ixpa xwỳnhjaja ma hkôt mra.

²⁻³ Hãmri nê gôta wỳr pōj nê mỳri ixkrĩ. Nhũm mẽ Jejus ã htu rax nê nhũm tee ri mẽ omunh o nhỹ. Hãmri nê hamaxpêr nê kànhmã xa nê tẽ nê pàr krem axà nê pàr kre kamã mũtũm awry rũm

mê ahkre ho nhỹ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nê. Mẽ kot Tĩrtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm harênh o nhỹ nhũm mẽ amgrà kamã kỳx pê mar o hkrĩ. Nhũm mẽ kãm:

⁴ —E mẽ inhma. Koja mēhō ma pur mã mō nê pur kãm mẽmo hy ho ukapêr o ri pa. Nom nhũm hy piitã amex kãm rôrôk kêt nê. Koja hkwỳja ahpỹnhã nhỹri rôrôk. Kwỳ aptỳx kãm rôrôk nhũm kuwênhre omu nê hwỳr mra nê hkrêr pa.

⁵ —Nê koja kên kãm hkwỳ rôrôk nê ra higrôt kutã nojarêt nê higrôt pa. Nom nhũm kamã aptỳx nê kêp pika hkryre.

⁶ Jakamã nhũm higrôt nhũm hã myt apha nê arĩgro htỳx mẽ nhũm grà pa. Harê hkryre jakamã grà pa.

⁷ —Nê koja mrônhĩ kamã hkwỳ rôrôk nê higrôt tã no nhũm utĩa kêp amỹtã nhũm ô hkêt nê.

⁸ —No kêt hirã kamã pika mex kãm rôrôk xwỳnhja hirã kamã rôrôk jakamã higrôt mex nê piitã ô rũnh nê. Kamã ô hkwỳ kêp 30 nê kamã hkwỳ kêp 60 nê kamã hkwỳ kêp 100. ã mẽ ujarênh kot anhỹr.

⁹ Kwa kêr ka mẽ ixujarênhja ma nê kãm aja-maxpêr tỳx rãhã ho apa. Anê.

*Mẽmo kaxyw Jejus kot mẽ ujarênh o mẽ ahkre
Makre 4.10-25; Rukre 8.9-15*

¹⁰ Hãmri pa mẽ ixpê Jejus kôt mẽ ixpa ho ixpa xwỳnhjaja Jejus kot mẽ kãm ã ujarênh anhỹrja ã

kuma nê tee ri hkukamã ijamaxpêr. Hâmri nê hã hkukja nê kãm:

—Kwa axujarênhhta na pa mẽ ixprĩ hã hkôt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

¹¹ Hâmri nhũm mẽ inhmã:

—Tôe. Nà kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htỳx ri pa.

¹² —No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mō. No mẽ kot ixkapêr mar nê ãm mar xwỳnhjaja na mẽ akĩnhã inhmar tỳx kêt nê. Jakamã nhũm Tĩrtũm tanhmã mẽ hkrã hto nhũm mẽ hã no hkêt tokyx anê htỳx ri pa.

¹³ “Ixte mẽ kãm aa mẽ kot mẽmoj pumunh kêt kwỳ ho anhỳr rax tã nhũm mẽ omu nê ãm omu. Nê ixte amnhĩ nhĩpêxja nhũm mẽ kãm hkĩnh kêt nê. Nê mẽ kot ixkapêr mar tã ãm inhma nê kãm hprĩ hã inhmar prãm kêt nê.”

—Jakamã na pa hte ã mẽ kãm mẽmoj te ho tãm pyrã nê harê no ãm hã haxwỳ nê mẽ kãm ixujarênh anê.

¹⁴⁻¹⁵ —Na pre ra Tĩrtũm nhỹ hã kapêr o pa xwỳnh Ijaisja amnepêm mẽ hkukamã tanhmã mẽ harênh to nê hã kagà. Mẽ kot inhmar nê ãm inhmar

xwÿnhjê jarê nê tanhmã mẽ hkukamã mẽ harênh to nê mẽ harênh o:

Koja mẽ ujarênh mex mar pymaj amnhĩ jamak pro nê amnhĩ no hpro nê hkôt hamaxpêr kêt nê. Jakamã koja mẽ kãm mẽ kot amnhĩ nhĩpêx mex prãm kêt nê harênhja ma nê ãm kuma. Nê omu nê ãm omu. Mẽ kãm hprãm kêt jakamã koja mẽ ã amnhĩ nhĩpêx anê. ã mẽ kot amnhĩ nhĩpêx anhÿr kêt ronhÿx mẽ ra Tĩrtũm kapêr ma nê hkôt amnhĩ xunhwÿ. Hãmri nhũm amnhĩ tã mẽ omu nê mẽ nê mẽ kot amnhĩ tomnuj rênh pa. Hãmri nhũm mẽ hkôt amnhĩ nhĩpêx mex nê kapêr mar mex o pa. Tã no nhũm mẽ ã amnhĩ nhĩpêx anhÿr kêt nê. Anê.

—ã Ijaisja mẽ hkukamã mẽ harê nê mẽ hã kagà anê.

¹⁶ —No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nê mẽ ajamak o ixkapêr mar o ri ixkôt apa.

¹⁷ Amnepêm mẽ akukamã pahijaja nê Tĩrtũm nhÿ hã mẽ kãm kapêr o ri mẽ pa xwÿnhjaja na prem kãm ixpumunh prãm tÿx o pa. Nê mẽ kãm ixkapêr mar prãm tÿx o pa. No ãm mẽ akĩnhã ixpumunh nê ixkapêr mar kêt rãhã htyk pa. Kormã ixwryk nê jar ixkator kêt jakamã na prem arĩ htĩr nê pa ri ixpumunh kêt rãhã ra htyk pa. ãm mẽ kapxipixjaja na ka mẽ mÿr pê ixte amnhĩ nhĩpêx ã ixpumunh nê ixkapêr mar o ixkôt apa. Tã mẽ kurom mẽ ate ano ho ixpumunh nê ajamak o ixkapêr mar o ixkôt apa jakamã kwa mẽ ja hã amnhĩ pumu nê tãm amnhĩ nhĩpêx o ri apa pê akĩnh nê ri apa. Anê.

Nhũm pre ã Jejus mẽ ixpê hkôt ixpa ho ixpa xwỳnhjê mã kapêr anê.

*Jejus kot hprĩ hã mẽmo hy jarẽnh
Makre 4.13-20; Rukre 8.11-15*

¹⁸ Hãmri nhũm Jejus mẽ ixpê hkôt ixpa ho ixpa xwỳnhjê mã hprĩ hã mẽ ujarẽnhta jarẽ nê mẽ inhmã:

—E kot paj ixprĩ hã mẽ amã mẽmo hy ho ukapêr xwỳnh ã ixujarẽnhta jarẽ ka mẽ inhma. Nà mẽmo hyta te kêp Tĩrtũm kapêr pyræk. Nê ahpỳnhã mẽmo hy rôrøk ã pikata te kêp mẽ apê panhĩ ahpỳnhã mẽ ate Tĩrtũm kapêr mar nê ahpỳnhã hkôt tanhmã amnhĩ nhĩpêx tota pyræk.

¹⁹ Jakamã mẽ kot mar xwỳnh kwỳjaja te mẽ kot aptỳx kãm hy rôrøk nhũm kuwênh kot hwỳr mrar nê hkrêr par xwỳnhta pyræk. Jao Tĩrtũm kapêr ma no nhũm Satanasti te kuwênh kot hy krêr parta pyrà nê mẽ kot mar nê amnhĩ kaxyw hkôt hamaxpêr nê hkôt amnhĩ xunhwỳr pymaj hãmri ra tanhmã kapêrja nê mẽ hkrã hto. Jakamã nhũm mẽ kuma nom ho hamakêtkati tokyx anê nê axte kãm hamaxpêr kêt nê pa.

²⁰ —Nê mẽ kot mar xwỳnh kwỳjaja te mẽ kot kênre kamã hy hkwỳ rôrøk nê higrôt nê grà par tokyx anhỳr xwỳnhta pyræk. Jao Tĩrtũm kapêr ma nê hkĩnh nê. Nê kãm mar prãm nê.

²¹ Tã nhũm mẽhõ Tĩrtũm nê tanhmã mẽ kãm kapêr to nhũm mẽ kuma nê Tĩrtũm kaga. Te mẽmo hy higrôt nom ra grà par tokyx anhỳrta pyræk.

²² —Nê mẽ kot mar xwỳnh kwỳjaja te mrônhi kamã hy hkwỳ rôrøk nê higrôt nhũm mrônhi kot kêp àmnàr xwỳnhta pyræk. Jao mẽ kãm Tĩrtũm

kapêr mar prãm tâ mãânên kãm mẽ hikukrêx rûnh nê mẽ hikâxpore rûnh prãm. Hãmri nê ãm ja pix kukamã hamaxpêr o pa. Nê ja gryk ã axte Tĩrtũm kapêr mã hamaxpêr nê hkôt amnhĩ nhĩpêx kêt nê.

²³ —Nê mẽ kot mar xwýnh kwýjaja te hirã kamã pika mex kãm hy hkwý rôrôk nê higrôt nê ô rûnhhta pyræk. Jao ixkapêr ma nê amnhĩ krã him hagjênh týx nê. Nê ixkôt ri amnhĩ nhĩpêx mex rãhã ho pa. Jakamã te mẽmo hy ô rûnh nê ô mex pyræk o amnhĩ nhĩpêx. E ã ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

²⁴ Nhũm Jesus axte mẽ kot mar o hkrĩ xwýnhjê mã awjarê nom hprĩ hã mẽ kãm ujarênh kêt nê. Axte mẽ kãm mẽmoj tâ kuxi nê awjarê nê mẽ kãm:

—Nà nhÿrmã Tĩrtũm mẽ kot kormã htĩr ri tanhmã amnhĩ nhĩpêx to ho pa hã mẽ omunh xà hkôt ahpÿnhã tanhmã mẽ harênh toja te mẽ ujarênh ja pyræk. Kojã mēhõ harôj y mex o ukapêr kaxyw ma hpur mã mō. Hãmri nê hkre hpa nê ma akupÿm mō.

²⁵ Tã nhũm kamàt nhũm ra gōr nê nō. Hãmri nhũm kãm hkurê xwýnhja ma kêp ihpur wÿr tē nê harôj mexta nhĩpy axtem nê kêp harôj kaàkre hkre. Harôj kaàkreja te kot harôj mex pyræk nom mẽ kot hkur kêt. Tã nhũm kêp harôj y mex nhĩpy hkre hpa hãmri nê ma akupÿm tē.

²⁶ —Tã nhũm hamē higrôt nê anhĩpê ô.

²⁷ Nhũm kãm mẽ àpênh xwýnhjaja tee ri harôj mex kaêx ã harôj kaàkreta pumu nê hpur nhõ dōn wÿr tē nê kãm harē nê kãm: “Kwa ate harôj mex pix

kre htâ pěr hkaêx ã harôj kaàkre mãânên kato. Kwa tanhmã na pre amnhĩ to nê hkaêx ã kato?” Anê.

²⁸ Hãmri nhũm tee ri mẽ kuma nê mẽ kãm: “Nà mēhō kãm ixkurê xwýnh na pre ã inhĩpêx anê.” Anê hãmri nhũm kãm mẽ àpênh xwýnhhta kãm: “Kwa xà kot paj mẽ tokyx ma hwýr mra nê nê harênh pa nê kurê nà?” Anê.

²⁹ Nhũm mẽ kãm: “Nà kot kaj mẽ anê nê harôj mexta mẽ ho apimràatã ixpê harênh pa.

³⁰ Kwār mãmrĩ harôj mex mẽ hpimràatã ô hpa mãn. Ka mẽ rĩ ma hwýr mra nê harôj kaàkre kumrêx jarênh pa nê axpên tã harê ho ê nê ma o mra nê hpôk. Hãmri nê rĩ kormã hpãnhã harôj mex jakà nê ho akuprô nê ô ho mra nê ixkre kamã haxwý.” Anê. ã mẽ ujarênh kot anhýr.

Anhýr o mẽ kãm kapêr.

*Jejus te kot mẽmo hy hkryre pyræk ã harênh
Makre 4.30-32; Rukre 13.18-19*

³¹⁻³² Hãmri nhũm Jejus arĩ mẽ kãm amnhĩ tã kuxi nê ujarênh o nhỹ. Nê tanhmã mẽ kãm amnhĩ tã ujarênh to nê mẽ kãm:

—Nà Tĩrtũm kot mẽ awýr ixte mẽ ato amnhĩptàr kaxyw inhmênh ã ijarênhja. Te ixte mẽmo hy pixire nhũm mẽ kot hkre nhũm higrôt pyræk. Koja gaa nê hprêk. Hãmri nê hpa anhgrà nhũm kuwênhre hwýr mra nê hoptĩ kamã amnhĩm haê nhĩpêx nê kamã hikwý. Tã kot paj nhỹrmã mẽmo hy jarênhhta pyrà nê ixpyxi htâ pika piitã hkôt mẽ ho amnhĩptà nê mẽ omunh mex rãhã ho ixpa. Anê.

*Jejus te kot pãwti kaxkrit xà pyræk ã harênh
Rukre 13.20-21*

³³ Nhũm Jejus arĩ mẽ kãm amnhĩ tã kuxi nẽ ujarẽnh o nhỹ nẽ mẽ kãm:

—E kot pa hpãnhã mẽ amã tanhmã pãwti kaxkrit xà jarẽnh to ka mẽ inhma. Na hte mēnijaja pãwti nhĩpêx kaxyw hãmri nẽ kaxkrit xà hkwỳ ho grire nẽ kupy nẽ trik xôm mẽ ho ahkà. Hãmri nẽ ho pãwti nhĩpêx. Kaxkrit xàja grire htã pãwti piitã ho kaxkrit mex nẽ. Tã ja pyrà nẽ ixpyxi htã koja mẽ nhỹrmã pika piitã hkôt ixkôt amnhĩ nhĩpêx mex o pa.

Anhỹr o mẽ kãm amnhĩ jarẽ.

Jejus kot mẽ ujarẽnh pix kãm mẽ ahkre hã harẽnh Makre 4.33-34

³⁴ Na pre ã Jejusja mẽ ujarẽnh o mẽ ahkre ho pa anẽ. ãm mẽ ujarẽnh pix o mẽ ahkre ho pa. Te tãm ujarẽnh pyràk no ãm mẽmoj tã haxwỳ rỳ amnhĩ tã haxwỳ nẽ mẽ kãm tanhmã amnhĩ jarẽnh to.

³⁵ ã kot mẽ ahkre ho pa anhỹr kukamã na pre ra amnepêm Tirtũm nhỹ hã kapêr o mẽ pa xwỳnhjê hõja harẽ nẽ hã kagà. Te Jejus tãm tanhmã amnhĩ jarẽnh to pyràk o hkukamã harẽ nẽ hã kagà nẽ hã hkagà ho:

Kot paj mẽ kãm ixujarẽnh pix kãm mẽ ahkre ho ri ixpa. Mẽmoj te ho tãm pyrà nẽ harẽ nom mẽmoj tã haxwỳ nẽ tanhmã mẽ kãm ixujarẽnh to. Nẽ aa mẽ kot mẽmoj mar kêt xwỳnh kwỳ kot paj mẽ kãm harẽ kê mẽ kuma. Anẽ.

Jejus kot hprĩ hã harôj kaàkre jarẽnh Matêwre 13.24-30, 13.47-50

³⁶ Tã nhũm Jejus mẽ kãm ujarẽnh pa nẽ mẽ kure nẽ ma tẽn ixkrem axà. Hãmri pa mẽ ixpê hkôt ixpa

ho ixpa xwýnhjaja ma hkôt mra nê ixkrem agjê. Hâmri nê harôj kaàkre hã ujarênhta ã hkukja nê kãm:

—Kwa aprĩ hã mẽ inhmã harôj kaàkre jarênhta jarê nà. Na pa mẽ kormã ixprĩ hã mar mex kêt nê. Anê.

³⁷ Hâmri nhũm mẽ inhmã:

—Tôe pa ixprĩ hã mẽ amã harê. ãm paa.

Ixpê Tĩrtũm kot mẽ awýr inhmẽnh xwýnh te ixte mẽmo hy mex o ukapêr xwýnhhta pyræk.

³⁸ Nê purta te kêp pika piitã pyræk.

Nê harôj mexta te ra mẽ ate ixkôt amnhĩ xunhwýr nê ixkôt amnhĩ nhĩpêx o apa xwýnhjê pyræk.

Nê harôj kaàkreta te mẽ kot Satanasti hkôt amnhĩ nhĩpêx o mẽ pa xwýnhjê pyræk.

³⁹ Nê kot harôj kaàkre hkre xwýnhhta te Satanasti pyræk.

Nê harôj jakàr xà hã arĩgrota te Tĩrtũm kot ahpýnhã tanhmã mẽ harênh to xà hã arĩgrota pyræk.

Nê mẽ kot harôj jakàr xwýnhjaja te Tĩrtũm kapêr o wrýk xwýnhjê pyræk.

⁴⁰ Mẽ ujarênhja kamã na prem harôj kaàkre kumrêx jarê nê hã hpôk jarê. Ja pyrà nê koja nhỹrmã Tĩrtũm kot ahpýnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwýnhjê nhĩpêx anê.

⁴¹ —Kot paj nhỹrmã kãm mẽ piitã mẽ ho amnhĩptàr kaxyw hãmri nê kapêr o mẽ wrýk xwýnhjê mã anê nhũm mẽ ma mran wrý nê mẽ kot amnhĩ tomnuj xwýnhjê pix o akuprô. Nê mẽ kot nhãm mẽ hkwyjê kot mẽ uræk nê tanhmã

amnhĩ tomnuj to ho pa kaxyw mẽ kãm anhỹr xwỳnhjaja nhũm mẽ mãnẽn mẽ ho akuprõ.

42 Hãmri nẽ mẽ ho pikuprõnh pa nẽ te mẽ kot harôj kaàkreta nhĩpêx pyrà nẽ kuwy kamã mẽ rẽn pa. Hãmri nhũm mẽ kamã amnhĩ xà htỳx kamã hamak rãhã nẽ pa ho pa. Nẽ amnhĩ xà htỳx ã maj tee ri mỳr rãhã ho pa. Nẽ tee ri amnhĩ xà hã maj amnhĩ nham o axpẽn kamnhar tỳx kaprỳ.

43 —No ixkõt mẽ kot amnhĩ nhĩpêx xwỳnhjaja koja mẽ mẽ kurom mex kumrêx nẽ pa. Kot paj mẽ ho mex rax nẽ nhũm mẽ mex rãhã nẽ pa ho pa. Tirtũm kot kormã pika nyw nhĩpêx mã xwỳnhhta kamã nhũm mẽ mex kumrêx nẽ pa ho pa. E kër ka mẽ ixujarẽnha ma nẽ kãm ajamxpêr tỳx rãhã ho apa. Anẽ.

*Mẽ hikukrêx mex o hpimxur jarẽn
Piripos 3.7*

44 Nhũm Jesus arĩ mẽ ixpiitã mẽ inhmã tanhmã ujarẽn to. Nom hprĩ hã ujarẽn kêt nẽ. Kê axte mẽmoj tã kuxi nẽ mẽ inhmã tanhmã ujarẽn to nẽ mẽ inhmã:

—Mẽ ate ixkõt amnhĩ xunhwỳr xwỳnhjaja te mẽ apê mẽ hikukrêx mex ã pika japrôr xwỳnhhta pyræk. Koja mẽhõ mẽ hikukrêx mex jamỳ nẽ o tẽ nẽ nhỹri amnhĩm ho amũxu. Kaxyw kakwỳ nẽ kamã hagjê nẽ hity hpa nẽ ma akupỹm tẽ. Hãmri nhũm jãã nhũm mẽhõ tẽn kãm kato. Hã pikata kakwỳ nẽ kãm kato nẽ omu nẽ hkĩnh nẽ. Nẽ hamaxpêr o: “E pa ma tẽ nẽ inhõrkwỹ kamã ixkukrêx piitã ho wẽnê hpa nẽ hpãnhã kàxpore jamỳ nẽ ho amnhĩm mẽ hikukrêx mex ã pika japrô nẽ amnhĩm mẽmoj mexta o ixarĩk pa.” Anhỹr o hamaxpêr nẽ akupỹm

hity hpa nê ma akupÿm tẽ. Hãmri nê mẽmoj mexta gryk ã õ mẽmoj piitã ho wẽnê hpa. Hikukrêx nê òrkwÿ nhũm piitã ho wẽnê hpa. Hãmri nê hpãnhã kàxpore jamÿ nê ma o tẽ nê amnhĩm pikata japrô. Hãmri nê ma akupÿm hwÿr tẽ nê kamã mẽ hikukrêx mexta kwrynh pa nê ho õ kumrêx.

—Tã te mẽ ate mẽhõ kot ã amnhĩ nhĩpêx anhÿr xwÿnhnta pyræk. Na ka mẽ uræk nê inhgryk ã amnhĩ tomnuj kaga hpa nê hpãnhã ixkôt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrô pyræk. Anẽ.

Mẽhõ kot kẽn jaxênh japrô jarênh

⁴⁵ Nhũm Jejus arĩ mẽ inhmã awjarẽ nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xàj Tirtũm kôt amnhĩ xunhwÿ nê hkôt ri amnhĩ nhĩpêx rãhã ho pa. Te mẽhõ my kãm kẽn jaxênh mex prãm nê ma ri hapêr o pa xwÿnhnta pyræk.

⁴⁶ Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtô nê harẽ nhũm ma akupÿm tẽ nê kãm ho õ hprãm xàj hikukrêx piitã ho wẽnê hpa. Hãmri nê kàxpore jamÿ nê o tẽ nê amnhĩm ho haprô. Kẽn jaxênh mexta pix gryk ã hikukrêx piitã ho wẽnê hpa nê hpãnhã ho amnhĩm haprô.

—Tã ja pyrà nê na ka htem amex nê ajamakêtkati nê axamnhĩx ri apa hprãm xàj ixkôt amnhĩ xunhwÿ nê ixkôt pix mã amnhĩ nhĩpêx o apa. Anẽ.

Kryhti jarênh

Matêwre 13.24-30, 13.36-43

47-48 Nhũm Jejus arĩ mẽ inhmã awjarẽ nõ mẽ inhmã:

—E Tĩrtũm kot nhỹrmã tanhmã mẽ harẽnh to xà hã arĩgro kot paj ixprĩ hã tanhmã mẽ amã harẽnh to. Te ho mẽmyjaja kot himô kamã kryhti rẽnh pyrãk. Koja mẽ gôx kãm kumẽ nõ akupỹm ho api nhũm kamã tep ohtô nõ. Nhũm omu nõ kỳx pẽ amgrã kamã hkapĩ nõ ahpỹnhã ri tanhmã kamã kute kawrà. Nẽ kamã mex kawrà nõ kawà kamã kugjẽ nõ mẽ kot hkur kêtja nhũm nhãm kurẽ.

49 Ja pyrã nõ Tĩrtũm kot ahpỹnhã ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to kaxyw arĩgrota ã ã mẽ hipêx anẽ. Koja kapẽr o mẽ wryk xwỹnhjaja mẽ kot hkôt amnhĩ xunhwỳr xwỹnhjẽ nõ mẽ kot amnhĩ tomnuj o mẽ pa xwỹnhjẽ kawrà hpa.

50 Nẽ te mẽ kot tep mex nõ tep punu kawrà nõ nhãm rẽnhta pyrãk o mẽ hipêx nõ ma kuwy hwỳr mẽ o mra nõ kamã mẽ kurẽ. Nhũm mẽ tee ri amnhĩ xà htỳx ã maj amỹra nõ tee ri amnhĩ nhĩpêx kaprỳ. Anẽ.

Nhũm pre ã Jejusja axte mẽ ixpê hkôt mẽ ixpa ho mẽ ixpa xwỹnhjẽ mã ujarẽnh anẽ.

51 Hãmri nõ mẽ inhmã:

—E xàn ka mẽ atã aprĩ hã ixujarẽnhta ma nà?

Anẽ pa mẽ kãm:

—Tỳ. Nà na pa mẽ atã ixprĩ hã mar mex nõ. Anẽ.

52 Hãmri nhũm mẽ inhmã:

—Tõe. Nà ãm hãmri. Na ka xep mẽ ra ixte mẽ ahkre nywta mar mex nõ. Nẽ mẽ akwỳjaja mããnẽn Tĩrtũm kapẽr tũm mar mex nõ. Te mẽ apê mẽhõ apkur xà rax pyrã nõ ma ho mẽ piitã mẽ hipêx o ri mẽ hkôt paja pyrãk. Ja pyrã nõ kêr ka mẽ ma mẽ

piitã mē hkôt Tirtũm mē wa ixkapēr o mē ahkre ho ri mē hkôt apa. Anē.

Najare nhō xwỳnhjaja kot Jejus kaga hã mē harēnh

Makre 6.1-6; Rukre 4.16-30; Juãw 1.11

⁵³ ã Jejus mē inhmã ujarēnh par anē.

⁵⁴ Hãmri nē ma akupỹm Najare hwỳr mō nē Tirtũm kapēr o mē ahkre xà hã ixkre hwỳr tē nē axà nē mē ahkre ho nhỹ. Nhũm mē amnhĩ jaēr pē tanhmã kot mē ahkre hto hã kuma nē tee ri hkukamã hamaxpēr nē axpēn mã:

—Tk. Kwa kēp mē panhĩō htã tanhmã kot we amnhĩ to nē ã àhpumunh tỳx kôt mē pamã kapēr anē nē ri mē kãm aa mē kot mēmoj pumunh kêt kwỳ ho anhỹr o pa?

⁵⁵⁻⁵⁶ Na pre mē panoo mã hprêk nhũm mē pahte pahprĩ hã hkwỳjê pumunh. Kēp pĩ kuprãr xwỳnh Juje mē hprō Marir wa hkraa. Nē kēp Xiakre nē Juje nē Simãw nē Jut mē htōō. Nē htōxjaja jar mē pakamã pa nhũm mē pahte mē piitã mē omunh mex kēnã kot kêt we mē kurom ã àhpumunh tỳx anē. Anē.

⁵⁷ Hãmri nē kamã gryk nē hkaga. Hãmri nhũm tee ri amnhĩ tã mē omu nē mē kãm:

—Nà Tirtũm nhỹ hã kapēr jarēnh o mē pa xwỳnhjaja na htem krĩ hkwỳ kamã kãm mē mar prãm nē. Nom ò krĩ kamã mē kot karàre rũm hprêk kãm omunh xwỳnhjaja na htem kuma nē ãm kuma. Anē.

⁵⁸ Tã mē kot amnhĩ kaxyw hkôt hamaxpēr kêt jakamã nhũm tee ri mē kãm aa mē kot mēmoj pumunh kêt kwỳ ho anhỹr rax prãm. No ãm mē kãm mēmoj to grêre nē ho anē.

14

*Mê kot Juãw Paxis pîr ã mẽ harênh
Makre 6.14-29; Rukre 9.7-9*

¹ Tã nhũm pika pê Garirej kamã mẽõ pahihiti Erox Jejus jarênh ma

² nê tee ri hkukamã hamaxpêr nê hã õ pôristi mã kapêr nê mẽ kãm:

—Kwa pêr Juãw Paxis na nà? Ra ixte hã ixàmnênh nhũm mẽ kot hpîr tã mãn tanhmã amnhĩ to nê akupÿm htîr. Nà pêr tãm kênã. Jakamã na hte aa mẽ kot mẽmoj pumunh kêt kwÿ ho anhÿr o pa. Anê.

³⁻⁵ Na pre ra Erox htõ pê hprõptàn ho hprõ. Tõ arĩ htîr tã nhũm axtem nê kêp utà nê ho hprõ. Hãmri nhũm Juãw Paxisja harênh ma nê hã kãm akir nê kãm:

—Kwa Eroxis kêp atõ hprõ kênã na ka kêt axtem nê kêp utà nê ho aprõ. Kwa ja omnuj tÿx o omnuj tÿx. Anê.

Hãmri nhũm amnhĩ tã kuma nê kamã gryk nê kot hpîr kaxyw. Tã nom nhũm Ijaew kot axpên mã kêp Tirtũm nhÿ hã kapêr jarênh xwÿnh ã harênh jakamã nhũm mẽ umaj hpîr kêt nê. Âm ho prês nê haxà nhũm hkrĩ ho hkrĩ.

⁶ Tã nhũm jãã nhũm Erox kator ã arĩgro kato nhũm mẽ hã akuprõ nê hã hkînh. Hãmri nhũm hprõ nyw kra niti mẽ hwÿr axà nê ahte mẽ hipôk ri mẽ kãm gre. Mẽ kot omunh nê kamã hkurê kaxyw nhũm mẽ noo mã hpijaàm kêt nê mẽ kãm grer o xa. Hãmri nhũm pahi Erox omu nhũm ja kãm mex nê nhũm hkînh nê kamã nopyma nê.

⁷ Hãmri nê kãm:

—Nà ãm hãmri na ka ã mẽ inhmã amnhĩ nhĩpêx anê. Jakamã kwa mãmri mẽmoj tã ixwỳ. Amã mẽmoj prãm xà hkôt hã ixwỳ kot paj amã kugõ. ãm hãmri na pa amã anê. E mẽmoj na amã hprãm? Anê.

⁸ Hãmri nhũm kuma nê kãm:

—Ma Juãw Paxis krã na pa inhmã hprãm. Inhmã hkrã krãhta nê pasiiti kamã axà nê ixwỳr o tẽ nê inhmã agõ. Anê.

Ra katorxà kot kaxyw kãm karõ jakamã nhũm ã hã hwỳr anê.

⁹ Hãmri nhũm Eroxja tee ri kuma nhũm ja kêp omnuj nê. Nom ra mẽ pikuprõnh rax xwỳnhjê nhĩpôk ri mẽ noo mã kot kãm: “E mãmri amã mẽmoj prãm xà hkôt hã ixwỳ pa amã kugõ.” Anhỳr jakamã kãm kot kêp nê hprãm kêt nê. Hãmri nê Juãw Paxis wỳr õ pòristi hkwy rê

¹⁰ nhũm mẽ ma mẽ hagjênh xàta wỳr mra nê unê nê mut krãhta.

¹¹ Hãmri nê hkrã mỳ nê pasiiti kamã kuxà nê ma akupỳm nita wỳr o tẽ nê kãm kugõ nhũm kumỳ nê ma katorxà hwỳr o tẽ nê kãm kugõ.

¹² Hãmri nhũm Juãw Paxis kôt mẽ pa xwỳnhjaja tee ri mẽ kot hpĩr ã harênh ma nê ma hwỳr mra nê kumỳ nê ma o mõn haxà. Hãmri nê ma Jejus wỳr mra nê kãm harê.

*Jejus kot mẽ ho ohtô nê mẽ kãm mẽ õ hã harênh
Makre 6.30-44; Rukre 9.10-17; Juãw 6.1-14*

¹³ Hãmri nhũm Jejus Juãw Paxis jarênh ma nê hkaprĩ nê. Nê ma himô nhĩkjê hwỳr kapôt ã mõr kaxyw pàr krem axà nê ma mõ. Pa mẽ hkôt ixpa ho ixpa xwỳnhjaja ma hkôt mra. Hãmri nhũm krĩ hkwy kamã mẽ pa xwỳnhjaja harênh ma nê ohtô

nê ma mẽ inhĩhkrep pikap mra. Nê ra amnhĩ to wa nê mẽ inhmõr xàja wỳr pỏj nê mẽ ixkutêp hkrĩ.

¹⁴ Jakamã pa mẽ mỗ nê mẽ hwỳr pỏj nê mẽ omu. Hãmri nhũm Jesus mẽ omu nê kãm mẽ hkaprĩ nê mẽ kãm mẽ à xwỳnhjê ho mex pa.

¹⁵ Tã nhũm ra myt àr kaxyw pa mẽ hkôt ixpa ho ixpa xwỳnhjaja tee ri mẽ omu nê Jesus wỳr mra nê kãm:

—Kwa na ra amỹkry htỳx nê. Amnhĩ nê mẽ hano kê mẽ ma nhỹri krĩ hkwỳ hwỳr mra nê tokyx amnhĩm mẽmoj japrỏ nê kuku. Mo jar mẽ apkur xà hã mẽõ? Jar akunĩ pix kênã. Anê.

¹⁶ Hãmri nhũm mẽ inhma nê mẽ inhmã:

—Nà kot paj mẽ hanor kêt nê. Mẽ kajaja kot kaj mẽ kãm õ nhũm mẽ apku. Anê.

¹⁷⁻²¹ No nhũm mẽ ohtỏ rax kumrêx. Mẽmyjaja kêp 5.000. Nê kaxyw mẽ hprỏ nê mẽ hkrajaja. Jakamã nhũm Jesus ã mẽ inhmã kapêr anê pa mẽ tee ri mẽ hkukamã ijamxpêr nê kãm:

—Kwa nà mẽ panhõja raxti hã. Mẽ panhõ pãwti kêp sĩk pix. Nê kaxyw tep gràja pijakrutre kênã kot kêt mẽ piitã mẽ hipêx. Nà xà kot paj mẽ ma mra nê nhỹri mẽ kãm mẽ mẽmoj japrỏ nhũm mẽ kuku? Anê.

Hãmri nhũm mẽ inhmã:

—Nà pu mẽ kãm mẽmoj japrỏr kêt nê. Kot puj mẽ kãm mẽ panhõta o anhgrà. E mẽ kãm anê kê mẽ ahpỳnhã ri hije nê hkrĩ hpa. Anê.

Hãmri pa mẽ kuma nê mẽ kãm anê nhũm mẽ piitã hkrĩ hpa. Hãmri nhũm Jesus pãwti mẽ tepja jamỳ nê kaxkwa hwỳr rít nê ho Tĩrtũm wỳ nê kãm:

—Pa Papaj? Nà apê mẽ inhmã mẽ inhõ ho apa xwỳnh jakamã amex o amex. Anê.

Hămri nê mẽ kãm ho hkry hpa nê hkôt mẽ ixpa ho mẽ ixpa xwỳnhjê mã kugõ pa mẽ ô ri ho mẽ hipêx pa. Nhũm mẽ piitã apkur o hkrĩ. Mějõja grire htã nhũm Jejus tanhmã mẽ kãm ho rax to nhũm mẽ ohtô rax kumrêx tã piitã kuku nê ho õhy htu hpa nhũm arĩ mẽõ jakrêx prã. Hămri pa mẽ akupỹm hakrêx o akuprõ nê ho kawà ho 12 nê ho nýt pa.

*Jejus kot gô krãhkà hã ãm nê htẽm ã harẽnh
Makre 6.45-52; Juãw 6.15-21*

²²⁻²³ Tã nhũm Jejus mẽ ixpê hkôt ixpa ho ixpa xwỳnhjê mã anê pa mẽ akupỹm pàr mã agjê nê ma xarmã hkukamã mỗ. Hămri nhũm mẽ kot mar o kuhê xwỳnhjê jano nhũm mẽ ma akupỹm hapêx. Hămri nhũm Jejus kot Tĩrtũm mã amnhĩ jarẽnh kaxyw ahte tẽ nê hixêt ã api nê himõk ã kãm amnhĩ jarẽnh o nhỹ.

Gaa nhũm ra kamàt nhũm arĩ ahte hixêt nhĩmõk ã nhỹ.

²⁴ Rôm pa mẽ pàr kãm mẽ inhmõr xwỳnhjaja kormã himô nhĩpõk ri mỗ. Pu nhũm kôk xàpêr tỳx mẽ ixkaxpa. Nê gô axpẽn tak tỳx nê pa mẽ tee ri rrẽmti ho gô rẽn nhĩpêx nê tee ri axpẽn pumu.

²⁵ Tã nhũm krãhyre kà nhũm Jejus man mẽ ixkôt gô krãhkà hã xan tẽ

²⁶ pa mẽ amnhĩ wỳr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hămri nê tee ri omu nê mẽkarõ hã hkamnhĩx nê umaj ixàmra rax nê.

²⁷ Hămri nhũm mẽ inhmã kapêr nê mẽ inhmã:

—Tk. Kwa mẽ amã ma hkêt nê. Pa na pa mẽ akôt tẽ. Anê.

²⁸ Hămri nhũm Simãw Pêtre kuma nê kãm:

—Kwa xà ka na ka tẽ? Tôe apê mẽ inhõ Pahihti jakamã kwa amnhĩ wỳr ixwỳ pa apyrà nẽ gô krãhkà hã xa nẽ awỳr tẽ nà? Anẽ.

²⁹ Hãmri nhũm kãm:

—Tôe mamrĩ amnẽ ixwỳr tẽ. Anẽ.

Hãmri nhũm kuma nẽ pàr rũm kato nẽ hwỳr tẽ. Urak nẽ gô krãhkà hã hwỳr tẽ.

³⁰ Hãmri nẽ kormã htép o htẽm mẽ kôk xapêrta kamã ama nẽ tee ri amnhĩ kukamã hamaxpêr pê ra àr o mỗ. Hãmri nẽ àmra kamã Jejus mã amnhĩ to akir nẽ kãm:

—Kwa tokyx ixto api Pahihti. Anẽ.

³¹ Hãmri nhũm hpa hã kupy nẽ ho àpir kurê kumrẽx nẽ kãm:

—Kwa pêr ãm kormã ate amnhĩ kaxyw inhmã ajamaxpêr tỳx kêt. Mon ka we ixkamnàr rom mãmri man ixwỳr atẽmre hkêt nẽ? Anẽ.

³² Hãmri nhũm wa akupỹn mẽ ixwỳr tẽ nẽ wa axà. Hãmri nhũm kôk katat kôt pinhkrênh pa nhũm gô tãm nõi kurê kumrẽx.

³³ Hãmri pa mẽ Jejus kot ã amnhĩ nhĩpêx anhỹrja ã omu hãmri nẽ kãm mex o mex ã harẽ nẽ kãm:

—Kwa ãm hãmri na hte amnhĩ pê Tĩrtũm Kra hã amnhĩ jarẽ. Nà apê Kra kênã. Anẽ.

Jenẽjare kamã Jejus kot akupỹm mẽ ho mex ã harẽnh

Makre 6.53-56

³⁴ Tã pa mẽ ra himô hã rê nẽ Jenẽjare hwỳr pøj.

³⁵ Hãmri nẽ ma kapê hã ri ixpa. Hãmri nhũm pika nhõ xwỳnh kwỳjaja Jejus pumu nẽ mẽ piitã mẽ kãm harẽnh o hprôt nẽ ahpỹnhã hwỳr nhỹhỹnh mẽ à xwỳnhjê hã karõ. Nhũm mẽ man mẽ ixwỳr mẽ o mra

36 nê mẽ ho Jejus wỳ nê kãm:

—Pa? Kwa kê mẽ à xwỳnhjaja akupỳm mex kaxyw apê axê kupê nà? Anê.

Hãmri nhũm mẽ kãm:

—Tôe. Kwār mẽ māmri mran hkupê. Anê.

Hãmri nhũm mẽ kuma nê axpên pãnhã hwỳr mra nê kêp ê pix kupênh tã ra akupỳm mex nê ma akupỳm mra.

15

Parijew nhõ xwỳnh mẽ Tĩrtũm kapêr tũm o mẽ ahkre xwỳnhjê jarênh

Makre 7.1-13

¹ Tã nhũm Parijew nhõ xwỳnh mẽ Tĩrtũm kapêr tũm o mẽ ahkre ho mẽ pa xwỳnhjaja Jerujarê rũm ma Jejus wỳr mra. Na htem mẽ ixkukamã mẽ inhĩgêjtê pyrà nê apkur kaxyw nê amnhĩ nhĩhkra kuhõnh ryy nê. Amnhĩ nhĩhkra htyk pix kuhõnh nê hkrĩ hkêť nê ãm amnhĩ nhĩhkra kuhõnh japjêê nê. Nê õ prat kuhõnh japjêê nê kormã apkur kaxyw hkrĩ. Tĩrtũm kot ja hã mẽ omunh nê mẽ mex ã mẽ harênh ã amnhĩ kamnhĩx jakamã na pre ã amnhĩ nhĩpêx anhỳr o pa. Jakamã nhũm mẽ ma Jejus wỳr mra.

² Hãmri nê omu nê kãm:

—Pa Jejus? E kwa mẽ inhmã mẽmoj jarê. Amnepêm mẽ panhĩgêjtjaja na prem apkur kaxyw nê amnhĩ nhĩhkra kuhõnh japjê nê rĩ kormã apku. Tã pa htem arĩ ijaxwỳja ã amnhĩ nhĩpêx anê. No akôt mẽ pa ho mẽ pa xwỳnhjaja na htem mẽ ixpyrà nê ã amnhĩ nhĩpêx anhỳr kêt nê. Kwa mo na htem amnhĩ nhĩhkra tyk kuhõnh tokyx anê nê hkrĩ nê apku? Anê.

³ Hãmri nhũm mẽ kuma nẽ mẽ kãm:

—Tk. Na ka htem ãm mẽ panhĩgêjtjê hkôt pix mã amnhĩ nhĩpêx o apa no Tĩrtũm kapêr kôt amnhĩ nhĩpêx kêt nẽ.

⁴ Tĩrtũm na pre mẽmoj tă mẽ pamã karõ ho:

Kêr ka mẽ anhĩpêxà nẽ mẽ akatorxà wa hã api-jaàm nẽ mẽ ho ajuta rãhã ho ri apa. Kot kaj mẽ ã amnhĩ nhĩpêx anhỹr kêt nẽ tanhmã mẽ kãm akapêr punuj to ho ri apa. Hã koja mẽ akwỳjaja ja mỳrapê mẽ apa. Anê.

—Na pre ã Tĩrtũmja mẽ pamã karõ anê.

⁵ No mẽ kajaja na ka htem ã akwỳjê mã karõ anhỹr kêt nẽ. ãm kapêrja kwỳm na ka htem mẽ kãm karõ nẽ mẽ kãm:

Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà rỳ anhĩpêxà ho ajuta hto kaxyw wa kãm hkwỳ nhõr kêt nẽ. ãm ho ate wa ho ajuta hkêt ã wa kãm amnhĩ jarẽ hãmri nẽ Tĩrtũm mã amnhĩ jarẽnh xà hã ixkre hwỳr o tẽ nẽ mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kãm mex nẽ. Kêr ka mẽ ã amnhĩ nhĩpêx anhỹr o ri apa.

—Anhỹr o na ka htem mẽ kãm karõ ho ri apa.

⁶ Nom Tĩrtũm kapêr tũm kot ã ja jarẽnh anhỹr kêt. ãm amnhĩ krã hkôt na ka htem ã mẽ kãm karõ punuj o ri apa anê. Te mẽ akapêrja mex o kot Tĩrtũm kapêr jakrenh pyræk.

⁷ Mẽ ate Tĩrtũm kôt amnhĩ nhĩpêx ã amnhĩ jarẽnh tă ãm amnhĩ to axêx nẽ hkôt amnhĩ nhĩpêx kêt nẽ. Na pre Tĩrtũm amnepêm mẽ akukamã tanhmã mẽ ajarẽnh to. Nhũm ỹ hã mẽ kãm kapêr jarẽnh xwỳnh

Ijaisja ô ri mẽ kãm mẽ ajarẽ nẽ hã kagà. Te Tĩrtũm tãm kot mẽ ajarẽnh pyràk.

⁸ Na pre mẽ akukamã mẽ ajarẽnh o:

Mẽ kãm ixkĩnh ã mẽ kot amnhĩ jarẽnh tã mẽ kãm ixkĩnh kêt. Na htem kãm ixprãm ã amnhĩ jarẽnh kaprỳ.

⁹ Mẽ kot ixkuhpa hã amnhĩ krã hkôt mẽmoj tã hkwỳjê mã karõ ho pa jakamã na htem kot ixkôt amnhĩ nhĩpêx o pa hã amnhĩ jarẽnh kaprỳ. Anẽ.

—Na pre ã Ijaisja Tĩrtũm nhỹ hã mẽ akukamã mẽ ajarẽ nẽ mẽ atã kagà anẽ. Anẽ.

Nhũm pre ã Jejus Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjê mã kapêr anẽ.

Mẽmoj kot mẽ pahtomnu hã harẽnh

Makre 7.14-23

¹⁰ Tã nhũm Jejus amnhĩ wỳr mẽ kot mar o kuhê xwỳnhjê hwỳ nẽ axte mẽ kãm kapêr nẽ mẽ kãm:

—E mẽ inhma nẽ inhmar tỳx nẽ.

¹¹ Na hte Tĩrtũm kapêr tũm o mẽ ahkre xwỳnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nẽ amnhĩ krã hkôt mẽ axàpkur xà hã tanhmã mẽ amã karõ hto ho pa. Tĩrtũm kot ja hã mẽ apumunh kôt mẽ amex ã mẽ ajarẽnh kaxyw ã mẽmoj tã mẽ amã karõ anẽ. Nom na hte Tĩrtũm tanhmã mẽ kot amnhĩ nhĩhkra kuhõnh to hã mẽ omunh xà hkôt tanhmã mẽ harẽnh to hkêt nẽ. Rỳ mẽ axàpkur xà pumunh kôt mẽ mex ã mẽ ajarẽnh kêt nẽ. Ja tanhmã kãm kute hkêt. Na hte ã mẽ kot amnhĩ nhĩpêx anhỹr ã mẽ omunh xà hkôt mẽ mex ã mẽ harẽnh rỳ mẽ mex kêt ã mẽ harẽnh kêt nẽ. Na hte mẽmoj kur ã

mê omu nê ãm mê omu nê hã tanhmã mê harênh to hkêt nê. Æm mê kapêr punuj rÿ mê kapêr mex ã mê mar kôt pix mã na hte tanhmã mê harênh to. Anê.

¹² Nhũm pre ã Jêjus mê kãm kapêr anê pa mê hkôt mê ixpa ho mê ixpa xwÿnhjaja kuma hãmri nê hwÿr mra nê kãm:

—Kwa na ka ã mê kãm akapêr anê nhũm Parijew nhõ xwÿnhjaja tee ri ama nhũm ja mê kêp omnuj nê. Anê.

¹³⁻¹⁴ Hãmri nhũm mê inhma nê tanhmã mê inhmã Parijew nhõ xwÿnhjê jarênh to nê hprÿ hã mê hkukamã mê harênh o:

—Tk. Kwãr mãmrÿ mê kêp omnuj. Mê kot Tÿrtũm kapêr tũm o mê ahkre ho pa htã na htem hkôt amnhÿ nhÿpêx kêt. Jakamã te mê nohkre xwÿnh kot amnhÿ nhÿpêx pyræk. Koja mêhõ nohkre htã amnhÿ kôt nhÿhÿm nohkre hõ ho mõi hãmri nê wa hamê pry pumunh kêt nê htÿx mõi hãmri nê nhÿri ahkrehti kamã tẽm. Tã Parijew nhõ xwÿnhjaja te kot wam htẽm xwÿnhhta pyræk nhũm mê kot mê mar xwÿnhjaja te kot wam htẽm xwÿnh kôt hõ htẽmta pyræk. Jakamã Parijew nhõ xwÿnhjaja mê kot mê mar o pa xwÿnhjê mê koja mê hpimràatã nhÿrmã te ahkrehti kamã rôrøk par pyræk o amnhÿ nhÿpêx nê mex kêt nê pa ho pa. Koja kaxkwa kamã inhõ Papaj nhÿrmã amnhÿ nê mê hanor pa.

—Inhõ Papaj te kêp mẽmo hy hkre ho pa xwÿnhhta pyræk. Na htem mẽmo hy hkre nhũm higrõt hapôj nê higrõt mex nê. Hãmri nhũm mê hwÿr mra nê omu nê nê mẽmoj nhigrõt punuj jarê nê kurê. Ja pyrã nê koja nhÿrmã inhõ Papaj amnhÿ nê Parijew nhõ xwÿnhjê janor pa nhũm mê mex kêt nê pa ho

pa. Jakamã kwa kêr ka mẽ hkôt ri amnhĩ nhĩpêx kêt nê. Anê.

Nhũm pre ã Jejus mẽ ixte hkôt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã mẽ harênh anê pa mẽ mar o ixkrĩ.

¹⁵ Hãmri nhũm Simãw Pêtre tee ri Tĩrtũm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhũm kuma nê hprĩ hã mẽ inhmã aw-jarê nê mẽ inhmã:

—Kwa xàn ka mẽ kormã aprĩ hã ja mar kêt nê?

¹⁷ E pa ixprĩ hã mẽ amã harê ka mẽ inhma. Nà na htem mẽmoj ku nhũm hte mẽ hkrã hi hwỳr gjêx kêt nê. Na hte mẽ õhy pix wỳr agjê nê gaa nê nhãm hapôj nê hapêx. Na htem mẽ apkur xàja ku nê ã hã tanhmã amnhĩ tomnu hto hkêt nê. Jakamã na hte Tĩrtũm ja hã mẽ omunh xà hkôt tanhmã mẽ harênh to hkêt nê.

¹⁸ ãm mẽ hkrã kamã mẽ hamaxpêr punuj pix nhỹ hã mẽ kot tanhmã amnhĩ tomnuj to jakamã na hte Tĩrtũm mẽ hamaxpêr ã mẽ omunh xà hkôt tanhmã mẽ harênh to.

¹⁹ Koja mẽhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprỳ hwỳr mra nê mẽ ho amnhĩkati. Nê tanhmã ri axpên tomnuj to ho pa.

20 Mě hamaxpěr punuj nhỹ hã na htem ã amnhĩ nhĩpêx anhỹr o pa. No na hte Tĩrtũm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwỳnh ã mẽ harēnh kêt nē. Ja tanhmã kãm kute hkêt. Anē.

Jejus kot Ijaew kêt xwỳnh ni kamã ukaprĩ hã harēnh

Makre 7.24-30

21 Tã nhũm Jejus mẽ inhmã kapěr pa hãmri nē mẽ inhmã anē pa mẽ ma hkôt mō. Ma Xir mẽ Sitōja wa pu hã ri ixpa.

22 Nhũm mēhõ nija omu nē hwỳr tē. Mě ixkĩnhã kệp Ijaew kêt tã hwỳr tē. Kanaã nhõ xwỳnh na pre. Tã Jejus wỳr tē nē kãm:

—Ka Pahihti Jejus? Apê Tĩrtũm kot mẽ ixwỳr amēnh xwỳnh jakamã xê ixujarēnh ma nē ixkamã axukaprĩ hkêt wehe. Na mẽkarõmnutija tanhmã ixpê ixkra ho nhũm ixpê omnuj tỳx kumrēx. Anē.

23 Hãmri nhũm Jejus kuma nē ãm kuma nē kãm tanhmã nē hkêt nē. Jakamã pa mẽ ixpê hkôt ixpa ho ixpa xwỳnhjaja kãm:

—Kwa hano kê ma akupỹm tēē ri. Na ãm ri mẽ pahkôt xatã hkrata jarēnh pix o ri pa. Anē.

24 Nom nhũm kot amnhĩ tã kamã hamak kaxyw tanhmã mẽ inhmã hã kapěr to nē mẽ inhmã:

—Nà ãm Ijaewjê pix wỳr na pre Tĩrtũm inhmē. Te mẽ kệp ôwēhti pikunor pyræk o na htem htỳx ri amnhĩ nhĩpêx o pa. Jakamã ãm mẽ hwỳr pix mã na pre inhmē. Na kormã inhmã tanhmã nhãm mẽ hkwỳjê jarēnh to hkêt nē. Anē.

25 Hãmri nhũm nitita tee ri amnhĩ tã kuma nē hwỳr tē nē kutã hkõnkrã ho htēm nē nhỹ nē kãm:

—Xê ma we ixkamã axukaprĩ hkêt wehe. Anē.

26 Hãmri nhũm kãm:

—Nà kormã. Na pre Tirtũm mẽ kêp Ijaewjê pix wỳr inhmẽ. Jakamã na pa kormã nhãm tanhmã mẽ akwỳjê ho mex to hkêt nẽ. Anẽ.

27 Hãmri nhũm kãm:

—Ma ãm hãmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anẽ.

28 Hãmri nhũm kuma nẽ kãm:

—Nà ãm hãmri na ka ã akra kaxyw inhmã ajamaxpêr tỳx anẽ. Jakamã kot paj nê mẽkarõmnutita jano. Koja axte tanhmã apê ho hkêt kumrêx.

Anhỳr o kãm kapêrja rôm nhũm hkraja akupỳm mex kurê kumrêx.

Jejus kot mẽ à xwỳnhjê ho ohtô nẽ mẽ ho mex ã harênh

Makre 7.31-37

29 Tã nhũm Jejus mẽ inhmã anẽ pa mẽ ixrohã krĩa pê ixkato nẽ ma himô rax pê Garirej wỳr mỗ. Nẽ nhỹri gô mỳri hixêr wỳr mỗ nẽ hã api nẽ ixkrĩ.

30 Hãmri nhũm mẽ ohtô nẽ ma mẽ ixkôt mra. Nẽ mẽ à xwỳnhjaja nhũm mẽ hamỳ nẽ Jejus wỳr mẽ o mra. Na prem ohtô rax kumrêx. Ra ri mẽ pa hkêt xwỳnhjaja nẽ mẽ nohkre xwỳnhjaja nẽ mẽ hyk o mẽ pa xwỳnhjaja. Nẽ mẽ kapêr kêt xwỳnhjaja nẽ ahpỳnhã ri tanhmã mẽ à kute xwỳnhjaja nhũm mẽ hamỳ nẽ ma Jejus wỳr mẽ o mra nẽ kutã mẽ haxwỳ. Hãmri nhũm mẽ omu nẽ ahpỳnhã akupỳm mẽ ho mex pa.

31 Jakamã na pre mẽ kapêr kêt xwỳnhjaja akupỳm kapêr mex nẽ. Nẽ ri mẽ pa hkêt xwỳnhjaja akupỳm mrrar mex nẽ. Nẽ mẽ hyk o mẽ pa xwỳnhjaja akupỳm tãm ri mra. Nẽ mẽ nohkre xwỳnhjaja akupỳm rĩt mex nẽ. ã ahpỳnhã akupỳm

mex par anê. Hâmri nhũm mẽ kot hwỳr mẽ hamỳnh nê Jejus wỳr mẽ o mrar xwỳnhjaja amnhĩ jaêr pê akupỹm mẽ mex ã mẽ omu nê mẽ kamã no pyma nê hkĩnh nê. Hâmri nê Tĩrtũm mã mex o mex ã harê nê axpẽn mã harẽn o:

—Nà ãm hãmri mẽ panhõ Tĩrtũmja ãm mex o mex. Anê.

*Jejus kot mẽ ho 4.000 nê mẽ kãm mẽ õ hã harẽn
Makre 8.1-10*

³² Tã nhũm Jejus mẽ ixte hkôt ixpa ho ixpa xwỳnhjaja amnhĩ wỳr mẽ ixwỳ nê mẽ ixkôt mẽ mrar xwỳnhjê jahkre nê mẽ inhmã:

—E. Ka mẽ rĩ kam jajê pumu. Na pa ra inhmã mẽ hkaprĩ nê. Na mẽ pahkôt ri pa hã apkati axkrunêpxi nhũm ra mẽ kêp mẽõja hapêx pa. Kojã mẽ apkur kêt rãhã ma akupỹm mẽ õ krĩ hwỳr pa hãmri nê pry hã hirot nê rôrôk o pa. Mẽ õ krĩ hwỳr awryy. Anê.

³³ Nhũm pre ã mẽ inhmã mẽ harẽn anê pa mẽ tee ri kuma hãmri nê kãm:

—Kwa nom nhỹri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nê mẽ ohtô griiã. Anê.

³⁴ Hãmri nhũm mẽ inhmã:

—No mẽ panhõ pãwtita? Tanhmã na arĩ kute nê hikwỹ? Anê.

Hãmri pa mẽ kãm:

—Nà ãm kêp 7 pix. Nê kaxyw tep kwỳ no ãm grêre. Kot mẽ ho dare kaxyw ã. Anê.

³⁵ Hãmri nhũm mẽ inhma nê mẽ ixkôt mẽ mrar xwỳnhjê mã anê nhũm mẽ hkrĩ pa.

³⁶ Hãmri nhũm pãwti mẽ tep grêreta jamỳ nê ho Tĩrtũm wỳ nê kãm:

—Pa Papaj. Nà apê mẽ inhmã mẽ inhõ ho apa xwỳnh jakamã amex o amex. ãm amex kumrêx. Anê.

Hãmri nê mẽ kãm mẽmojta o hkry hpa nê mẽ inhmã kugõ pa mẽ ô ri ho xa nê ho mẽ hipêx pa.

³⁷⁻³⁸ Hãmri nhũm mẽ piitã apku nê õhy htu hpa. Nhũm prem mẽmyjaja kêp 4.000 nê kaxyw mẽnijaja nê mẽhprĩjaja. Mẽ ohtô rax kumrêx tã nhũm Jesus mẽõ ho mẽ hipêx pa. Hãmri pa mẽ hakrêx o akuprõ nê ho kawà ho 7 nê ho nỳt.

³⁹ Hãmri nhũm Jesus ma akupỳm mẽ õ krĩ hwỳr mẽ hano pa mẽ pàr krem agjê hãmri nê ma ijaxwỳja mõ. Ma pika pê Makatã hwỳr mõ.

16

Parijew nhõ xwỳnh kwỳ kot aa mẽ kot mẽmoj pumunh kêt õ ho anhỳr ã Jesus wỳr ã mẽ harênh

¹ Tã pa mẽ ra hwỳr pøj nhũm Parijew mẽ Sat-usew nhõ xwỳnhjaja Jesus pumu nê hwỳr mra. Nê hêx rom kot kamã hamak kaxyw hwỳr mra nê kãm:

—Pa Jesus? E kwa mẽ inhmã aa mẽ ixte mẽmoj pumunh kêt õ ho anê nà? Pa mẽ ate ho anhỳr ã apumu nê Tĩrtũm kot mẽ ixwỳr amênh ã akõt ijamaxpêr kurê kumrêx. E kwa tokyx. Anê.

²⁻³ Hãmri nhũm mẽ kuma nê mẽ kãm:

—Tk. Nà kot paj mẽ amã ho anhỳr kêt nê. Mẽ ate hã ixpumunh nê ixkõt ajamaxpêẽre kaxyw ã. Na ka htem kaxkwa kamã kakrã pumu nê axpên mã na wrỳk ã harê. Nê kaxkwa mex pumu nê axpên mã amgrà hã harê. Tã ixte tanhmã mẽ amã mẽmoj nhĩpêx to hã ixpumu nom Tĩrtũm kot mẽ awỳr inhmênh xwỳnh ã ixkõt ajamaxpêr kêt nê.

⁴ ãm mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awỳr inhmẽnh xwỳnh tâ ka mẽ ja hã ixkôt ajamaxpêr kêt nẽ. Tã mẽ ate aa mẽmoj pumunh kêt kwỳ ixte mẽ amã ho anhỳr kaxyw ka mẽ inhmã hã karõ. Nà kot paj mẽ amã ho anhỳr kêt nẽ. Kormã. Kot paj ãm nhỹrmã te amnepêm Jõhti kot amnhĩ nhĩpêx pyrak o amnhĩ nhĩpêx. E ja pix kot paj mẽ amã harẽ. Nom kot paj mẽ amã aa mẽ ate mẽmoj pumunh kêt õ ho anhỳr kêt nẽ. Anẽ.

Nhũm pre ã Jejus mẽ kãm kapêr anẽ hãmri pa mẽ ixrohã mẽ kêp ixkato nẽ ma ixpa.

*Jejus kot hkôt mẽ pa xwỳnhjê jahkre hã harẽnh
Makre 8.14-21*

⁵ Tã pa mẽ Jejus mẽ ixrohã ma mõi nẽ pàr mã agjê nẽ ma xarmã akupỹm rê nẽ hikjê hã mõi. Hãmri nẽ tee ri mẽ ixàpkur xà japêr nẽ axpẽn mã:

—Kwa na pu mẽ panhõ pãwti ho pajamakêtkati nẽ kure. Anẽ.

⁶ Hãmri nhũm Jejus mẽ inhma nẽ tanhmã mẽ inhmã Parijew mẽ Satusew nhõ xwỳnhjê jarẽnh to. Nom pãwti hã kuxi nẽ mẽ inhmã mẽ harẽ nẽ mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwỳnhjê mẽ kêp pãw kaxkrit xà hkwỳ hpyr kêt nẽ. Anẽ.

⁷ Hãmri pa mẽ tee ri kuma nẽ ixprĩ hã mar mex kêt nẽ. Nẽ arĩ kapêrta ã axpẽn kukjêr o hkôt mõi nẽ axpẽn mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwỳ hpyr nẽ mẽ pahkurê nà? Anẽ.

⁸ Hãmri nhũm mẽ inhma nẽ mẽ inhmã:

—Hêxta waa nê. Mon ka mē ãm axpên mã mē panhõ pãwti hkêt pix jarênh o mõ? Pêr kormã mē ate amnhĩ kaxyw inhmã ajamaxpêr tỳx kêt.

⁹ Jãã ixte mē anoo mã pãwti kêp 5 pix tã nhũm ixte ho mē kêp 5.000tajê nhĩpêx par. Nhũm mē kot hkur nê ho õhy htu hpar nhũm mē ate mẽõ jakrêx o apikuprõnh par nê ho kawà ho 12 nê ho hipu.

¹⁰ Nê ham pãwti kêp 7 o mẽ kêp 4.000 nhĩpêx par nhũm mē kot hkur nê ho õhy htu hpar nhũm mē ate mẽõ jakrêx o apikuprõnh raxja.

¹¹ Ra ixte mē anoo mã ja ho anhỹr o axkrut tã ka mē ra hã ano hkêt nê arĩ axpên mã mẽ paxàpkur xà pix jarênh o ixkõt mõ. Nà mẽ paxàpkur xàja na pa harênh kêt nê. Parijew mẽ Satusew nhõ xwỳnhjê nhõ pãwti kaxkrit xà pix na pa hã kuxi nê mẽ amã tanhmã harênh to. Anê.

¹² Nhũm pre ã mẽ inhmã kapêr anê hãmri pa mẽ atã kuma nê kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwỳnhjê kapêr kõt amnhĩ nhĩpêx nê na ka mẽ ixkurê nê ã mẽ harênh anê. Anê.

Jejus kot amnhĩ tã hkõt mẽ pa xwỳnhjê kukjêr ã harênh

Makre 8.27-30; Rukre 9.18-21

¹³ Tã pa mẽ axte Jejus kõt mõ nê pika pê Sejarej Piripos kamã kormã mõ nhũm Jejus amnhĩ tã mẽ ixkukja nê mẽ inhmã:

—E mẽ inhmã mẽmoj jarê. Tanhmã na hte mẽ akwỳjaja axpên mã ijarênh to wehe? Anê.

¹⁴ Hãmri pa mẽ kãm:

—Nà na htem ahpỳnhã tanhmã ajarênh to. Na hte kamã mẽ hkwỳjaja ajarênh o finat Juãw Paxis

ã ajarê. Nhũm kamã mẽ hkwỳjaja ato finat Eris ã ajarê nhũm mẽ hkwỳjaja tōhã apê Tĩrtũm nhỹ hã akapêr o apa xwỳnhjê hō akupỳm atĩr ã ajarê. Nê tōhã finat Jeremĩstija rỳ axtem hō hã ajarê. Ā na htem ahpỳnhã axpẽn mã ajarênh anê. Anê.

¹⁵ Hãmri nhũm mẽ inhma nê mẽ inhmã:

—No mẽ kajaja? Ixpê mēhō hã na ka htem axpẽn mã ijarê? Anê.

¹⁶ Hãmri nhũm Simãw Pêtre kãm:

—Nà apê Tĩrtũm kot mẽ ixkaxyw axãm nê mẽ ixwỳr amēnh xwỳnh na ka. Nê apê mẽ ixpiitã mẽ inhō Pahi Maati na ka. Ā na pa htem axpẽn mã ajarênh anê. Anê.

¹⁷ Hãmri nhũm kuma nê kãm:

—Nà ãm hãmri na ka ã ijarênh anê Simãw Pêtre. Nom amnhĩ krã hkôt na ka ã ijarênh anhỹr kêt nê. Tĩrtũm tãm kot amã ixto amnhĩrĩt xà hkôt na ka ã ijarênh anê.

¹⁸ Nà akumrêx na ka ã ijarênh anê. Tã koja mẽ apyrà nê nhỹrmã mẽ kot ixkôt amnhĩ xunhwỳr xwỳnhjaja ma hkwỳjê mã ja hã ijarênh o ri krĩ piitã hkôt pa. Hãmri nhũm mẽ hkwỳjaja mẽ kuma nê mẽ apyrà nê ixkôt amnhĩ xunhwỳ. Hãmri nhũm mẽ kêp ixprãm nōkati xwỳnhjaja tee ri tanhmã mẽ kot ijarênh toja ma nê ã ijarênh anhỹrja nê mẽ kãm kapêr tã nom ho hkaprỳ. Ā koja ixkôt mẽ kot amnhĩ xunhwỳr xwỳnhjaja mẽ kãm ijarênh o pa anê. Jao te mẽ apê kên nhũm ixte mẽ ato amnhĩm inhōrkwỳ nhĩpêx pyràk. Tã akumrêx ate ã ijarênh kot anhỹr jakamã kot paj te ixte akumrêx amỳnh nê ato ixtêm nê inhōrkwỳ nhĩpêx kaxyw amnhĩm akumrêx axãm pyràk o anhĩpêx Simãw Pêtre.

19 –E kêr ka ma inhỹ hã tanhmã mẽ piitã mẽ kãm ijarênh to ho ri apa. Mẽ kot hprĩ hã amar kaxyw. Koja mẽ hkwỳjaja ama nẽ amnhĩ kaxyw ixkôt hamaxpêr nẽ ixkôt amnhĩ xunhwỳ. Ka ja hã mẽ omu nẽ mẽ kãm: “E ra mẽ ate Jejus kôt amnhĩ xunhwỳr jakamã kot ka mẽ nhỹrmã ty nẽ ma kaxkwa hwỳr api nẽ Tĩrtũm mẽ wa kuri amex kumrêx nẽ atĩr tũm nẽ apa ho apa.” Anhỹr o mẽ kãm ijarênh o apa. No mẽ kot akapêr mar nẽ âm mar nẽ ixkôt amnhĩ xunhwỳr kêt xwỳnhjaja ka mẽ kãm: “No mẽ kajaja mẽ ate Jejus kôt amnhĩ xunhwỳr kêt jakamã kot kaj mẽ nhỹrmã Tĩrtũm mẽ Krata wa kuri atĩr tũm nẽ apa ho apa hkêt nẽ.” Anhỹr o ã inhỹ hã mẽ kãm akapêr anhỹr o ri mẽ hkôt apa. Jao te ate kaxkwa hwỳr saf pyr nẽ Tĩrtũm krajê mã kahê xà rênh nẽ Tĩrtũm kra hkêt xwỳnhjê pê kahê pyræk o amnhĩ nhĩpêx o apa. Anẽ.

Nhũm pre ã Jejus Simãw Pêtre mã kapêr anẽ.

20 Hãmri nẽ hpãnhã mẽ ixpiitã mẽ inhmã kapêr nẽ mẽ inhmã:

–E. Kwa kêr ka mẽ kormã mẽ piitã mẽ kãm Tĩrtũm kot mẽ awỳr inhmênh ã mẽ kãm ijarênh o ri apa hkêt nẽ. Kormã. Anẽ.

*Jejus kot amnhĩ kukamã amnhĩ jarênh ã harênh
Makre 8.31-33; Rukre 9.22*

21 Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarênh to nẽ mẽ inhmã:

–Nà mẽ kajaja mẽ ate aprĩ hã ixpumunh mex. No mẽ pahkwỳjaja kãm hprĩ hã ijarênh mar nẽ ixpumunh prãm kêt. Ijaew krãhtũmjaja nẽ Tĩrtũm kapêr tũm o mẽ ahkre xwỳnhjaja nẽ patre krãhtũmjaja. Mẽ kãm hprĩ hã ixpumunh nẽ kãm

ixkapêr mar prãm kêt jakamã kot paj tokyx ma Jerujarê hwÿr mō nhũm mẽ kamã ixpynê nê ixtak rax nê ixpĩ. Nom kot paj ixtyk ã apkati axkrunêpxi nhũm Tĩrtũm akupÿm ixto ixtĩr. Anê.

²² Hãmri nhũm Simãw Pêtre tee ri kot ã mẽ kãm amnhĩ jarênh anhÿrja ã kuma nê hwÿr tẽ nê hpa hã kupy nê mẽ ixpê ho kato nê mẽ ixkàx ã o xa. Nê ã kot amnhĩ jarênh anhÿrja nê kãm kapêr nê kãm:

—Kwa nà Pahihti. Ri ã amnhĩ jarênh anhÿr kêt nê. Mo kot kêt mẽ ri axtem nê ã anhĩpêx anê? Anê.

²³ Hãmri nhũm kuma nê hwÿr apkjê nê omu nê kãm:

—Tk. Te apê Satanasti kapêr pyræk o na ka ã inhmã akapêr anê. Kot kaj ã akapêr anê hãmri nê ixkôt apa hkêt nê. Tĩrtũm kãm hprãm xà hkôt na ã mẽ kot inhĩpêx anhÿr kaxyw kênã. Tã ka Tĩrtũm jamaxpêr o ajamaxpêr kêt nê amnhĩ jamaxpêr o ã inhmã akapêr anê. Te apê ixpê axamnãr xwÿnh pyræk o amnhĩ nhĩpêx. Anê.

Jejus krajaja kot tanhmã amnhĩ nhĩpêx to hã mẽ harênh

Makre 8.34-9.1; Rukre 9.23-27; Juãw 12.24-26; mããnên Rômãn 15.1; Wam Korĩt 10.23-24; Karatas 5.24; Piripos 2.4; Wam Pêtre 4.1; Apokarip 2.10, 12.11

²⁴ Nhũm pre ã Jejus Simãw Pêtre mã kapêr anê hãmri nê hpãnhã mẽ ixpê hkôt ixpa ho ixpa xwÿnh piitã mẽ inhmã kapêr nê mẽ inhmã:

—E kot kaj mẽ ixkôt amnhĩ xunhwÿr ã amnhĩ jarê hãmri nê mããnên amnhĩ jarênh o: “Jejus kêp inhõ Pahihti jakamã kot paj kapêr kôt pix mã amnhĩ nhĩpêx rãhã ho ri ixpa. Kwãr ixkwÿjaja tanhmã hã inhĩpêx hto.” Anhÿr o amnhĩ jarê.

25 –Koja mẽ ixtã mẽ atõx pĩ rỳ tanhmã mẽ atõ hto ka ty. Tã nom koja akaxwỳnh ma ixwỳr àpir kurê kumrêx. Hãmri ka ixkuri atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hãmri nẽ inhõ krĩ hwỳr axàpir kêt nẽ.

26 –Nẽ koja mẽhõ hikukrêx rax gryk ã Tĩrtũm kaga. Tã nhỹrmã ty hãmri nẽ amnhĩ kôt hikukrêx õ hpyr nẽ o mõi kêt nẽ. Koja tee ri kuwy hwỳr mõi pymaj amnhĩ nẽ hikukrêx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tĩrtũm mã amnhĩre nẽ ma õ krĩ hwỳr api? Koja ã amnhĩ nhĩpêx anhỹr kêt nẽ.

27 –Nẽ ixpê Tĩrtũm kot mẽ awỳr inhmẽnh xwỳnh kot paj nhỹrmã kaxkwa rũm akupỹn mẽ awỳr wrỳ nhũm Tĩrtũm kapêr o mẽ wrỳk xwỳnhjaja man ixkôt wrỳ. Hãmri pa inhõ Papaj nhỹ hã ixte mẽ piitã tanhmã mẽ kot amnhĩ nhĩpêx to hã mẽ omunh xà hkôt ahpỹnhã tanhmã mẽ harẽnh to.

28 ãm hãmri na pa ã mẽ amã amnhĩ jarẽnh anẽ. Kot paj nhỹrmã akupỹn ixte mẽ ato amnhĩptàr kaxyw man mẽ awỳr wrỳ. Tã kot kaj mẽ akwỳjaja akupỹn ixwrỳyta kukamã tokyx ixte tanhmã ixte amnhĩ nhĩpêx to hã ixpumu. Anẽ.

17

Jejus kot hixêt prêk nhĩmõk ã hirã kamã ãm ã harẽnh

Makre 9.2-13; Rukre 9.28-36; mããnẽn Sikũn Pêtre 1.16-18

¹ Tã nhũm semãnja hapêx nhũm Jejus ma nhỹri hixêt prêk wỳr mõi. Nẽ kaxyw Simãw Pêtre nẽ Xiakre nẽ Xiakre htõ Juãwja nhũm ma amnhĩ kôt

wa mẽ o mõi. Nhũm wa mẽ mõi nẽ hixêt prêk ã api nẽ himõk ã kuhê.

² Hãmri nhũm Jejus xep ra axtem nẽ xa. Axtem hkuk nhĩrã htỳx nẽ xa. Te myyti nhĩrã htỳx pyràk. Nẽ ê haka htỳx kumrêx.

³ Hãmri nhũm xep ja wa kaxkwa rũm hwỳr wrỳ nẽ kuri kãm kapêr o xa. Mojes mẽ Erisja wa nhũm hwỳr wrỳ nẽ kuri xa. Tĩrtũm amnepê m amnhĩ wỳr wa ho àpir tã wa akupỳn wrỳ nẽ Jejus mã kapêr o xa.

⁴ Hãmri nhũm Jejus kôt mẽ mõi xwỳnhjaja wa mẽ omu nhũm Simãw Pêtre tanhmã hamaxpêr to nẽ Jejus wỳr tẽ nẽ kãm:

—Kwa Pahihti. Nã ãm hãmri na pu mẽ amnẽ mõi. Kwa pu mẽ kritpê m jar axkamẽ nẽ tokyx panojarêt kêt nẽ. Pa mẽ amã pô nhĩrõnh o axkrunêpxi nẽ hipêx. Amã hõ nhĩpêx nẽ Mojes mã hõ nhĩpêx nẽ Eris mã hõ nhĩpêx ka mẽ kamã akrĩ. E kwa pa mẽ amã ho anẽ nã?

Anhỳr o kãm kapêr. Nom amnhĩ krã hkôt ã kapêr anẽ.

⁵ Hãmri nẽ kormã ã kãm kapêr anhỳr rôm nhũm ra kakrã jaka htỳxja wrỳ nẽ wa mẽ hkunor pa nhũm wa mẽ kamã kuhê. Nhũm kakrã kamã Tĩrtũm mẽ kãm kapêr nẽ mẽ kãm:

—E ota Ixkra xa. Inhmã hapê ho inhmã hapê. E kêt ka mẽ kapêr mar tỳx rãhã ho ri apa. Anẽ.

⁶ Hãmri nhũm mẽ tee ri kuma nẽ kãm ma htỳx nẽ umaj pikap rôrôk nẽ htu mỳrpê hikwỹ.

⁷ Hãmri nhũm Jejus mẽ hwỳr tẽ nẽ mẽ hã ãhkra jaxwỳ nẽ mẽ kãm:

—E mẽ kãnhmã akuhê nẽ amã ma hkêt nẽ. Anẽ.

⁸ Hāmri nhũm mẽ kuma nẽ kànhmã rīt nẽ Jejus pix pumu nhũm ahte xa nhũm kuri wa ãm xwỳnhhta wa ra ma akupỹm api.

⁹ Hāmri nhũm mẽ kormã akupỹm hixêt nhĩmõk rũm mẽ ixwỳr wrỳk o mỗ nhũm Jejus mẽ kãm:

—E kêr ka mẽ ham ate mẽmoj pumunh xwỳnhhta kormã nhãm mẽ kãm harênh kêt nẽ. Kot paj nhỹrmã ty nẽ akupỹm ixtír ka mẽ rĩ kormã mẽ kãm ja hã ijarênh o ri apa. Anẽ.

¹⁰ Hāmri nhũm mẽ kormã akupỹn mẽ ixwỳr wrỳk o mỗ nhũm mẽ Jejus mã:

—Kwa mẽ inhmã mẽmoj jarẽ. Na htem Tĩrtũm kapêr tũm o mẽ ijahkre xwỳnhhaja mẽ inhmã: “Eris kumrêx koja Tĩrtũm mẽ pahwỳr kumẽ nhũm Krisja kormã hapu hã wrỳ.” Anẽ. Na htem ã mẽ inhmã war ajarênh anẽ. Tã ka ra wrỳ nom kormã akukamã Erisja wrỳk kêt. Anẽ.

¹¹ Hāmri nhũm mẽ kãm:

—Nà ãm hāmri na prem ã wa ijarênh anẽ. Na pre ra ixkukamã te Eris kot amnhĩ nhĩpêx pyræk xwỳnhhta tẽ nẽ ixkutêp mẽ kãm ijarênh o pa.

¹² Tã nom nhũm mẽ ja hã omunh kêt nẽ. Na prem axtem nẽ kãm hprãm xà hkôt tanhmã hipêx to nẽ kupĩ. Tã koja mẽ nhỹrmã ã hipêx anhỳr pyræk o inhĩpêx. Anẽ.

¹³ Hāmri nhũm mẽ ra hprĩ hã kuma nẽ axpẽn mã:

—Kwa Juãw Paxis pimràata na ã mẽ pamã harênh anẽ. Tapxipix na pre te Eris kot amnhĩ nhĩpêx pyræk o amnhĩ nhĩpêx o pa. Tã tãm na mẽ pamã harẽ. Anẽ.

Jejus kot mēhō hkra nē mēkarōmnuti kator ā harēnh

Makre 9.14-29; Rukre 9.37-43

14 Tā nhūm mē ra akupŷm ahpar mā man mē ixwŷr hpôx o mō nhūm mē ohtô rax nē Jejus kutêp kuhê. Hāmri nhūm mēhō myja mē omu nē mē kutā tē nē mē hkaxpa nē Jejus kutā hkōn krā ho tēm nē nhŷ nē hkra ho kuwŷ nē kām:

15 –Pa Jejus. Kwa inhmā ixkra kamā axukaprī nē. Na hte mēkarōmnutija xatā tanhmā ixpê ho nhūm hte ŷ hā mra nē rōrōk nē tōhā kuwy kamā rōrōk nē tōhā gōx kām mran mrō nē ixpê homnuj tŷx nē.

16 Tā pa akôt mē pa ho mē pa xwŷnhjê hwŷr o tē nom nhūm mē kot inhmā ho mex kaxyw tee ri tanhmā ho hkaprŷ. Kwa xà kot kaj akupŷm inhmā ho mex nà? Anē.

17 Hāmri nhūm kuma nē mē ixte hkôt ixpa ho ixpa xwŷnhjê mā kapēr nē mē inhmā:

–Hêxta waa nē. Ra mē ate ixte Tirtūm nhŷ hā mē ho mex ā ixpumunh o ixkôt apa ryy htā kormā ixpyrà nē ā mē hipêx anhŷr kêt nē. Nà kormā mē kaxyw Tirtūm kôt mē ajamaxpēr tŷx kêt jakamā na ka mē tee mē ho mex kaxyw. Anē.

Hāmri nē myta mā kām:

–E amnē ixwŷr akrata o tē pa omu. Anē.

18 Hāmri nhūm kuma nē hwŷr o tē nhūm omu nē nē mēkarōmnutija kator nhūm akupŷm mex kurê kumrêx.

19 Hāmri pa mē ixte Jejus kôt ixpa ho ixpa xwŷnhjaja ja hā omu mē hkàx ā amnhī tā hkukja nē kām:

—Kwa na pa mẽ axwakre kamã tee ri nê hanor prãm kaprÿ. Kwa mon pa mẽ apyrà nê nê hanor nhũm kator nê ma htẽm kêt nê? Anê.

²⁰⁻²¹ Hãmri nhũm mẽ inhmã:

—Nà kormã mẽ ate mẽ kaxyw Tĩrtũm kôt ajamaxpêr tÿx kêt. Nom kot ka mẽ kaxyw hkôt ajamaxpêr tÿx hãmri nê hkôt amnhĩ nhĩpêx kukwak ri mẽmoj tã awÿ nhũm mẽ ama nê mẽ ate mẽmoj tã axàhwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “Kwa amnhĩ jarê nê ma tẽ nê gô xujanâr kãm mãn mrõ.” Anhÿr nhũm kot amar nê amar xà hkôt ã amnhĩ nhĩpêx anhÿr kurê kumrêx pyræk. Ja pyrà nê kot kaj mẽ amnhĩ kaxyw Tĩrtũm kôt ajamaxpêr tÿx kukwak ri mẽmoj tã awÿ nhũm mẽ ama nê mẽ amã mẽmoj tanhmã ho rÿ mẽ amã mẽmoj gô. Anê.

*Jejus kot htyk kukamã amnhĩ jarênh ã harênh
Makre 9.30-32; Rukre 9.43-45*

²²⁻²³ Tã hãmri pa mẽ Jejus kôt ma mõi nê nhÿri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarênh to nê mẽ inhmã:

—Nà koja mẽ tokyx mẽ kãm ixtã amÿnê nhũm mẽ ixpĩ. Mẽ kot ixpĩr tã kot paj ixtyk ã apkati axkrunêpxi nhũm Tĩrtũm akupÿm ixto ixtĩr. Anê.

Hãmri pa mẽ tee ri ã kot amnhĩ jarênh anhÿrja ã kuma nê ixkaprĩ htÿx kumrêx.

*Jejus kot Tĩrtũm nhõrkwÿ hwÿr àr
Rõmãn 13.5-7; Wam Korĩt 10.32-11.1*

²⁴ Tã pa mẽ Jejus kôt ma mõi nê ra Kapanaũ hwÿr pøj. Hãmri nhũm mẽ kot Tĩrtũm mã amnhĩ jarênh xà hã ixkre ho mex kaxyw mẽ kêp kàxpore hkwy

jamÿnh xwÿnhjaja mẽ ixpumu nẽ mẽ ixwÿr mra nẽ Simãw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwÿjê pyrà nẽ Tĩrtũm mã amnhĩ jarẽnh xà hã ixkre ho mex kaxyw kàxpore hkwÿ nhõr kêt nẽ nà? Anẽ.

²⁵ Hãmri nhũm mẽ kuma nẽ mẽ kãm:

—Tỳ kot mẽ kãm òr o pa kênã. Anẽ.

Hãmri nẽ ma mẽ ixkôt tẽ nẽ mẽ ixkôt mẽhõ nhõrkwÿ hwÿr axà. Hãmri nẽ kot Jejus mã mẽ harẽnh mã tã nhũm ra hamaxpêr ã omu nẽ kumrêx kãm kapêr nẽ kãm:

—Kwa inhmã mẽmoj jarẽ Simãw Pêtre. Xà na hte pahi hkrajaja ò papaj mã kàxpore hkwÿ nhõr o pa nà? Xà na hte ãm hkra hkêt xwÿnh pixjaja kãm hkwÿ nhõr o pa? Anẽ.

²⁶ Hãmri nhũm kuma nẽ kãm:

—Nà mẽ kêp hkra hkêt xwÿnh pixjaja na hte kãm òr o pa. Anẽ.

Hãmri nhũm Jejus kãm:

—Tỳ. Nà ãm hãmri na ka ja jarẽ. Na hte pahi hkrajaja ò papaj mã kàxpore nhõr kêt nẽ. Mẽ kêp hkra kênã. Tã ixpê Tĩrtũm Kra jakamã mo kaxyw kot pa kêt òrkwÿ hwÿr inhgjêx kaxyw kãm kàxpore hkwÿ gõ?

²⁷ Tã nom kot paj òr kêt nhũm kàxpore hkwÿ jamÿnh xwÿnhjaja tee ri ja hã ixpumu nẽ axpên mã ixte amnhĩ tomnuj xwÿnh ã ijarẽ. Jakamã e ma gõnhmã tẽ nẽ tep ò kanhê. Hãmri nẽ ho api nẽ apy nẽ hakwa jakjê nẽ kamã kàxpore htÿxre pumu. Nẽ apy nẽ man o tẽ nẽ pahpãnhã kàxpore jamÿnh xwÿnhhta mã agõ. Anẽ.

Nhũm pre ã Jejus Simãw Pêtre mã karõ anê nhũm kuma nê ma hwỳr tẽ nê kot kãm karõ xà hkôt ã amnhĩ nhĩpêx anê.

18

Mẽ kot amnhĩ to rũnh xwỳnhjê jarẽnh

Makre 9.33-37; Rukre 9.46-48; mããnên Piripos 2.3-7; Wam Pêtre 3.4, 5.5-6

¹ Tã mẽ ixte Jejus kôt ixpa ho ixpa xwỳnhjaja amnhĩ kukamã ijamaxpêr nê amnhĩ tã Jejus kukja nê kãm:

—Kwa mẽ inhmã mẽmoj jarẽ Pahiti. Nhỹrmã mẽ ixpê pahi nê anhĩhkô hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwỳjê jakre? Anê.

² Hãmri nhũm mẽ inhma nê amnhĩ wỳr mẽhprĩre hõ mã hpa ho apê nhũm hwỳr tẽ nê mẽ ixkuri xa.

³ Hãmri nhũm Jejus omu nê hã mẽ inhmã:

—E mẽ inhma. Kêr ka mẽ apê pahi pyràk o tanhmã amnhĩ jarẽnh to ho ri apa hkêt nê. ãm te amarĩ ri mẽ apa pyràk o amnhĩ nhĩpêx. Te mẽhprĩre kot amnhĩ nhĩpêx pyràk. Kot kaj mẽ ã amnhĩ nhĩpêx anhỹr o apa hkêt hãmri nê nhỹrmã inhĩhkô hã mẽ ho amnhĩptàr kêt nê.

⁴ Jakamã kot kaj mẽ amã nhỹrmã inhĩhkô hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrà nê amã amnhĩ to rũnh prãm kêt nê apa.

⁵ —Nê kêr ka mẽ apê pahi kot amnhĩ nhĩpêx pyràk o tanhmã amnhĩ jarẽnh to ho apa hkêt nê. ãm te amarĩ ri mẽ apa pyràk o amnhĩ nhĩpêx. Jao nhỹri mẽhprĩjê hõ pumu nê kamã axukapri nê kãm

mějmoj tanhmã ho rỳ kãm mějmoj gõ. Hãmri nẽ te pa ate tanhmã ixto mex to pyræk o amnhĩ nhĩpêx. Kot kaj mẽ ã amnhĩ nhĩpêx anhỹr o apa hãmri nhũm Tĩrtũm ja hã mẽ apumu nẽ mẽ ate amnhĩ to rũnh kêt tã mẽ ate amnhĩ to rũnh xwỳnh ã mẽ ajarẽ. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhỹr o ri apa. Anẽ.

Měj kot amnhĩ tomnuj xwỳnhjê hkukamã mẽ harẽnh

⁶ Nhũm Jėjus arĩ mẽ inhmã mễhprĩ jarẽ nẽ mẽ inhmã:

–Nẽ mễhprĩre na htem amnhĩ kaxyw ixkôt hamaxpěr o pa. Tã koja mễhõ inhnê tanhmã mẽ kãm kapěr to. Měj kot tanhmã amnhĩ tomnuj to hprãm xàj tanhmã mẽ kãm kapěr to ho pa. Hãmri nhũm mẽ kuma nẽ mẽ kapěr xà hkôt tanhmã amnhĩ tomnuj to. Hã koja Tĩrtũm ja hã omu hãmri nẽ kot inhnê tanhmã kãm kapěr to xwỳnhhta pumu nẽ homnuj tỳx nẽ. Te mẽ kot mễhõ pynênh nẽ mut ã kẽn pytĩ hõ nhôr nẽ ma o htêm nẽ gô xupỳm kãm mễnh pyræk o hipêx. Te ho ja pyræk no ãm homnuj tỳx o hakre.

⁷ –Nẽ koja mễhõ inhnê tanhmã mẽ kot ixkôt amnhĩ xunhwỳr xwỳnhjê hõ mã kapěr to. Kot tanhmã amnhĩ tomnuj to hprãm xàj tanhmã kãm kapěr to. Rỳ kot ixkaga hprãm xàj tanhmã kãm kapěr to. Hãmri nhũm kuma nẽ mar xà hkôt ixkapěr kwỳm tanhmã amnhĩ tomnuj to. Tã koja Tĩrtũmja ja hã omu nẽ mããnẽn kot inhnê kệp àmnàr xwỳnhhta pumu nẽ ã inhnê kãm kapěr anhỹrja mỳrapê homnuj tỳx kumrẽx.

8-9 —E kwa mẽ okora. Kot kaj mẽ anhĩhkra ho tanhmã amnhĩ tomnuj to rỳ apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhỹr pymaj te mẽ ate amnhĩ pê krãhyr nê mẽnh pyræk o amnhĩ nhĩpêx nê axte ã amnhĩ tomnuj anhỹr kêr nê. Rỳ ka mẽ ano ho mẽmoj punuj pumu. Hã kêr ka kãm ajamaxpêr pix o apa pymaj te mẽ ate amnhĩ pê ano katøk nê kaxàr nê mẽnh pyræk o amnhĩ nhĩpêx nê nhãm arit kurê kumrêx. Kêr ka mẽ ã amnhĩ nhĩpêx anhỹr o ri apa. Hãmri nê nhỹrmã ty nê ma Tĩrtũm nhõ krĩ hwỳr api. No kot ka mẽ arĩ akutã ano nê arĩ akutã apar nê arĩ akutã anhĩhkra rãhã ri apa htã ho amnhĩ tomnuj o apa. Hãmri nê nhỹrmã ty nê ate amnhĩ tomnuj mỳrapê ma mẽ kot amnhĩ xà htỳx kamã hamak tũm xà hwỳr ma mõi.

10-11 —Nê kêr ka mẽ mẽhprĩrejê kamã axukapri rãhã ho apa. Na hte kaxkwa kamã Tĩrtũm kapêr o mẽ wrỳk xwỳnh kwỳjaja Tĩrtũm mã mẽ hamãr mex o pa. Tã koja mẽhõ tanhmã kêp hõ hto nhũm mẽ hã omu nê ma tẽ nê Tĩrtũm mã harênh kurê kumrêx. Anê.

ôwêhti pikunor jarênh

Rukre 15.3-7

¹² Nhũm Jejus arĩ mẽ inhmã kapêr nê mẽ inhmã: —E pa mẽ amã awjarê ka mẽ ixujarênh ma. Nà koja mẽhõ my hkrit ôwêhti xohtô nê. Nê apkati mẽ ma hamãr o pa. Hãmri nhũm pyxire nê tanhmã amnhĩ to nê kêp akunok. Kwỳ kaga nê ma nhỹhỹm ahte tẽ nê kêp akunok. Hãmri nhũm mytita ma akupỹm o mõi kaxyw hkwỳ ho pikuprõnh pa hãmri nê tee ri hkwỳ kaêx ã pikunor xwỳnhhta japêr nom nhỹri omunh kêr nê. Hãmri nê tee ri hkukamã

hamaxpêr nê ma hkwȳ ho mō nê nh̄yri kure. Kutêp apkur kaxyw nh̄yri kure hāmri nê ma akup̄ym pikunor xw̄ynhta japêr o tē.

¹³ Hāmri nê hapêr ryy nê nh̄yri hw̄yr kato nê omu nê hk̄inh nê. Hāmri nê kutu nê ma akup̄ym o tē. Na hte pikunor kêt xw̄ynhê nh̄y hã hk̄inh tã pikunor xw̄ynhta mã kato nê hk̄inh t̄yx nê. Krit xohtô htã nom ãm kãm ho pixi nê ho hpikunor prãm kêt. ã mē ujarênh kot anh̄yr.

¹⁴ Ja pyrà nê Tirtũm kãm mēhō pyxi nê nh̄ymã ma kuwȳ w̄yr mōr prãm kêt kumrêx. Mē piitã mē kot hkôt amnh̄i xunhw̄yrja na kãm hprãm. Anê.

Jejus kôt mē pahtôjê hō kot mē pahtomnuj jarênh

¹⁵ Nhũm Jejus ar̄i mē inhmã kapêr nê mē inhmã: —Nê ja. Kojã ixkôt mē atō r̄y mē atōx tanhmã atomnuj to. Hã kêr ka ma hw̄yr tē nê kot tanhmã anh̄ipêx to hã amnh̄i tã kãm akapêr. Nom kêr ka mē nhãm mēhō mã harênh kêt nê. ãm tanhmã kot ato xw̄ynhta pix w̄yr tē nê kumê war axpên mã akapêr nê war axpên ma. Nhũm ama nê akup̄ym tãm anh̄ipêx hã kêr ka akup̄ym te ixkôt kêp atō r̄y atōx pyrãk o ka wa axpên nh̄ipêx nê axte jam ajamaxpêr kêt nê.

¹⁶ Nom koja ama nê ãm ama r̄y tanhmã ato hkêt ã amnh̄i jarênh japêr. Hã kêr ka ma akup̄ym tē nê akup̄ym amnh̄i kôt Kris kôt atō r̄y atōx o axkrut r̄y mē ho axkrunêpxi nê amnh̄i kôt hw̄yr mē o mra kê mē axpên tã war ama. Amnepêm Tirtũm kapêr ã kagã htũm kot ja jarênh o:

Kêr ka mē atō tanhmã axpên nh̄ipêx to. Hāmri nê hã axpên mã akapêr kaxyw nê amnh̄i kôt akw̄yjê ho axkrut r̄y ho axkrunêpxi nê

akupÿm hwÿr mē o mra kê mē axpēn tã war ama. Anē.

—Ă Tĩrtũm kapēr ă kagà htũm kot ja jarēnh kot anhÿr.

¹⁷ Jakamã kêr ka mē amnhĩ kôt akupÿm kot tanhmã ato xwÿnhhta wÿr mē o mra kê mē atã kuma. Hãmri nhũm arĩ mē kãm kot tanhmã ato hkêt ă amnhĩ jarē ka tee ri amnhĩ tã omu nē ikrēsti hwÿr tē nē Kris kwÿ hã mē pikuprōnh xwÿnhjê mã harē. Kê mē ama hãmri nē ja hã axte kot tanhmã ato xwÿnhhta mã kapēr. Nhũm mē mar kêt nē arĩ kot tanhmã ato hkêt ă amnhĩ jarē ka mē amnhĩ nē hanor kurê kumrēx. Hãmri nē te kêp Kris kôt mē atõ rÿ mē atõx kêt pyràk o hipêx.

¹⁸ —Nē koja mēhõ ixkôt amnhĩ xãm nē Inhĩpêêxà Tĩrtũm kôt ri amnhĩ nhĩpêx o pa. Ka mē ja hã omu nē inhÿ hã tanhmã kãm akapēr to nē kãm: “E ra ate Jesus kôt amnhĩ xãm jakamã kot kaj nhÿrmã Tĩrtũm mē wa kuri amex kumrēx nē atĩr tũm nē apa ho apa.” Anhÿr o kãm akapēr. Nom mē kot ixkôt amnhĩ xunhwÿr kêt xwÿnhjaja ka mē ă mē kãm akapēr anhÿr kêt nē. Ăm inhÿ hã mē kãm: “No mē kajaja mē ate Jesus kôt amnhĩ xunhwÿr kêt jakamã kot kaj mē Tĩrtũm mē Krata wa kuri atĩr tũm nē amex nē apa hkêt nē.” Anē. Kêr ka mē inhÿ hã ă ahpÿnhã tanhmã mē kãm akapēr to ho apa anē.

¹⁹⁻²⁰ —Nē kot kaj mē Tĩrtũm mã amnhĩ jarēnh kaxyw te axkrutre rÿ axkrunēpxire htã axpēn wÿr akuprō nom mē kapxipixjaja apikuprōnh kêt nē. Kot paj mē akaêx ă mē anhĩhkô hã mē amar o xa. Mē ate ano ho ixpumunh kêt tã pa wa mē anhĩhkô hã mē amar o xa. Jakamã kot kaj mē

axpên wÿr akuprô nê mẽmoj tâ Tĩrtũm wÿ nhũm kaxkwa kamã ja hã mẽ ama. Nê mẽ ate hã axàhwÿr xwÿnh̄ta nhũm mẽ amã tanhmã ho. Kêr ka mẽ ã ixkamnàr rom axàmnhĩx amnhĩ to Inhĩpêêxà hwÿr anê. Anê.

Nhũm pre ã Jejus mẽ inhmã kapêr anê.

Mẽ pahte tanhmã axpên nhĩpêx to hã mẽ pamã karô

Matêwre 6.14-15; Rukre 17.3-4; mãânên Epes 4.32; Korosê 3.13

²¹ Tã nhũm Simãw Pêtre Jejus wÿr tẽ nê mẽmoj tâ hkukja nê kãm:

—Kwa inhmã mẽmoj jarê Pahшти. Xà koja akôt ixtô rÿ ixtôx tanhmã inhĩpêx to pa amnhĩ tâ omu nê ãm omu nê amnhĩ tâ tanhmã ho hkêr nê. Nhũm axte tanhmã ixto nê axte tanhmã ixto ho 6 tâ pa ãm amnhĩ tâ omu nê amnhĩ tâ tanhmã ho hkêr nê. ãm ho ijamakêtkati nê axte kãm ijamaxpêr kêt nê. ã amnhĩ tâ hipêx anhÿr o 7 nhũm ja amã mex nê nà? Anê.

²² Hãmri nhũm kãm:

—Nà kot kaj ã amnhĩ tâ hipêx anhÿr o 7 pix kêt nê. Koja mẽhõ xatã tanhmã ato rãhã nê ka amnhĩ tâ omu nê ajaxwÿja amnhĩ tâ xatã tanhmã ho hkêr nê. ãm amnhĩ tâ omu nê ãm omu nê tãm hipêx rãhã ho ri apa. Mãmrĩ ho anhÿr o apa rãhã nê aa jam anhÿrer kêt nê.

²³ —E kot paj ixprĩ hã mẽ amã tanhmã ja jarênh to ka mẽ inhma. Tĩrtũm na hte xatã mẽ ate tanhmã amnhĩ tomnuj to hã mẽ apumu nê mẽ anê rên̄h o pa. Te kot pahi kot ã hkwyjê nhĩpêx anhÿr pyrãk. Koja mẽ õ pahija kãm mẽ àpênh xwÿnh̄jaja kot kêp kàxpore ho ãpresta hã mẽ omunh kaxyw nhÿ.

24 Hāmri nhũm mẽ hwỳr ja ho tẽ nẽ kutã ãm. Ra kot kêp hikàxpore ho ìpresta rax xwỳnhja.

25 Tã no ãm aa akupỹm kãm òr kêt nẽ ra kêp ho hapêx pa. Hāmri nhũm pahija tee ri amnhĩ tã omu nẽ hkwỳjê mã hã amỹnê nẽ mẽ kãm: “E. Mẽ ma o tẽ nẽ hprõ nẽ hkrajaja nẽ òrkwỹ nẽ hikukrêx mẽrohã ho wẽnê hpa nẽ hpãnhã kàxpore py nẽ man inhmã o tẽ. Kot ixpê ixkàxpore ho ìpresta nẽ akupỹm inhmã òr kêt mýrapê.” Anẽ.

26 –Hāmri nhũm kot ho ìpresta xwỳnhhta tee ri amnhĩ tã kuma nẽ kutã hkõnkrã ho nhỹ nẽ amnhĩ to hwỳr kãm hihtỳx nẽ kãm: “Kwa nà ri ixto anhỹr kêt nẽ pahihtì. Ixkamã axukapřĩ nẽ hkêt wehe. Nà kot paj akupỹm amã kugõ kãm ga.” Anẽ.

27 –Hāmri nhũm amnhĩ tã kuma nẽ kãm hkapřĩ nẽ. Hāmri nẽ kãm: “Tõe. Nà kot paj ã anhĩpêx anhỹr kêt nẽ. Kot paj anhõ kõt kaxõnh pa nẽ kumẽ ka mãmřĩ ma ajamakêtkati nẽ axãmnhĩx apa.” Anẽ.

28 Nhũm ã kãm kapêr anẽ nhũm kuma nẽ hkĩnh nẽ. Hāmri nẽ ma tẽ nẽ kato nẽ ixkre kapem pòristi hõ pumu. Na pre ra kêp kàxpore hkwỳ ho grìre nẽ ho ìpresta nhũm kato nẽ omu. Hāmri nẽ hwỳr tẽ nẽ amnhĩ kĩnhã òkre hã kumỳ nẽ kãm: “Kwa tokyx akupỹm ate ixpê kàxpore ho ìpresta pãnhã inhmã agõ.” Anẽ.

29 Hāmri nhũm tee ri amnhĩ tã omu nẽ ra ham kot pahi kutã amnhĩ nhĩpêxta pyrã nẽ kutã hkõnkrã ho nhỹ nẽ kãm: “Kwa nà. Kwa ri ixto anhỹr kêt nẽ. Nà kot paj hpãnhã amã kugõ. Kwa ixkamã axukapřĩ nẽ hkêt wehe.”

30 Anhỹr tã nom nhũm kuma nẽ ãm kuma nẽ hã amỹnê. Hã hkwỳjê mã amỹnê nẽ mẽ kãm: “E mẽ ma jahti ho tẽ nẽ haxà. Kojã kot ixpê kàxpore ho

ĩpresta pãnhã inhmã kugõ nẽ rĩ kormã kato nẽ rĩ amnhĩ pumu.” Anẽ. Hãmri nhũm mẽ kuma nẽ ma o tẽ nẽ haxà.

³¹ —Hãmri nhũm hkwyjaja tee ri mar o kuhê nhũm mẽ kêp ja omnuy nẽ nhũm mẽ pahi hwỳr agjê nẽ kãm harẽ.

³² Hãmri nhũm tee ri harẽnh ma nẽ kamã gryk tỳx nẽ akupỹm amnhĩ wỳr hã karõ nhũm akupỹm hwỳr axà nhũm kãm: “Tk. Kwa na ka pre amnhĩ tomnuj tỳx nẽ. Ate amnhĩ to ixwỳr nhũm inhmã akapri nẽ ixte anhõ kõt kaxônh nẽ mẽnũ tã

³³ ka amnhĩ kĩnhã anhĩõta kamã axukapri hkêt nẽ ri ã hipêx anẽ.” Anẽ.

³⁴ Hãmri nẽ kamã gryk nẽ hã õ pôristi mã amỹnê nhũm mẽ ma o tẽ nẽ haxà. Mẽ kot mẽ hagjênh xà hã ixkre kamã apkati mẽ tanhmã mẽ kot hipêx to kaxyw nhũm mẽ kãm hã amỹnê. Tanhmã mẽ kot hipêx to rãhã nhũm kot akupỹm kaxpore raxta nhõr par nẽ rĩ kormã kator kaxyw nhũm mẽ ma o tẽn haxà. ã mẽ ujarênh kot anhỳr. Anẽ.

³⁵ Nhũm pre ã Jejus mẽ ixte hkõt ixpa ho ixpa xwỳnhjê mã kapêr anẽ. Hãmri nẽ mẽ inhmã:

—Ja pyrà nẽ koja ixkõt mẽ atõ rỳ mẽ atõx tanhmã mẽ atomnuj to ka mẽ amnhĩ tã omu nẽ âm omu nẽ ho ajamakêtkati kurê kumrêx nẽ axte kãm ajamaxpêr kêt nẽ. Te pahi kot mẽhõ nhõ kõt kaxônh par nẽ axte kãm hamaxpêr kêêta pyræk. No kot kaj mẽ ã amnhĩ nhĩpêx anhỳr kêt nhũm kaxkwa kamã inhõ Papaj ja hã mẽ apumu nẽ te ho pahi tee ri kot amnhĩ tomnuj xwỳnhnta kot amnhĩ nhĩpêx ã omunh nẽ hã àmnênh nhũm mẽ kot apkati mẽ tanhmã omnuy tota pyræk o mẽ anhĩpêx. Anẽ.

19

Jejus kot mẽ pahte axpẽn kaga nê mẽ pahkurê

Matêwre 5.31-32; Makre 10.1-12; Rukre 16.18; mããnẽn Wam Korĩt 7.10-16

¹Tã nhũm Jejus mẽ inhmã kapěr pa nê mẽ inhmã anê pa mẽ ixrohã Garirej rũm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã.

²Hãmri nhũm mẽ ohtô nê Jejus pumu nê man mẽ ixwỳr mra nhũm mẽ omu nê mẽ kãm akupỳm mẽ à xwỳnhjê ho mex.

³Hãmri nhũm Parijew nhõ xwỳnh kwỳjaja hwỳr mra. Hêx rom kot kamã hamak nê tanhmã ho kapěr punuj to kaxyw hwỳr mra nê kãm:

—Pa? Kwa mẽ inhmã mẽmoj jarê. Tanhmã na pre amnepêm finat Mojesja mẽ pahte mẽ pahprõ kaga hã mẽ panhĩgêjtê mã karõ hto? Xà kot mẽ pahprõ pahkwỳm ri tanhmã amnhĩ nhĩpêx to pu mẽ hkaga nhũm ja Tĩrtũm mã mex nê nà? Anê.

⁴Hãmri nhũm mẽ kãm:

—Nà na ka mẽ aprĩ hã Mojes kot tanhmã ja jarênh to mar mex kêt nê. Ja kot anhỳr kêt. Amnepêm mẽmoj piitã hkrax kãm na pre Tĩrtũm my nê nija wa hipêx. Axpẽn kaxyw wa hipêx.

⁵Hãmri nê wa hkukamã tanhmã wa kot amnhĩ nhĩpêx to hã wa harê nê wa harênh o:

Koja mẽmyjaja hprõ kaxyw hãmri nê gryk ã katorxà mẽ hipêêxà wa hkaga nê ãm hprõ kôt pix mã pa ho pa. Te wa tipxi nê ri wa pa pyrãk o amnhĩ nhĩpêx. Anê.

—Na pre ã Mojes Tĩrtũm nhỹ hã mẽ kãm ja jarênh anê.

⁶ Jakamã koja te wa tipxi nê ri wa pa pyræk o axpên nhîpêx o pa. Tîrtûm tãm kot axpên mã wa òr kênã kot kêt wa axtem nê ri htỳx ri hamaxpêr nê axpên kaga. Anê.

⁷ Hãmri nhũm mẽ kuma nê kãm:

—Tỳ. Nom finat Mojes na pre mẽ pakukamã mẽ panhîgêjtê mã ã ja hã karõ anê nê mẽ kãm:

Kot kaj mẽ aprõ kaga kaxyw hãmri nê ra kêp aprõ hkêt ã hã kagà nhîpêx nê kãm agõ nê amnhĩ nê hano kê ma tẽ.

—Anhỳr o na pre mẽ kãm hã karõ. Tã ka na ka mẽ ixte axpên kaga hkêt ã mẽ inhmã karõ. Anê.

⁸ Hãmri nhũm mẽ kuma nê mẽ kãm:

—Tỳ no ãm mẽ kãm Tîrtûm kapêr kôt amnhĩ nhîpêx prãm kêt jakamã na pre ã mẽ kãm ja jarênh anê. No amnepêm mẽmoj piitã hkrax kãm na prem ã amnhĩ nhîpêx anhỳr o pa hkêt nê.

⁹ Jakamã kêr ka mẽ aprõ kaga hkêt nê apa. Kot kaj mẽ hkaga nê hpãnhã nhãm mễhõ ho aprõ nhũm Tîrtûm noo mã te ate wam aprõ kamã nhãm aprõ nyw o amnhĩkati pyræk. Tîrtûm pê ja omnuj tỳx nê. Rỳ koja mễhõ hprõ kaga ka hpãnhã ho aprõ nhũm Tîrtûm noo mã te ate wam mjên pê ho amnhĩkati pyræk. Ja mãânên Tîrtûm pê omnuj tỳx nê. Anê.

Nhũm pre ã Parijew nhõ xwỳnhjê mã kapêr anê.

¹⁰ Hãmri pa mẽ ixte hkôt ixpa ho ixpa xwỳnhjaja ã kapêr anhỳrja ã kuma nê kãm:

—Xà na hte mẽ mjên ra kãm mẽ hprõ hkĩnh kêt tã hkaga hkêt nê arĩ hkôt pa ho pa nhũm hte Tîrtûm mã ja mex nê nà? Jakamã kwa xà kot paj mẽ nhỹrmã ixprõ kaga pymaj ixprõ hkêt kumrêx nê ixpa ho ixpa nhũm ja mẽ inhmã mex nê nà? Anê.

¹¹ Hãmri nhũm mẽ inhmã:

—Nà ãm hãmri na ka mẽ ja jarê. No mẽ ate harênhja na mẽ piitã mẽ kãm mex kêt. Koja Tĩrtũm tãm amã aprõ hkêt ã ajarê ka rĩ aprõ hkêt nê ahte ajamakêtkati nê ri apa.

¹² Na htem piitã hprõ nê pa hkêt nê.

Na hte kamã tanhmã mẽ kute xwỳnhjaja kormã hprĩre ri tanhmã kute mỳrapê kãm hprõ hprãm kêt nê pa.

Nê kamã tanhmã mẽ ho mỳrapê nhũm mẽ hkurê hkêt nê hprõ hkêt nê pa.

Nê kamã mẽ kãm Tĩrtũm mã tanhmã amnhĩ to ho pa pix prãm xaj kãm hprõ hprãm kêt nê pa.

Tã kot kaj mẽ jajê pyrà nê ã amnhĩ nhĩpêx anhỹr prãm nê rĩ kam nê aprõ hkêt nê apa. Anê.

*Jejus kot amnhĩ nê mẽhprĩjê janor kêt ã harênh
Makre 10.13-16; Rukre 18.15-17*

¹³ Tã nhũm Ijaew kwỳjaja Jejus pumu nê hwỳr mẽ hkrarejê jamỳ nê mẽ o mra. Kot mẽ hã ìhkra jaxwỳr nê mẽ ho Tĩrtũm wỳr kaxyw hwỳr mẽ o mra. Hãmri pa mẽ ixte hkôt ixpa ho ixpa xwỳnhjaja tee ri mẽ omu nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wỳr mẽ o mra? Kormã mẽ ràxre kênã. Kwa mẽ ma akupỹm mẽ o mra nà? Anê.

¹⁴ Hãmri nhũm Jejus mẽ inhma nê mẽ inhmã:

—Kwa nà mẽ ri inhnê mẽhprĩjê kurê hkêt nê. Kwâr mẽ mãmri ixwỳr mẽ o mra. Anê.

Hãmri nê amnhĩ wỳr mẽ mẽ kãm hpa ho apê nhũm mẽ hwỳr mẽ o mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ kãm amnhĩ to rũnh prãm

kêt nê. Tã Tĩrtũm kôt mẽ kot amnhĩ nhĩpêx o mẽ pa xwỳnhjaja te mẽ kot jajê pyràa nê kãm amnhĩ to rũnh prãm kêt nê pa. Anê.

¹⁵ Hãmri nê mẽ hã ìhkra jaxwỳ nê mẽ ho Tĩrtũm wỳ hãmri nê mẽ inhmã anê pa mẽ ma axte mẽ kurũm mỗ.

Kàxpore rũnh xwỳnh jarênh

Makre 10.17-22; Rukre 18.18-23; mãănên Rômãn 3.19-20; Wam Ximotre 6.6; Xiakre 2.10

¹⁶ Tã nhũm Ijaew òja Jejus wỳr tẽ nê kãm:

—Pa mẽ ijahkre xwỳnh? Kwa inhmã mẽmoj jarê. Tanhmã kot pa nhỹrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to wehe? Anê.

¹⁷ Hãmri nhũm kãm:

—Tk. Ra Tĩrtũm kot nhỹrmã mẽ atĩr tũm nê apa kaxyw mẽmoj tã mẽ amã karõ nhũm ate mar mex kênã kot ka kêt ri axte ja hã ixkukja. Nà Tĩrtũmja mex o mex jakamã kot kaj amã kuri atĩr tũm nê apa hprãm hã kot kaj kapêr kôt amnhĩ nhĩpêx no ri apa. Anê.

¹⁸ Hãmri nhũm kãm:

—No nhỹ kapêr kôt kot paj amnhĩ nhĩpêx o ri ixpa wehe? Anê.

Hãmri nhũm kãm:

—Na pre mẽ amã mẽmoj tã karõ ho:

Kêr ka mẽ axpẽn par kêt nê.

Nê nhãm mẽ hprõ ho amnhĩkati hkêt nê.

Nê mẽ kêp axàhkĩnh kêt nê.

Nê tanhmã mẽ ho axêx to hkêt nê.

¹⁹ Nê anhĩpêxà mẽ akatorxà wa hã apijaàm nê wa ho mex pê wa kutã anojarêt o ri apa.

Nê amã akwỳjê hã ma ho te ka amã amnhĩ tã ma pyràk o mẽ hipêx. Jao tãm mẽ hipêx o ri apa.

E kot kaj amã nhÿrmã Tirtũm kuri atĩr tũm nẽ apa hprãm hã kêr ka ã amnhĩ nhĩpêx anhÿr o ri apa. Anẽ.

²⁰ Hãmri nhũm kuma nẽ kãm:

—Ku nhũm. Ra ã ixte amnhĩ nhĩpêx anhÿr o ri ixpa kênã. Nom te kormã ixtĩr tũm nẽ ixpa kaxyw ixte tãm kêt pyræk. Kwa axte inhmã mêmõj jarẽ nà? Anẽ.

²¹ Hãmri nhũm kãm:

—Nà kormã mêmõj pyxi nẽ arĩk. Na ka amã akukrêx rax prãm tÿx o amã Tirtũm prãm jakre. Jakamã ma akupÿm tẽ nẽ akukrêx rax o wênê hpa nẽ hpãnhã kãxpore jamÿ nẽ ma mẽ kêp amrakati xwÿnhjê mã õr pa. Hãmri nẽ rĩ akupÿn ixwÿr tẽ nẽ rĩ ixkõt apa ho apa. Anẽ.

²² Hãmri nhũm kuma nẽ tee ri amnhĩ kukamã hamaxpêr. Kãm hikukrêx rax japê nẽ kãm kamã ãhkra karo hprãm kêt nẽ. Hãmri nẽ tee ri Jesus kot ã kãm hã karõ anhÿrja ma nhũm ja kêp omnuj nẽ nhũm ma akupÿm htẽm kurê kumrêx.

²³ Hãmri nhũm Jesus tee ri omu nẽ mẽ inhmã:

—Hêxta waa nẽ. Koja mẽ hikukrêx rũnh xwÿnhjaja ohtõ nẽ kãm mẽ hikukrêx japê xaj Tirtũm mẽ wa ixri htĩr tũm nẽ pa ho pa hkêt nẽ. Wa ixte amnhĩ nhĩpêxja mẽ kêp hihtÿx.

²⁴ Mẽ kãm hikukrêx rũnh mã ãhkra karo hprãm kêt rãhã tee ri kãm Tirtũm kõt amnhĩ nhĩpêx prãm kaprÿ. Te ho mêmõ kot menh kagõ hã hkre nẽ kãm kagõ katõk prãm kêt rãhã kãm guhkrax kãm àr prãm kaprÿta pyræk. Anẽ.

Nhũm pre ã Jesus mẽ inhmã kapêr anẽ.

²⁵ Hãmri pa mẽ kuma nẽ tee ri amnhĩ kukamã ijamaxpêr nẽ kãm:

—Kwa mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhỹrmã war ari ixtĩr tũm nẽ ixpa ho ixpa hkêt nẽ nà? Anẽ.

²⁶ Hãmri nhũm mẽ inhmã:

—Nà kot kaj mẽ amnhĩ krã hkôt mẽ amã mẽ akukrêx japêja mã anhũrer kêt nẽ. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nẽ. Jao ra mẽ apê Tĩrtũm mẽ wa ixri atĩr tũm nẽ mẽ apa ho mẽ apa mã xwỹnh. Anẽ.

²⁷ Hãmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nẽ akôt ixpa ho ixpa. Jakamã kot paj mẽ nhỹrmã war ari ixtĩr tũm nẽ ixpa ho ixpa nà? Anẽ.

²⁸ Hãmri nhũm kuma nẽ mẽ ixpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hãmri nẽ ixte mẽ ho amnhĩptàr o ixkrĩ xà maati kamã nhỹ nẽ mẽ piitã mẽ kot tanhmã amnhĩ nhĩpêx to hã mẽ omunh xà hkôt tanhmã mẽ harênh to. Tã mẽ kajaja mẽ ate ixkôt apa ho apa xwỹnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkôt ahpỹnhã tanhmã inhmã mẽ harênh to. Mẽ mex ã mẽ harẽ rỳ mẽ mex kêt ã mẽ harẽ. Kot kaj mẽ ã inhmã mẽ harênh anẽ. ãm hãmri na pa mẽ amã ixkapêr anẽ.

²⁹ —Nẽ ka mẽ atõ inhmã tanhmã amnhĩ nhĩpêx to ho apa kaxyw akwỳjê re nẽ ma inhmã mẽmoj to anhỹr o ri apa. Tanhmãnh anhõrkwỹ rỳ atõ rỳ atõx re. Rỳ aprõ nẽ akrajê re. Rỳ akatorxà mẽ anhĩpêxà war are. Rỳ akukrêx piitã rer pa hãmri nẽ ma mẽ piitã mẽ kãm ixkapêr o mẽ ahkre ho ri mẽ hkôt apa. Hã kot paj mẽ apumu nẽ mẽ ato mex rax nẽ. Hãmri ka mẽ ma mẽ hkôt apa nẽ mẽ kãm

ixkapêr jarênh o apa nhũm mẽ kot mẽ amar xwỳnh kwỳjaja mẽ ama nê kãm mẽ akĩnh nê. Nê ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyræk o mẽ anhĩpêx nê mẽ ato mex o pa. Hãmri ka mẽ nhỹrmã ty nê ma Tĩrtũm mẽ wa inhõ krĩ hwỳr api nê wa ixkuri amex kumrêx nê atĩr tũm nê apa ho apa.

³⁰ Nom kwa kêr ka mẽ amnhĩ tã ja ma nê amnhĩ to rũnh xwỳnh ã amnhĩ kamnhĩx kêt nê. Jar mẽ kot amnhĩ to rũnh ã amnhĩ to jarkrar xwỳnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh ã amnhĩ pumu. Anê.

20

Jejus kot nhỹrmã hkrajê ho mex ã harênh

Rômãn 9.14-16

¹ Nhũm Jejus arĩ mẽ ixte hkôt ixpa ho ixpa xwỳnhjê mã awjarê nê mẽ inhmã:

—Nê kot paj nhỹrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyræk o mẽ anhĩpêx. Koja pur nhõ dõnja ihpur kãm mẽmo xô ra hkà hpa nhũm omu hãmri nê kaxyw mẽ àpênh xwỳnhjê japêr kaxyw ma gãm tẽ. Nê gáp xa nê mẽ kãm akir nhũm mẽ hã akuprõ.

² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axàpênh o amỹkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kôt mẽ amã amnhĩre.” Anê hãmri nhũm mẽ kuma nê kãm: “Tõe. Nà kot paj mẽ amã apê.” Anê nhũm pur wỳr mẽ kurê nhũm mẽ ma kãm àpênh mã mra.

3—Tã nhũm arĩ kỳx mã myt tẽ nhũm pur nhõ dõn akupỹm gãm tẽ nhũm mẽ hkwỳja arĩ kuhê.

4 Nhũm tee ri mẽ omu nẽ mẽ kãm: “Kwa mon ka mẽ axâpênh kêt nẽ arĩ akuhê? E. Mẽ ma wamtajê hkôt mra nẽ inhmã apê pa hpãnhã mẽ amã amnhĩrer mex nẽ.” Anê.

5 Hãmri nhũm mẽ kuma nẽ ma mẽ hkôt mra. Tã nhũm ra myt kaxkwa nhĩpòk ri ajêt nhũm hpur nhõ dõnja mã hkwỳjê ho anê nẽ. Kê axte mẽ hkôt jajê jano nhũm mẽ ma mẽ hkôt mra. Tã nhũm ra myt ahpanh grire nhũm ma akupỹm kêwe gãm tẽ nẽ mã mẽ ho anê nẽ axte mẽ hkôt jajê rẽ.

6—Tã nhũm ra myt grire nhũm ma akupỹm kêwe gãm tẽ nẽ jajê pumu nhũm kê wem arĩ gáp kuhê. Hãmri nhũm tee ri mẽ omu nẽ mẽ kãm: “Kwa mon ka mẽ axâpênh kêt nẽ atỳx gáp akuhê ho akuhê?” Anê.

7 Hãmri nhũm mẽ kãm: “Nà mēhõ kot mẽ inhmã mẽ ixâpênh ã karõre hã.” Anê. Hãmri nhũm mẽ kãm: “Tõe. Mẽ ma mẽ hkôt ixpur wỳr mra nẽ inhmã mãn apê.” Anê hãmri nhũm mẽ kuma nẽ ma hkwỳjê hkôt mra.

8—Tã nhũm ra kamàt. Hãmri nhũm hpur nhõ dõnja kãm âpênh xwỳnhjê krãhtũm wỳr tẽ nẽ kãm: “E. Ma mẽ hwỳr tẽ nẽ mẽ kãm anê kê mẽ âpênh kaga nẽ man akôt mra ka inhmã mẽ kãm amnhĩre. Nom kêr ka hapu hã mẽ mõi xwỳnhjê kumrêx mã amnhĩre nẽ wam mẽ mõi xwỳnhjê ho hapu nẽ mẽ kãm amnhĩre.” Anê. Hãmri nhũm kãm: “Tõe. Nà kot paj mẽ ho anê.” Anê.

9 Hãmri nẽ ã mẽ kãm amnhĩrer anê. Hapu hã mẽ mrar xwỳnhjê kumrêx mã amnhĩre. Te mẽ kot kwỳhtã âpênh o amỹkry pyræk o nhũm hpãnhã mẽ kãm amnhĩre.

10 Hāmri nhũm wam mẽ mrrar xwỳnhjaja ja hã mẽ omu nẽ hkĩnh nẽ. Hāmri nẽ htỳx hamaxpẽr o: “Nà kot paj xep kàxpore jamỳnh rax o mẽ hakre. Ixàpênh rax o ixte mẽ hakrenh kênã.” Anhỳr tã no nhũm mẽ piitã mẽ kãm amnhĩrer o axpẽn pyràk. Ra pur nhõ dõn kot kãm hã karõ xà hkõt.

11 Hāmri nhũm mẽ hamỳ nẽ tee ri hkre kamã omu nẽ we ra hpur nhõ dõnja kamã gryk nẽ.

12 Hāmri nẽ hwỳr mra nẽ kãm: “Kwa jajaja na mẽ amã àpênh o ore pyxi nẽ. No kêt mẽ pajaja na pa mẽ kwỳhtã ixàpênh rax o kamàt. Arĩgro htỳx kãm ixàpênh o ixãm o ixtã kamàt tã ka pẽr ãm mẽ inhmã amnhĩrer o axpẽn pyràk. Kwa na ka mẽ ixtomnuj nẽ.” Anẽ.

13 Hāmri nhũm mẽ kuma nẽ mẽ kãm: “Tk. Nà na pa mẽ atomnuj kêt nẽ. Na pa kwỳhtã tanhmã mẽ amã amnhĩrer to xà jarẽ ka mẽ inhma nhũm ja mẽ amã mex nẽ ka mẽ ma hwỳr axàpênh mã mra.

14 Kwa mẽ akàxpore jamỳ nẽ ma mra. ãm pa inhmã hprãm xà hkõt na pa ã mẽ amã amnhĩrer anẽ.

15 Ixkàxpore jakamã kot paj nhãm inhmã mẽhõ mã òr prãm xà hkõt kãm kugõ. Tã ka mẽ ã mẽ hã ixkamã agryk anẽ. E mẽ akàxporeja mỳ nẽ ma mra.” Anẽ. Nhũm ã hpur nhõ dõn mẽ kãm kapẽr anẽ. ã mẽ ujarẽnh kot anhỳr. Anẽ.

16 Nhũm pre ã Jejus mẽ inhmã ujarẽnh anẽ nẽ mẽ inhmã:

—Ja pyrà nẽ wam mẽ ate ixkõt amnhĩ xunhwỳr xwỳnhjaja nẽ hapu hã mẽ kot kormã ixkõt amnhĩ xunhwỳr mã xwỳnhjaja kot paj nhỹrmã mẽ apiitã mẽ ato mex kumrẽx o axpẽn pyràk. Anẽ.

*Jejus kot htyk kukamã amnhĩ jarênh
Makre 10.32-34; Rukre 18.31-34*

¹⁷ Tã nhũm Jejus mẽ inhmã anê pa mẽ ixrohã ma Jerujarê hwÿr mō. Mẽ ohtôjê hkôt mō. Hãmri nhũm Jejus mẽ ixpê 12jê mã anê nê mẽ ixkwÿjê hkàx ã mẽ inhmã kapêr kaxyw ahte hapu hã mẽ ixto mō.

¹⁸ Hãmri nê mẽ inhmã amnhĩ kukamã tanhmã amnhĩ jarênh to nê mẽ inhmã:

—E na pu mẽ ra Jerujarê hwÿr mō. Kamã koja mẽ pahkwÿjaja inhĩpêx kati nê. Koja mẽ patre krãhtũmjê mẽ Mojes kapêr o mẽ ahkre xwÿnhjê nhĩhkram ijaxà nhũm mẽ kot ixpĩr kaxyw ixtã amÿnê.

¹⁹ Koja mẽ kãm ixkurê xwÿnhjaja ixpynê nê Rõm nhõ xwÿnhjê nhõ pōristijê hwÿr ixto tẽ nê mẽ kãm tanhmã ixto hêx to. Hãmri nhũm mẽ kuma nê mẽ mar xà hkôt tanhmã inhĩpêx to. Nhũm mẽ hkwÿjaja ixtã hpêr o axkê nê ixtã akunha nhũm mẽ hkwÿjaja ixto kapêr punuj nê tanhmã ijapry hto nê ixtak. Hãmri nê ma ixto tẽ nê pĩ kahpa hã inhô nê ixpĩ. ã koja mẽ inhĩpêx anê. Nom kot paj ixtyk ã ixtã apkati axkrunêpxi nhũm Tĩrtũm akupÿm ixto ixtĩr. Anê.

*Xiakre mẽ Juãw wa katorxà kot wa ho Jejus wÿr
ã harênh*

*Makre 10.35-45; mããnên Rõmãn 12.3, 12.10,
12.16; Epes 4.2; Píripós 2.3-8; Xiakre 4.6; Wam Pêtre
5.3*

²⁰ Tã nhũm Jepetew prõja amnhĩ kôt Jejus wÿr hkra Xiakre mẽ Juãwja wa o tẽ. Kot wa ho Jejus wÿr kaxyw hwÿr wa o tẽ. Mẽ ixpyrà nê wa kot Jejus kôt pa ho pa xwÿnhjê hõ na pre wa nhũm wa katorxàja

Jejus wÿr wa o tẽ. Hãmri nẽ kutã hkõnkrã ho tẽm nẽ nhỹ

²¹ nhũm kãm:

—Pa mo na? Anẽ.

Hãmri nhũm kãm:

—Ma ixkrata na pa ixte wa ho awÿr kaxyw awÿr wa o tẽ. Xê kot kaj nhỹrmã ate mẽ piitã mẽ ho amnhĩptàr kaxyw nhỹ nhũm ixkrata wa akutã anhĩjê nẽ wa kêp anhõ kôwenatõ nẽ akutã anhĩjê nẽ wa ato nhỹ. Ja prãm xàj na pa ã wa ho awÿr anẽ. Anẽ.

²² Hãmri nhũm kuma nẽ Xiakre mẽ Juãw wa omu nẽ wa kãm:

—Nà na war akatorxàja htÿx ã war ato ixwÿr anẽ. Koja mẽ tokyx ixpĩ kot paj amnhĩ xà htÿx kãm ijamak kãm ty. Tã xà koja mẽ ixpyrà nẽ ã war anhĩpêx anẽ ka wa ixpyrà nẽ amnhĩ xà htÿx kamã ajamak rax kãm ty nà? Anẽ.

Hãmri nhũm wa kãm:

—Tÿ. Nà kot pa wa ijaxwÿja anẽ nẽ apyrà nẽ amnhĩ xà htÿx kãm ijamak kãm ty. Anẽ.

²³ Hãmri nhũm wa kãm:

—Nà ãm hãmri na ka wa amnhĩ jarẽ. War ate ixpyrà nẽ ixkõt amnhĩ xà htÿx kãm ajamak kãm atyk mã kênã. Tã nom war akatorxà kot war ato ixwÿrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkô hã nhỹ. No pa kot paj amnhĩ kaxyw mẽhõ jarẽnh kêt nẽ.

Anhÿr o wa kãm kapêr.

²⁴ Hãmri pa mẽ ixte wa uràk nẽ Jejus kõt ixpa ho ixpa xwÿnhjaja wa katorxà kot ã wa ho Jejus wÿr anhÿrja ã kuma nẽ wa kamã inhgryk nẽ. Hãmri nẽ axpẽn mã ixkapêr o:

—Tk. Nà koja Juãw mẽ Xiakre wa nhỹrmã kêp õ kôwenatô nẽ mẽ pahto amnhĩptàr kêt kumrêx. Anẽ.

²⁵ Nhũm Jejus mẽ inhma nẽ amnhĩ wỳr mẽ ixpi-itã mẽ inhmã hpa ho apê nẽ mẽ inhmã:

—E mẽ amnẽ ixwỳr axkamẽ pa mẽ amã awjarẽ mãn. Anẽ.

Hãmri pa mẽ hwỳr axkamẽ nhũm mẽ inhmã:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harênh kaxyw tanhmã mẽ ho mex to ho pa.

²⁶⁻²⁷ Tã no mẽ kajaja. Kêr ka mẽ ho mẽ uràk kêt nẽ. ãm te amarĩ ri mẽ apa pyràk o axpên nhĩpêx o ri apa. Nẽ te mẽ apê mẽ kãm axàpênh xwỳnh pyràk o amnhĩ nhĩpêx o ri mẽ hkôt apa. No kêr ka mẽ ho amnhĩptàr mã ajamaxpêr o ri apa hkêt nẽ.

²⁸ Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwỳr kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wrỳ. Nẽ mẽ ate ixkôt amnhĩ xunhwỳr xwỳnhjê nẽ ixtyk kaxyw na pa pre wrỳ. Anẽ.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

²⁹ Tã pa mẽ Jejus kôt kormã Jerujarẽ hwỳr ra Jeriko htêp o mõ. Hãmri nẽ kurũm ixkaton mõ nhũm mẽ ohtô nẽ mẽ ixkôt mra.

³⁰ Nhũm pry nhĩhkjê hã no hkre xwỳnh wa àhwỳr o hkrĩ xwỳnhja wa amnhĩ wỳr mẽ inhmrar mar o

nhỹ. Mẽ ohtôô nẽ Jejus kôt mẽ mrar xwỳnhjê mrar ma nẽ mẽ kãm:

—Kwa mo na? Mẽmoj wỳr na ka mẽ axohtô nẽ mra? Anẽ.

Hãmri nhũm mẽ wa kãm:

—Nà Jejus pê Najare nhõ xwỳnhhta kôt na pa mẽ mra. Anẽ.

Hãmri nhũm wa mẽ kuma hãmri nẽ kàx pê Jejus mã kapêr nẽ kãm:

—Pa Pahihti? E apê mẽ inhõ Pahihti mex na ka. Te apê amnepê m anhĩgê t pahihti Tawita pyràk. Jakamã kwa wa ixkamã axukapĩ nẽ akupỹm wa ixto mex. Anẽ.

³¹ Hãmri nhũm Jejus kôt mẽ mõi xwỳnhjaja wa kuma nẽ wa kãm:

—Tk. Kwa war akapêr kêt nẽ nhỹ nà. Anẽ.

Tã no nhũm wa ãm mẽ kuma nẽ xatã amnhĩ to kuwỳ. Kàx pê amnhĩ to kuwỳ.

³² Hãmri nhũm Jejus wa kuma nẽ xa nẽ wa omu nẽ wa kãm:

—Pa mo na? Tanhmã kot pa wa ato? Anẽ.

³³ Hãmri nhũm wa kãm:

—Nà akupỹm wa inhmã wa ixrĩt mex prãm. Anẽ.

³⁴ Hãmri nhũm kãm wa hkapĩ nẽ wa no htok nhũm wa akupỹm rĩt mex kurê kumrêx. Hãmri nẽ rĩt mex ã amnhĩ pumu nẽ hkĩnh tỳx nẽ ma Jejus kôt hkwỳjê hkôt mõi.

21

Jejus kot Jerujarẽ hwỳr àr ã harẽnh

Makre 11.1-11; Rukre 19.28-40; Juãw 12.12-19

¹ Tã nhũm Jejus kormã Jerujarẽ hwỳr kormã mõi. Pa mẽ hkôt mõi nẽ ra Petake hwỳr ixàhtêp o mõi. Hixê t pê Oriwêhti kahti ri na pre krĩja xa. Jakamã

pa mẽ wa hwỳr ixàhtêp o mō nhũm Jejus mẽ ixte hkôt ixpa ho ixpa xwỳnhjê wa ho axkrut nê amnhĩ kukamã wa kumẽ.

² Nê wa kãm:

—E wa ma krĩ mũj wỳr mẽ ixkukamã wa tẽ. Nê wa hwỳr axà nê nhỹri jumẽnre mẽ hkra wa kãm ê nê wa ãm xwỳnh wa omu hãmri nê kãm ê xà hpôt nê man akupỹn amnẽ hamẽ wa o tẽ.

³ Kojã mẽhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Nà mẽ panhõ Pahihti na hã karõ pa wa hwỳr tẽ.” Anhỹr o wa kãm ijarẽ. Hãmri nhũm war ama nê war amã õr kurẽ kumrẽx. E wa ma hwỳr tẽ. Anẽ.

⁴ Tĩrtũm kapêr ã kagà htũm ra kot ja kukamã harênh. Na pre ra Tĩrtũm nhỹ hã kapêr xwỳnhjê hõ ja jarẽ nê hã kagà ho:

⁵ Pa Jerujarẽ nhõ xwỳnhjaja. Kwa mẽ tee ri amnhĩ kukamã ajamaxpêr ho amã ma hkêt nê. Ota mẽ anhõ pahi nywta ra jumẽnre hã nhỹ nê mẽ awỳr hpôx o tẽ. Te kot amnhĩ to grire xwỳnh pyræk o amnhĩ nhĩpêx nê tẽ.

⁶ Anhỹr o kot hkukamã harênh jakamã nhũm Jejus amnhĩ kukamã ja wa kumẽ hãmri nhũm wa ma hwỳr htẽm kurẽ kumrẽx.

⁷ Nê krĩta wỳr pøj nhũm Jejus kot wa kãm harênh xà hkôt nhũm wa jumẽnreta pumu. Hãmri nê hamẽ wa kãm ê xà hpôt nê ma Jejus wỳr wa o tẽ. Hãmri nê kaxyw amnhĩ xê hkwỹ hkwrỳ nê kãm ho jumẽnre nywta kô kahty. Nê kãm ho htýx nê o xa nhũm Jejus hã nhỹ nê hã mō.

⁸ Kormã Jerujarẽ hwỳr hixêt ã àpir o mō. Nhũm mẽ kot omunh o kuhê xwỳnhjaja hkĩnh nê ma

hkukamã pry ho mex kaxyw amnhĩ xê hkwýptyr ho mō. Nê pô hkwý jakà nê utyr o mō.

⁹ Nhũm mē hkwýjaja Jejus kukamã mra nhũm mē hkwýjaja hapu hã hkôt mra. Nê piitã kax pê Tĩrtũm mex o mex ã harēnh o hkôt mō nê harēnh o:

Ota Tĩrtũm kot mē pahwýr mēnh xwýnhhta ra pōj.

Ăm hãmri na mē pahwýr wrý. Ja na mex kumrēx. Kêp mē panhõ Pahihti mex na.

Ăm hãmri na pre Tĩrtũm mē pahwýr kumē.

Tĩrtũm mex kumrēx. Ăm mex o mex.

Anhýr o Jejus kôt Jerujarē hwýr harēnh o mō. Kot mē ho amnhĩptàr kurê kumrēx ã hkamnhĩx jakamã hkĩnh nê hkôt ã harēnh anhýr o mō.

¹⁰ Hãmri nhũm krĩ nhõ xwýnhjaja tee ri mē kuma nê axpēn mã:

—Kwa mēhõ na we hpôx o mō nhũm mē ã hkôt harēnh anhýr o mō? Anē.

¹¹ Hãmri nhũm Jejus kôt mē mrrar xwýnhjaja mē kuma nê mē kãm:

—Nà Tĩrtũm nhỹ hã kapēr jarēnh xwýnh pê Jejus na. Kêp Garirej kamã krĩ pê Najare nhõ xwýnhhta na. Anē.

Jejus kot Tĩrtũm nhõrkwý hwýr àr ã harēnh

Makre 11.15-19; Rukre 19.45-48; Juãw 2.13-22

¹²⁻¹³ Tã hãmri nhũm Jejus Jerujarē wýr axà nê jumēnre rũm wrý nê ma Tĩrtũm mã amnhĩ jarēnh xà hã ixkre hwýr tē nê axà. Hãmri nê tee ri mē kot tanhmã ixkre kamã amnhĩ nhĩpêx to hã mē omunh o xa. Nhũm mē axtem nê môx nê ôwēhti nê tuuti ho wēnê ho kuhê. Mē kot haprôr nê Tĩrtũm mã amnhĩ jarēnh kaxyw kãm hpar nê òr kaxyw mē kãm ho wēnê ho kuhê. Nom axtem nê mē kãm hã ohtô rax kãm mē kãm ho wēnê. Hãmri nhũm Jejus

mê hwÿr axà nê tee ri mê omu nhũm ja kêp omnuj tÿx kumrêx. Hãmri nhũm mê hwÿr tê nê mê kot kàxpore ho pinhpanh xwÿnhjê pê mê õ mêsti rênh pa. Nê mê kot tuuti ho wênê xwÿnhjê pê hkrĩ xà hkujate nê rênh pa. Hãmri nê mê kãm:

—Tk. Kwa Tĩrtũm kapêr ã kagà htũm kot ixkreja jarênh kot:

Inhõrkwÿja ãm mê ate inhmã amnhĩ jarênh xà hã ixkre pix kaxyw na.

Anhÿr o kot harênh tã ka mê axtem nê kamã ã amnhĩ nhĩpêx anê. E kwa mê ajapôx tokyx anê. Anê.

Hãmri nê mê kator pa nhũm mê ma hapêx.

¹⁴ Hãmri nhũm mê no hkre xwÿnhjaja nê mê hyk o mê pa xwÿnhjaja mra nê agjê nê Jejus kutã kuhê nhũm mê omu nê akupÿm mê ho mex.

¹⁵⁻¹⁶ Hãmri nhũm mēhprĩ hkwÿjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tĩrtũm na pre mê ixwÿr amê.

Kot kaj te anhĩgêt Tawi pyrà nê mê ixto amnhĩptàr o apa.

Anhÿr o kãm grer o kuhê. Hãmri nhũm patre krãhtũm mê Tĩrtũm kapêr tũm o mê ahkre ho mê pa xwÿnhjaja tee ri ã mê grer anhÿr ã mê kuma. Nê tee ri Jejus kot mê no hkre xwÿnhjê mê mê hyk o mê pa xwÿnhjê ho mex ã omunh o kuhê nê gryk nê Jejus wÿr tê nê kãm:

—Kwa na mēhprĩjaja mê grer kãm ã ajarênh anê ka mê mar kêt nê? Mê grerja mexti hã. Anê.

Hãmri nhũm mê kãm:

—Tÿ ixte mê mar kênã. Tĩrtũm kãm hprãm xà hkôt na mê ã inhmã inhmex o inhmex ã ixtã grer

anê. Tîrtûm kapêr ã kagà htûm kot ã mẽ hkukamã harênh kot anhÿr. Mẽ harênh kot:

Koja mẽhprîjaja Pahiti mã mex o mex ã grer o kuhê.

Anhÿr o kot mẽ hkukamã harênh kênã. Tã mãn ka mẽ kormã kamã harênh kêt jakamã na ka mẽ ja jarênh mar kêt nê. Kwâr mẽ mãmri ã inhmex ã grer anê.

¹⁷ Anhÿr o mẽ kãm kapêr hãmri nê mẽ inhmã anê pa mẽ ixkreta rûm ijapôj nê ma akupÿm Petãn wÿr mra nê kamã amnhîm hikra.

Jejus kot mẽmo hpàr mã kapêr ã harênh

Makre 11.12-14; mããnên Xiakre 1.6

¹⁸ Tã nhûm kwÿhtã nhûm Jejus kànhmã nhÿ nê mẽ inhmã anê pa mẽ ixrohã ma akupÿm Jerujarê hwÿr mra. Hãmri nê kormã mō nhûm Jejus pry kahti ri ra kãm prãm nê.

¹⁹ Hãmri nê mẽmo pî pê fikêhti jarênhja pumu nê kot ô hkwy rênh nê hkrêr kaxyw hwÿr mât. Hãmri nê tee ri ô japêr nhûm ô hkêt nê ãm hô hpix harir. Hãmri nhûm tee ri omu nê kãm:

—E kot kaj axte axô hkêt kumrêx.

Anhÿrja o nhûm grà par kurê kumrêx.

²⁰ Hãmri pa mẽ ixte hkôt ixpa ho ixpa xwÿnhjaja omu nê Jejus mã:

—Kokÿÿ. Kwa tanhmã na we amnhî nhîpêx to nê grà kurê kumrêx? Anê.

²¹ Nhûm mẽ inhmã:

—Nà kot kaj mẽ ixpyrà nê fikêhti kot tanhmã amnhî nhîpêx to kaxyw Tîrtûm mã ajamaxpêr tÿx nê nhûm amã hprãm xà hkôt amã tanhmã hipêx to. Nom kêr ka mẽ ajamaxpêr kati ho tee ri hkukamã ajamaxpêr kêt nê. ãm kaxyw Tîrtûm kôt

ajamaxpêr tỳx nê nhũm mẽ amã tanhmã mẽmoj nhĩpêx to. ãm hãmri na pa mẽ amã ja jarê. No ãm ja pix kêt. Kot kaj mẽ mãânên hixêt mũj mã akapêr nê kãm: “E anhỹr xàta rũm akato nê ma tẽ nê gô rax kãm mrõ.” Anê nhũm amar xà hkôt ã amnhĩ nhĩpêx anê.

²²—Nê kot kaj mẽ mẽmoj tã Tĩrtũm wỳ nê kaxyw kãm ajamaxpêr tỳx kãm hã awỳ nhũm amã mẽmoj prãm xwỳnhta gõ. Anê.

*Mêhõ nhỹ hã Jejus kot mẽ ahkre hã harênh
Makre 11.27-33; Rukre 20.1-8*

²³ Nhũm arĩgro hõ hã nhũm Jejus kêwe axte Tĩrtũm mã amnhĩ jarênh xà hã ixkreja wỳr axà nê kamã mẽ ahkre ho nhỹ. Mẽ kãm tanhmã mẽ kot amnhĩ nhĩpêx to nê nhỹrmã Tĩrtũm mẽ wa kuri htĩr tũm nê pa kaxyw tanhmã mẽ kãm kapêr to ho nhỹ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwỳr mra nê hêx rom mẽmoj tã hkukja nê kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỹr o apa? Na ka hte akupỹm mẽ ho mex o apa nê tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

²⁴ Hãmri nhũm mẽ kãm:

—Nà kot pa ixkumrêx mẽmoj tã mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarê.

²⁵⁻²⁶ Finat Juãw Paxis ã kot paj mẽ akukja. Mêhõ nhỹ hã na pre hte mẽ hkrã kumrãr o pa? Xà amnhĩ krã hkôt nà? Xà Tĩrtũm nhỹ hã? E mẽ atõ inhmã ja jarê. Anê.

Hāmri nhūm mẽ kuma nẽ tee ri kot tanhmã kutã kãm harẽnh to hkukamã hamaxpêr pê axpên pumunh o kuhê nẽ axpên mã:

—Kwa tanhmã kot puj wem kãm ja jarẽnh to? Or mẽ kot mar o kuhê xwýnhjaja na htem kêp Tĩrtũm nhỹ hã kapêr jarẽnh xwýnh ã harẽ. Tã kot puj mẽ kãm kot amnhĩ krã hkôt kot mẽ hkrã kumrãr ã harẽ nhūm mẽ tee ri mẽ pama nẽ mẽ pakamã gryk tỳx nẽ. Nẽ mẽ paxêx rom ã mẽ pahte kãm pakapêr anhỹr ã mẽ pahpumu nẽ kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harẽ hāmri nhūm mẽ pamã: “Kwa ã kot anhỹr kênã na ka prem kapêr ma nẽ hkôt ajamaxpêr kêt nẽ?” Anẽ. Jakamã kot puj mẽ ja pymaj tanhmã kãm harẽnh to hkêt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã Jejus mã nẽ nhūm kot ta pãnhã tanhmã mẽ kãm nẽ pymaj nhūm mẽ tee ri kãm tanhmã nẽ hprãm kaprý o kuhê.

²⁷ Hāmri nẽ kãm:

—Konẽn. Mẽ ixte mẽhõ nhỹ hã kapêr o pa hã omunhre hã. Anẽ.

Hāmri nhūm mẽ kuma nẽ mẽ kãm:

—Tk. Tôe kot pa xep ijaxwýja mẽ amã tanhmã amnhĩ jarẽnh to hkêt nẽ. Ijaxwýja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽhõ my mẽ hkra wa pijakrut ã wa harẽnh

Matêwre 7.21-23; Rukre 7.29-30

²⁸ Hāmri nhūm Jejus axte Ijaew krãhtũmjê mẽ mẽ õ patre krãhtũmjê mã kapêr nẽ mẽmoj tã kuxi nẽ tanhmã mẽ kãm ujarẽnh to nẽ mẽ kãm:

—E pa mẽ amã awjarẽ ka mẽ inhma. Koja mẽhõ hkra my hamẽxkrut. Hãmri nẽ hkra kot waja mã tanhmã kapẽr to nẽ kãm: “E kêr ka jarãhã ma tẽ nẽ inhmã pur kãm apê.” Anẽ.

²⁹ Hãmri nhũm kuma nẽ pur mã htẽm kaga nẽ hitõt nẽ. Tãã no ãm hã ahtũmre nẽ tanhmã hamaxpẽr to hãmri nẽ ma hwÿr tẽ nẽ kamã àpênh o xa.

³⁰ Hãmri nhũm wa hipêêxàja hpãnhã hkra kot hapu hwÿr tẽ nẽ mã kãm kapẽr anẽ nẽ kãm: “E kêr ka ajaxwÿja atõ hkõt tẽ nẽ wa inhmã apê.” Anẽ nhũm kuma nẽ kãm: “Tõe. Nà kot paj ma tẽ.” Anhÿr tã no ãm hõta kĩnhã htẽm kêt nẽ.

³¹ —Jakamã e. Nhÿ hkra na pre hipêêxà kapẽr ma nẽ hkõt amnhĩ nhĩpêx nẽ kapẽr nhĩrõp ãm kêt nẽ? Xà kot waja nà? Xà kot haputa? E mẽ atõ tanhmã inhmã wa harênh to. Anẽ.

Hãmri nhũm mẽ kuma nẽ kãm:

—Nà kot wata. Kot wata na hitõt tã tanhmã hamaxpẽr to nẽ ma tẽ nẽ kãm apê. Anẽ.

Hãmri nhũm mẽ kãm:

—Tÿ ãm hãmri na ka harẽ. No mẽ kajaja te mẽ ate hkra kot haputa kot amnhĩ nhĩpêx pyræk. Mẽ ate Tĩrtũm kapẽr kõt amnhĩ nhĩpêx o apa hã amnhĩ jarênh tã hkwÿm ri amnhĩ nhĩpêx o apa. Te mẽ ate kot hapu kot hipêêxà mã àpênh ã amnhĩ jarênh tã kãm àpênh kêeta pyræk. No kêt mẽ kot amnhĩ tomnuj o mẽ pa xwÿnh kwÿjaja na mẽ arom Tĩrtũm kapẽr ma nẽ hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwÿr pa kaxyw ra tãm nẽ. ãm hãmri na pa mẽ amã ixkapẽr.

³² Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nẽ ãm ama

nê aa kapêr kôt amnhĩ nhĩpêx kêt nê. Nom mẽ kot amnhĩ tomnuj o mẽ pa xwỳnh kwỳjaja mẽ arom kuma nê Tĩrtũm kôt amnhĩ nhĩpêx. Ka mẽ ja hã mẽ omu nê ãm mẽ omu nê mẽ uràk nê ã amnhĩ nhĩpêx anhỹr kêt nê. Anê.

Mẽ àpênh punu xwỳnhjê jarênh

Makre 12.1-12; Rukre 20.9-18

³³ Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapêr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No ãm amnhĩ tã kuxi nê mẽ kãm awjarê nê mẽ kãm:

—Koja mẽhõ mẽ kot kãm pur kãm àpênh kaxyw hkwyjê mã karõ nhũm mẽ ma hwỳr mra nê kamã mẽmo hy hkre nê hkre pa. Hãmri nhũm hpur nhõ dõn nhỹhỹm nojarêt nê kãm mẽ àpênh xwỳnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj kà hpa ka mẽ mãmri kamã axujamỳnh pa nê ho axkjê. Nê ixkutêp inhmã inhõ jaxwỳ nê mãmri anhõ tanhmã ho hprãm xà hkôt tanhmã ho.”

—Anhỹr o mẽ kãm kapêr hãmri nê ma nhỹhỹm mỗ.

³⁴ Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwỳnhjê ho axkrunêpxi nê akupỹm mẽ hwỳr mẽ kurê. Mẽ kot mẽ kãm hkwy nhõr nhũm mẽ ma kot kãm o mõi kaxyw nhũm ma mẽ hwỳr mẽ kurê.

³⁵ Nhũm mẽ ma hwỳr mỗ. Mõi nê ra hwỳr pøj nhũm mẽ amnhĩ wỳr mẽ omu nê axtem nê mẽ homnuj nê. Nê mẽ unê nê ja tak nê ja pĩ nê hõja nhũm mẽ kên o htak hãmri nê amnhĩ nê wa hano nhũm wa ma akupỹm ỹ kamã mỗ.

³⁶ Hāmri nhũm mẽ õ patrāwja tee ri wa omu nẽ hamaxpēr o: “Kwa nà na mẽ ixpê inhmã mẽ àpênh xwỳnhjê homnuj tỳx nẽ. Nà kot paj axte mẽ hwỳr mẽ hkwỳjê rẽ. Nom hpānhã mẽ ho ohtô nẽ mẽ kurẽ. Kê mẽ ohtô nẽ mẽ hwỳr mỗ nẽ tã inhmã inhõ hkwỳ jamỳ nẽ man ixwỳr o mỗ.”

—Anhỳr o hamaxpēr hāmri nẽ mẽ hwỳr jajê rẽ nhũm mẽ ma akupỳm mẽ hwỳr mỗ. Nhũm mẽ amnhĩ wỳr mẽ ohtô hã nẽ mã mẽ ho anẽ nẽ mẽ hipêx kati nẽ nhũm mẽ ỹ kamã ma õ patrāwja wỳr akupỳm mỗ.

³⁷ Hāmri nhũm tee ri mẽ omu nẽ hamaxpēr o: “Hêxta waa nẽ. Tanhmã kot paj amnhĩ nhĩpêx to? Nà kot paj pēr mẽ hwỳr ixkraja măn mẽ. Inhmã hapê htỳx tã kot paj mẽ hwỳr kumẽ kê ma mẽ hwỳr mỗ. Hāmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ tã inhmã kãm inhõja kwỳ gõ.” Anẽ.

—Hāmri nẽ mẽ hwỳr kumẽ nhũm ma mỗ.

³⁸ Tã hāmri ra mẽ hwỳr hpôx o mỗ nhũm mẽ amỳm amnhĩ wỳr omu nẽ kêp hkra hã omu nẽ axtem nẽ hã axpên mã amỳnê nẽ axpên mã: “E oněj hpur nhõ dõn krata tẽ. Kojã nhỹrmã õ papaj mỳr pẽ amnhĩm hpur ã pykata pytà nẽ ho õ. Jakamã kwa pu mẽ hpĩr kurẽ kumrêx nẽ kêp hpur ho arĩk nẽ ho panhõ. Ê tokỳj pu mẽ kupĩ ri.” Anẽ.

³⁹ —Hāmri nhũm ra tẽ nẽ mẽ hwỳr pøj nhũm mẽ unê nẽ hpur nê ho kato nẽ mã ho anẽ nẽ kupĩ. ã mẽ ujarênh kot anhỳr. Anẽ.

⁴⁰ Nhũm pre ã Jesus mẽ kãm ujarênh anẽ. Hāmri nẽ hã mẽ hkukja nẽ mẽ kãm:

—E koja pur nhõ dõnja hkra jarënh ma hãmri nê tãm mẽ hwÿr mõi hãmri nê tanhmã mẽ hipêx to wehe? Anê.

⁴¹ Hãmri nhũm mẽ kãm:

—Nà koja ma akupÿm mẽ hwÿr mõi hãmri nê mẽ homnuj tÿx nê mẽ himex pa. Hãmri nê hpãnhã nhãm hpur ã mẽmojjê rê nhũm mẽ tã katàt kôt kãm àpênh o pa. Anê.

⁴² Hãmri nhũm Jejus mẽ kãm:

—Tÿ ãm hãmri na ka ã mẽ harënh anê. Kot mẽ ho anhÿr mã tãm kênã. Mãn ka prem ra Tĩrtũm kapêr ã kagã htũm kot tanhmã ja jarënh toja ma? Harënh kot:

Mẽ kot kên o amnhĩm òrkwÿ nhĩpêx kaxyw nê kên maati pumu nê htÿx omnuj ã hkamnhĩx nê hkagata. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Tĩrtũm kot kên maati mex ã harënh xwÿnhnta mẽ pamã mex o mex.

Ã Tĩrtũm kapêr ã kagã htũm kot ja jarënh kot anhÿr.

⁴³ Ja pyrã nê na pre ra Tĩrtũm amnhĩ kaxyw mẽ apê Ijaew xunhwÿ. Mẽ apê hkra nê hkôt mẽ ate amnhĩ nhĩpêx kaxyw amnhĩ kaxyw mẽ axunhwÿ. Tã ka mẽ axtem nê hkaga. Te mẽ kot kên maati pumunh nê mex kêt ã hkamnhĩx nê hkagata pyrãk. Jakamã koja mẽ apãnhã Ijaew kêt xwÿnh kwÿjê xunhwÿ nhũm mẽ arom hkôt amnhĩ nhĩpêx mex o pa. Jao ra mẽ kêp hkra nê. Anê.

⁴⁴ Nhũm pre ã Jejus mẽ kãm te kêp kên maati pyrãk o mẽ kãm amnhĩ jarënh anê. Hãmri nê axte amnhĩ tã kuxi nê mẽ kãm axte kên jarënh pyrãk ã amnhĩ jarê nê mẽ kãm:

—Nà kot kaj mẽ atõ ixkaga hãmri nẽ te mẽhõ htỳx htẽm nẽ kẽn pumunh kêt nẽ hã htêk nẽ tẽm pyràk o amnhĩ nhĩpêx. Jao ixkutã amnhĩ xãm. Rỳ ka tanhmã ajamaxpêr to nẽ ixkaga nhũm te kẽn maati kot anhĩpy tẽm nẽ axôm par pyràk o anhĩpêx ka mẽ amex kêt kumrêx. Anẽ.

⁴⁵ Nhũm pre ã mẽ kãm ujarênh kãm mẽ harênh anẽ. Hãmri nhũm patre krãhtũmjê mẽ Parijew nhõ xwỳnhjaja tee ri amnhĩ tã kuma

⁴⁶ nhũm ja mẽ kêp omnuy tỳx jakamã nhũm mẽ kãm unênh nẽ haxàr prãm nẽ. No mẽ ãm amnhĩ tã kãm mẽ kot mar o kuhê xwỳnhjê puma nẽ. Mẽ kurom Jejus kêp Tĩrtũm nhỹ hã kapêr xwỳnh ã hkamnhĩx jakamã nhũm mẽ kãm mẽ uma nẽ. Hãmri nẽ kormã tanhmã ho hkêt nẽ.

22

Pahi kot hkra hprõ kaxyw hkwyjê hwỳr ã harênh Rukre 14.15-24; mãânên Wam Korit 6.9-11; Epes 5.5-6; Apokarip 19.7-8

¹⁻² Tã nhũm Jejus axte mẽ kãm awjarê. Ijaew kot Tĩrtũm kaga hã mẽ kãm hã kuxi nẽ awjarê nẽ mẽ kãm:

—E pa mẽ amã ahpỳnhã mẽ kot Tĩrtũm kapêr mar nẽ tanhmã amnhĩ nhĩpêx to xwỳnhjê jarê ka mẽ inhma. Te mẽ kot pahihti kot hkra hprõ kaxyw nhũm kot amnhĩ wỳr hkwyjê hwỳr nhũm mẽ kot harênh mar nẽ ahpỳnhã tanhmã amnhĩ nhĩpêx to xwỳnhjaja kot amnhĩ nhĩpêx pyràk. Koja pahihtija hkra hã hkĩnh nẽ hã apkur mex kaxyw amnhĩ wỳr hkwyjê hã karõ.

³ Hãmri nhũm kãm mẽ àpênh xwỳnhjaja ra kot amnhĩ wỳr mẽ hã karõ xwỳnhjê hwỳr mra nẽ mẽ

kãm nojarêt nhũm mẽ kuma nẽ ãm mẽ kuma nẽ axtem nẽ mẽ kêp hitõt nẽ. Hãmri nhũm mẽ tee ri mẽ kuma nẽ akupỹm tẽ nẽ pahihtĩ mã mẽ harẽ.

⁴—Hãmri nhũm tee ri amnhĩ tã mẽ harẽnh ma nẽ hpãnhã mẽ hwỳr axtem kãm àpênh xwỳnh kwỳjê rẽ nhũm mẽ ma mẽ hwỳr mra nẽ mẽ kãm: “Pa. E kwa mẽ tokyx. Na ra pahihtĩ mẽ akutêp mẽõ nhĩpêx pa. Na mẽ môx kwỳ hpa nẽ ho àr mex nẽ. Nẽ mẽ akutêp mẽmoj nhĩpêx par jakamã e kwa mẽ tokyx nã.” Anẽ.

⁵ã mẽ kãm kapêr anhỹr tã nhũm mẽ kuma nẽ ãm mẽ kuma nẽ ma ahpỹnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tẽ nhũm ja ma nhỹhỹm mẽmo to wẽnê ho tẽ.

⁶Nhũm mẽ hkwỳjaja mẽ kãm ujarẽnh xwỳnhjê pynê nẽ mẽ htak o mẽ kupa.

⁷—Hãmri nhũm pahihtija mẽ harẽnh ma nẽ àhkurê nẽ. Hãmri nẽ mẽ hwỳr pôristi hkwỳ rẽ nhũm mẽ ma mẽ hwỳr mra nẽ mẽ unê nẽ mẽ kupa nẽ mẽ õ krĩ hã hpôk pa.

⁸Hãmri nhũm pahihtĩ kãm mẽ àpênh xwỳnh kwỳjê mã kãm: “Kwa ra ixte mẽ kutêp mẽõ mex kwỳ xunhwỳr tã nhũm mẽ ixwỳr mrar kêt nẽ. Ixtỳx ho mẽ mex ã mẽ hkamnhĩx nẽ amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt.

⁹E kwa mẽ ma krĩ hkôt axtem mẽ hkwỳjê japêr o mra. Nẽ nhỹri mẽhõ pumu nẽ kãm awjarê kê man ixwỳr tẽ nẽ ixkra hã hkĩnh nẽ mẽ ixkutã apku. Mẽ ã mẽ kãm axujarẽnh o amrar anẽ.” Anẽ.

¹⁰—Hãmri nhũm mẽ kuma nẽ ma mẽ hapêr o mra nẽ mẽ piitã mẽ kãm anhỹr o mra. Nhũm mẽ kuma nẽ wam tajê rom ma mẽ hkôt mrar kurê

kumrêx. Mě kot amnhĩ to mex xwỳnhjaja nẽ mẽ kot amnhĩ tomnuj xwỳnhjaja hãmri piitã ma mẽ hkôt mra. Hãmri nẽ ixkreja wỳr mra nẽ hwỳr gjêx kaxyw nhũm mẽ kãm mẽ ê mex gō nhũm mẽ hagjê hãmri nẽ kormã mẽ apkur xà hã ixkre hwỳr agjê nẽ ho nỳt pa.

¹¹ Hãmri nhũm pahihtija mẽ hwỳr axà nẽ mẽ piitã mẽ omu. Nhũm ja pixi nẽ axtem nẽ hkwỳjê hkĩnhã mẽ kot kãm ê mex nhōrja jaxàr kêt rãhã axà nẽ apkur o nhỹ.

¹² Hãmri nhũm tee ri ja hã omu nẽ hwỳr tẽ nẽ kãm: “Pa. Tk. Kwa na htem ixkrem gjêx kaxyw nẽ mẽ kot mẽ kãm mẽ ê mex nhōr jagjê nẽ rĩ kormã hwỳr agjê nẽ apku. Tã mon ka akwỳjê hkĩnhã haxàr kaga? Kwa na htem ã amnhĩ nhĩpêx anhỹr kêt nẽ.” Anhỹr o kãm kapêr nom nhũm kuma nẽ ãm kuma nẽ tanhmã kutã kãm nẽ hkêt nẽ. ãm htỳx apkur o nhỹ.

¹³ Jakamã nhũm tee ri omu hãmri nẽ hã mẽ kot kãm àpênh xwỳnhjê mã amỳnê nẽ mẽ kãm: “E mẽ hwỳr tẽ nẽ unê nẽ hpa nẽ hte hpre nẽ ma o tẽ nẽ kamàt kô kamã amẽ. Kê tee ri mur nẽ amnhĩ xà htỳx kamã hamak o amnhĩ nham o xpênh kamnhar tỳx kaprỳ ho nõ nẽ rĩ amnhĩ pumu.” Anẽ. Hãmri nhũm mẽ kuma nẽ kãm ho anẽ. ã mẽ ujarênh kot anhỹr. Anẽ.

¹⁴ Nhũm pre Jejus ã mẽ kãm ujarênh anẽ hãmri nẽ mẽ kãm:

—Nà Tĩrtũm kot pahihtita pyrà nẽ amnhĩ wỳr mẽ ho ohtô nẽ mẽ hwỳr tã na hte mẽ piitã hkôt amnhĩ xunhwỳr kêt nẽ. Jakamã na hte ãm mẽ ho grêre nẽ amnhĩ wỳr mẽ ho api. Anẽ.

Parijew nhõ xwỳnh kot Jejus kamã hamak ã mẽ harẽnh

Makre 12.13-17; Rukre 20.20-26; mããnẽn Rõmãn 12.1, 13.7

¹⁵⁻¹⁶ Tã nhũm Parijew nhõ xwỳnhjaja ã Jejus kot mẽ kãm ujarẽnh anhỹrja ma hãmri nẽ kurũm kato nẽ tanhmã hkukamã axpẽn mã hã ãmnẽnh to. Hãmri nẽ hwỳr mẽ hkwỳjê mẽ Eroxo kôt mẽ pa xwỳnh kwỳjê rẽ. Hêx rom mẽ kot mẽmoj tã hkukjêr kaxyw hwỳr mẽ kurẽ nhũm mẽ ma hwỳr mra nẽ omu nẽ kãm:

—Kwa Jejus. Nà ãm hãmri na ka hte Tĩrtũm kapêr o mẽ ahkre mex o ri apa nẽ mẽ kamã akahak o apa hkêt nẽ. Mẽ kot tanhmã ato kapêr punuj to htã ka aprĩ hã mẽ ahkre mex o ri apa.

¹⁷ E kwa mẽ inhmã mẽmoj jarẽ. Rõm nhõ pahihtu kot mẽ pahpê Ijaew mẽ pahte kãm kãxpore hkwỳ nhõr ã mẽ pamã karõta. Kwa xà ja amã mex nà? Xà kot pu mẽ kãm hkwỳ gõ? Nà xà kot pu mẽ kãm õr kêt nẽ? E kwa mẽ inhmã tanhmã ja jarẽnh to. Anẽ.

¹⁸ Nhũm prem ã hêx rom ãhkukjêr anhỹr tã no nhũm ra mẽ hamaxpêr ã mẽ omu nẽ mẽ kãm:

—Tk. Kwa mon ka mẽ ã axêx rom ja hã ixkukjêr anẽ?

¹⁹⁻²⁰ E mẽ atõ inhmã kãxpore htỳxre hõ gõ pa omu. Anẽ.

Hãmri nhũm mẽ kãm ja gõ nhũm kupy nẽ kãnhmã mẽ kãm kupy nẽ mẽ kãm:

—E mẽhõ nhĩxi nẽ mẽhõ karõ na ja hã? Anẽ.

²¹ Hãmri nhũm mẽ kãm:

—Pahi Sesti karõ nẽ hixi na hã. Anẽ.

Hãmri nhũm mẽ kuma nẽ mẽ kãm:

—Tỳ. Tô kêr ka mẽ mãmri kãm hkwy nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tirtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anẽ.

²² Hãmri nhũm mẽ amnhĩ jaêr pê ã kot kàxpore jarênh anhỹrja ma nẽ axte kãm tanhmã nẽ hkêt nẽ. Hãmri nẽ akryk omu hãmri nẽ ma akupỹm mra.

Akupỹm mẽ htĩr ã mẽ harênh

Makre 12.18-27; Rukre 20.27-40; Juãw 5.21, 6.39-40; mããnẽn Wam Korõt 6.14, 15.12-28; Wam Tesarõn 4.13-18

²³ Tã nhũm Satusew nhõ xwỳnh kwỳjaja mẽ kot akupỹm mẽ htĩr kêt ã mẽ hkamnhĩx kêt xwỳnhjaja na pre mẽ. Na pre htem mẽ htyk nẽ mẽ hapêx kumrêx ã mẽ hkamnhĩx jakamã axpẽn mã tanhmã Jejus jarênh to nẽ axpẽn mã:

—E kwa pu mẽ hwỳr mra nẽ mẽmoj xihtỳx ã hkukja. Kê mẽ pama nẽ tee ri tanhmã mẽ pamã kapêr to hkukamã hamaxpêr kaprỳ. Kê mẽ piitã ja hã omu nẽ àhpumunh kêt ã omunh kurê kumrêx. E tokyx pu mẽ hwỳr.

Anhỹr jakamã Parijew nhõ xwỳnhjê pyrà nẽ hêx rom ma hwỳr mra nẽ hkukja nẽ kãm:

²⁴ —Pa Jejus? Kwa mẽ inhmã mẽmoj jarê. Na pre finat Mojesja Tirtũm nhỹ hã ã mẽ panhĩgêjtê mã karõ anẽ. Mẽ hkra hkêt rãhã mẽ pa nẽ mẽ htyk xwỳnhjaja nhũm mẽ harênh o:

Koja mẽhõ hprõ nẽ kamã hkra hkêt rãhã pan ty. Hã koja hkôt htõja hpãnhã hprõ ho hprõ nẽ kamã hkra. Hãmri nhũm kato nẽ te kêp htõ htyk xwỳnhhta hkra pyræk. Anẽ.

Ã na pre Mojesja Tĩrtũm nhỹ hã mẽ kãm karõ anẽ.
 25 Jakamã kwa ga mẽ ixujarẽnh ma. Koja mẽ kot
 axpẽn to htõ xwỹnhjaja kęp 7. Nhũm kot waja hãmri
 hprõ nẽ wa pa nhũm kamã hkra hkêt rãhã ty.
 Nhũm hkõt htõja hpãnhã ho hprõ

26 nẽ wa axpẽn to pa. Nhũm mããnẽn kamã hkra
 hkêt rãhã ty. Nhũm htõ hõta haxwỹja hpãnhã tãm
 o hprõ nẽ we wa axpẽn to pa grire nhũm haxwỹja
 kamã hkra hkêt rãhã ty. Hãmri nhũm htõ hkwỹjaja
 ni pyxi nẽ axpẽn pãnhã ho hprõ hpa no mẽhõ kamã
 hkra hkêt rãhã htyk pa.

27 Hãmri nhũm mẽ hprõta mẽ hkõt amnhĩ to hitep
 nẽ ty.

28 Tã Tĩrtũm kot akupỹm nhỹrmã mẽ ho htĩr ronhỹx
 nhỹ nhỹx kęp nija mjên kumrẽx? Ra piitã kot ho
 hprõ kẽnã. E mẽ inhmã ja jarẽ. Anẽ.

29-30 Hãmri nhũm Jejus mẽ kuma nẽ mẽ kãm:

—Nà kaxkwa kamã mẽ kot amnhĩ nhĩpêxja ax-
 tem na. Mẽ htĩr ri mẽ kot Tĩrtũm kõt amnhĩ xun-
 hwỳr xwỹnhjaja na htem ty hãmri nẽ Tĩrtũm nhõ
 krĩ kamã axte kãm hprõ hprãm kêt nẽ pa. Jakamã
 hprõ hkêt nẽ pa. Rỳ ni japêr nẽ mjên kêt nẽ pa.
 Nom ri kãm mjên rỳ hprõ hprãm kêt nẽ pa. Hãmri
 nẽ Tĩrtũm kapêr o mẽ wrỳk xwỹnhjê pyrà nẽ axte
 htyk kêt nẽ. ãm htĩr tũm rãhã nẽ pa ho pa. Pêr mẽ
 ate Tĩrtũm kapêr ã kagà htũm mar mex kêt jakamã
 na ka mẽ ã ja hã ixkukjêr anẽ. Tĩrtũm àhpumunh
 tỳx o àhpumunh tỳx jakamã kumã mẽ ate mẽmoj tã
 ixkukjêr xwỹnhta na tanhmã kęp kute hkêt. Ra ja
 kukamã àhpumunh tỳx kẽnã.

31-32 —Nom mẽ ate akupỹm mẽ htĩr kêt ã mẽ
 hkamnhĩxja kot paj ixprĩ hã mẽ amã harẽ. Am-

nepê m na pre Tîrtûm pî hpôkja kamã tanhmã Mojes mã kapêr to. Mãn ra mẽ ate mar. Na pre kãm: Ixpê Apraãw nhõ Tîrtûm na pa. Nê mãânên ixpê Apraãw kra Ijak mẽ htãmnhwý Jako wa õ Tîrtûm na pa.

Anhÿr o Mojes mã amnhĩ jarẽ nhũm kuma nê hã kagà. Kêp apu arĩ mẽ htyk rãhã nhÿx pre ã mẽ harênh anhÿr kêt nê. Nhÿx pre mẽ harênh o: “Amnepê m Apraãw nê hkra nê htãmnhwý mẽ htîr ri ixpê mẽ õ Tîrtûm na pa pre.” Anhÿr o nhÿx pre mẽ harẽ. Nom na pre ã amnhĩ jarênh anhÿr kêt nê. Mẽ pamã te Apraãwja mẽ htyk nê mẽ hapêx pyræk. Nom nhũm prem ra Tîrtûm ri ra akupÿm htîr nê mex nê pa ho pa. Tã ka htem Tîrtûm kapêr kwÿm ri akupÿm mẽ htîr kêt ã mẽ harênh o apa.

Anhÿr o Satusew nhõ xwÿnhjê mã kapêr.

³³ Hãmri nhũm mẽ kot mar o kuhê xwÿnhjaja amnhĩ jaêr pê kot mẽ ahkreja ma.

Tîrtûm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

³⁴ Tã nhũm Parijew nhõ xwÿnhjaja Satusew nhõ xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr akuprõ nê Jejus wÿr mra. Kot mẽ uræk nê hêx rom àhkukjêr nê hamaxpêr o hakrenh kaxyw hwÿr mra.

³⁵ Hõja kêp Tîrtûm kapêr tûm o mẽ ahkre o mẽ pa xwÿnh jakamã hêx rom kamã hamak kaxyw kãm kapêr nê kãm:

³⁶ –Kwa Jejus. Ot pa mẽ awÿr mra. Kwa mẽ inhmã mẽmoj jarẽ. Na pre Tîrtûm ahpÿnhã mẽmoj

to 10 nê hã mẽ pamã karõ. Mẽ pahte hkôt amnhĩ nhĩpêx kaxyw hã mẽ pamã karõ. Tã nhỹ kapêr na mex o kot hkwỳ jakrenh wehe? Anê.

³⁷ Hãmri nhũm kuma nê mẽ kãm:

—Nà kot mẽ pamã hã karõ kot:

Kêr ka mẽ anhĩ piitã ho amã Tĩrtũm kĩnh tỳx o apa.
Mẽ amã hkĩnh tỳx o mẽmoj piitã hakrenh par o apa.

³⁸ E Tĩrtũm kot mẽ pamã hã karõ ja na mex o piitã hakrenh par.

³⁹ Nê hkôt ja:

Kêr ka mẽ amã akwỳjê hã ma ho te ka amã amnhĩ tã ma pyræk. Jao ra tãm mẽ hipêx.

⁴⁰ ã Tĩrtũm kapêr ã kagà htũm kot mẽ pamã hã karõ kot anhỹr. ã mẽ pahte amnhĩ nhĩpêx anhỹr o papaja na Tĩrtũm kãm hprãm tỳx kumrêx. Kot kaj mẽ ja wa hkôt amnhĩ nhĩpêx rãhã ho ri apa nê mãănêñ ra Tĩrtũm kot mẽ pamã mẽmoj tã karõ xwỳnh piitã hkôt amnhĩ nhĩpêx. Ja na pre Mojes mẽ Tĩrtũm nhỹ hã kapêr xwỳnhjaja amnepêm Tĩrtũm nhỹ hã mẽ panhĩgêjtê mã hã karõ ho pa. Anê.

Jejus kot amnhĩ tã mẽ hkukjêr ã harênh

Makre 12.35-37; Rukre 20.41-44; mãănêñ Rõmãn 1.3-4

⁴¹ Nhũm Parijew nhõ xwỳnhjaja arĩ Jejus mar o kuhê nhũm amnhĩ tã tanhmã mẽ hkukjêr to. Nom te nhãm mẽhõ hã mẽ hkukjêr pyræk o mẽ hkukja nê mẽ kãm:

⁴² —E mẽ inhmã mẽmoj jarê. Tanhmã na ka htem axpên mã Tĩrtũm kot mẽ akaxyw âm mã xwỳnhhta jarênh to? Kêp mẽhõ kanrêhã htãmnhwỳ koja wehe? Anê.

Hãmri nhũm mẽ kãm:

—Nà koja kato nê kêp pahi finat Tawi kanrêhã htàmnhwý koja.

⁴³ Anê nhũm Jejus mẽ kuma nê mẽ kãm:

—Tỳ. ãm hãmri na ka mẽ harê. No mo na htem axpên mã kêp pahi Tawi hkanrêhã htàmnhwý pix ã harê nê mãânên kêp ò pahihti hã harênh kêt nê? Tawi na pre Tirtũm Karõ nhỹ hã tanhmã harênh to nê harênh o:

⁴⁴ Na pre Tirtũm inhõ Pahihti mã ã kapêr anê nê kãm: “E amnê ixwýr tẽ nê inhĩhkô hã nhỹ nê inhmã mẽ ho amnhĩptàr o akrĩ. Kot paj mẽ kot kãm akurê xwýnh piitã mẽ unênh pa nê awýr mẽ o mra nê anhĩhkram mẽ haxàr pa.” Anhỹr o pre kãm kapêr.

⁴⁵ ã Tawija Tirtũm kot Kris mã kapêr jarênh nê kêp ò pahi hã kagà anê. Mẽ kajaja na ka htem ãm kêp Tawi tàmnhwý pix ã axpên mã harênh o ri apa. No kêt Tawija na pre kêp ò Pahihti hã harênh o pa. Anê.

⁴⁶ Hãmri nhũm mẽ kuma nê tee ri kot tanhmã kutã kãm kapêr to hkukamã hamaxpêr nê axte mẽmoj tã hkukjêr kêt nê. Tanhmã kot mẽ amnhĩ to nê hamaxpêr o hakre? Na prem tee ri kãm hamaxpêr o hakrenh prãm kaprý. Jejus mẽmoj piitã hkukamã àhpumunh tỳx o àhpumunh tỳx.

23

Jejus kot tanhmã Parijew nhõ xwýnhjê jarênh to Makre 12.38-40; Rukre 11.43-46, 20.45-47

¹ Tã nhũm Jejus mẽ ixte hkôt ixpa ho ixpa xwýnhjê mẽ mẽ kot mar o kuhê xwýnhjê mã kapêr nê mẽ inhmã tanhmã Parijew nhõ xwýnh mẽ

Mojes kapêr o mẽ ahkre xwÿnhjê jarênh to nê mẽ inhmã:

²—Nà Parijew nhõ xwÿnh mẽ Tĩrtũm kapêr tũm o mẽ ahkre xwÿnhjaja na htem hprĩ hã Tĩrtũm kapêr ã kagà htũm mar mex nê.

³ Jakamã kêr ka mẽ mar tÿx nê mẽ kot ho mẽ ajahkre kôt amnhĩ nhĩpêx. No mẽ kot amnhĩ nhĩpêxja kêr ka mẽ hkôt amnhĩ nhĩpêx kêt nê. Mẽ kot Tĩrtũm kapêr tũm o mẽ ajahkre htã hkôt amnhĩ nhĩpêx kêt nê.

⁴ Te mẽ kot mēhõ kot mẽ katut ã mẽ kãm mẽ jênh pytĩ janhôr tã no ãm mẽ kuxwar hkwÿ htur kêt kot amnhĩ nhĩpêx pyrak o na htem amnhĩ nhĩpêx o pa. Jao mẽ amã mẽmoj tã karõ nê mẽ amã: “E kêr ka mẽ ã amnhĩ nhĩpêx anê nê ã amnhĩ nhĩpêx anê.” Anhÿr pix o mẽ amã kapêr o pa. Nom mẽ tãmjaja amnhĩ kapêr kôt amnhĩ nhĩpêx kêt nê.

⁵ —Na htem hkwÿjê kot mẽ omunh nê mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nê mẽ mẽ noo mã mẽ ê mex pix kãm pa. Nê amnhĩm Tĩrtũm kapêr ã kagà htũm kwÿ hã kagà nê amnhĩ nhõkrã hã hanhõ nê amnhĩ pa hã hanhõ nê hã pa. Mẽ kot hã nohtÿx rãhã hã mẽ hkamnhĩx kaxyw nhũm htem ã amnhĩ nhĩpêx anhÿr o pa. Nê mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

⁶ —Nê mẽ pahpê Ijaewjê nhõ Tĩrtũm kapêr o mẽ ahkre xà hã ixkre kamã mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. Nê mẽmoj tã mẽ apkur xà mex ã arĩgro hã nhũm htem ma mẽ apkur xà hã ixkre hwÿr akuprõ nhũm

mê kot amnhĩ to rũnh xwỳnhjê hkrĩ xà mex pix kamã kãm hkrĩ hprãm.

⁷ Nê nhỹri pry hã mra nhũm mê kot mê omunh nê mê kêp mê ahkre xwỳnh maati hã mê hã hpi-jaàm kãm tanhmã mê kãm kapêr mex toja nhũm htem kãm hprãm. ã na hte Parijew nhõ xwỳnh mê Tĩrtũm kapêr tũm o mê ajahkre xwỳnhjaja hêx rom mê anoo mã amnhĩ nhĩpêx anhỹr o pa.

⁸⁻¹⁰ –No mê kajaja. Kêr ka mê ho mê uràk kêt nê. Kê mê axpên mã mê ajarênh o: “Pahi Maati” anhỹr o mê ajarênh kêt nê. Rỳ mê ajarênh o: “mê ijahkre xwỳnh maati” anhỹr o axpên mã mê ajarênh hkêt nê. Kêt paxipix na pre Tĩrtũm mê akaxyw ixãm jakamã paxipix na ixpê mê anhõ Pahi Maati. Nê paxipix na ixpê mê ajahkre xwỳnh maati. No mê kajaja ixkôt mê apê axpên to atõx nê atõ na ka mê.

–Nê kêr ka mê ri axpên jarênh o: “Mêpahpãm” anhỹr kêt nê. Kêt kaxkwa kamã na Mêpahpãmja.

¹¹⁻¹² –Nê kot ka mê amnhĩ to rax prãm xàj tanhmã amnhĩ to jarkrar to ho apa htã no nhũm akwỳjaja ama nê ãm ama nê akôt hamaxpêr kêt nê. No kot kaj mê piitã mê kutã tanhmã anojarêt to ho apa nhũm mê amnhĩ tã mê apumu nê axpên mã mê amex ã mê ajarê. Jakamã kot kaj mê amã mê piitã mê kot mê amex ã mê ajarênh prãm hãmri nê ri mê piitã mê kãm tanhmã amnhĩ nhĩpêx to pê mê kutã anojarêt rãhã ho ri apa. Anê.

*Jejus kot mê hkwỳjê mã kapêr tỳx ã harênh
Makre 12.40; Rukre 11.39-52, 20.45-47*

¹³⁻¹⁴ Tã nhũm Jejus hpãnhã Parijew nhõ xwỳnh mê Tĩrtũm kapêr tũm o mê ahkre ho mê pa xwỳnhjê mã kapêr. Nê mê kãm kapêr kãm hihtỳx nê mê kãm:

—E mẽ apê Parijew nhõ xwỳnh mẽ Tĩrtũm kapêr tũm o mẽ ahkre xwỳnhjaja. E mẽ inhma. Kot kaj mẽ amex kêt nẽ. Mẽ apê mẽ no kupyw xwỳnh na ka mẽ. Nẽ mẽ amã Tĩrtũm kôt amnhĩ nhĩpêx prãm kêt. Nẽ nhỹrmã atyk nẽ mẽ amã õ krĩ hwỳr axàpir prãm kêt. Nẽ akwỳjaja kot hwỳr àpir pymaj na ka htem akwỳjê nẽ tanhmã mẽ kãm axêx to ho apa. Mẽ kot mẽ apyrà nẽ Tĩrtũm kapêr kwỳm amnhĩ nhĩpêx prãm xàj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwỳr kahêxà kahê htỳx pyrak o apa.

¹⁵ —Nẽ mẽ akwỳjaja kot mẽ akôt amnhĩ xunhwỳr nẽ mẽ akôt amnhĩ nhĩpêx prãm xàj na ka htem ma awry hã nhỹhỹm tanhmã mẽ kãm ri axujarênh to ho ri apa. Jakamã nhũm mẽhõ mẽ ama nẽ mẽ akôt amnhĩ xãm hãmri nẽ ra amnhĩ tomnuj tỳx o mẽ ajakre. Jakamã koja mẽ nhỹrmã mẽ apyrà nẽ ma mẽ kot amnhĩ xà htỳx kamã hamak tũm xàta wỳr pa. Jakamã kwa mẽ o kora. Kot kaj mẽ amex kêt nẽ.

¹⁶ —Hêxta waa nẽ. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt kumrêx. Na ka htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nẽ mẽ kãm: “Kot kaj mẽ ãm hãmri mẽmoj tã amnhĩ jarênh kaxyw hãmri nẽ Tĩrtũm mã amnhĩ jarênh xà hã ixkre nhĩxi jarênh kôt mẽhõ mã amnhĩ jarê nhũm ama nẽ hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nẽ ate mẽ kãm õr xàta jarênh kôt ãm hãmri mẽmoj tã mẽhõ mã amnhĩ jarê. Hãmri nhũm ama

nê hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwy nhõr kôt ã amnhĩ jarênh anê. Jakamã na amnhĩ to hêx kêt nê.’ Anhÿr o hamaxpêr. Na ka htem ã mẽ ahkre ho apa anê.

¹⁷ Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tã amnhĩ jarênh nê aa paxêx kêt rãhã ho papaja na Tĩrtũm kãm hprãm.

¹⁸ —Nê na ka htem mẽ kêp mẽ hikukrêx jamÿnh prãm xaj ã atÿx ri mẽ ahkre anê nê mẽ kãm: “Kot kaj mẽ ãm hãmri mẽmoj tã amnhĩ jarênh kaxyw nê Tĩrtũm mã mẽmoj nhõr xà hã mêstija jarênh kôt mēhõ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà ãm hãmri na inhmã amnhĩ jarê rÿ ko na apu ãm inhmã amnhĩ to hêx.’ Anhÿr o hamaxpêr. Nom kot kaj mẽ Tĩrtũm mã mẽmoj nhõr xà hã mêstija ã kãm mẽmoj xi. Hãmri nê ra mẽ ate kãm õr xàta jarênh kôt ãm hãmri mẽmoj tã mēhõ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhÿr jakamã na amnhĩ to hêx kêt nê.’ Anhÿr o hamaxpêr.” Anê. Na ka htem ã mẽ ahkre anê.

¹⁹ Mẽ ajamaxpêr kêt xwÿnh na ka mẽ. Tĩrtũm mã mẽmoj nhõr xà hã mêstija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mêsti jakrenh ã harê.

20 Nom Tĩrtũm mã mēsti mē mē kot hã kãm mēmoj nhõrta te kot axpēn pyræk jakamã kot kaj mē mēstija jarēnh kõt mēmoj tã amnhĩ jarē nē mããnēn mē ate hã Tĩrtũm mã mēmoj xirja jarēnh kõt amnhĩ jarē. Hamē wa kot axpēn pyræk jakamã hamē wa harēnh pē amnhĩ to axêx kêt nē. Jakamã kêr ka mē mēmoj tã amnhĩ jarēnh kaxyw nē hamē wa harēnh kõt âm hãmri mēmoj tã amnhĩ jarē nē ho axêx kêt nē.

21 Tã kot kaj mē âm hãmri amnhĩ jarēnh ã mēmoj tã amnhĩ jarēnh kaxyw nē Tĩrtũm mã amnhĩ jarēnh xà hã ixkre hkõt hã amnhĩ jarē nē mããnēn Tĩrtũm kêp ixkre hpãm kõt hã amnhĩ jarē. Jakamã kêr ka mē hamē wa harēnh pē amnhĩ to axêx kêt nē.

22 —Nē kot kaj mē âm hãmri amnhĩ jarēnh ã mēmoj tã amnhĩ jarēnh kaxyw nē kaxkwa jarēnh kõt amnhĩ jarēnhja o mããnēn kaxyw kaxkwa kamã Tĩrtũm krĩ xà maati hkõt amnhĩ jarē. Nē mããnēn Tĩrtũm kõt amnhĩ jarē. Jakamã kwa hamē wa harēnh pē amnhĩ to axêx kêt nē.

23 —Hêxta waa nē. Mē apê Parijew nhõ xwýnh mē mē apê Tĩrtũm kapēr tũm o mē ahkre xwýnhjaja kot kaj mē amex kêt nē. Mē ate mē no kupyw xwýnh na ka mē. Na ka htem Tĩrtũm kapēr piitã hkõt amnhĩ nhĩpêx kêt nē âm hkwý kõt pix mã amnhĩ nhĩpêx o ri apa. Na ka htem âm kapēr o hpýnhre nē hkõt amnhĩ nhĩpêx ã amnhĩ pumu nē ate amnhĩ to mex xwýnh ã amnhĩ jarēnh o apa. No Tĩrtũm kãm hprãm xà piitã hkõt amnhĩ nhĩpêx kêt nē. Mē ate tãm mē hipêx nē mē ho mex nē mē kamã axukapri hã kot mē amã karõja. Nē mē amã Tĩrtũm kĩnh ã kapēr kõt amnhĩ nhĩpêx hã karõja ra mē ate mar tã hkõt amnhĩ nhĩpêx kêt nē. Mē ate kapēr piitã hkõt

amnhĩ nhĩpêx ronhỹx ja mẽ amã mex o mex.

24 Mẽ ate ãm kapêr o hpỹnh nẽ hkôt amnhĩ nhĩpêx jakamã te mẽ ate atỹx ri tanhmã axàpkur to ho mẽ akrĩ pyràk. Jao te mẽ axàpkur xà hã mẽõ kamã pure pumunh nẽ nê hanhir nẽ rênh tã mãânên kamã kên rax pumunh tã nê hanhir nẽ rênh kêt rãhã hkur pyràk. Jao Tĩrtũm kapêr o hpỹnhre nẽ hkôt amnhĩ nhĩpêx no piitã hkôt amnhĩ nhĩpêx kêt nẽ. Pêr mẽ ajamaxpêr kêt tã na ka htem atỹx mẽ ahkre ho ri apa.

25 —Hêxta waa nẽ. Mẽ apê Parijew nhõ xwỳnh mẽ mẽ apê Tĩrtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyr xwỳnh na ka mẽ. Nà mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harênh nẽ kamã apkur pyràk o na ka mẽ. Jao ãm mẽ akrãhka rũm pix mã mẽ amex. Nẽ mẽ noo mã te mẽ amex pyràk no mẽ anhõxàhkre kaxwỳnh kãm mẽ ajamaxpêrja mex kêt. Mẽ akapêr prãm nẽ mẽ axàhkurê nẽ mẽ anhõxỳy.

26 Mẽ ajamaxpêr mex kêt kênã. Kwa kêr ka mẽ tãm ajamaxpêr o tãm akwỳjê nhĩpêx o ri apa. Nẽ axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nẽ amnhĩm mẽ amex ã mẽ ajarê. No na ka htem amã mẽ amnhĩ to mex prãm xàj ãm tee ri amnhĩ kuhõnh japjê kaprỳ.

27 —Hêxta waa nẽ. Mẽ apê Parijew nhõ xwỳnhjê mẽ mẽ apê Tĩrtũm kapêr tũm o mẽ ahkre ho mẽ apa xwỳnhjaja kot kaj mẽ amex kêt nẽ. Te mẽ ate mẽ htykjê jagjênh xà pyràk. Na htem mẽ hagjênh xà ho mex o pa nom kamã mẽ hi nẽ ahpunuj pix.

28 Ja pyrà nê ã mē ate amnhĩ nhĩpêx anhÿr. Kapôt rŭm mē anhĩja na mex. Te mē ate mē ho mex o apa pyràk o na ka htem amnhĩ nhĩpêx nhŭm mē ãm akrâhkà pix pumu nom ãm mē akrâ hi kaxwÿnh kãm mē ajamaxpêr punuj rãhã hã mē apumunh kêt nê. Mē ate tanhmã mē no kupyrr to pix kukamã ajamaxpêr jakamã te mē ate mē htykjê jagjênh xà pyràk.

29-30 —Hêxta waa nê. Mē apê Parijew nhõ xwÿnh mē mē apê Tĩrtŭm kapêr tŭm o mē ahkre xwÿnhjaja kot kaj mē amex kêt nê. Mē ate mē no kupyrr xwÿnh na ka mē. Na ka htem ma mē hã pika hwÿr apa nê Tĩrtŭm nhÿ hã kapêr o mē pa xwÿnhjê hã pika ho mex. Nê mē kot amnhĩ to mex xwÿnhjê hã pika ho mex. Nê axpên mã mē harênh o: “Hêxta waa nê. Na pre amnepêm mē pakukamã mē panhĩgêjtaja Tĩrtŭm nhÿ hã mē kãm kapêr xwÿnhjê homnuj nê mē kupa. No kêt mē papajaja mē kamã ri papa ronhÿx pu prem mē uràk nê ã mē hipêx anhÿr kêt nê.” Anhÿr o axpên mã mē hkaprĩ ho ri apa.

31-32 Nom ãm amnhĩ to axêx. Mē ate ã amnhĩ nhĩpêx anhÿr o apa kênã. ã mē ate amnhĩ nhĩpêx anhÿr jao ra apê mē hkanrêhã mē hkra kumrêx ã amnhĩ to amnhĩrĩt mex o apa.

33 Te mē ate kagã xoprê kot mē hkamnhar nê mē homnuj tÿx pyràk jakamã koja Tĩrtŭm nhÿrmã ma mē kot amnhĩ xà htÿx kamã hamak tŭm xàta wÿr mē ajano ka mē ma hwÿr ajapêx. Hãmri nê tee ri amã ajapôx prãm kaprÿ nê rĩ amnhĩ pumu.

34 —Kot paj nhÿrmã ma mē awÿr inhÿ hã ixkapêr jarênh o mē pa xwÿnh kwÿ rê. Nê inhÿ hã mē àhpumunh xwÿnh kwÿ rê. Nê ixkapêr o mē ahkre xwÿnh kwÿ rê. Nom kot kaj mē ãm mē kapêr ma

nê apê mẽ hprãm nõkati nê tanhmã mẽ homnuj tỳx to ho apa. Nê ixpê mẽ hkwỳjê hpar o apa. Jao pĩ kahpa hã mẽ hanhôm o mẽ hkwỳjê hpa. Nhũm mẽ hkwỳjaja Tĩrtũm kapêr o mẽ ahkre xà hã ixkre kamã mẽ ahkre ho hkrĩ ka mẽ omu nê mẽ unê nê ixkreja kamã mẽ htak. Hãmri nhũm mẽ apymaj nhãm ahpỳnhã krĩ hkwỳ hwỳr hprôt nê mra. Ǻ kot kaj mẽ inhỹ hã ixkapêr jarênh xwỳnhjê nhĩpêx anhỹr o apa.

³⁵⁻³⁶ Na prem ra mẽ himex rax nê. Amnepêm panhĩ kator krax rũm Atãw kra Apewta na pre Tĩrtũm nhỹ hã kapêr o pa nhũm htõja kãm mar prãm kêt nê kupĩ. Tã nhũm Tĩrtũm axte mẽ hwỳr ỹ hã kapêr o mẽ pa xwỳnh kwỳjê rê nhũm prem mã mẽ ho anê nê mẽ hkwỳjê nhĩmex. Nhũm pre xatã mẽ hwỳr mẽ hkwỳjê rê nhũm mẽ xatã mẽ kupa. Apew rũm Parakis kra Jakaris wỳr na prem mẽ himex rũnh nê. Hãmri nhũm prem Tĩrtũm mã amnhĩ jarênh xà hã ixkre kamã Jakarisja pĩ. Tã mẽ kajaja mẽ ate mẽ urak nê mẽ amã Tĩrtũm kapêr mar prãm kêt nê mẽ urak nê amã Tĩrtũm nhỹ hã kapêr xwỳnhjê nhĩmex prãm nê. Ǻ mẽ ate mẽ anhĩgêjtjê pyrã nê mẽ hipêx anhỹr mỳrapê koja Tĩrtũm mẽ apê mẽ hkanrêhã mẽ hkra nê mẽ htãmnhwỳjaja mẽ ato hpimràatã tanhmã mẽ ato htỳx to ka mẽ amnhĩ xà htỳx kamã ajamak rãhã ho ri apa. Anê.

Jejus kãm Jerujarê nhõ xwỳnhjê japê htỳx ǻ harênh

Rukre 13.34-35; mããnên Rõmãn 11.25-27

³⁷ Hãmri nhũm Jesus te ra kot Jerujarê nhõ xwỳnhjê pumunh nê mẽ kãm kapêr pyrak o

tanhmã kapêr to ho xa. Nê mẽ kãm:

—Hêxta waa nê Jerujarê nhõ xwÿnhjaja. Tĩrtũm kot xatã mẽ awÿr ý hã kapêr jarênh xwÿnhjê rênh nhũm mẽ kot mẽ akõt mẽ amã kapêr jarênh o pa htã ka mẽ kapêr mar kêt kumrêx. Nê axtem nê kên o mẽ htak o mẽ himex o apa. ã na ka htem amnhĩ tomnuj o apa anê. Tã nom arĩ inhmã mẽ ajamãr o ri ixpa hprãm. Te ho krãhyre kot nore hpro nê ho hikwÿ pyrãk o na pa inhmã mẽ anhĩpêx prãm nê. Nom mẽ amã ixprãm nõkati nê mẽ ate ixkaga kumrêx.

³⁸ Mÿrapê koja Tĩrtũm mẽ anhõ krĩ jamãr kêt nê.

³⁹ Kot paj tokyx ty nê mẽ apiitã mẽ are nê ma akupÿm api ka mẽ axte ixpumunh kêt nê. ãm akupÿn ixwÿrÿk xã hã arĩgrota pix ã koja mẽ akwÿyjaja mẽ amÿrpê krĩ ja kamã ixpõx ã ixpumu. Hãmri nê mẽ akurom ixpumu nê hkĩnh tÿx nê. Nê tã ixkõt amnhĩ xunhwÿr kurê kumrêx. Hãmri nê axpên mã ijarênh o:

Ota Tĩrtũm kot mẽ pahwÿr mênh xwÿnhhta wrÿ. Nã ãm hãmri na mẽ pahwÿr wrÿ. Ja mex o mex. Koja mẽ ã axpên mã ijarênh anê. Anê.

24

Jejus kot mẽ pakukamã mẽmoj jarênh

Makre 13.1-13; Rukre 21.5-19; mããnên Wam Ximotre 4.1-3; Sikũn Ximotre 3.1-9; Apokarip 6.1-17

¹ Tã nhũm Jejus Tĩrtũm mã amnhĩ jarênh xã hã ixkre rũm kato nê ma tẽ. Pa mẽ ixte hkõt ixpa ho ixpa xwÿnhjaja kormã ixkreja pumunh o ixkuhê nê kãm harê nê kãm:

—Kwa Pahihtĩ. Hêxta waa nê. Ixkreja ãm mex kumrêx. Anê.

Hãmri nhũm mẽ inhmã:

²—Tỳ mex nom koja nhỹrmã mẽ kãm Tĩrtũm kurê xwỳnhjaja grành pa. Koja arĩ kên ò axkrutre nẽ axpẽn mỳnh nẽ nờ kêt nẽ. Koja piitã anhrà nẽ ahpỳnhã ri hikwỹ. Anẽ.

³ Hãmri pa mẽ kuma nẽ tee ri hkukamã ija-maxpẽr. Hãmri nhũm Jesus ma tẽ nẽ hixêt pê Oriwêhti hã api nẽ hã nhỹ pa mẽ ma hkôt mra nẽ mẽ kot ã ixkre nhĩpêx anhỹrta ã hkukja nẽ kãm:

—Kwa xà ãm hãmri koja mẽ ã ixkreta nhĩpêx anẽ? Kwa mẽ inhmã aprĩ hã harẽ. Xà koja mẽ nhỹrmã ho anẽ nà? Xà koja mẽ tokyx ho anẽ? Nẽ akupỹn mẽ ixwỳr awrỳk nhũm mẽmoj piitã hapêxja. Kwa mẽmo koja we wỳj ri tanhmã amnhĩ nhĩpêx to wehe? Anẽ.

⁴ Hãmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhỹ nẽ mẽ inhmã:

—Nà nhỹrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mẽ amã harẽ ka mẽ inhma. Nà koja mẽ ohtô nẽ mẽ awỳr mra nẽ hêx rom te pa ixte amnhĩ nhĩpêx pyràk o amnhĩ nhĩpêx o mẽ akôt pa.

⁵ Nẽ mẽ amã amnhĩ jarênh o: “E Tĩrtũm na pre mẽ awỳr inhmẽ. Ixpê kaxkwa rũm ixwrỳk xwỳnhhta na pa.” Anhỹr o mẽ akôt mẽ amã amnhĩ to hêx o pa. Jao ohtô nẽ mẽ nokupyr o pa.

⁶ —Nẽ koja mẽ nhỹri awry hã axpẽn par o pa nẽ mẽ atã axpẽn par o pa. Nom kêr ka mẽ harênh ma nẽ ri tokyx mẽmoj piitã hapêx ã hkamnhĩx kêt nẽ. Kormã mẽmoj piitã hapêx xà hã arĩgroja kormã.

⁷ Koja mẽmoj piitã hapêx kaxyw nhũm ahpỳnhã ri pika piitã hkôt mẽ pa xwỳnhjaja pika hõ nhõ

xwỳnhjê kutã kuhê nê pijapu ho kuhê. Jao ra axpên par o pa. Hãmri nhũm nhỹri pika hkwỹ htertet tỳx kumrêx. Nê mẽ hpur kãm mẽõja hapêx nhũm mẽ kãm prãm tỳx nê pa. Jakamã nhũm mẽ ohtô nê prãm xàj axkaprã.

⁸ Nom ja kormã mẽmoj hapêx kaxyw krax pix na. Te ho mênijê hõ hpijagri kaxyw nê kormã kawax pê õhy xà pyrak.

⁹ —Nê koja mẽ piitã ixkôt mẽ akamã gryk nê kãm mẽ akurê htỳx o pa. Nê mẽ awỳr mra nê ixtã mẽ apynê nê mẽ atomnuj tỳx nê mẽ apa.

¹⁰ Jakamã koja mẽ kot ixkôt amnhĩ xunhwỳr xwỳnh kwỳjaja mẽ umaj tee ri amnhĩ kukamã hamaxpêr hãmri nê ixkaga. Nê ixkôt mẽ kãm axpên tã amỳnê nê axpên kãm gryk o pa.

¹¹ Nhũm nhỹri mẽ hkwỹjaja Tĩrtũm nhỹ hã kapêr jarênh xwỳnh ã amnhĩ to hêx o pa. Jao mẽ ohtô nê mẽ nokupyr o pa.

¹² Koja mẽ ã amnhĩ nhĩpêx anhỳrja o ra piitã kãm axpên kamã ukaprĩ hkêt o pa.

¹³ Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htỳx nê ixkaga hkêt nê. Mẽ kot mẽ apar tã ka mẽ kaxkwa kamã akupỹm atĩr kurê kumrêx.

¹⁴ —Nê kot kaj mẽ apê ixkwỳjaja ma krĩ piitã hkôt Tĩrtũm kapêr o mẽ ahkre ho apa. Mẽ kot amnhĩ tomnuj kaga nê ixkôt amnhĩ xunhwỳr nhũm Tĩrtũm kot ja hã mẽ omunh nê mẽ ho hkra hã mẽ kãm harênh o ri mẽ piitã mẽ hkôt apa. Kot kaj mẽ piitã mẽ kãm ijarênh pa pa rĩ kormã akupỹn mẽ awỳr wrỳ. Anê.

*Mê pahomnuj tỳx xwỳnh maati hã harênh
Makre 13.14-23; Rukre 21.20-24; mãănênh Sikũn
Tesarõn 2.3-4*

¹⁵ Nhũm Jejus arĩ mẽmoj kukamã mẽ inhmã kapêr nê mẽ inhmã:

—Amnepê m Tĩrtũm nhỹ hã kapêr xwỳnh finat Tãnĩewja na pre tanhmã mẽ atomnuj tỳx xwỳnh maati ja jarênh to. Tã koja nhỹrmã ra kot harênh xà hkôt axtem nê Tĩrtũm mã amnhĩ jarênh xà hã ixkre hwỳr axà nê Tĩrtũm xãm xà kamã xa. Ka mẽ ja hã omu hãmri nê mẽ kot krĩ grành par ã hkamnhĩx kurê kumrêx.

¹⁶ Koja ã amnhĩ nhĩpêx anê ka mẽ amỳm amnhĩ wỳr mẽ omu hãmri nê ajapôj nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwỳnhjaja kaj mẽ omu hãmri nê mẽ kot mẽ apar pymaj aprôt nê ma amrar kurê kumrêx.

¹⁷ Rỳ ka mẽ anhõrkwỹ hkrãmnênh o akrĩ japêr nê amỳm amnhĩ wỳr mẽ omu nê akukrêx wỳr axàr nê hõ hpyr mã ajamaxpêr kêt nê. ãm wrỳ nê aprôt nê ma atêm kurê kumrêx.

¹⁸ Rỳ ka mẽ apur kãm axàpênh o apa japêr nê amỳm mẽ omu hãmri nê akupỹm anhõrkwỹ hwỳr axê jamỳnh kaxyw atêm kêt nê. ãm mẽ umaj aprôt nê ma atêm kurê kumrêx.

¹⁹ —No mẽ htujarô nê mẽ hkra karàre xwỳnhjaja koja mẽ kêp mẽmoj omnuj tỳx nê. Tanhmã kot mẽ amnhĩ to nê mẽ umaj hprôt tỳx? Nà pika ja kamã koja mẽ mex kêt o mex kêt. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

²⁰ —Nê kwa kêr ka mẽ amnhĩ to Tĩrtũm wỳ kê ã mẽ kot amnhĩ nhĩpêx anhỹr xà hã arĩgroja na wrỳk

pê ã amnhĩ nhĩpêx anhÿr kêt nê. Rỳ mẽ hkôt xà hã arĩgro pê sap ã ã amnhĩ nhĩpêx anhÿr kêt nê.

21 —Nê ã mẽ kot amnhĩ nhĩpêx anhÿr ã arĩgroja ã koja mẽ piitã amnhĩ xà htỳx kãm hamak tỳx kumrêx. Amnepê̄m Tĩrtũm kot pika ho kator krax rũm amnê mẽ pa xwỳnhjaja kormã aa kot ã amnhĩ xà htỳx kamã hamak anhÿr kêt tã arĩgroja ã koja mẽ amnhĩ xà htỳx kumrêx kamã ama. Hãmri nê axte pika ja kamã ã amnhĩ xà htỳx kumrêx kamã hamak anhÿr kêt nê.

22 Kop apu Tĩrtũm kot mẽ kot amnhĩ xà htỳx kamã hamak xà hã arĩgro hkwȳ ho gri hkêt ronhÿx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xàj mẽ amã ho gri.

23-24 —Tã ã mẽmoj kot amnhĩ nhĩpêx anhÿr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupÿn wrỳ. Kwa mẽ hwỳr mra nê omu.” Anê. Rỳ mẽ amã: “Krisja krĩ mũj kamã na raa. Kwa mẽ ma hwỳr mra nê omu.” Anhÿr o mẽ amã ixto hêx o pa. Rỳ mẽ awỳr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awỳr wrỳ. Tĩrtũm na mẽ awỳr inhmê pa wrỳ.” Anê. Rỳ mẽ amã: “E ixpê Tĩrtũm nhÿ hã ixkapêr xwỳnh na pa mẽ awỳr mōn pōj.” Anhÿr o mẽ amã amnhĩ to hêx. Hãmri nê mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhÿr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nê mẽ gryk ã ixkaga hprãm xàj koja mẽ ã mẽ anoo mã amnhĩ nhĩpêx anhÿr o pa. Nom ãm ã amnhĩ nhĩpêx anhÿr kaprỳ ka mẽ ixkaga hkêt nê.

25 —E kwa mẽ inhmar tỳx nẽ. Na pa ra ixprĩ hã ã mẽ kot amnhĩ nhĩpêx anhỹrja kukamã ã mẽ amã mẽmoj jarẽnh anẽ. Tã kêr ka mẽ amnhĩ nẽ ã mẽ kot amnhĩ to hêx anhỹr o mẽ pa xwỳnhjê pumunh mex o apa nẽ axkãm ajamak rom.

26 Rỳ koja mẽ tanhmã mẽ amã ixto hêx to nẽ mẽ amã: “Ota Tĩrtũm kot mẽ pahwỳr mẽnh xwỳnhhta kapôt ã mõn pøj. E mẽ tokyx ma hwỳr mra nẽ omu.” Anhỹr o mẽ amã ijarẽ ka mẽ ama nẽ ãm mẽ ama nẽ hwỳr amrar kêt nẽ. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwỳr agjêx kêt nẽ.

27 Kot paj nhỹrmã akupỹn mẽ awỳr ixwrỳk kaxyw hãmri nẽ ixpimxur kãm ixwrỳk kêt nẽ. Kojã pika piitã hkôt mẽ pa xwỳnhjaja anhĩpê ixwrỳk kãm ixpumu. Te mẽ piitã anhĩpê mẽ kot na haxênh pumunh pyræk o kot kaj mẽ anhĩpê apiitã ixpumu.

28 Te nhỹri mẽmoj kro nẽ nõr nhũm nhônhti kot omunh nẽ hã htor nẽ hpinhpanh nhũm mẽ piitã hã omunh pyræk o kot paj amnhĩ nhĩpêx. Anẽ.

Jejus akupỹn wrỳk xwỳj ri mẽmoj kukamã harẽnh Makre 13.24-31; Rukre 21.25-33; mããnẽn Wam Tesarõn 4.16-17

29 Nhũm Jejus arĩ mẽ ixte hkôt ixpa ho ixpa xwỳnhjê mã kapêr nẽ mẽ inhmã:

—Nẽ kot paj akupỹn mẽ awỳr inhnojarêr nhũm rĩ Tĩrtũm kaxkwa kamã tanhmã mẽmoj nhĩpêx to. Kapêr ã kagà htũm kot tanhmã ja kukamã harẽnh to nẽ harẽnh kot:

Koja Tĩrtũm kaxkwa ho àk nhũm kanhêti piitã rôrôk pa nhũm myyti ahtyk nhũm mytwrỳre uræk nẽ axte hpôk kêt nẽ. Anẽ.

³⁰ Koja ã mëmoj amnhĩ nhĩpêx anhÿr pa hãmri pa kaxkwa hã mẽ amã mëmoj nhô. Hãmri nhũm pika piitã hkôt ri mẽ pa xwÿnhjaja piitã omu nẽ tee ri amnhĩ kukamã hamaxpêr o hkaprĩ nẽ mÿr rax kumrêx. No mẽ kajaja kot kaj mẽ omu hãmri nẽ akupÿn mẽ awÿr ixwrÿk nẽ mẽ ato amnhĩptar mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mẽ awÿr wrÿ.

³¹ Hãmri nẽ Tĩrtũm kapêr o mẽ wrÿk xwÿnh maati mã anẽ nhũm pifti kakô hãmri nhũm hkwyjaja kuma nẽ ma mẽ awÿr pika piitã hkôt anhgrã nẽ ma mra nẽ inhmã mẽ ato akuprô. Ixte amnhĩ kaxyw mẽ axunhwÿr xwÿnhjê o akuprô nẽ man akupÿn ixwÿr mẽ ato hapêx. Anẽ.

Jejus kot mëmo pàr o ejêp jarênh

Makre 13.28-31; Rukre 21.29-33

³² Nhũm Jejus arĩ mẽ inhmã kapêr nẽ mẽ inhmã:
—E ka mẽ pĩ hpàr mũj pumu. Na hte mëmo mytwrÿ hã rã nhũm mẽ omu nẽ ô hkukamã hamaxpêr kurê kumrêx.

³³ Ja pyrã nẽ koja ã ixte mëmoj jarênh anhÿr xwÿnhja amnhĩ nhĩpêx par mẽ ka mẽ omu nẽ akupÿn mẽ awÿr ixwrÿk mã ajamaxpêr kurê kumrêx. Kot paj te ra mẽ anhõrkwÿ kapem ixãm pyrãk o amnhĩ nhĩpêx.

³⁴ Nom akupÿn ixwrÿk kêt ri koja ã mẽ kot mëmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa akupÿn wrÿ.

³⁵ —Nẽ koja nhÿrmã pika nẽ kaxkwa wa hapêx pa. Tã no ãm ixkapêrja koja wa uràk nẽ aa hapêx kêt nẽ. Koja ãm rãhã ho rãhã. Kot paj aa ihkjê ho tanhmã mẽnh to hkêt nẽ. Anẽ.

Mê pahte akupÿn Jejus wrÿk xà hã arÿgro pumunh kêt ã mê pajarênh

Makre 13.32-37; Rukre 12.37, 17.26-30, 17.34-36; määnên Wam Tesarôn 5.2

³⁶ Nhũm Jejus arÿ mê inhmã kapêr nê mê inhmã:

—Nê ixte akupÿn mê awÿr ixwrÿk xà hã arÿgroja mê ate omunh kêt. Nê kaxkwa kamã Tÿrtũm kapêr o mê wrÿk xwÿnhjaja haxwÿja kot ja pumunh kêt. Nê ijaxwÿja ixpê Tÿrtũm Kra htã ixte ja hã amnhÿ pumunh kêt. ãm inhõ Papaj pix na kot ja pumunh.

³⁷ —Nê kot paj nhÿrmã man akupÿn mê awÿr wrÿ. Akupÿn mê awÿr ixwrÿk xà hã arÿgrota ã koja mê htÿx ri amnhÿ tomnuj o pa. Te amnepêm Noehti kormã htÿr ri mê pa xwÿnhjaja kot htÿx ri amnhÿ tomnuj o pata pyrãk.

³⁸ Na pre htem amnhÿ kaxyw Tÿrtũm mã hamaxpêr kêt nê. ãm jar mê kot amnhÿ nhÿpêx pix kukamã hamaxpêr kôt pix mã amnhÿ nhÿpêx o pa. Rôm nhũm Noehtija gô htãm pymaj pàr rax nhÿpêxta mã axà.

³⁹ Nhũm mê ja hã omu nê ãm omu nê tanhmã ri amnhÿ kukamã hamaxpêr to hkêt nê. Hãmri nhũm naja mê haêr pê wrÿ nê wrÿk rax o mê hanhir pa. Tã akupÿn ixwrÿk xà hã arÿgroja ã koja mê htÿx ri ã amnhÿ nhÿpêx anhÿr o paja o pa mê haêr pê naja pyrã nê akupÿn wrÿ.

⁴⁰ —E kot paj mê amã nhÿrmã akupÿn ixwrÿk nê tanhmã mê anhÿpêx to hã amnhÿ jarê. Te kot ja pyrãk. Koja mêmÿjê hõ wa hamêxkrut nê hpur kãm àpênh o xa. Nhũm hõja ra ixkôt amnhÿ xãm nhũm hõja ixkôt amnhÿ xãm kêt japêr. Hãmri pa amnhÿ wÿr ra kot ixkôt amnhÿ xãm xwÿnhta o api nhũm

kot ixkôt amnhĩ xãm kêt xwÿnh̄ta h̄pur kãm ahte arĩ xa. Hãmri nê tee ri hkràmnhwÿ japêr rĩt o xa.

⁴¹ Rÿ nhũm mēnijê wa hamēxkrut nê harôj kahuk o xa. Nhũm hōja ra ixkôt amnhĩ xãm nhũm hōja ixkôt amnhĩ xãm kêt japêr. Hãmri pa amnhĩ wÿr kot ixkôt amnhĩ xãm xwÿnh̄ta ho api nhũm kot ixkôt amnhĩ xãm kêt xwÿnh̄ja tee ri hkràmnhwÿ japêr rĩt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mē anhĩpêx anê.

⁴² Tã mē ate akupÿn ixpôx xà hã arĩgro pumunh kêt jakamã kwa kêr ka mē ijamār rãhã ho ri apa.

⁴³ Na htem htÿx ri nhÿri tanhmã amnhĩ nhĩpêx to ho pa nhũm mē kêp àhkĩnh xwÿnh̄ mē òrkwÿ hwÿr agjê nê mē kêp ahkĩ.

⁴⁴ Tã mē ate akupÿn ixwrÿk xà hã arĩgro pumunh kêt jakamã kwa kêr ka mē ixwakre kamã te mē apê mē òrkwÿ nhõ dõn kot amnhĩ nhĩpêx pyrã nê atÿx ri tanhmã amnhĩ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhĩ nhĩpêx rãhã ho ri apa. Anê.

Mê kãm mē àpênh mex xwÿnh̄jê jarênh

Rukre 12.41-48

⁴⁵ Nhũm Jejus arĩ mē inhmã kapêr nê mē inhmã:

—E koja mē kãm àpênh xwÿnh̄jê hõ àpênh mex o pa hãmri nhũm ò patrãw àpênh ã omu hãmri nê ma nhÿhÿm mōr kaxyw nê ìhkram mēmoj piitã haxàr pa nê kãm: “E kêr ka ixwakre kamã inhmã inhōrkwÿ tãnopxar mex nê. Nê inhmã mē àpênh xwÿnh̄jê mã mē apkur xà nhõr o apa.” Anhÿr o kãm mēmoj tã karõ hãmri nê kato nê ma nhÿhÿm mō.

⁴⁶ Hãmri nhũm kot kãm àpênh mex xwÿnh̄ja wakre kamã kãm àpênh mex o pa. Jakamã nhũm

õ patrāw akupÿn hpôx o mō nhũm amnhĩ wÿr harēnh ma nē hkĩnh nē. Nē tee ri amnhĩ kukamã hamaxpēr o kām uma hkêt nē. Kot wakre kamã kutêp kām àpēnh mex jakamã tee ri tanhmã amnhĩ kukamã hamaxpēr to hkêt nē.

⁴⁷ Jakamã nhũm õ patrāwja akupÿn pōj nē kot kām àpēnh mex ã omu nē hkĩnh nē. Hāmri nē kot kām õ mēmoj piitã hamār o pa kaxyw ìhkram haxār pa.

⁴⁸ No koja axtem nē wakre kamã kām àpēnh mex kêt japêr. Nē hamaxpēr o: “Tk. Nà koja tokyx akupÿn mōr kêt nē.” Anhÿr o hkamnhĩx.

⁴⁹ Hāmri nē wakre kamã kām mē àpēnh xwÿnhjê htak nē pipānh pix o pa. Nē kām kagôxÿhti xành xwÿnhjê kôt pix mã pa.

⁵⁰ Hāmri nhũm õ patrāwja haêr pê akupÿn pōj nē tee ri ja hã omu.

⁵¹ Hāmri nē kamã gryk tÿx nē tanhmã homnuj htÿx to nē kām mē àpēnh punuj xwÿnhjê mē mē ho hpimràatã amnhĩ nē mē kator pa. Hāmri nē mē kot kapêr kwÿm amnhĩ nhĩpêx xwÿnhjê mē mē ho hpimràatã tanhmã mē homnuj to nē amnhĩ nē mē kator. Hāmri nhũm mē tee ri amnhĩ kukamã hamaxpēr nē mur nē tee ri amnhĩ nhĩpêx. Tã kêr ka mē ixwakre kamã ho mē uràk kêt nē. Mē kurom ixwakre kamã ixkapêr kôt amnhĩ nhĩpêx mex rāhã ho ri apa. Anē.

25

*Kormã mē mjên kêt xwÿnhjê ho 10 nē mē harēnh
Wam Tesarôn 5.1-3*

¹ Nhũm Jejus arĩ mē inhmã kapêr nē mē inhmã:

—Nê mẽ ate Tĩrtũm kôt amnhĩ nhĩpêx o mẽ apa xwỳnhjaja kêr ka mẽ akupỹn amnhĩ wỳr ixkãm ajamak rom nê ri apa. Nom mẽ kêp Tĩrtũm prãm nõkati xwỳnhjaja koja mẽ akĩnhã ãm htỳx tanhmã amnhĩ to pix kukamã hamaxpêr o pa. Te kormã mẽ mjên kêt xwỳnhjaja kot amnhĩ nhĩpêxta pyræk. E pa mẽ amã tanhmã mẽ harênh to ka mẽ inhma. Koja kormã mẽ mjên kêt xwỳnh kêp 10jaja ma hkràmnhwỳ mjên mã xwỳnh kutã pry hã mra. Amnhĩ kôt kanê jamỳ nê o mra nê kutêp pry nhĩkrep hkrĩ.

²⁻⁴ Nhũm mẽ kêp 5jaja hkwỳjê rom amnhĩ kukamã hamaxpêr mex nê kanê kaxyw amnhĩ kôt orti hkwỳ ho mỗ. No nhũm mẽ kêp 5 nê mẽ hkĩnhã ãm htỳx kanê pix jamỳ nê o mra.

⁵ Hãmri nê mẽ mjên mã xwỳnhja kutêp axpên mã kapêr o hkrĩ. Nhũm tokyx htêm kêt nhũm mẽ kutêp hkrĩ nê gaa nê ra õtxwa nê gaa nê hikwỹ nê ra õt pa.

⁶ —Tã nhũm kôt ã kamàt hãmri nhũm mjên mã xwỳnhta hpôx o tẽ. Hãmri nhũm kot hkukamã harênh xwỳnhja mẽ õt o mẽ hikwỹ xwỳnhjê mã amỹra nê mẽ kãm: “Kwa mẽ hãmri. Ota mjên mã xwỳnhta tẽ. Mẽ tokyx kànhmã akrĩ pu mẽ kutã mra.” Anê.

⁷ Hãmri nhũm mẽ hkrã hapôj nê kanê hpôk.

⁸ Nom nhũm mẽ hkwỳjê hkĩnhã õ kanê kaxyw orti ho pa hkêt xwỳnhjaja ra mẽ kêp mẽ kanêja hkapyrỳ hpa nhũm mẽ tee ri kot hpôk kaxyw. Hãmri nê orti hkwỳ hã hkwỳjê hwỳ nê mẽ kãm: “Xê mẽ inhmã orti ho inhõ kanê go.” Anê.

⁹ Nom nhũm mẽ kêp nê nê mẽ kãm: “Ma mẽ inhõ kanê kamã orti grire kênã kot pa kêt mẽ amã ho go. Xê mẽ tokyx ma mra nê nhỹri amnhĩm hkwỳ japrô

mê.” Anê.

¹⁰ Hãmri nhũm mẽ tee ri mẽ kuma nê ma amnhĩm hkwȳ japrôr mã ma mra.

—Rôm nhũm mjên mã xwỳnhhta mẽ hãnh tẽ nhũm kanê kamã arĩ mẽ orti xwỳnhhjaja omu nê hã jêt kurê kumrêx. Hãmri nê ma hkôt môn mẽ pikuprôn̄h xà hã ixkreja wỳr wa hã hkĩnh nê apkur kaxyw gjêx pa nhũm mẽ hã kahê. Mẽ gjêx xà hã oreja ra hwỳr hpôx jakamã nhũm mẽ hã kahê.

¹¹ —Tã nhũm ma mẽ kot orti japrôr mã mrar xwỳnhhjaja hãmri amnhĩ to hapu nê mra nê tee ri mẽ hã hakwakre kupê nê htatak nê tee ri mẽ kãm akir nê mẽ kãm: “Xê mẽ inhmã kahê xà mẽ pa mẽ awỳr agjê.” Anê.

¹² Hãmri nhũm hprô mã xwỳnhhta mẽ kuma nê mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupỹm mra.” Anê. ã mẽ ujarênh kot anhỹr. Anê.

¹³ Nhũm pre ã Jejus mẽ inhmã ujarênh anê. Hãmri nê mẽ inhmã:

—E kêr ka mẽ te kot amnhĩ kôt orti hkwȳ ho mōr xwỳnhhjaja kot amnhĩ nhĩpêx pyrâk. Mẽ ate akupỹn ixwrȳk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anê.

Mẽ kãm mẽ àpênh xwỳnhjê jarênh

Rukre 19.11-27

¹⁴ Nhũm Jejus arĩ mẽ inhmã kapêr nê mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nê. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mēhō my kot kãm mẽ àpênh xwỳnhjê nhĩpêx pyrâk. Kojã nhỹhỹm nojarêr nê kãm mẽ àpênh

xwÿnhjê mã hikukrêx piitã hkaga hpa. Ôrkwÿ nê hpur nê hkrit. ãm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa.

¹⁵ Hãmri nê ahpÿnhã mẽ kãm kàxpore hkwy gõ. Mẽ kot kutêp kãm tanhmã ho rÿnh to kaxyw ahpÿnhã mẽ kãm ôr pa. Kot kàxpore pumunh mex xwÿnhja mã nhÿm ho 5.000 nê kugõ. Nê kot hkôt kax pê omunh xwÿnhja mã nhÿm ho 2.000 nê kugõ. Nê kormã kot omunh tÿx kêt xwÿnhja mã nhÿm ãm ho 1.000 pix nê kugõ. Hãmri nê mẽ kãm amnhÿ jarê nê ma nhÿhÿm mõ.

¹⁶ Hãmri nhÿm kot ho 5.000 nê hamÿnh xwÿnhja kàxporeta py nê ma o mõi kurê kumrêx nê tanhmã ho àpênh to ho mõi kãm ra hipy axte ho 5.000 nê kumê.

¹⁷ Nhÿm kot ho 2.000 nê hamÿnh xwÿnhja mããnh tanhmã ho àpênh to ho mõi kamã ra hipy axte ho 2.000 nê kumê.

¹⁸ Nom nhÿm kot ho 1.000 pix nê hpyr xwÿnhja wa hkÿnh ã axtem nê ma o tẽ nê kãm kakwÿ nê kamã haxà nê hity hpa nê ma akupÿm tẽ.

¹⁹ –Tã nhÿm mẽ õ patrãwja akupÿn mõi pøj nê mẽ kãm: “E mẽ amnê ixwÿr mra nê ixte mẽ mã kàxpore ho ixpigranh xwÿnhja jarê. Tanhmã na ka prem ixkutêp inhmã hipêx to?” Anê.

²⁰ Hãmri nhÿm kot ho 5.000 nê hpyr xwÿnhja kumrêx hwÿr tẽ nê kãm: “E ota akàxporeta. Ate inhmã ho 5.000 pix nê ôr tã pa mã ho rax nê mã hipy axte ho 5.000 nê kumê nhÿm ho axkamur nê ra ho 10.000. Tã ota.” Anhÿr o kãm kapêr hãmri nê kãm kugõ

²¹ nhÿm amnhÿm hamÿ nê omu nê hkÿnh nê. Hãmri nê kãm: “Nà ãm hãmri na ka inhmã ho anê.

Ixte amã ho 5.000 pix nê òr tã ka ra inhmã ho rax jakamã kot kaj apê inhmã mẽ àpênh xwỳnhjê hkrãhtũm. E amnê ixwỳr axà pu mẽ apku nê pahkĩnh.” Anê.

²² –Hãmri nhũm hpãnhã kot ho 2.000 nê hpyr xwỳnhhta hwỳr tẽ nê ò patrãwta mã kãm: “E ota akàxporeta. Ate inhmã ho 2.000 pix nê òr tã pa amã ho rax nê amã hipy axte ho 2.000 nê kumẽ. Tã ota.” Anê.

²³ Hãmri nhũm kuma nê amnhĩm hamỳ nê omu nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho 2.000 pix nê òr tã ka inhmã ho rax jakamã kot kaj apê inhmã mẽ àpênh xwỳnhjê hkrãhtũm. E amnê ajaxwỳja ixwỳr axà pu mẽ apku nê pahkĩnh.” Anê.

²⁴ –Tã nhũm kot ho 1.000 pix nê hpyr xwỳnhhta hapu hã wa hkôt tẽ. Hãmri nê ò patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nê apa.

²⁵ Jakamã na pa inhmã apyma nê. Nê akàxporeta py nê ma o tẽ nê kaxyw kre nê kamã haxà. Tã ka akupỳn mỗn pỏj pa ajarênh ma hãmri nê hkapa nê man akupỳn amã o tẽ. Tã ota anhõ 1.000ta.” Anê.

²⁶⁻²⁷ Hãmri nhũm tee ri kuma nê kãm: “Tk. Kwa amã ixpyma nê ate ixpumunh mex anhỳr tã na ka ixte amã kàxpore nhõrta pyr nê ma ho atêm. Nê mẽ kot mẽ kêp kàxpore jamỳnh o kuhê xà kamã mẽ kãm òr nhũm mẽ ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xwỳnh.” Anê.

28-30 Hāmri nē kēp kàxporeta py nē nhām jam kugō nē kām: “E amý nē o tē nē kot inhmã ho 10.000 nē òr xwýnhhta mã agō. Hāmri nē jahti pyné nē ma o tē nē kamàt kô kamã amē. Apênh mexti hã. Koja tee amýra nē amnhĩ xà htýx kamã hamak xàj tee ri amnhĩ nham o axpên kamnhar týt kaprý nē rĩ amnhĩ pumu.” Anhýr o kãm kapēr nhũm kuma nē hpa hã kupy nē ma o tē. Hāmri nhũm mē ò patrãwja mē àpênh xwýnhjê mã kãm: “E mē ate ixwakre kamã mē axàpênh mex xwýnhjaja kot paj ã mē ato mex rax anē ka mē akĩnh nē. Nom mē kot inhmã mē àpênh mex kêt xwýnhjaja kot paj mē kēp mẽõ mẽmojta jamý nē nhām mẽhõm kugō nhũm hkaprĩ nē.” Anē. Á mē ujarēnh kot anhýr. Anē.

Jejus kot nhýrmã mē piitã tanhmã mē harēnh to hã harēnh

Matêwre 13.35-43, 13.47-50; mããnēn Apokarip 20.11-15

³¹ Nhũm Jejus arĩ mē inhmã kapēr nē mē inhmã: –Nē kot paj nhýrmã akupýn mē awýr wrý nhũm Tĩrtũm kapēr o mē wrýk xwýnh piitã man ixkôt wrý. Kot paj wrý nē ixpê pahĩ maati hã ixkrĩ xà maati kamã inhmex nē nhý.

³²⁻³³ Hāmri nē Tĩrtũm kapēr o mē wrýk xwýnhjê mã anē nhũm mē ma krĩ piitã hkôt mē apiitã mē ato pikuprõnh pa nē akupýn ixwýr mē ato hapêx. Pa mē apumu nē tanhmã mē axunhwýr to. Te ôwêhti jamãr o pa xwýnh kot ôwêhti kaêx ã motre pumunh nē nhām nē motre xunhwýr parta pyrãk.

³⁴ Hāmri nē ixupôk rũm mē ate ixkôt amnhĩ xunhwýr xwýnhjê mã ixkapēr nē mē amã: “E mē kajaja kot kaj mē amex kumrêx nē ri apa ho apa.

Amnepêem kormã mẽmoj piitã hkêt ri na pa pre Inhĩpêêxà mẽ wa mẽ akukamã tanhmã ijamaxpêr to nê mẽ amã mẽmoj mex xunhwỳr rũnh nê.

³⁵ Tã ka prem ajapôj hãmri nê ixkôt amnhĩ xunhwỳ nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukaprĩ nê inhmã mẽmoj gô pa kuku.

Nê na pa pre inhmã kôr nê ixpa ka prem ja hã ixpumu nê inhmã gô pa ho ixkô nê akupỳm ixihtỳx.

Nê aa mẽ ate ixpumunh kêt tã ka prem nhỹri ixpumu nê amnhĩ nhõrkwỹ hwỳr ixwỳ.

³⁶ Nê na pa pre ixê pynajti nê ri ixpa ka prem ja hã ixpumu nê inhmã axê gô pa haxà nê ri hã ixpa.

Nê na pa pre ixà nê inhĩkwỹ ka prem ixwỳr mra nê ixkane nê tanhmã ixto mex to pa akupỳm inhmex.

Nhũm prem ijaxà pa mẽ hagjênh xà kamã ixkrĩ ka prem ixwỳr mra nê tanhmã ixto mex to.

Ã mẽ ate ixto mex anhỹr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nê." Anê.

³⁷ —Kot paj ã mẽ ate tãm amnhĩ nhĩpêx xwỳnhjê mã ixkapêr anê. Hãmri ka mẽ tee ri inhma nê amnhĩ tã ixkukja nê inhmã: “Kwa xà mẽ pajaja na pa prem ã ato mex anê? Nà mẽ ixte ã anhĩpêx anhỹr kãm amnhĩ pumunh kêt tã na ka ã mẽ ijarênh anê. Kwa nhỹri na ka pre amã prãm nê apa pa prem apumu nê amã mẽmoj gô ka aku? Nê nhỹri na ka pre amã kôr nê apa pa prem amã gô hkwỳ ka ho ixkô?”

38 Nê nhÿri na pa prem apumu nê amnhÿ nhõrkwÿ hwÿr awÿ? Rÿ ka pre axê pynajti nê apa pa prem amã inhÿnõhkã gõ ka hagjê?

39 Nê nhÿri na ka pre axà nê anhÿkwÿ pa prem apumu nê akane? Nê nhÿri na prem ajaxà pa mē hagjênh xàja wÿr mra nê kamã tanhmã ato mex to? Nà mē pa hkêt.” Anhÿr o amnhÿ tã ixkukja.

40 Hãmri pa mē amã: “Nà mē kêp amrakati xwÿnhjaja na pre htem pa pyræk. Tã ka prem mē kamã axukapri hã tanhmã mē kutã anojarêt to ho ri apa jao te pa tanhmã ixto mex to ho apa pyræk. ãm hãmri na ka prem ã mē ho mex anhÿr o ri apa.” Anê. Kot paj ã mē ate amnhÿ to mex xwÿnhjê mã ixkapêr anê.

41 –Hãmri nê hpãnhã apke rÿm mē kot ixkõt amnhÿ xunhwÿr kêt xwÿnhjê mã tanhmã ixkapêr to nê mē kãm: “No mē kajaja kot paj ixupøk rÿm mē unhwÿr xwÿnhtajê hkÿnhã mē ato mex kêt nê. Amnepêm na pre Tirtÿmja Satanasti mē mē kot tanhmã kãm amnhÿ nhÿpêx to ho mē pa xwÿnhjê mē mē ho hpimràatã mē kaxyw kuwy rax kumrêxja nhÿpêx. Mē kot amnhÿ tomnuj tÿx mÿrapê nhÿrmã kamã amnhÿ xà htÿx kamã hamak rãhã nê pa ho pa kaxyw. Tã kot kaj mē ajaxwÿja ma mē hkõt hwÿr ajapêx. Mē apê Satanasti hkõt mē ate amnhÿ nhÿpêx o apa xwÿnh jakamã kot kaj mē uràn ma hwÿr ajapêx pa.

42 Aa mē ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mēmoj nhõr kêt nê. Nê inhmã kôr nê ixpa hã ixpumu nom inhmã gõ hkwy hkêt nê.

43 Nê nhÿri ahte ixpa hã ixpumu nom amnhÿ

nhõrkwỹ hwỳr ixwỳr kêt nẽ. Nẽ ixê pynajre nẽ ixpa hã ixpumu nom inhmã axê nhõr kêt nẽ. Nẽ ixà nẽ inhĩkwỹ hã ixpumu nom ixkane hkêt nẽ. Nẽ mẽ kot ijaxàr nhũm arĩ ixkrĩ hã ixpumu nom ixwỳr amrar nẽ tanhmã ixto mex to hkêt nẽ. ã mẽ ate inhĩpêx anhỹr o apa jakamã e mẽ ma kuwy hwỳr apa kurê kumrẽx.” Anẽ. Kot paj ã mẽ kãm ixkapêr anẽ.

⁴⁴ Hãmri nhũm mẽ tee ri inhma nẽ amnhĩ tã ixkukja nẽ inhmã: “Kwa nà ã mẽ ijarênh anhỹr kêt nẽ. Aa mẽ ixte ã anhĩpêx anhỹỹre hã. Nhỹri na pa prem tanhmã akute hã apumu? Nà aa mẽ ixte nhỹri ã ate amnhĩ nhĩpêx anhỹr ã apumunhre hã.” Anẽ.

⁴⁵ —Koja mẽ ã inhmã amnhĩ tã aprãr anhỹr kaprỳ. Kot paj mẽ kãm: “Nà na ka pre htem mẽ kêp amrakati xwỳnhjê pumu nẽ ãm mẽ omunh o ri apa nẽ mẽ kamã axukaprĩ hkêt nẽ. ã mẽ hipêx anhỹr jao te pa ã inhĩpêx anhỹr pyræk. Jakamã kwa mẽ tokyx ma kuwy hwỳr ajapêx kurê kumrẽx.” Anẽ. Kot paj ã kuwy hwỳr mẽ hanor anẽ.

⁴⁶ Hãmri nẽ hwỳr mẽ rênh pa nhũm mẽ ma hwỳr hapêx nẽ kamã amnhĩ xà htỳx kãm hamak rãhã nẽ pa ho pa nẽ aa kator kêt kumrẽx. No kêt mẽ ate tãm amnhĩ nhĩpêx o mẽ apa xwỳnhjaja kot kaj mẽ kurom ma Tĩrtũm mẽ wa inhõ krĩ hwỳr api nẽ kamã amex nẽ atĩr tũm nẽ apa ho pa. Kot paj ã ahpỹnhã mẽ apiitã mẽ anhĩpêx anẽ. Anẽ.

Nhũm pre ã Jejus akupỹn wrỳk ã amnhĩ kukamã mẽ inhmã ujarênh anẽ. Hãmri nẽ mẽ inhmã ujarênh pa.

*Mê kot Jejus ã àmnênh ã amnhĩ jarênh
Makre 14.1-2; Rukre 22.1-2; Juãw 11.45-53*

¹ Tã nhũm Jejus mẽ ixte hkôt ixpa ho ixpa xwýnhjê mã ujarênh pa nê mẽ inhmã:

² —E kot puj mẽ axte pahtã apkati axkrut hãmri nhũm arĩgro pê Pas kato. Jakamã koja mẽ pi-itã amnepêm Tĩrtũm kot Ejit nhõ xwýnhjê pê mẽ pakukamã mẽ panhĩgêjtê kator mã hamaxpêr nê hã hkĩnh kaxyw Jerujarê hwỳr akuprõ. Kamã koja mẽ ixpynê nê pĩ kahpa hã inhõ nê ixpĩ. Koja mẽ tokyx ã inhĩpêx anê. Anê.

Nhũm pre ã amnhĩ kukamã mẽ inhmã amnhĩ jarênh anê.

³ Rôm nhũm Jerujarê kamã patre krãhtũmjê mẽ Ijaew pigêjtaja patre maati Kajpasja nhõrkwỹ kamã axpên wỳr akuprõ.

⁴⁻⁵ Ra mẽ kãm Jejus pĩr prãm tã mẽ kãm mẽ kot hkôt kapêr mar o pa xwýnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩĩ? Kot puj mẽ pahkĩnh kãm tanhmã ho nhũm mẽ hkĩnh xwýnhjaja hã mẽ pakamã gryk tỳx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhỹr o axpên ma.

*Mêhõ ni kot Jejus krã gregrer ã harênh
Makre 14.3-9; Rukre 7.36-50; Juãw 12.1-8*

⁶ Tã nhũm Jejus kormã krĩ pê Petãn kamã Simãw nhõrkwỹ kamã apkur o nhỹ. Simãwja na pre hkà kro xapêr tỳx o pa nhũm Jejus ra arĩgro hõ hã akupỹm hkà ho mex. Hãmri nê akupỹm õ krĩ hwỳr pôi nê õrkwỹ hwỳr tẽ nê kuri apkur o nhỹ.

7 Hāmri nhūm mēhō nija hpôx ã omu nē hamaxpēr o:

—Ma koja pēr Jejusja pa hã apkati grêre hāmri nē ty. An pa ma hwÿr tē nē mēhkuxwa xà ho hkuxwa.

Anē hāmri nē kēn jaka ho kàx kām mēhkuxwa xàja nhūm kumÿ nē ma hwÿr o tē. Hāmri nē ho hkrã gregrer nē hã hkapîr pa nē ho hkuxwa hpa. Mēhkuxwa xà hã kàxpore xohtô rax tã nhūm ã hã hkapîr par anē.

8 Hāmri pa mē ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nē axpēn mǎ:

—Tk. Kwa na hã mēhkuxwa xàta kapîr pa.

9 Kop apu ma kot o htēm nē ho wēnê nē hpānhã kàxpore ho rax kumrêx nē hamÿnh nē ho mē kēp amrakati xwÿnhjê nhîpêx par o nhÿx ja kām mex nē. Kwa mo na we ã amnhî nhîpêx anhÿr kêt nē? Anē.

10 Hāmri nhūm Jejus amnhî tã mē inhma nē mē inhmǎ:

—Kwa kot ixto mex kaxyw kēnǎ na ka mē axtem nē ixtǎ kām akir.

11 Mē kēp amrakati xwÿnhjaja koja mē arî mē akôt pa rǎhǎ nē. Ka mē amǎ mēmo arîgro hã tanhmǎ mē ho ajuta hto hprām nē tanhmǎ mē ho ajuta hto nē mē kām mēmoj gō. No pa kot paj ri mē akôt ixpa ka mē ixto mex ry ho apa hkêt nē. Kot paj tokyx mē apiitǎ mē are.

12 Ixtyk nhūm mē kot ijaxàr kukamǎ na ã ixkuxwa anē. Æm hāmri na ã inhîpêx anē.

13 Æm hāmri na pa mē amǎ kot ã inhîpêx anhÿrja jarē. Koja mē krî piitǎ hkôt axpēn mǎ ijarēnh ã

kagà kamã ijarênh o pa nê kamã nija kot ã inhîpêx anhÿr kamã harê nê kuma. Anê.

Jut Kariot kot mē kām Jejus ã àmnênh

Makre 14.10-11; Rukre 22.3-6

¹⁴ Tã nhũm Jut Kariotja. Kêp mē ixpê Jejus kôt ixpa ho ixpa xwÿnh pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tẽ nê tanhmã Jejus o mē mar to nê mē kãm:

¹⁵ —E ot pa mē amã Jejus jarênh o tẽ. Xà kot paj mē amã hã amÿnê ka mē hpãnhã inhmã amnhÿre nã? Anê.

Hãmri nhũm mē kuma nê hkĩnh nê. Hãmri nê kãm:

—Nà kot paj mē amã amnhÿre.

Anê hãmri nê kãm kàxpore ho 30 nê òr kurê kumrêx nhũm hamÿ nê hkĩnh nê kato nê ma tẽ.

¹⁶ Hãmri nê mē kãm Jejus pynênh kaxyw tânopxar o ri hkôt ri pa. Mē kot mar o ri pa xwÿnhjê hkàx ã unênh nê ma mē hwÿr o htêm kaxyw.

Jejus kot hkôt mē pa xwÿnhjê kutã apkur

Makre 14.12-21; Rukre 22.7-13; Juãw 13.21-30

¹⁷ Tã nhũm mē hkĩnh pê Pasja kato. Amnepêm kormã Ejit kãm mē pa ri na pre mē inhîgêjtaja ôwêhti hkrare hkwÿ hpa nê ho anê nê kuku. Tĩrtũm kot ja hã mē omunh nê Ejit nhõ xwÿnhjê nê mē kator kaxyw nhũm prem ã amnhĩ nhîpêx anê. Tã mē ixpê mē hkanrêhã mē htàmnhwÿjaja na pa htem arĩ amgrà mē arĩgro pê Pasja ã axpên wÿr akuprõ nê jam ijamaxpêr pê mē uràk nê ôwêhti hkrare hkwÿ pa nê pãwti kaxkrit kêt kãm kuku. Jakamã pa mē ixte Jejus kôt ixpa ho ixpa xwÿnhja

wa axkrut nê Jejus wÿr tē nê amnhĩ tã hkukja nê kãm:

—Kwa nhÿri kot paj we wa tē nê mẽ akutêp Pas ã mẽ panhõ hã apê? Anê.

¹⁸ Hãmri nhũm wa kãm:

—Nà wa māmri ma Jerujarēja wÿr wa tē. Nê krĩm axà nê mēhõ myti pumunh kurê kumrêx nê kãm: “E Jejus na wa inhmẽ pa wa awÿr tē. Na awÿr hpêr mēnh o: ‘E na pa ra inhnojarê. Jakamã nhÿri kot paj we ixkõt ri mẽ pa ho mẽ pa xwÿnhjê mẽ Pas ã axpēn kutã apku?’ Anhÿr o awÿr hpêr mẽ.” Anê. E wa ã kãm akapêr anê kê war ama nê war amã òrkwÿ nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nê māmri mẽ ixkutêp kamã mẽmoj tã apê. Anê.

¹⁹ Hãmri nhũm wa kuma nê ma Jerujarê hwÿr tē. Nê hwÿr axà hãmri nê ra kot wa kãm mẽmoj jarēnh xà hkõt mẽmoj piitã omu hãmri nê mẽ ixkutêp mẽõ hã àpēnh o wa xa.

²⁰ Tã nhũm kamàt pa mẽ Jejusja kõt ixkreta wÿr ixpõx pa nê hwÿr agjê nê ixàpkur kaxyw ixkrĩ. Mẽ ixte Jejus kõt ixpa ho ixpa xwÿnhjê pē 12jaja pa mẽ ixpiitã Jejus kutã ixàpkur o ixkrĩ.

²¹ Hãmri nhũm Jejus tanhmã mẽ inhĩõ jarēnh to nê mẽ inhmã:

—E pa mẽ amã mẽmoj jarē ka mẽ inhma. Kot kaj mẽ atõ mẽ kãm ixkurê xwÿnhjê nhĩhkram ijaxà. Anê.

²² Hãmri pa mẽ tee ri kuma nê ixkapri htÿx nê. Hãmri nê axpēn pãnhã amnhĩ tã hkukja nê kãm:

—Kwa xà pa? Nà pa hkêt. Kot paj ã anhĩpêx anhÿr kêt kumrêx Pahihti.

Anhÿr o axpēn pãnhã kãm amnhĩ tã aprã.

²³ Hāmri nhũm mẽ inhmã:

—Nà ãm hāmri na pa mẽ amã ixkapêr. Mẽ ate ixkutã guhkrax kãm anhõ pãwti ho mry kagô nhek o akrĩ xwýnhjê hõ kot kaj mẽ kãm ixtã amýnê.

²⁴ Tĩrtũm kapêr ã kagà htũm ra kot ixkukamã harênh xà hkôt koja mẽ tanhmã ixto rax nê ixpĩ. Nom kot mẽ kãm ixtã àmnênh mã xwýnhta hêxta waa nê. ã kot amnhĩ nhĩpêx anhỹrja mýrapê koja amnhĩ xà htýx kãm hamak rax kumrêx. Kop apu aa õ mãmãj nhõxà hkre rũm kator kêt ronhýx ja kãm mex nê. Anê.

²⁵ Hāmri nhũm Jut Kariot kot mẽ kãm hã àmnênh mã xwýnhta hāmri amnhĩ tã kuma nê kãm:

—Kwa xà we pa Jejus? Xà pa kot paj ã anhĩpêx anê? Kwa nà pa hkêt. Anê.

Hāmri nhũm kãm:

—Tỳ. Ka ã ate inhĩpêx anhỹr mã kênã. Anê.

*Jejus kot amnhĩ kamrô pikapĩr kukamã harênh
Makre 14.22-26; Rukre 22.14-23; mããnên Wam
Korĩt 11.23-26*

²⁶ Tã nhũm Jejus pãwti hõ py nê Tĩrtũm mã harê nê mẽ inhmã ho hkry nê ho mẽ inhĩpêx pa nê mẽ inhmã:

—E na pa ã mẽ amã pãwti ho hkry nê mẽ amã òr anê. Ja pyrã nê koja mẽ ã inhĩpêx anê nê te ixto hkry hpar pyrãk o inhĩpêx pa amnhĩ xà htýx kamã ijamak kãm ty. Nom mẽ anê kot paj ty. E mẽ mãmrĩ aku.

Anhỹr o mẽ inhmã amnhĩ jarê pa mẽ kuma nê kot mẽ inhmã ho hkry xwýnhja ku.

²⁷⁻²⁸ Hāmri nhũm hpãnhã kop py nê mã ho anê nê Tĩrtũm mã harê nê mẽ inhmã kugõ nê mẽ inhmã:

—Mê kot ixpîr xà hã arĩgroja ã koja ixkamrô axkapî. Nom koja mẽ amarĩ ixpîr nhũm amarĩ ixkamrô hpikapîr kêt nê. ãm paa. Pa kot paj mẽ anê mẽ ìhkram amnhĩ jaxà nhũm mẽ ã inhĩpêx anê nê ixpî. Koja ixkamrô axkapî nhũm Tĩrtũm omu nê ixkukwak ri mẽ ate ixkôt amnhĩ xunhwÿr xwÿnhjê nê mẽ ate amnhĩ tomnuj piitã te amnhĩ katut kôt rênh par pyræk o hipêx nê mẽ ato hkra. Ra amnepêm kot ã amnhĩ jarênh anhÿr xà hkôt. Jakamã e mẽ ixkamrô pikapîr mã ajamaxpêr pê wĩhti ho akôm o axpên nhĩpêx.

²⁹ ãm hãmri na pa ã mẽ amã amnhĩ jarênh anê. Kot paj axte wĩhti ho ixkôm kêt rãhã nhũm nhÿrmã inhõ Papaj akupÿn mẽ awÿr inhmê. Hãmri pu mẽ akupÿn ixwÿr xà hã arĩgrota ã pahkĩnh rax kumrêx. No ãm axtem tanhmã hã pahkĩnh to. Anê.

Nhũm pre ã Jejus mẽ inhmã amnhĩ jarênh anê. Pa mẽ axpên pãnhã kopta py nê wĩta kwÿ ho ixkô.

³⁰ Hãmri nê mẽ ixpiitã ho ixkôm pa nê Tĩrtũm mã mex ã gre. Hãmri nê ijapôj nê hixêt prêk pê Oriwêhti hwÿr ma mra.

Jejus kot Simãw Pêtre mã kapêr ã harênh

Makre 14.27-31; Rukre 22.31-34; Juãw 13.36-38

³¹ Tã nhũm Jejus tanhmã mẽ ixte hkôt ixpa ho ixpa xwÿnhjê jarênh to nê mẽ inhmã:

—E Tĩrtũm kapêr ã kagà htũmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamãr o pa xwÿnhja pĩ hãmri nhũm ôwêhti hpigràn pa nê ma anhrã nê ri mra. Anhÿr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamàt ja kamã koja mẽ tanhmã inhĩpêx to ka mẽ ixtã mẽ omu nê mẽ umaj

ôwêhti pyrâ nê apiitâ ixkaga hpa nê ma aprôt nê mra.

³² Nê mē kot ixpîr tâ kot paj akupÿm ixtîr. Hâmri nê ma akupÿm mē akukamã pika pê Garirej wÿr mō. Kamã kot puj mē axte axpēn pumu. Anê.

³³ Hâmri nhÿm Simãw Pêtre tee ri tanhmã mē kot amnhî nhîpêx to hkukamã amnhî jarênhja ma nê hkaprî nê kãm:

—Tk. Nà kot paj ã amnhî nhîpêx anhÿr kêt nê Pahihti. Koja pahkwÿja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

³⁴ Hâmri nhÿm Jejus kãm:

—Nà ra ixte akukamã ixàhpumunh mex. Koja apkati hkôt krãhyre hkàr kêt ri ka ra mē umaj ate ixkôt apa hkêt ã mē kãm amnhî tâ axàprãr o axkrunêpxi kãm ga. Kwa jam ajamexpêr tÿx nê. Anê.

³⁵ Hâmri nhÿm tee ri kuma nê axte kãm:

—Kwa nà. Mē kot ajaxàr nê apîr tâ kot paj arî akôt ri ixpa nhÿm mē pahto amÿrà nê tanhmã panhîpêx to. Nà kot paj aa akaga hkêt nê.

Anhÿr o kãm amnhî jarê. Pa mē ijaxwÿja ã kãm amnhî jarênh anê.

Jejus kot Tîrtÿm mã amnhî jarênh

Makre 14.32-42; Rukre 22.39-46

³⁶ Tã nhÿm Jejus mē inhmã anê pa mē ma nhÿri mē kot kãm “Gesēm” anhÿr xwÿnhja wÿr mra. Hâmri nhÿm mē inhmã:

—E mē jar ixkutêp akrî. Pa ma mÿtÿm tē nê Tîrtÿm mã amnhî jarê mãn. Anê.

³⁷ Hâmri nê mē ixkwÿjê ho axkrunêpxi nê amnhî kôt mē kuwÿ. Simãw Pêtre nê Jepetew kra pijakrut pê Xiakre nê Juãwja wa nhÿm amnhî kôt mē kuwÿ

nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tỳx nê.

³⁸ Hãmri nê mẽ kãm:

—Hêxta waa nê. Na pa tee ri amnhĩ xà htỳx kamã ijamakja kukamã ijamaxpêr nê amnhĩ kamã ixkahak tỳx o ra ixkaprĩ nê. Te ixkaprĩ kot ixpĩr o mōr pyrək. Jakamã e mẽ jar anohtỳx nê ixto Tĩrtũm wỳr o akrĩ kê tanhmã ixto pa mẽ kot tanhmã ixtoja kutã ixihỳx nê. Anê.

³⁹ Hãmri nê mẽ kurũm htēm grire nê Tĩrtũm mã amnhĩ jarēnh kaxyw htu mỳr pê tēm nê pikap nō nê kãm:

—Kwa Papaj. Hêxta waa nê. Inhmã amnhĩ xà htỳx kãm ijamak prãm kêt kumrêx. Na pa tee ri amnhĩ kukamã ijamaxpêr nê amnhĩ kamã ixkahak tỳx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mẽ kãm ixkurê xwỳnhjaja tanhmã ixto hkêt nê. Rỳ ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã hprãm xà hkôt kêt. Anê.

⁴⁰ Hãmri nê kànhmã xa nê akupỹm Simãw Pêtreja mẽ hwỳr tē nê tee ri mẽ omu nhũm mẽ ra ôt pa nê hikwỹ. Nhũm mẽ omu nê Simãw Pêtre mã kãm:

—Kwa Simãw Pêtre. E mẽ hãmri akrã hapôj. Kwa wem anohtỳx grire

⁴¹ nê ixkutêp amnhĩ to Inhō Papaj wỳr o akrĩ kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nê arĩ mẽ kutã amnhĩ to htỳx nê akuhê. Ấ mẽ amã mẽ ate amnhĩ nhĩpêx anhyr prãm nom kormã mẽ amã maa.

⁴² Anhÿr o mẽ kãm kapêr hãmri nê akupÿm tẽ nê axte Tirtũm mã amnhĩ jarẽ nê kãm:

—Kwa Papaj. Nà inhmã amnhĩ xà htÿx kãm ijamak prãm kêt. Na pa amnhĩ kukamã ijamaxpêr nê amnhĩ kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kê mẽ kãm ixkurê xwÿnhjaja tanhmã ixto hkêt nê. Nom ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã ja prãm xà hkôt kêt. Anê.

⁴³ Hãmri nê kànhmã xa nê Simãw Pêtreja mẽ hwÿr akupÿm tẽ. Nê mẽ omu nhũm kê mẽ axte gôr nê hikwÿ. Ra mẽ ôttxwa htÿx nê axte gôr nê hikwÿ. Nhũm Jesus tẽ nê tee ri mẽ omunh o xa

⁴⁴ nom axte tanhmã mẽ kãm nê hkêt nê. ãm awjanã nê akupÿm tẽ nê kê wam kot Tirtũm mã amnhĩ jarênh xà hkôt axte kãm amnhĩ jarẽ.

⁴⁵⁻⁴⁶ Hãmri nê akupÿm mẽ hwÿr tẽ nê mẽ kãm:

—Kwa xàn ka mẽ arĩ gôr nê anhĩkwÿ? E mẽ tokyx akrã hapôj. Na mẽ ra mẽ kot ixwÿr mrrar nê ixpynênh mã. Koja mẽ tokyx ixkutã mẽ kot amnhĩ xunhwÿr xwÿnhjaja mẽ kãm ixtã amÿnê. Ota ra kot ixtã mẽ kãm àmnênh xwÿnhhta tẽ. E mẽ tokyx kànhmã akrĩ pu mẽ kutã mra. Anê.

Mẽ kot Jesus pynênh ã harênh

Makre 14.43-50; Rukre 22.47-53; Juãw 18.2-11

⁴⁷ Nhũm Jesus mẽ kãm kapêr o ãm rãhã nhũm Jut Kariot pê mẽ inhĩõja hwÿr tẽ. Nê amnhĩ kôt mẽ ohtô nê hwÿr mẽ o tẽ nhũm mẽ wapohti nê kô jamÿ nê hkôt o mra. Patre krãhtũm mẽ Ijaew krãhtũmjaja kot Jesus wÿr mẽ rênh xwÿnhjaja nhũm mẽ man hkôt Jesus wÿr mra.

48 Na pre ra Jut Kariot amnhĩ kukamã mẽ kãm amnhĩ jarẽnh o:

—Kot paj ixkumrẽx hwỳr tẽ ka mẽ ixkõt hapu hã mra. Kot paj hwỳr tẽ nẽ kãm ixkapẽr nẽ kahti hkõt kumỳ. Ka mẽ hã ixpumu nẽ hwỳr mra nẽ unênh kurê kumrẽx. Ixte kahti hkõt mỳnh xwỳnhhta kot kaj mẽ unê. Anẽ.

49 Hãmri nẽ Jejus wỳr tẽ nẽ kãm:

—Pa Jejus? Xàn ka kormã anhõt kêt nẽ xa?

Anẽ nẽ kahti hkõt kumỳ.

50 Hãmri nhũm amnhĩ tã omu nẽ kãm:

—Kwa Jut. Ate tanhmã ixto kaxyw mã xwỳnh jakamã e kam nẽ mãmri tanhmã ixto. Anẽ.

Hãmri nhũm Jut kõt mẽ mrar xwỳnhjaja Jut kot kahti hkõt mỳnh ã omu nẽ hwỳr mra nẽ unênh kurê kumrẽx.

51 Hãmri nhũm mẽ inhĩõja tee ri ja hã mẽ omu nẽ õ wapo kapa nẽ patre maati mã ápênh xwỳnh kot mẽ hkõt htẽm xwỳnhhta mã ho apê. Nẽ kot ho hkrã nhĩpônẽ mã tã kuhpaw nẽ upôk rũm hamak nhĩkjê pix krãhta.

52 Hãmri nhũm Jejus omu nẽ nẽ kãm kapẽr nẽ kãm:

—Kwa akupỹm awapota hkàm haxà nẽ amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa.

53 Xà kot paj amnhĩ to Tĩrtũm wỳ nhũm ãm inhma nẽ tanhmã jajê pê ixpytãr to hkêt nẽ? Nà kot paj amnhĩ to kuwỳ nhũm ixwỳr kapẽr o mẽ wrỳk xwỳnhjê rẽnh kurê kumrẽx nhũm mẽ ohtô rax kumrẽx nẽ wrỳ nẽ mẽ kęp ixpytã.

54 Nom kot paj ã amnhĩ to hwỳr anhỹr kêt nẽ. Tĩrtũm kapẽr ã kagà htũm kot amnepẽm ixkukamã

ã mẽ kot inhĩpêx anhÿr ã mẽ harênh jakamã kwâr mẽ mãmrĩ Tĩrtũm kãm hprãm xà hkôt ã inhĩpêx anê. Anê.

⁵⁵ Hãmri nê hpãnhã mẽ kot unênh xwÿnhjê mã kapêr nê mẽ kãm:

—Kwa na pa pre apkati mẽ Tĩrtũm mã amnhĩ jarênh xà hã ixkre kamã mẽ kãm ixujarênh o ixpa. Ka prem tokyx ixpynênh kêt tã jarãhã te ixte amnhĩ tomnuj xwÿnh pyræk o inhĩpêx nê ixwÿr wapohti nê kô hã akapên nê ixwÿr tẽ.

⁵⁶ Tã nom ra Tĩrtũm kapêr ã kagà htũm kamã Tĩrtũm nhÿ hã mẽ kapêr xwÿnh kot mẽ akukamã mẽ ajarênh nê mẽ atã kagà xà hkôt na ka mẽ ri ã inhĩpêx anê. Anê.

Nhũm pre ã Jejusja amnhĩ tã mẽ kãm kapêr anê. Hãmri pa mẽ ixte hkôt ixpa ho ixpa xwÿnhjaja mẽ omu nê tee ri amnhĩ kukamã ijamaxpêr nê mẽ umaj ixprôt nê anhrà nê ma inhmrar kurê kumrêx.

*Mẽ kot patre maati hwÿr Jejus o môr ã harênh
Makre 14.53-65; Rukre 22.54-55, 22.63-71; Juãw
18.12-14, 18.19-24*

⁵⁷ Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwÿnhjaja ra patre maati Kajpas nhõrkwy hwÿr akuprõ nê Jejus kutêp hkrĩ. Hãmri nhũm mẽ kot unênh xwÿnhjaja ma mẽ hwÿr o tẽ.

⁵⁸ Hãmri nê mẽ hwÿr ho axà nê hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nê kĩtare hwÿr axà nê pôristi nhĩkhô hã nhÿ. Hãmri nê tee ri Jejus kukamã hamaxpêr o nhÿ nê hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amým tanhmã mẽ kot hipêx to hã mẽ omunh o nhỹ. Anẽ.

⁵⁹ Hãmri nhũm patre krãhtũmjê mẽ juistijaja kãm Jejus pĩr prãm tỳx nẽ. Jakamã na prem Ijaew wa ho hamẽxkrut nẽ axpẽn kôt tanhmã mẽ kãm ho hêx to nhũm mẽ kot hã wa mar nẽ ra hpĩr kaxyw mẽ pikuprõnh xwỳnhjê kapi.

⁶⁰ Jakamã nhũm prem axpẽn pãnhã mẽ hwỳr mra nẽ tanhmã ho hêx to. Nom axpẽn kôt harẽnh kêt nẽ. ãm ahpỳnhã tanhmã ri harẽnh to nom wahõ wa axkrut nẽ axpẽn kôt harẽnh kêt nẽ. Jakamã nhũm mẽ tee ri hã mẽ kuma.

Tã nhũm ja wa mẽ hwỳr tẽ nẽ axpẽn kôt harẽ nẽ mẽ kãm:

⁶¹ —Nà na pre tanhmã Tĩrtũm mã amnhĩ jarẽnh xà hã ixkre jarẽnh to nẽ harẽnh o: “Kot paj nhỹrmã inhmã ixkreja grãnh par prãm nẽ kugrà hãmri nẽ ãm ixtã apkati axkrunẽpxi pix nẽ akupým hipêx pa. Ja kaxyw ixàhpumunh tỳx.” Anhỹr o na amnhĩ jarẽ pa wa kuma.

⁶² Anhỹr o mẽ kãm ho hêx. Hãmri nhũm patre maatija wa kuma nẽ kãnhmã xa nẽ Jejus mã kapër nẽ kãm:

—Kwa xà ãm hãmri na wa ã ajarẽnh anẽ nà? Xàn ka pre ã amnhĩ jarẽnh anẽ? E mẽ inhmã tanhmã amnhĩ jarẽnh to. Anẽ.

⁶³ Nom nhũm amarĩ mẽ kãm xa nẽ mẽ kãm tanhmã nẽ hkêt nẽ. Hãmri nhũm patre maatija tee ri omu nẽ axte kãm kapër nẽ kãm:

—Kwa aprĩ hã mẽ inhmã tanhmã amnhĩ jarẽnh to. Tĩrtũm noo mã amã ixkapër jakamã kêr ka akatàt kôt mẽ inhmã amnhĩ jarẽ nẽ amnhĩ to axêx

kêt nê. Xà apê Tĩrtũm Kra? Xà ka na pre Tĩrtũm mẽ ixkaxyw axãm? Kwa akatàt kôt mẽ inhmã amnhĩ jarẽ. Anẽ.

⁶⁴ Hãmri nhũm tã hprĩ hã mẽ kãm amnhĩ jarẽ nẽ mẽ kãm:

—Tỳ. Nà ãm hãmri na ka ã ijarẽnh anẽ. Ixpê Tĩrtũm kot mẽ akaxyw ixãm xwỳnhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỳn kakrã kamã mẽ awỳr wrỳ. Hãmri nẽ Tĩrtũm xàhpumunh o àhpumunh xwỳnhta nhĩhkô hã nhỹ hãmri nẽ pam tanhmã mẽ ajarẽnh to ka mẽ amnhĩ tã ixpumu nẽ inhma. Anẽ.

⁶⁵ Hãmri nhũm patre maatija tee ri ã kot amnhĩ jarẽnh anhỹr ã kuma nẽ kamã gryk tỳx nẽ. Hãmri nẽ gryk xàj kệp patre maati hã ê kapa nẽ hkaxônh pa nẽ kumẽ nẽ hkwyjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harẽnh xwỳnh õ japêr? Tãm kot amnhĩ pê Tĩrtũm Kra hã amnhĩ jarẽnh ã amnhĩ to hêx nhũm mẽ pahte mar kênã.

⁶⁶ Jakamã e kwa tanhmã kot puj mẽ hipêx to? Anẽ.

Hãmri nhũm mẽ kãm:

—Nà ã kot amnhĩ jarẽnh anhỹr mỳrapê koja ty. Ra htyk mã tãm kênã. Anẽ.

⁶⁷ Hãmri nẽ tanhmã hipêx kati hto. Mẽ hkwyjaja hkuk kuhtô nẽ ãhkra ho htak nhũm mẽ hkwyjaja ãhkra hpo ho htak nẽ hã hpêr o axkẽ nẽ kãm:

⁶⁸ —E apê Tĩrtũm Kra hã ate amnhĩ jarẽnh jakamã mãn urak nẽ axàhpumunh tỳx. Jakamã e mẽ kot atak xwỳnhta nhĩxi jarẽ pa mẽ ama. Anẽ.

*Simãw Pêtre kot Jejus kôt pa hkêt ã amnhĩ jarênh
Makre 14.66-72; Rukre 22.56-62; Juãw 18.15-18,
18.25-27*

⁶⁹ Rôm nhũm Simãw Pêtre arĩ kĩtare kamã nhỹ. Hãmri nhũm mẽ kãm àpênh xwỳnh nitita omu nê hprĩ hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwỳnhjê hõ na ka. Anê.

⁷⁰ Hãmri nhũm tee ri amnhĩ tã kuma nê kãm mẽ uma xàj mẽ kãm amnhĩ tã aprã nê kãm:

—Tk. Kokỹ. Ixte mễhõ my ata pumunhre hã. Anê.

⁷¹ Hãmri nê mẽ umaj kànhmã xa nê tễ nê kĩtare hwỳr hakwakrem ahte mẽ hkàx ã xa. Tã nhũm hpãnhã hõja omu nê hã mẽ kãm:

—Xê ma pêr ãm hãmri na mẽ harê. Kêp Jejus kôt ri mẽ pa xwỳnhjê hõ na pêr. Anê.

⁷² Hãmri nhũm amnhĩ tã kuma nê kãm:

—Tk. Nà mẽ ri ã amnhĩ krã hkôt ri ixto axêx anhỹr kêt nê. Ixte aa mễhõta pumunh kêt kumrêx. Anê.

⁷³ Tã nhũm mẽ hkwỳjaja hwỳr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pêr ãm hãmri na mẽ ajarê. Apê Jejus kwỳ na ka. War akapêr kot axpên pyràk kênã. Anê.

⁷⁴ Hãmri nhũm tee ri mẽ kuma mẽ kãm amnhĩ tã aprãr kãm hihtỹx nê mẽ kãm:

—Kwa nà. Na pa Tĩrtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uràk ixpê Garirej nhõ xwỳnhre hã. Ixte mễhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhÿrja o ra mẽ kãm amnhĩ tã aprãr o axkrunẽpxi nhũm krãhyre hkàr kurê kumrẽx.

⁷⁵ Hãmri nhũm Simãw Pêtre kuma nẽ ra Jejus kot hkukamã krãhyre hkàr kêt ri kot hã amnhĩ aprãr o axkrunẽpxi hã harẽnh ta mã hamaxpêr kurê kumrẽx. Hãmri nẽ kãnhmã hakry hpar o tẽ nẽ hkaprĩ htÿx kumrẽx nẽ kĩtare pê kato nẽ tẽ nẽ awry hã xa nẽ mÿr rax nẽ.

27

Mẽ kot pahшти Pirat wÿr Jejus o htẽm ã mẽ harẽnh Makre 15.1; Rukre 23.1-2; Juãw 18.28-32

¹ Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wÿr pikuprõnh pa. Hãmri nẽ Jejus ã axpên mar o hkrĩ nẽ axpên mã:

—Nà kot puj mẽ hã amÿnê kê mẽ kupĩ. Kêp Tĩrtũm Kra hã kot amnhĩ jarẽnh o amnhĩ to hêx kênã. Anẽ.

² Hãmri nẽ mẽõ põiристijê mã anẽ nhũm mẽ hpa hpre hpa nẽ ma pahшти Pirat wÿr o tẽ. Pirat kêp Rõm nhõ pahшти nhÿ hã mẽ ixpê Ijaewjê ho amnhĩptar jakamã nhũm mẽ ma hwÿr o tẽ nẽ ïhkram haxà.

Jut Kariot kot amnhĩ pĩr ã harẽnh Atre 1.15-19

³ Rõm nhũm Jut Kariot tee ri mẽ kot Jejus pĩr kaxyw mẽ harẽnh ma nẽ hkaprĩ nẽ. Ra kot mẽ kãm hã àmnênh tã mẽ kot hpĩr kaxyw ã mẽ harẽnh ma nẽ tee ri amnhĩ kukamã hamaxpêr o hkaprĩ htÿx nẽ. Hãmri nẽ hamaxpêr o:

—Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hãmri nê ra mẽ kot kãm kàxpore ho 30 nê òrta jamỳ nê ma akupỳm patre krãhtũmjê mẽ Ijaew pigêtjê hwỳr o tẽ. Hãmri nê mẽ kot Tĩrtũm mã amnhĩ jarênh xà hã ixkreja wỳr mẽ hwỳr axà

⁴ nê nhỹri mẽ omu nê mẽ hwỳr tẽ nê mẽ kãm:

—E ota mẽ akàxporeta. Na pa ã mẽ amã Jejus ã ixàmnhênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnhênh anê. Jakamã e mĩ. Mẽ akupỳm akàxporeta jamỳ. Kot paj amnhĩm hamỳnh kêt nê. Anê.

Hãmri nhũm mẽ tee ri kuma nê kãm:

—Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

⁵⁻⁷ Hãmri nhũm tee ri mẽ kuma hãmri nê pikap kàxpore rênh pa nê ma tẽ nê kato. Hãmri nê hkaprĩ htỳx kumrêx nê hamaxpêr o:

—Kwa tanhmã kot pa we amnhĩ to? Nà kot paj amnhĩ pĩ. Anê.

Hãmri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tẽ hãmri nê amnhĩ mut mã ê nê ho amnhĩ pĩ. Hãmri nhũm patre krãhtũmjaja harênh ma nê tee ri kot kàxpore rênhta kawrà nê hã axpên kukja nê axpên mã:

—Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêtjê kurê jakamã na

htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hãmri nhũm ja mẽ kãm:

—E na pa ra ijamaxpêr. Pu mẽ ho Jut kot amnhĩ pĩr xà hã pikata japrô hãmri nê kamã jar mẽ kêp mẽ pahkwỳ hkêt htyk xwỳnhjê jagjênh o papa. Anê.

Hãmri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwỳr mra nê haprô.

⁸ Hãmri nê hã hixi mẽ nhũm kêp “mẽ hkamrô pikapĩr xà kamã pika”. Mẽ kot Jejus pĩr xà hã kàxpore ho haprôr jakamã nhũm prem ã hã hixi mênh anê. Nhũm htem arĩ axpên mã ã hixi jarênh anhỹr o pa.

⁹⁻¹⁰ Nhũm pre ra amnepêem Tĩrtũm nhỹ hã kapêr o pa xwỳnh finat Jeremĩsti mẽ hkukamã hprĩ hã ja jarê nê hã kagà. Nê hã kagà o:

Koja Ijaew nhõ patrejaja mēhõ kot mẽ kãm mēhõ my hã àmnênh pãnhã kãm kàxpore ho 30 nê òr xwỳnhja jamý. Hãmri nê ma o tẽ nê nhỹri mẽ kot amnhĩm pika kakwỳnh nê ho poti nhĩpêx o pa xà hã pika hkwy japrô. Ra Tĩrtũm kot inhmã mẽ harênh xà hkôt koja mẽ ã amnhĩ nhĩpêx anê. Anê.

ã finat Jeremĩsti kot Tĩrtũm nhỹ hã mẽ hkukamã mẽ harênh nê hã kagà anhỹr xaja kôt nhũm prem ã amnhĩ nhĩpêx anê.

Pahihti Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-38

¹¹ Rôm nhũm mẽ pahihti Pirat wỳr Jejus o tẽ nê hwỳr ho axà nê kutã ãm nhũm xa nhũm Piratja omu nê kãm:

—E. Kwa inhmã amnhĩ jarẽ. Xà apê Ijaew nhõ pahi na ka nà? Xà ka na htem amnhĩ wỳr ajamãr o pa? Anẽ.

Hãmri nhũm kãm:

—Tỳ. Nà ãm hãmri na ka ijarẽ. Anẽ.

¹² Hãmri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapër punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nẽ.

¹³ Jakamã nhũm pahihti Pirat tee ri ja hã omu nẽ kãm:

—Kwa xà na ka ã mẽ kot ato kapër anhỹrja mar kêt nẽ nà?

¹⁴ Anhỹr tã nom nhũm Jejus akryk xa nẽ axte tanhmã kãm nẽ hkêt nẽ. Hãmri nhũm Pirat tee ri kot ã amnhĩ nhĩpêx anhỹr ã omu nẽ hamaxpër o:

—Kokỹỹ. Mẽ kot ho kapër punuj tã nhũm ãm mẽ kuma nẽ te kãm mẽ uma hkêt pyrã nẽ tanhmã inhmã amnhĩ tã àprãr to hkêt nẽ. Anẽ.

Pirat kot Jejus pĩr kaxyw hã àmnênh ã harênh

Makre 15.6-15; Rukre 23.13-26; Juãw 18.39-

19.16

¹⁵⁻²¹ Tã nhũm Pirat kormã mẽ kot axpên mar xà hã ixkre kamã ỳr rãhã nhũm hprõja hwỳr hpër mẽ nẽ kãm:

—Xê tanhmã mẽ kãm Jejusja ã axàmnênh to hkêt nẽ. Na pa kamàt ja kamã hkôt amỹti nẽ tee ri hkukamã ijamaxpër. Kot amnhĩ to mex xwỳnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nẽ. Kwarĩ. Anẽ.

Hãmri nhũm Piratja kuma nẽ hamaxpër o:

—Nà ixte Ijaew krãhtũmjê pumunh tũm. Ijaew kwỳjaja kãm Jejus kĩnh nhũm mẽ hkrãhtũmjaja kot

mê hã Jejus kamã gryk nê. Jakamã ixte tanhmã mê kãm hã ixàmnh to kaxyw na mê ã ixwÿr o htêm anê. Anê.

Na htem Pas nhõ arĩgrota hapôx mê nhũm pre htem Ijaew o amnhĩptâr xwÿnhja mê kãm mê hagjênh xà kamã hkrĩ xwÿnhjê ho hpÿnh nê mê hapôj. Mê kãm hprãm xà hkôt nhũm mê kãm mê hapôj nhũm mê akupÿm kapôt ã hamakêtkati nê amnhĩx pa. Jakamã nhũm ra mê hagjênh xà kamã mēhō my pē Parapasja hkrĩ. Na pre tanhmã amnhĩ tomnuj to nhũm mê mÿrapê unê nê haxà. Jakamã nhũm Ijaewjaja mê ho amnhĩptâr xwÿnh Pirat wÿr akuprõ nê kuhê nhũm mê kãm:

—E kot paj jarãhã mê amã mê hagjênh xà kamã mê hkrĩ xwÿnhjê hõ mã inhũre kê àmnhĩx kato nê ri pa. Nhÿ kot paj mê amã kãm inhũre? Xà Parapas nà? Xà mê akwÿ kot amnhĩm ho mê anhõ pahшти Jejus pē Tirtũm kot mê akaxyw ãm xwÿnhhta kot paj mê amã kãm inhũre? Nhÿ wehe? E mê inhmã nhÿ jarê. Anê.

Pirat na pre mê inhõ patre krãhtũmjê pumunh mex nê. Ijaew kãm Jejus kapêr mar prãm tÿx ã nhũm mê hã kamã gryk tÿx nê hwÿr o mrarja kôt nhũm mê omunh mex nê. Jakamã ã hã mê hkukjêr anê. Hãmri nhũm mēhpigēt mê patre krãhtũmjaja kuma hãmri nê mê pikuprõnh nê mê kuhê xwÿnhjê mã kãm:

—Kwa mê kãm anê kê mê pamã Parapas mã mãn ure nê mãmri Jejus Kris pĩ. E kwa mê tokyx kãm anê kê Parapas mã ure. Anê.

Hãmri nhũm mê mê kuma nê pahшти Pirat mã kãm:

—Nà mê inhmã Parapas mã mãn anhũre. Anê.

22 Hāmri nhũm tee ri mẽ kuma nẽ mẽ kām:
 –Kwa no mẽ ate Jejus pê Tĩrtũm kot mẽ akaxyw
 ãm xwỳnh ã harẽnh xwỳnhnta? Tanhmã kot paj
 hipêx to? Anẽ.

Hāmri nhũm mẽ kām:

–Apĩ ri. Tokyx pĩ kahpa hã anhô kê ty. Anẽ.

23 Hāmri nhũm tee ri mẽ kuma nẽ mẽ kām:

–Tk. Kwa nà. Tanhmã kot amnhĩ tomnuj tore
 hã kot pa kêt ri pĩ kahpa kunhõ nhũm ty. Anẽ.

Hāmri nhũm mẽ xatã àmra kamã kām:

–Kwa pĩ kahpa hã mãn anhô kê ty. Kwa tokyx ã
 mẽ inhmã hipêx anẽ. Anẽ.

24 Hāmri nhũm tee ri ja nê tanhmã mẽ kām kapêr
 to no nhũm mẽ mar kêt nẽ. Nhũm tee ri mẽ àmra
 mar o xa. Hāmri nẽ kām Jejus pĩr prãm kêt jakamã
 amnhĩm gô hkwỹ janhi nẽ mẽ piitã mẽ noo mã
 amnhĩ nhĩhkra kuhõnh o xa. Mẽ kot hã omunh xà
 hkôt kãm hpĩr prãm kêt ã omunh kaxyw. Hāmri nẽ
 mẽ kām:

–E na pa mẽ anoo mã ã amnhĩ nhĩhkra kuhõnh
 anẽ ka mẽ ja hã ixpumu. Nà inhmã hpĩr prãm
 kêt. Tanhmã kot amnhĩ tomnuj tore hã. Mẽ
 kaxipixjaja mẽ amã hpĩr hprãm jakamã mẽ kam
 nẽ tanhmã ho. No pa kot paj tanhmã ho hkêt nẽ.
 ãm kwarĩ ho kwarĩ. Anẽ.

25 Hāmri nhũm mẽ kuma nẽ kām:

–Tõe. Nà ãm hāmri. Kot paj mẽ pamjaja amnhĩ
 tã htykja nhô. Nẽ mẽ ixkra nẽ mẽ ixtãmnhwỳjê mẽ
 amnhĩ to ixpimràatã amnhĩ tã kunhõ. Kê Tĩrtũm
 kãm tanhmã hã mẽ ixtõ hto hprãm nẽ mamrĩ
 tanhmã hã mẽ ixtõ hto. Anẽ.

26 Hāmri nhũm mẽ kuma nẽ mẽ kãm hprãm xà
 hkôt mẽ kãm Jejus ã amỳnê nẽ mẽ kãm Parapas
 mã ure. Ra Parapas kot pahi Pirat pê õ pôristi

kutã amnhĩ xãm nê kêp hõxpĩrja mýrapê nhũm mẽ kot unênh nê haxàr tã Ijaew kãm hprãm xà hkôt akupým kãm ure. Hãmri nê õ pôristijê mã anê nhũm mẽ Jejus tak. Nê htak rax nê hãmri nhũm Pirat mẽ kãm hã amýnê nhũm mẽ kot pĩ kahpa hã nhôr o hpĩr kaxyw ma o tẽ.

*Pôristi kot Jejus ã hpêr o pikênh ã harênh
Makre 15.16-20; Juãw 19.2-3*

²⁷ Tã nhũm pôristijaja mẽ kot pĩ kahpa hã Jejus nhôr kaxyw ma o tẽ nê pahihiti Pirat nhõrkwy kamã ixkre hõ hwýr ho axã. Nhũm pôristi ohtô nê hwýr akuprô nê hã pêr o pikênh kaxyw axpên mã:
—E kwa tokyj pu mẽ kãm pahi xê jaxà ri. Kêp pahi hã kot amnhĩ jarênh kênã. Anê.

²⁸ Hãmri nê kêp ê kapa nê hpãnhã kêp pahi hã mẽ ê kamrêk mexja py nê kãm haxà.

²⁹ Nê kãm pahi hã mẽ ahkà nhĩpêx nê hkrãm haxà. Nom axtem akunĩ kamã mẽmo mrô nhĩ te kot ronh kanêre pyrãk xwýnhja nhũm mẽ hikãx nê hkrãm haxà. Nê kãm pahi hã kô gõ nhũm kupy nê o xa. Hãmri nhũm mẽ ho anhýr pa nê kutã hkõn krã ho rôrôk nê hkrĩ hpa nê hã pêr o pikênh kamã kãm:

—E ãm hãmri. Apê Ijaew nhõ pahi punuti na ka. Anê.

³⁰ Hãmri nê kãnhmã kuhê nê hkuk kuhtô nê kêp kô pytà nê xatã ho hkrãx pê htak. Nhũm prem ã pêr o pikênh kãm hipêx anê.

³¹ Hãmri nê kêp pahi hã ê kapa nê akupým kãm ê jaxà nê mẽ kot pĩ kahpa hã nhôr kaxyw ho kato nê ma o tẽ.

*Pôristi kot pĩ kahpa hã Jejus nhôr ã harênh
Makre 15.22-32; Rukre 23.27-43; Juãw 19.17-25*

³² Nhũm pôristijaja Jejus o kato nê ma kapôt mã o tẽ. Nê kãm pĩ kahpa pytĩja gõ nhũm kumỳ nê mẽ hkôt o hkwỳ. Nom ra hiro tỳx nê nhũm mẽ tee ri ja hã omu nê mēhõ kot ho ajuta kaxyw mẽ kot omunh xwỳnhjê kapi ho xa. Hãmri nê Sirên nhõ xwỳnh Simãw kà htyk pumu nê unê nê kãm kot Jejus o ajuta kaxyw hã karõ nhũm hwỳr tẽ nê kêp pĩ kahpata mỳ nê hkôt kãm kumỳ nê o tẽ.

³³ Hãmri nhũm mẽ kên nhĩxêt te kot mẽ hkrã hi pyrãk xwỳnhhta wỳr mẽ o pøj. Mẽ kapêr kãm na prem hixêtja jarênh o: “Korkot.” No mẽ pakapêr kãm Korkot jarênhja kêp “mẽ hkrã hi xà” nhũm mẽ ma hwỳr Jejus o pøj.

³⁴ Hãmri nê mẽ kot pĩ kahpa hã nhôr kaxyw nhũm à htỳx kumrêx kamã hamak pymaj kãm mēmo mẽ hkanexàja gõ. Wĩhti mẽ mēmo mry ma xà ho pihkàr nhũm mẽ kãm hkwỳ gõ. Nom nhũm hkaki nê mẽ kot amnhĩ xà htỳx kamã hamak kêt xà hã omunh kurê kumrêx nê hkaga. Nhũm mẽ tee ri ja hã omu hãmri nê kêp ê kapa nê kumẽ nê pĩ kahpa hã kuxi nê prek o ìhkra nê hpar o htỳx pa. Hãmri nê kànhmã pĩ jarĩ nê ahkre kamã ãm nê ho htỳx nhũm kỳxpê ajêt.

³⁵ Hãmri nhũm pôristi hkwỳjaja axpên mã ê hkwỳ ho pigrành kaxyw hã kênre ho jôka.

³⁶ Hãmri nê ho anhỳr pa nê pikap Jejus jamãr o hkrĩ.

³⁷ Na htem mẽ hpar kaxyw nê tanhmã mẽ kot amnhĩ tomnuj to hã kagà nê mẽ mỳri pĩ kahpa hã hanhõ. Jakamã na prem tapti hõ py nê tanhmã Jejus ã kagà hto nê hã kagà ho:

IJA EW NHÕ PAHI NA JA
HIXI PÊ JEJUS

Hāmri nê hwÿr ho api nê mÿri kunhō. ã Jejus kot amnhĩ jarēnh anhÿrja mÿrapê na prem kupĩ.

³⁸ Hāmri nhũm mẽ hpānhã wa àhkĩnh xwÿnh wa ho axkrut nê mãânēn pĩ kahpa hã wa kunhō. Nê akutã ho Jejus nhĩjê nhũm war ajêt.

³⁹ Tã nhũm pry hã mẽ mrrar xwÿnhjaja Jejus pumu nê hã hpēr o pikēnh o mra nê kãm:

⁴⁰ –Kwa ka na ka pre ate Tĩrtũm mã amnhĩ jarēnh xà hã ixkre grành par nê atã apkati axkrunēpxi nê akupÿm hipêx par ã amnhĩ jarē. Nê apê Tĩrtũm Kra hã amnhĩ jarē. Nê axàhpumunh o axàhpumunh jakamã e kwa amnhĩ kapa nê wrÿ pa mẽ ja hã apumu. Kwa tokyx. Anê.

⁴¹ Nê patre krãhtũmjê mẽ Tĩrtũm kapēr tũm o mẽ ahkre o mẽ pa xwÿnh mẽ mẽ hkrãhtũmjaja piitã hwÿr mra nê hã hpēr o axkê.

⁴² Nê axpēn mã harēnh o:

–E jahti na xep pre mẽ kamã ukaprĩ ho pa nê tanhmã mẽ ho ajuta hto ho pa. Tã nom tãm tanhmã amnhĩ to nê wrÿk kêt nê. Kwa pu mẽ arĩ pakuhê nê kot amnhĩ kaxàr nê wrÿk kãm omu. Koja wrÿ pu mẽ omu nê kēp mẽ panhō pahihiti hã hkôt pajamaxpēr kurê kumrêx. E tokyx wrÿ Jejus. Pa mẽ awrÿk kãm apumu. Nà kot kaj awrÿk rax nê.

⁴³ Na hte amnhĩ kaxyw Tĩrtũm mã hamaxpēr o pa. Nê kēp Kra hã amnhĩ jarēnh o pa. Jakamã e. Kê Tĩrtũm tãm hwÿr tē nê kēp Kra hã akupÿm mẽ pahpê utà. Anê.

⁴⁴ Hāmri nhũm wa kot akutã hijê nê jêt xwÿnhnta wa haxwÿja mẽ mar xà hkôt mã ho kapēr anê.

Jejus tyk ã harênh

Makre 15.33-41; Rukre 23.44-49; Juãw 19.28-30; mãñnên Eprêw 10.19-20

⁴⁵ Tã nhũm kaxkwa nhĩpôk ri myt ÿr mẽ nhũm te kamàt pyràk nhũm kamàt kô rax kumrêx. Jao hã awry mẽ nhũm ra akupÿm myt katêr o mỗ.

⁴⁶ Hãmri nhũm Jejus kapêr kãm hihtÿx nê àmra htÿx kãm Tĩrtũm mã kapêr nê kãm:

—Inhõ Tĩrtũm inhõ Tĩrtũm. Kwa mon ka ixkaga? Anê.

Nom kapêr kamã kãm kapêr o:

—Eri Eri. Rãmã sapatani. Anê.

⁴⁷ Hãmri nhũm mẽ kot mar xwÿnhjaja kot Eri jarênh ã kuma nê htÿx ho finat Eris mã kapêr ã hkamnhĩx.

⁴⁸ Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhÿr ã kuma nhũm mễhõ kãm hkaprĩ nê. Hãmri nê mẽmo rerek py nê o tễ nê kaxyw pĩ rytija py nê ho hkanhwÿ. Nê akupÿn o tễ nê ho wĩhti nhek nê Jejus kot hkaôr kaxyw kãm kupê.

⁴⁹ Hãmri nhũm hkwÿjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Koja hwÿr tễ nê ho wrÿk japêr. Anê.

⁵⁰ Hãmri nhũm kamàt kô mẽ nhũm Jejus ra htyk kaxyw nê axte àmra htÿx nê hãmri nê ty.

⁵¹ Tykja kôt nhũm Tĩrtũm mã amnhĩ jarênh xà hã ixkre kamã hakwakre hã kupêxêja kÿj rũm ahpar mã axkjê nê amnhĩ kahê xà mễnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mễnh pyràk

o ã amnhĩ nhĩpêx anê. Nhũm pika htertet tỳx kumrêx o kên rũnh kwỳ ohtô nê hkrakrak pa.

⁵² Hãmri nhũm mẽ htyk ã pika kamã mẽ htykjê nhõrkwỹ ho ohtô nê mẽ hã axkjê nhũm mẽ hikwỹ xwỳnhjaja akupỹm htĩr nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nê akupỹm htĩr nê hapôj nê kuhê.

⁵³ Nom kormã nhỹhỹm mrar kêt nê. Arĩ mẽ hã pika nhĩpy Jejus akupỹm htĩr ã hamãr o kuhê. Tã nhũm Jejus apkati hõ hã akupỹm htĩr ã arĩgrota ã nhũm mẽ rĩ kormã ma Jerujarê hwỳr mra nê hwỳr agjê nhũm mẽ ohtô nê akupỹm mẽ htĩr ã mẽ omu.

⁵⁴ Nhũm kormã Jejus htyk o mõrta ã nhũm pòristi krãhtũm mẽ pòristi hkwỳjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htỳx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwỳnhta amnhĩ jarê. Kêp Tĩrtũm Kra kênã. Tã pu mẽ amarĩ pahtỳx kupĩ. Anê.

⁵⁵⁻⁵⁶ Nhũm pre mẽnijaja ohtô nê amỳm Jejus tyk kãm omunh o kuhê. Marir Matarên nê Xiakre mẽ Juje wa katorxà Marir nê Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wỳr mō.

Mẽ kot Jejus jaxàr ã harênh

Makre 15.42-47; Rukre 23.50-56; Juãw 19.38-42

⁵⁷ Tã nhũm ra myt grire nhũm krĩ pê Arimatej rũm hikàxpore rax xwỳnh pê Jujeja tẽ. Nom axtem

Juje hõ na pre. Ra kot Jejus kôt amnhĩ xãm jakamã kãm ho wryk nẽ haxàr prãm nẽ.

⁵⁸ Hãmri nẽ ma pahi Pirat wÿr tẽ nẽ ĩ hã kuwÿ nẽ kãm:

—E ot pa awÿr tẽ. Kwa inhmã htyk xwÿnh̄ta gõ pa ma o tẽ nẽ haxà nà? Anẽ.

Hãmri nhũm kuma nẽ kãm harẽ nhũm ma o tẽ nẽ haxà.

⁵⁹ Kaxyw kupẽxê mex õ py nẽ ho hkupu pa

⁶⁰ nẽ ma o tẽ nẽ õ kën kre kamã haxà. Na pre htyk kukamã kën kre kakwÿ nhũm mẽ kot kormã kamã mẽhõ jaxàr kêt tã kamã na pre Jejus jaxà. Hãmri nẽ hã kën rax õ xãm nẽ ho hitom nẽ ma akupÿm tẽ.

⁶¹ Nhũm Marir Matarën mẽ Marir õja wa kën kreta kapem omunh o wa nhÿ.

Pôristi kot kën kre jamâr o kuhê ã harënh

⁶² Tã nhũm apkati nhũm mẽ inhõ arĩgromnu pẽ sap kato. Hãmri nhũm Parijew nhõ xwÿnh̄jê mẽ patre krãhtũmjaja ma pahi Pirat wÿr mra nẽ kãm:

⁶³ —Kwa pahiti. Nà amnhĩ to hêx o pa xwÿnh̄ta na pre kormã htĩr nẽ pa ri tanhmã amnhĩ jarënh to ho pa. Nẽ nhÿrmã ty nẽ htyk ã apkati axkrunẽpxi pix nẽ akupÿm htĩr ã amnhĩ jarẽ.

⁶⁴ Jakamã kwa hwÿr anhõ pôristi hkwÿ rẽ kê mẽ ma hwÿr mra nẽ hamâr mex o apkati axkrunẽpxi. Kot ka anhÿr kêt nhũm hkôt mẽ pa ho mẽ pa xwÿnh̄jaja ma hwÿr mra nẽ ho ahkĩ nẽ ma o mra nẽ nhÿri haxà nẽ mẽ piitã mẽ kãm ra akupÿm htĩr ã harënh o hêx o pa. Te tãm kot amnhĩ kukamã amnhĩ jarënh pyrãk. Nom mẽ kot axte ã harënh anhÿrja koja omnuj tÿx o tãm kot ã amnhĩ jarënh anhÿrja jakre. Anẽ.

65 Hâmri nhũm mẽ kuma nẽ mẽ kãm:

—Tõe. Nà koja mẽ ho anẽ. E mẽ ma hwỳr amnhĩ kôt pôristi hkwỹ ho mra kê mẽ hakwakre kahê xà jamâr mex o kuhê. Anẽ.

66 Hâmri nhũm mẽ kuma nẽ ma hwỳr mra nẽ hakwakre hã kên raxta o htỳx pa. Nẽ mēhō kot omunh nẽ kahê mēnh pymaj menh ê ho hkukō. Hâmri nẽ ho anhỹr pa nẽ pôristi mã kãm:

—E Kêr ka mẽ jar kuri hamâr mex o akuhê. Kê mēhō tẽ nẽ tanhmã ho hkêt nẽ. Anẽ.

28

Jejus akupỹm htĩr ã harēnh

Makre 16.1-8; Rukre 24.1-12; Juãw 20.1-10

1 Tã nhũm apkati nhũm tômĩk. Hâmri nhũm Marir Matarēn mẽ Marir òja kwỳhtã kànhmã nhỹ nẽ ma akupỹm kên kreta wỳr wa tẽ.

2 Puh nhũm pika htertet tỳx nẽ nhũm Tĩrtũm kapêr o mẽ wrỳk xwỳnhja kên kre wỳr wrỳ nẽ nhãm hakwakre nê kên raxta mẽ nẽ hã nhỹ.

3 Hirã htỳx kãm nhỹ. Te na jaxênh pyræk. Nẽ ê haka htỳx kumrêx.

4 Nhũm pôristijaja tee ri omu nẽ kãm ma htỳx nẽ htertet nẽ umaj pikap rôrøk pa nẽ te htyk pyrã nẽ hikwỹ.

5 Hâmri nhũm wa nita kên kre hwỳr pøj nẽ tee ri Tĩrtũm kapêr o mẽ wrỳk xwỳnhta pumu. Nhũm wa kãm:

—Kwa wa amã ma hkêt nẽ. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwỳnhta.

⁶ Nom jar amrakati. Na ra akupÿm htîr nê kato nê ma tẽ. E wa kam nê amnê axà nê nôr xà kaprÿ pumu. Anê.

Hâmri nhũm wa kuma nê tee ri kên kre kamã Jejus japêr nhũm kamã amrakati.

⁷ Hâmri nhũm Tirtũm kapêr o wrÿk xwÿnh wa kãm:

—E wa tokyx ma akupÿm tẽ nê hkôt mẽ pa ho mẽ pa xwÿnhjê mã harê. Koja ma Jejus mẽ akukamã akupÿm Garirej wÿr mõi. Garirej kamã kot kaj mẽ axte axpên pumu. Ra kot mẽ amã amnhĩ jarênh xà hkôt. E kwa wa tokyx ma akupÿm mẽ hwÿr tẽ. Anê.

⁸ Hâmri nhũm wa kuma nê ma akupÿm hprôt nê htêm kurê kumrêx. Kãm ma htã hkĩnh nê. Nê ma Jejus kôt mẽ pa ho mẽ pa xwÿnhjê mã ujarênh kaxyw ma mẽ hwÿr hprôt nê wa tẽ.

⁹ Pu nhũm ra Jejus tãm wa kutã tẽ nê wa hkaxpa. Hâmri nê wa haêr pê wa kãm kapêr nê wa kãm:

—Pa? Nhÿhÿm na ka wa tẽ? Anê.

Hâmri nhũm wa omu nê hkĩnh tÿx kumrêx nê hwÿr hprôt nê hpar pê hkõn krã ho tẽm nê akutã hpar ã kumÿ nê kãm mex o mex ã harê nê kãm:

—Hêxta gài nê. Ma amex kumrêx. Amex o amex. Anê.

¹⁰ Hâmri nhũm wa kãm:

—E war amã ma hkêt nê. Mamrĩ ma tẽ nê ixkôt mẽ pa ho mẽ pa xwÿnhjê mã ijarê kê mẽ ma Garirej wÿr mra. Kamã kot paj mẽ axte axpên pumu. Anê.

Pôristi kot kàxpore hprãm xaj Jejus o hêx ã harênh

¹¹ Rôm nhũm pôristi hkwÿjaja akupÿm tãm hkrã hãmri nê ma kên kreta rũm akupÿm krĩm mra. Hâmri nê patre krãhtũmjê hwÿr mra nê mẽ kãm ujarênh pa.

12 Hâmri nhũm mẽ tee ri mẽ kuma nẽ mẽhpigêtjê ho akuprõ nẽ mẽ hã axpẽn mar o hkrĩ. Hâmri nẽ axpẽn mar pa nẽ pôristi mã amnhĩrer rax nẽ mẽ kãm:

13 —E mẽ amnhĩm kàxpore jamỳ nẽ ma ri ã mẽ kãm amnhĩ jarênh anhỹr o apa. Nom kêr ka mẽ kãm amnhĩ to axêx nẽ mẽ kãm: “Na pa prem kên kre kapem ixtỳx gõr nẽ inhĩkwỹ nhũm Jejus kôt mẽ pa ho mẽ pa xwỳnhjaja mra nẽ mẽ ixpê ĩ ho ahkĩ nẽ ma o mra.” Anhỹr o mẽ kãm amnhĩ to axêx o apa. Mẽ ixte kàxpore ho mẽ amã amnhĩrerta pãnhã.

14 Koja pahшти Piratja mẽ anhõt ã mẽ ajarênh ma nẽ hã tanhmã mẽ ato kaxyw hã kot paj mẽ axy pê tanhmã kãm ixkapêr to nhũm tanhmã mẽ ato hkêt nẽ. Jakamã e. Mẽ tee ri amnhĩ kukamã ajamaxpêr kêt nẽ. Mẽ mãmrĩ ma mra nẽ ã mẽ kãm axujarênh anhỹr o ri apa. Anẽ.

15 Hâmri nhũm mẽ kuma nẽ mẽ kot amnhĩ to hêxta pãnhã kàxpore jamỳ nẽ ma mẽ mar xà hkôt mẽ piitã mẽ kãm Jejus kôt mẽ pa xwỳnhjê ho hêx o pa. Tã na htem arĩ jarãhã Ijaewjaja ã axpẽn mã mẽ harênh anhỹr rãhã ho pa.

Jejus kot hkôt mẽ pa ho mẽ pa xwỳnhjê mã mẽ àpênh ã karõ

Makre 16.14-18; Rukre 24.36-49; Juãw 20.19-23; Atre 1.6-8

16 Tã pa mẽ ixte Jejus kôt ixpa ho ixpa xwỳnh pê 11jaja hãmri akupỹm Jejus htĩr ã harênh ma hãmri nẽ ma Garirej wỹr mra. Nhỹri Jejus kot mẽ inhmã mẽmo hixêt prêk jarênhja wỹr.

17 Nẽ ra hwỳr ixpôx o mrar mẽ Jejus pumu. Tã nom nhũm mẽ ixkwỳjaja tee ri omu nẽ htỳx ho nhãm mẽhõ hã hkamnhĩx. No kêt mẽ pajaja na pa

prem ixprî hã omunh kurê kumrêx nê ixkînh tỳx nê. Nê ixkînh nê hwỳr ixprôt nê kãm:

—Pa Jejus? Hêxta waa nê. Amex o amex. Anê.

¹⁸ Hãmri nhũm mẽ inhmã:

—E na pre Tĩrtũm ã inhmã kapêr anê nê inhmã: “E kêr ka amnhĩ nhỹ hã mêmoj piitã tanhmã ho ho apa. Kaxkwa kamã nê pika kamã. Mamrĩ nhỹhỹm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anê. Na pre mẽ akaxyw ã inhmã kapêr anê.

¹⁹ —Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nê tanhmã amnhĩ nhĩpêx to hã ijarênh ma hãmri nê ixkôt amnhĩ xunhwỳ nê ixkôt ri amnhĩ nhĩpêx o pa. Nê kêr ka mẽ ja hã mẽ omu nê Tĩrtũm mẽ wa inhmã mẽ hkrã kumrã. Wa ixkarõ nhỹ hã mẽ hkrã kumrã. Mẽ kot wa inhỹ hã pix mã tanhmã amnhĩ nhĩpêx to ho pa kaxyw.

²⁰ —Nê mẽ kãm anê kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhỹr o ri mẽ hkôt apa. Kot paj mẽ anhĩhkô hã ri ixpa rãhã nhũm nhỹrmã pikaja hapêx o hapêx. Anê.

Na pre ã Jejus mẽ inhmã mẽ ixàpênh ã karõ anê.

Matêwre kot Jejus jarênh nê hã kagàja ja kôt na hapêx.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f